



29,106 / 8

A. xxx, Hof

Digitized by the Internet Archive  
in 2019 with funding from  
Wellcome Library

<https://archive.org/details/b30545377>



FRIDERICI  
HOFFMANNI  
CONSILIARII REGIS

*INTIMI, ARCHIATRI, ACADEMIÆ ET ORDINIS  
MEDICI SENIORIS*

OPUSCULA  
PATHOLOGICO-PRACTICA  
SEU  
DISSERTATIONES SELECTIONES

*Antea diversis temporibus editæ, nunc revisæ  
& Auctiores.*

*ACCEDIT EJUSDEM AUCTORIS  
MEDICUS POLITICUS.*

*Cum Indice rerum præcipuarum.*



VENETIIS, MDCCXXXIX.

APUD SEBASTIANUM COLETI.

SUPERIORUM PERMISSU, AC PRIVILEGIO.

FRIDERICI  
HOFFMANNI  
CONSILIARI REGIS

PHYSICUS AC CHIRUR-  
GUS ORDINARIUS

OPUSCULA  
PNEUMONICOPRAGICA

3 B 0

DISSECTATIONES SELECTIORES

ANATOMIAE ET CHIRURGIAE  
PNEUMONICOPRAGICAE

NOTAE PNEUMONICOPRAGICAE  
MEDICUS PNEUMONICUS  
Cum tabula aeneae



VENETIS, MDCCXXII

AD PNEUMONICOPRAGICAM  
PNEUMONICOPRAGICAM



# TYPOGRAPHUS BENEVOLO LECTORI

S. P. D.



*Incidi forte in Manuscriptum de Medico Politico, maxima cum cura ex privatissimis Illustris Hoffmanni Professoris Halensis lectionibus calamo Auditorum avide exceptum. Statim ex titulo rei novitatem, ex translatione ipsa pulcherrimum ordinem intellexi. Accedit, quod utrumque & Medicinæ & Politicæ studium tanto cum successu conjunxerit vir ille, ut sine artibus Machiavellicis hoc duce auream praxin acquirere sibi possit Medicus vel invitus. Equidem non dubito, si Auctor ipse opus hoc typis excudi curasset, quin limatius fortasse prodiisset; sed an excellentiora scientiæ monumenta in hoc opusculo adumbrata, sibi reservaverit, judicabit sapiens in fine Lector.*



# INDEX OPUSCULORUM.

## DECAS I.

- I. **D**E ætatis mutatione morborum causa & remedio. pag. 1
- II. De salium morbosorum generatione in corpore humano. 13
- III. De putredinis doctrina ejusque amplissimo in medicina usu. 27
- IV. De usu anatomes in praxi medica. 38
- V. De morbis fœtuum in utero. 57
- VI. De dentibus, eorum morbis & cura. 69
- VII. De bile medicina & veneno corporis. 87
- VIII. De salubritate februm. 104
- IX. De situ erecto in morbis periculosis valde noxio. 122
- X. De crismum natura earumque explanatione rationali. 129

## DECAS II.

- I. **D**E certa & rationali mortis in morbis præfagio. pag. 144
- II. De duodeno multorum malorum causa. 157
- III. De ignorata uteri structura multorum in medicina errorum fonte. 170
- IV. De morbis certis regionibus & populis propriis. 182
- V. De læsionibus externis, abortivis, venenis ac philtris. 195
- VI. De metallurgia morbifera. 207
- VII. De inflammatione ventriculi frequentissima. 220
- VIII. De morbis hepatis ex anatomia deducendis. 237
- IX. De pulsuum natura, genuina differentia & usu in praxi. 247
- X. De generatione mortis in morbis. 259  
Medicus Politicus. 271

## NOTI REFORMATORI Dello Studio di Padoa.

**H**Avendo veduto per la Fede di Revisione, & Approbazione del P. F. Paolo Tomaso Manuelli Inquisitore nel Libro intitolato *Friderici Hoffmanni Opuscula Pathologica, Practica, seu Dissertationes Selectiores*, non v'esser cos'alcuna contro la Santa Fede Cattolica, & parimente per Attestato del Segretario Nostro; niente contro Principi, & buoni costumi, concedemo Licenza à Sebastiano Coleti Stampatore, che possi esser stampato, osservando gl'ordini in materia di Stampe, & presentando le solite Copie alle Pubbliche Librerie di Venezia, & di Padoa.

Dat. 20. Agosto 1738.

( Gio: Francesco Morosini Cav. Ref.

( Daniel Bragadin Cav. Proc. Ref.

Agostino Gadaldini Segretario.

1738. 30. Agosto.

Registrato nel Magistrato Eccell. contro la Bestemmia.

Vettor Gradenigo Segretario.  
DIS-



# DE ÆTATIS MUTATIONE MORBORUM CAUSA ET REMEDIO.

§. I.



Ngenis quidem morborum, quibus mortalium genus subinde affligitur, est numerus; sed immensa quoque Numinis misericordia factum, ut innumera passim in universa rerum natura

ad eosdem tam arcendos, quam vinandos, prostant auxilia. Etenim non modo illa tria sic dicta naturæ regna amplum suggerunt apparatus rerum, quæ salutaris & medicinali pollent virtute, sed & ipsa elementa, quæ omnium naturalium, & maxime vivorum corporum, constituunt naturam ejus indolis ac virtutis sunt, ut accommodatam adversus multos & difficiles morbos præbeant medicinam, testantibus id clare satis puris aquarum fontibus, maximeque iis, qui acidularum & thermarum nomine insigniuntur. Catholicum illud, aereo æthereum, quod vitam fovet ac sustinet, fluidum, tam salubrem in sinu fovet facultatem, ut multæ longæ ac rebelles sint passiones, quæ non nisi aeris mutatione sanescunt. In ipsis alimentis, quibus omnes ad vitam & sanitatem servandam perpetuo indigemus, vis recondita est medicinalis, & jam pridem vel experientiæ suffragio in comperto habemus, deprompta ex diætetico fonte remedia in vincenda morborum difficilium pertinacia, iis quæ e pharmacis petuntur, Galenicis æque ac chymicis, longe esse anteferenda, uti quidem vinum, lac, serum

*Opusc. Patb.*

lactis, jura & gelatinæ carniū, decocta avenacea, hordei, axungia animantium, olea expressa planum faciunt testatumque.

2. Neque vero tantum in iis, quæ extra corpus posita sunt, salubris & medicamentosa latet virtus, verum, ita etiam a summo opifice sapientissima illa corporis humani structura est fabrefacta, ut ad morbos expugnandos non mediocre symbolum conferat, eaque propter ipsi quandoque morbi medicina sint & adversus morbos præsidium. Luculento exemplo sint febres, in quibus motuum intensiorum beneficio sæpenumero non modo causæ, quæ febrem excitando perniciem intenterunt, amoveantur, sed & multæ graves & chronicæ passiones, uti epilepticæ, convulsivæ & spasmodicæ, abiguntur, & corpus firmiorem sanitatem, majus robur majoresque vires acquirit. Quod quidem sicuti in febribus, nec non sanguinis excretionibus, a varia conditione varioque motu fluidorum evenit; ita non minus in structura, conformatione atque textura solidorum singulare latitat artificium, quod in medicatione morborum præcipuum sæpe curationis punctum absolvit. Emicat id, ut mittamus alia, sub mutatione ætatum, cuius magna vis est tam ad inducendam morborum dispositionem, quam eorundem sanationem; utrumque non aliam ob causam quam ob mutatam sub ætatis periodorum temporis decursu solidorum fabricam atque texturam.

Quod penitus nosse, quum in arte nostra magni sit momenti, dignum curatori indagine mihi visum fuit

A

hocce



hocce argumentum fufius evolendum.

3. In perquirenda igitur falutari mutatz ætatis adverfus morbos efficacia, haud abs re erit præmittere nonnulla, de proxima hujus effectus caufa, folidis nempe corporis noſtri partibus earumque natura, actione atque ad vitam & fanitatem tuendam, ad morbos ingignendos eodemque rursus abigendos potentia. Veteres, ac inter hos maxime GALENUS, cum iis, qui ex poſteris preſſius ipſius veſtigiis inſiſterunt, neglectis plane ſolidorum vitiis, à fluidorum tantum labe, intemperie, vel corrupta ac depravata indole, omnium fere morborum ortum ac cauſas derivarunt. Hinc ſi monumenta eorum, qui poſt GALENUM per multa ſæcula medicinam opere & ſermone agitarunt, evolvimus, vix quicquam aliud in explicanda morborum generatione invenimus, quam ſanguinis abundantiam & inopiam, bilem flavam, vel atram, aut pituitam eminentem, vel horum quatuor humorum intemperaturam, vel eorum putredinem, vapores inſenſos & præternaturales humorum in partes fluxiones, quibus poſtea medendi methodum accommodarunt, unice in corrigendis, vel evacuandis intemperie, aut vitio laborantibus humoribus, occupatam. Reliquæ, quas in dogmatica morborum diſquiſitione tradunt, cauſæ mera grande ſonantia ſunt nomina, humidum radicale, calidum innatum, potentiæ attractrices, expultrices, retentrices, antipraxiæ viſcerum, idioſyncraſia, ſympathia, venenata qualitas, & id genus plura, quæ tamen ad intelligenter explicandam morborum geneſin, & inveſnienda congrua adverſus hos præſidia, nullius plane uſus ſunt atque momenti.

4. Jam quidem priſcis medicorum facile condonandum, quod in vitæ, fanitatis & morborum cauſis eruendis cœcutierint, & alienas proſus foverint opiniones, quum ipſos non modo exquiſitior corporis humani ſtructuræ no-

titia & genuina partium functio, ſed & vitalis ille humorum in circulum abiens motus, omnium in corpore actionum fundamentum, latuerit. Noſtris vero temporibus, poſt divinum illud circuli ſanguinis multaque alia preſtantiffima inventa, in luce palpare non amplius licet, ſed ægre merito ferendum, quod pathologica doctrina a plurimis recentiorum, ſuperiori etiam adhuc ſæculo, non melius fuerit exulta, quæ tamen unica & vera rationalis & tutæ therapiæ baſis eſt. Fuerunt enim, qui, licet non ex quatuor morboſis Galenicorum humorum, ex aliis tamen non minus gratis ſuppoſitis fluidorum vitiis, morborum duxerunt incunabula, acido ſcilicet & viſcido, pituita, bile & acido, acrimonia varia, falſedine, dyſcraſia ſalino-ſulphurea, ſcorbutica impuritate, morbiſicis fermentis, ſuccorum craſſitie, plenitudine, venenata qualitate, ſpirituum obſcuratione, fixitate, male poſthabito perverſo habitu & vitio ſolidorum.

5. Neque etiam noſtro hoc ævo ferendum eſſe exiſtimamus, quod docti quidam & celebres medici in explicandis medicis rebus, & maxime quidem morborum ætiologia, nova quædam principia, ſeu mavis nomina, quæ plus eſſentiæ ſubſtantiarum ſpiritualium & intelligentium, quam rerum corporearum quadrant, obtrudere & infelici ſidere introducere contendunt, dum vitæ & mortis, fanitatis & morborum cauſam, quin hos curandi facultatem, in ſpirituali quodam, interno vitali ſenſu, cognitione & intentione prædito ac motu ad certum finem, certo gradu dirigente principio conſtituunt, & inter materiales morborum cauſas excluſa fere omni falſa pathologia, præter humorum abundantiam, admittunt fere nihil. Ens enim ejuſmodi metaphyſicum & deprompta inde abſtruſa principia, ex ſententia noſtra nullius ſunt uſus, eo quod minus ſufficiunt clariſ & diſtinctis in pathologicis eliciendis conceptibus



ptibus, qui tamen ad omnem veritatem & demonstrativam cognitionem requiruntur, neque etiam formandis accommodis curandi indicationibus serviunt. Hinc rectius utique ejusmodi amplectenda esse principia censemus, quorum ductu ex causis proximis, sensui & rationi obviis, in pathologicis ratiocinatio & in therapeuticis medicatio adornatur, quæ potissimum suppeditat, solidorum & fluidorum, e quibus corpus coagmentatum, natura, vis atque operatio mutua intimius cognita, quam recentiores mechanismi nomine offerunt.

6. Et profecto iusta nobis suppetit causa reprehendendi eos, qui ad occulta ejusmodi principia & sterilia nomina confugiunt, quum ex perquisitiore solidorum cognitione, plurima in medica doctrina perquam facile ac commode enodari & ad rationes revocari queant. Adducemus in exemplum inevitabilem moriendi necessitatem. Hæc quidem inventu non adeo difficilis est iis, qui rerum corporearum naturam callent; illis vero, qui hac destituuntur, abstrusa mirum videtur, ut etiam ad speculationes a corporis natura plane alienas delabantur, quasi tum energia principii vitalis vacillet, deficiat, istudque a motu in corpore suscitando desistat. In corpore potius, non spirituali ente, causa interius quærenda, mutata scilicet structura solidorum, quæ regunt, movent & impellunt fluida, quæ saluberrimas secretiones atque excretiones sustentando, mortem morbosque avertunt. Jam ipsis sensibus manifestum est, carnes, tendines, ligamenta, ossa, vasa, longe flexilia, porosiora esse & molliora in junioribus, in annosioribus vero & decrepitis duriora, compactiora & solidiora, ductibus & poris coarctatis, reddi; unde vel domestico experimento constat, longe intensiori coctione annosiorum animantium carnes indigere, quam juniorum, ut

mollescant. Quum igitur ingravescente ætate fibræ non modo rigidiores & duriores evadant, sed & pori, ductus & canaliculi angustentur & coalescant, ex necessitate utique mechanica fit, ut utilissimæ nutritioni, viribus ac robori servientes in corpore functiones, secretio scilicet roscidi nutritii succi, fluidi spirituosus in cerebro & spinali medulla, liquoris chylosi in villosa intestinorum & seminalis in testium canaliculosa substantia, minuantur ac sufflaminentur. Dein, quum pariter minima illa vascula, quæ impuratum & superfluum partium emissioni maximeque cuticulari excretioni serviunt, lapsu temporis collabantur minusque patula sint, remanent recrementa ac vitales succi inquinantur. Utrisque vero junctim pensitatis, non mirandum est, morbos ipsamque mortem sensim necessario gigni atque demum induci, quemadmodum id latius, primus, quod sciam, deduxi in *med. rat. system. tom. I. Sect. I. cap. I.* nec non *dissert. de fato physico & medico.*

7. Cognita hac necessaria mortis, in mutata solidorum textura constituta causa, in proclivi est rationem reddere, quare ante diluvium adeo longævi fuerint homines, ob subtiliora scilicet, tenuiora & temperata a crassioribus & feculentis partibus immunia, quibus usi sunt, elementa quæ post universalem inundationem inter se commixta, impuriora facta atque corruptioni magis obnoxia. Facile exinde quoque causa elucescit, quare incolæ regionum montanarum, qui subtiliori ac puriori aere, aquis & alimentis purioribus fruuntur, uti in Helvetia, Bohemia, & in Italia Alpibus vicino tractu, graviores ætate fiant iis, qui in depressis locis aerem & alimenta infecta atque inquinata hauriunt. Neque minus id ad usum hinc decerpere licet, quod ad vitam sanam & longam conciliandam nihil aptius sit



aeris puri & temperati, potus limpidi ac tenuis & ciborum mollium ac facilis solutionis usu, lenibus frictionibus & inunctionibus poros simul apertos servando & perspirationem elicendo.

8. Quam singularis porro utilitatis exquisitior solidarum partium & aptitudinis earundem ad motum tam recipiendum, quam propagandum sit cognitio, ad plurima in pathologicis clare & distincte explananda, luculenter confirmant morbi sic dicti hæreditarii. In vulgus quippe notum est, parentes phthificos, hypochondriacos, calculosos, podagricos, epilepticos, melancholicos, quin haud raro hydropicos & cachecticos, gignere infantes ad eosdem morbos proclives & iidem plerumque obnoxios. Hujus causam si quis idearum seminalium, spirituum, vel principii vitalis peculiarem labem, vel dispositionem suggerere velit, is certe verba dabit sterilia, quæ ad intelligenter explicandum & invenienda remedia usus sunt plane nullius. Fundamentum potius nativorum ejusmodi morborum in vitiata staminum, fibrarum & vasorum, e quibus corpus coagmentatum est, conformatione, illarum nimia sive laxitate, sive strictura & tensione, ac horum nimia vel amplitudine, vel angustia, ab ipsis parentibus connata, reperitundum. Hæc vero qui novit atque perpendit, facile judicabit, morbos per nativitatem in liberos translatos, difficulter sanationem recipere, eo quod omnium sit difficillimum, solidæ cujusdam partis conformationem aliam facere & immutare. Habebit quoque perspectum, a parentibus morbofis prognatis exquisitam vitæ victusque servandam esse rationem, ne delitescens solidæ partis labes ex fluidorum vitio invaleseat & in morbum erumpat apertum.

9. Eadem hæc alia atque alia solidorum quoad habitudinem fibra-

rum, vasorum, pororum, nervorum ac minimorum ductuum, in unione & cohæsione, textura atque structura, vera præterea causa est, quod unus altero robustior, facilius ægrotet, facilius quoque vel difficilius sanescat, nec non ratione animi mobilior sit, vel torpidior & ad hos vel illos animi affectus magis, vel minus proclivis. Verbo: hæc solidorum structuræ diversitas est causa diversitatis operationum in functionibus animalibus, vitalibus & naturalibus. Vulgo quidem, secundum GALENUM ipsiusque sectatores, hæc temperamentis, sive sanguinis & humorum temperiei & intemperiei adscribuntur, sed absonam & a veritate alienam hanc esse opinionem, vel ex eo clare patescit, quod actiones illæ, quæ temperamentis, sanguineo, cholericis, melancholicis & phlegmaticis, vulgo tribuuntur, mutare & corrigere arduum & vix sit integrum; quod tamen, si natura & temperies fluidorum earundem causa esset, facillime, mutato aere, victu & vivendi genere, fieri posset. Contra ea ipsa experientia uberius confirmat, nihil magis tam ad mutationem ipsius sic dicti temperamenti & actionum corporis secundum ipsam naturam, quam etiam ad morbos ipsorumque productionem conferre, quam ætatem ejusdemque vicissitudines. Ratio pariter in procinctu est, quia videlicet labentibus annis, interea temporis solida, per quæ fibrosa stamina, membranas, vasa, nervos, ligamenta, tendines & ossa intelligimus, immutantur, eaque propter in motu, tam progressivo, quam secretorio & excretorio, ipsa quoque temperie fluidorum, ingens contingit mutatio.

10. Antiquissima hinc jam priscorum Philosophorum fuit sententia, certis annis & quæ ex his conficiuntur etatibus, occultam & plane peculiarem inesse virtutem immutandi homi-



hominis valetudinem & corpus ad varios morbos ipsamque mortem disponendi. Scitum potissimum hanc in rem est VERULAMII effatum: *hec intestina illa calamitas, quam nulla ars, nulla humana industria effugere, sed ne reprimere quidem potest. Etenim si cui ab ortu temperato vel ÆSCULAPIUS præsit, qui illum ab iis, quæ foris sunt, aut quæ intro sumuntur causis, salvum & incolumem sic tueatur, ut nullum inde corpus detrimentum capiat; is tamen a semetipso suaque sponte magis magisque conficietur consumeturque, donec extremum vitæ spiritum edat. Illuc dum contendit, plurimas hoc interim spatio mutationes necessario suslinet. Has qui annorum spatiis & intervallis dimensum primum discreverunt, simul ætates appellarunt, ut sit atas id vitæ curriculum, quo luculenter corporis constitutio per se suoque nutu mutatur.*

II. Maxime omnium verò septenario multum detulerunt numero, & annos numerantes septimum quemvis vocarunt climactericum, quasi singulorum lapsu homo tanquam per gradus & scalas ad perfectionem viriumque robur, & retrogrado postea cursu ad decrementum rursus vitæque interitum vergeret. Nec sine ratione. Potiores enim in corpore humano mutationes exserunt se ad ductum numeri septenarii. Scilicet ter septima hebdomade embryo in utero primum motum edit & sex septima ad partum est paratus. Infante in lucem edito, septimo mense dentes exitum moliuntur atque erumpunt; bis septimo mense stomachi ea firmitas facta, ut cibum capere & digerere possit; ter septimo mense pedes in incessu, & lingua in loquela officio fungi incipiunt; septimo anno primi decidunt dentes, mentisque & sensuum internorum operationes cum ingenii viribus sese primum exserunt; bis septimo anno pili in pube crescunt, in feminis menses exsolvuntur, in testibus quoque adolescentum spermatici liquoris secretio inchoat, & utriusque potentia generan-

*Opusc. Path.*

di accedit. Inde ad ter septimum usque annum corpus in longitudinem & caput in magnitudinem excrescit debitam, barba in mento comparet, & animæ facultates sese magis produnt. A vigesimo quinto ad trigésimum quintum annum, corpus in amplitudinem extenditur, ossa magis solidescent, membra nanciscuntur firmitatem ac robur, & corpori maxima est agilitas animoque & ingenio vigor. Tum perstat idem corporis robur ad quadragesimum usque nonum annum, quo sensim diminitur, in feminis mensium fluxus subsistit, in viris potentia generandi deficit, & ingravescente magis ætate, sub senectute successive vires decrescunt animi, ingenii & corporis, actiones vitales, naturales & animales labascunt, donec demum penitus concidant.

12. Propius vero nostrum institutum & scopum maxime medico-practicum tangit, quod ab hac solidarum corporis nostri partium, quoad texturam, structuram & conformationem, in figura & magnitudine per ætates, sive certas annorum periodos, facta immutatione, peculiaris in certis partibus cuivis ætati propria ad producendos morbos emergat dispositio. In quo quidem illud inprimis observatione dignum videtur, quod hinc oriundi ætatum morbi a capite & superioribus incipiant, & postea per gradus quasi ad inferiora descendant, & collum, fauces, pectus, præcordia, hypochondria, imum ventrem, pelvim & partes extremas occupent. Ratio hujus observati in proclivi & hæc esse videtur. Scilicet, quemadmodum sapiens natura, in efformando embryonis utero inclusi corpusculo sic versatur, ut primum caput cum cerebro ipsaque spinali medulla, postea thoracem, abdomen & partes externas ad perfectionem suam perducatur, ita etiam eadem hæc extra uterum occupata primo omnium est, ut caput ad justam suam magnitudinem & perfectionem provehat, postea pectoris elaborationem intendat & œconomiam motuum vitalium recte instruat, ac demum ad reliquas inferiores partes rite



perficiendas & ad justam magnitudinem ac proportionem traducendas omnem laborem atque operam conferat. Hæc autem quum nonnisi expandendo & dilatando debito modo canales & eorum diametros, tonum & robur fibris motricibus conciliando & majori sanguinis ac humorum copia affluente perfici queat; neutiquam mirandum est, si hæc omnia non secundum regulam, ordinem & proportionem rite fiunt, sed humores plus justo ad partes ampliandas, & nutriendas adducuntur, iique minus temperati & mobiles sunt, vel forsan a debitis suis viis deflectunt & alias sedes aliaque loca occupant, varias ex humorum stagnationibus, stasibus, morbosas affectiones in partibus pullulare ac infestare.

13. Is autem est naturæ processus & hic morborum ætatum proventus. In infantibus caput quam maxime tam quoad externas, quam internas partes patitur. Tunc enim variæ in facie exulcerationes, achores, favi, in ore aphthæ, in oculis & auribus humiditates, in narium cavo coryzæ observantur, nullaque ætas tam facilis & prompta est ad concipiendam levi ex causa, uti ex solo lactentis matris terrore, epilepsiam, quam hæc ipsa infantilis. Circa mensem septimum, quum ordinario naturæ cursu dentes prorumpere incipiant, a dolore & vellicatione nervosarum in gingivis fibrarum, totum systema nervorum per consensum irritatur & valide afficitur, unde in difficulter dentientibus pavores, vigilæ, febres, convulsiones epilepticæ, oppressiones pectoris, ventris tormina, cum nimio alvi profluvio, vel interdum ejus constrictione, observantur. Qualia generis nervosi præternaturalia pathemata, ob summam in infantili corpore imbecillitatem, a lacte copioso, stagnante, corrupto, corrosivo reddito, quam facile proveniunt & plures etiam infantes interficiunt. In pueris dein usque ad decimum quartum annum, tinea in capite, tumores glandularum in collo, in nucha paroti-

des tumefactæ, acres oculorum defluxiones, aurium & narium fluxus interdum purulenti, tussis ferinæ, convulsivæ, inflammationes anginosæ, in quibusdam schrophulæ observantur. Ob ligamenta quoque adhuc valde laxa & flexilia luxationes, in humeris præsertim & vertebriis dorsi, & gibbositates facile, accedente causa quadam externa violenta, proveniunt. Et quum in hac ætate valde dulces & temperati sint humores, quibus lumbrici in intestinorum tenuium anfractibus prompte nutriuntur & succrescunt, ab horum morfu importuno sæpe epilepticæ & convulsivæ artuum agitationes infestare solent.

14. Circa decimum quartum postea annum, sanguis paullo tenuior, calidior & copiosior redditus, efficit, ut pili prorumpant in pube, ut testium quoque fabrica elaboretur inque eorum minutissimis canalibus succus lymphaticus spirituosus seminalis secernatur, in feminis vero uteri vasculosa compages ampliatur, canales tortuosi explicentur, sanguinem superabundantem recipiant eundemque nimis accumulatum demum eructent. Circa hanc ætatem, quæ puertatis nomine venit, major vigor majusque robur accedit partibus solidis, vox etiam sonora redditur, sique sanguis non liberum per uteri oscula invenit exitum, sed refluit & regurgitat ad ventriculi & intestinorum tunicas nerveas, nec non vasculosa abdominis viscera, gravia & varia sæpe femellas premunt incommoda, ut sunt vagi æstus, inappetentia, virium dejectio, corporis lassitudo, tabescentia & id genus plura. A decimo quarto ætatis anno usque ad vigesimum primum, quæ adolescentiæ periodus, in subjectis habitu corporis spongiosiori, pluribusque & exilibus vasibus præditis, eaque propter ad plenitudinem succorum ipsa natura proclivibus, sanguis paullo majori impetu fertur ad caput, unde in adolescentibus dolores & exæstuationes capitis, aurium tinnitus, narium siccitates & hæmorrhagiæ, dolores quoque oculorum, immo inter-



interdum phrenitides, præsertim ab incitatori ad studia impetu, vel gravi animi affectu, suboriri & hanc ætatem graviter infestare solent.

15. In juventute, quæ a vigesimo quinto usque ad trigessimum quintum annum porrigitur, in thoracis cavitate plures sedem obtinent passiones. Tum quippe præter tussis siccas & defluxiones acres salvas ad epiglottidem & arteriam asperam, hæmoptyses, pleuritides veræ & spuræ, vomicæ, tubercula pulmonum, abscessus, phthises, hæcticæ, tabes, asthmata convulsiva, cordis vehementes & crebræ palpitaciones sese produnt. In juventute enim cordis atque arteriarum major potentia motrix elastica systaltica succrescit, pulsus fit validior, ipseque sanguis magis attenuatur & intestino valde fervet motu, inde uberior sanguinis calidi portio, quam promte & facile in arterias laterales, quæ ordinario lympham vehunt, urgetur, & vel statim ibi concipiendo firmam, vel nimium distendendo & apertendo valcula, jam nominatos morbos excludit. Observatum quoque per frequentem dissectionem corporum morbis defunctorum est, in juvenili ætate concretiones polyposas membranaceas in vasorum cordi vicinorum cavitate, frequentissime generari & ad pectoris morbos, præsertim funestos & incurabiles, multum conferre, atque cordis contumaci palpitatione, pulsu intermittente, inæquali, ingenti spirandi angustia, anxio & pressorio in præcordiis dolore, ceu certis indiciis, sese prodere. Quod autem in juvenili & virili ætate familiares fiant polypi, quam in aliis, hæc videtur ratio, quod tum validiori cordis & arteriarum impulsu, crassiores & graviores sanguinis & succorum partes, longe facilius & arctius compingantur, coeant & concrecant.

16. Post annos juveniles sequuntur viriles, quos nonnulli a trigesimo quinto ad quinquagesimum usque nonum annum computant. Hac in ætatis periodo, summus vigor & valor partium solidarum, promptior quoque succorum

progressivus motus & calor intensior est, unde fit, ut accedentibus aliis causis externis sanguinem nimium commoventibus, vel etiam subito in motu sistentibus, febres inflammatoriæ, acutæ, ardentes, phreneticæ, erysipelacæ, arthriticæ, nephriticæ oboriantur. Hoc quoque temporis spatium, ob incrementem, perfecto jam corporis incremento, succorum copiam, in dispositis sanguis per hæmorrhoidalia vasa effertur, minusque rite exsolutus, varia inducit incommoda, moliminum hæmorrhoidalium nomine passim nota. Postea notabiliter, in sexu præsertim sequiori, decrescit ac minuitur vis systaltica vasorum infimi ventris, neque amplius prodit mensium fluxus, cessatque vis generandi, tum pariter in viris, ab anno scilicet quinquagesimo sexto, ad sexagesimum tertium, lentior fit sanguinis circuitus per hepar & sanguinea corporis viscera, ac non modo in feminis, sed & viris, exsurgunt illi morbi, qui a motu lentiori & segniori progressu sanguinis per viscera eorumque ab humoribus stagnantibus infarctu proficiunt. In viris maxime, qui antea hæmorrhoidali fluxui assueti, eundem non amplius experiuntur, pululat nephritis, calculus renum, icterus, colica convulsiva, cachexia, hydrops, quartana, morbus niger, hæmorrhoides cœcæ, vel etiam nimium fluentes, mictiones cruentæ, nec non apoplexia.

17. Post annum sexagesimum tertium, ad septuagesimum septimum & qui sequuntur annos, tonus solidorum longe magis frangitur, partes incipiunt siccescere, rigescere tubulique angustari. Hinc vero respiratio minuitur, remanent impuri succi, quibus sanguis & succus nutritivus inquinatur & ingens fit acrimoniæ salinæ proventus, qua serum imbuatur, ut morbi seniles & decrepitæ ætati familiares inde pullulent, quales sunt marcor cum rugis, scabies sicca, pruritus circa anum, virium languor, dysuria, stranguria, tenesmus, vesicæ calculus, impotentia virilis, podagra nodosa. Quin succrescit sensim dyscrasia scorbutica



butica adeo corruptiva, ut partes extremæ in senibus etiam leviter læsæ, facile tangantur sphacelo, vel hic etiam sponte oriatur.

18. Per omnem igitur ætatis flexum peculiare quidam morbi, ob ipsam corporis, maximeque solidarum ipsius partium, mutatam habitudinem, infestant, quos inter nostris quidem in oris frequentissimi sunt, quos hæcenus enumeravimus. Nec tamen dubitamus, quin in aliis locis & regionibus, longius a nobis remotis aliaque temperie gaudentibus, aliæ adhuc ætatum passionibus, & hæc quoad symptomata a nostris diversæ, sint solennes. Patet hoc ipsum jam ex HIPPOCRATIS monumentis, qui quidem *Sect. III. apb. 24. ad 31.* morbos cuivis ætati proprios atque consuetos longa enumeravit serie, & primus hanc veritatem ipsa experientia habuit perspectam; sed non omnes, quorum mentionem iniicit, in iis, qui zonam temperatorem incolunt observantur, nec iisdem, quibus in calidiori tractu, incedunt pathematibus. Neque etiam censendum est, in omnibus ætatibus, omnibusque individuis, semper ita exacte præsto esse hos morbos, ac diximus, sed experientia utique testatur, pro temperamentorum, solidarum partium & habitus corporis varietate, majori, vel minori fibrarum sensibilitate, diversa etiam vitæ victusque ratione, vel anticipare, vel postponere, majori aut minori vehementia invadere, nec non has, vel illas partes magis occupare ac detinere.

19. Quemadmodum vero quævis ætas ad ingignendos certos in his vel illis partibus morbos conspicuam vim habent atque potentiam; ita vicissim notatu dignum est, quod hæc, vel illa vitæ periodus, a pathematibus quibusdam, reliquis solennibus, secundum suetum naturæ ordinem, immunis sit. Sic experientiæ calculo constat, infantes & pueros capitis quidem morbis & epilepticis maxime convulsionibus frequentissime affligi; ab

insultibus tamen paralyticis, apoplecticis, nec non ab affectibus soporosis, hemiplexia, vertigine, melancholia & infania, liberos esse. Ratio hæc subesse videtur. Postremi hi capitis affectus a nimia sanguinis & humorum congestione, a spasticis partium imi ventris, vel etiam externarum constrictionibus producta, ortum trahunt, eo quod inde vasorum cerebri nimia sit distensio, sanguinis in iisdem stagnatio, infarctus, eorundemque demum ruptura cum subsequente humoris effluxu. In infantibus vero & pueris humores magis serosi, quam ipse sanguis redundat, partesque solide flaccidiores atque remissiores sunt ut sanguis non tanto impetu ad caput possit urgeri. Pari ratione in puerili & infantili ætate constituti, a pleuritide, tam vera, quam spuria, hæmoptysi, phthisi, hectica, pulmonum abscessibus, vomitis & inde resultante tæbe ac tussi purulenta, minus infestantur; eo quod omnes hæc passionibus, & abundantioribus, & tenuiorem sanguinem, cum intensiori in vasa thoracis impulsu requirunt, quæ in teneris ejusmodi non præsto sunt corporibus. Neque etiam infantia & pueritia spasmis præcordiorum & hypochondriacis, hæmorrhoidibus & inde oriundis incommodis, nephritidi, calculo renum, arthritidi, chiragræ, podagræ, ictero & scorbuto patet. Tum enim corpus magis perspirabile est, quam in virili & senili ætate, humores quoque tenuiores expeditius feruntur per viscera abdominis, quam si spissiores facti sunt sub senio.

20. Contra ea adultior ætas hoc habet singulare, ut non facile corripiatur morbis infantum, tinea scilicet, achoribus, favis, tumoribus colli & parotidum, aurium fluxu, item epilepsia & motibus artuum convulsivis. Senum etiam grandævorum pathematibus minus patent, qui ætate consistunt & vegeti sunt. Potissimum periculum sphaceli ex causa interna ipsis non imminet, eo quod in ipsis succi magis defecati promte circumaguntur & ipsarum quoque fibrarum tonus



mus vegetior est. Nec ulcera scorbutica cacoetha hos tam frequenter detinent, quam senes in quibus ob excretiones minus rite succedentes cutisque spiracula minus pervia, humores impuri & sulphurea falsa diathesi imbuti, facile ulcera sordida inducunt. Qui vero ætate magis sunt provecti, nec hæmoptysi, nec phthisi, nec febribus ardentibus, nec synochis, nec malignis, facile implicantur. Neque etiam hos torquent familiares illæ juvenibus ac viris, in nostris maxime septentrionalibus oris, stricture ac spasmii diaphragmatis, & ventriculi cum pathematibus ex vitio hypochondriorum, vel systemate nervorum præter naturam affecto. In juvenibus quippe major adest toni intensio, fibræ magis tensæ & ad dolorificas spasticas crispaturas magis proclives; in senibus vero ob rigiditatem fibrarum & fluidi nervei, quod sensum & motum dispensat, inopiam, non tantæ, nec tam promptæ corrugationes & stricture in nervorum & fibrarum systemate oboriri queunt. A vermibus quoque senes non experiuntur incommoda, ob succos valde acres, salios & impuros, qui verminosæ progeniei minus favent, sed potius adversantur. Non minus grandævi a peste aliisque contagiosis morbis raro tentantur, quia eminens apud ipsos prima in regione acor, & in venis acrimonia falsa, subtilitati & tenuitati, qua contagium motu intestino sese propagare solet, multum resistit ejusque deleteriam vim reprimat atque infringit. Tenendum tamen in genere: hæc omnia ita quidem communi maximeque solenni more accidere, extra ordinem vero, licet rarissime, fieri omnino posse, ut regula patiatur exceptionem, ac senes puerorum, vel juvenum & virorum, hi vicissim senum morbis obnoxii sint, tum maxime, quando eminens error in diætâ & vitæ ratione admissus fuerit, vel hæreditaria dispositio, aut alia quædam externa valida causa accesserit.

21. Sicut autem porro ætatis muta-

tio magna pollet potentia ad inducendam corpori morbosam dispositionem; ita eundem annorum vitæ decursum hanc iterum tollere, per ipsam constat experientiam, adeo, ut id, quod pueris, adolescentibus & juvenibus molestum fuit, ingruente senio, cesset atque expiret. Testatur id luculentis verbis HIPPOCRATES *Sect. II. apb. 20* quibus, inquit, *quum juvenes sunt, ventres humidus, his senescentibus siccantur, quibus vero juvenibus siccus sunt, his senescentibus humectantur.* Rationem hujus observati veteres & inter hos optimus ille HIPPOCRATIS interpres, MERCURIALIS, hanc afferunt: in juventute intemperies calida acerrimæ bilis procreatrix est, a quo læviora sunt intestina & alvus fluxa, in frigida vero senectute, pituita eminet, cessat alvi laxitas & durities succedit. Contra ea ubi in juvenili ætate, ob perspirationem auctiorem & firmiorem ventriculi atque intestinorum tonum, alvus sicca est, accedente senectute humectatur, ob lentiores tum factam & impeditiorem perspirationem. Angustatis enim & siccatis in senili corpore vasorum & cutis spiraculorum osculis, succi non rite eadem subeunt, sordibusque perspirandis præcluditur exitus, quo fit, ut humida hæc recrementa ad alia corporis excernicula refluant, ibidemque collecta molliant, humectent & exeant, ex quo utique causa petenda, quod senes multum tussiant, spuant, mingant, per alvum deficiant, crebriusque catarrhis & coryzis exerceantur.

22. Adversus ipsos etiam morbos mutata ætas præsidio est, eosdemque feliciter, quam ulla medicina abigit. Illustrare hanc in rem HIPPOCRATIS est testimonium *Sect. III. apb. 28.* ita habens: *plurimæ affectiones pueris judicantur partim in quadraginta diebus, partim in septem mensibus, partim in septem annis, partim ad pubertatem accedentibus. Quicunque vero pueriles morbi perdurant, nec desinunt, quum ex æphebis egressi sunt, aut femina, quum menstruales esse inceperunt, consenescere consueverunt.* Potissimum de epile-



epilepticis motibus idem gravis auctor hoc passim asserit, quod per ætatem sanentur, ab hac vero non abacti, ægrius vel plane non tollantur. Sic enim *Secl. II. apb. 45.* disertis perhibet verbis: *juvenibus comitialium liberationem faciunt mutationes, maxime ætatis, & aeris, & regionum victuumque. Secl. VI. apb. 7.* ita prodidit: quibus epilepsia ante pubertatem contingunt, mutationem accipiunt, quibus vero accidunt viginti quinque annos natis, iis plerumque commoriuntur. Et *lib. prædict. art. XVI.* hæc habet: *difficillime a morbo sacro liberantur, in quibus a puero contigit morbus, & simul ad virilem ætatem pervenit.* Eadem pariter CELSI sententia est, qui *lib. II. cap. II.* hunc in modum fatur: *si quæ genera morborum in infantem inciderunt, ac neque pubertate, neque primis coitibus, neque in femina primis mensivis finita sunt, fere longa sunt.* Hinc etiam de CALIGULA Imperatore narrat SVETONIUS, eundem ætatis beneficio, ab epilepsia fuisse liberatum.

23. Si causam rimamur huius effectus, hæc utique videtur verisimillima; desiderari scilicet ad gignendum epilepticum morbum, non tantum certam in fluidis intemperiem, sed & peculiarem pravam in solidis, præsertim cerebro eiusque vasis, membranis, & nervis dispositionem, ut non modo humor morbo excludendo aptus, ibi subsistere sedemque figere possit, sed & systema membranarum & nervosarum partium ad concipiendos spasmos & contractorios convulsivos motus habile sit atque dispositum. Jam vero humidiora cerebri & nervorum stamina ante pubertatem facile admittunt humorum stagnationem, atque etiam ob teneritudinem ad convulsivas motiones mobilia sunt magisque procliva, eaque propter, ante septimum præsertim annum, uti recte notavit. DURETUS, & epilepsia & horrendæ interdum artuum convulsivæ tractationes, agitationes & distensiones invadunt, quæ tanto gravius tantoque diutius infestant, quanto magis a causis externis, inordinato & incongruo victu,

animi motibus, aut mentis fatigationibus foventur. Superatis autem pubertatis annis, quando ab admixto sanguini & lymphaticis succis genituræ virilis, ut ita loqui liceat, spiritu, ceu fermento, omnes solidæ corporis partes, ipsaque cerebri stamina, tonum intensiorem majusque robur adipiscuntur, excretiones quoque, harumque potissima perspiratio liberius succedunt, evenit, ut vel naturæ beneficio sua sponte, vel adhibita quadam leni medicina, truculentæ ille passionis desinant atque expirent. Recte enim HIPPOCRATES *lib. de morb. sacr. art. 13.* hanc rationem reddit: *postquam, inquit, viginti anni præteriere, venæ plenæ sunt & cerebrum magis compactum est atque adstrictum, quare non defluit in venas humor; si vero defluerit, sanguinem non superat, multum ac calidum existentem.* Quod si vero facta hac per ætatem partium solidarum & fluidorum progressus mutatione, epilepsia post vigesimum quintum, & qui sequuntur, annos, persistit, vel etiam tum demum oboritur, vix perfecta speranda est medela, ipso jam fidem faciente CELSO *lib. II. cap. II.* sic disserente: *morbis comitialis post annum vigesimum quintum ortus ægre curatur, multoque ægrius is, qui post quadragesimum annum coepit, adeo ut in ea ætate aliquid naturæ spei, vix quicquam in medicina sit.*

24. Neque vero tantum in epileptico malo, verum etiam in aliis gravibus & difficilibus capitis morbis, illa quæ annorum lapsu in corporis partibus contingit mutatio, auxilio est, in phrenitide scilicet, melancholia, paralyti, infania, memoriæque debilitate, nec non convulsivis artuum motibus. Ea enim, probe monente MERCURIALI *in prælect. Patav.* perpetua quasi HIPPOCRATIS fuit consuetudo, ut quando uno exemplo plura similia docere vult, illud semper seligat, quod frequentius, difficilius & notius est. Unde quum in allegatis locis exponere sibi sumit, quantum in morborum curatione valeat ætatis mutatio, epilepsiam in exemplum produxit, neutiquam exclusis aliis morborum



convulsivorum speciebus, nervorumque & capitis affectibus, in quibus functiones animales & sensitivæ turbantur. Sic igitur concludendum: si in epilepsia, ubi omnes functiones sensuum internorum penitus perduntur, ut superato insultu nec præteritorum memoria supersit, ætatis mutatio medelam præstat, multo magis convulsiones & convulsivi motus aliique capitis, qui sensus internos non adeo lædunt, morbi eadem cedent.

25. Nobis certe plurima nota sunt exempla puerorum, qui a vermibus, adolescentulorum, qui ab immatura venere, iracundiæ affectu & studiorum intemperantia, in convulsivos artuum motus, phrenitides & insanias inciderunt, & adhibitis quantumvis spectatæ virtutis remediis, acidulis, antepilepticis, cauteriis & balneis, graviter iisdem detenti fuerunt, post annum vero decimum, nonnulli etiam post vigesimum primum, sponte, sine medicina, accedente præsertim aeris mutatione, prorsus convaluerunt. Novimus quoque, impuberibus quibusdam tantam fuisse memoriæ membrorumque imbecillitatem, ut nec distincte loqui, nec firmum tenere gradum, nec memoria quicquam comprehendere potuerint, superato tamen pubertatis & maxime vigesimo primo annis, membris externis vigorem ac firmitudinem, intellectui quoque ac memoriæ aciem accessisse, pristinaque penitus evanuisse vitia. Similiter multi animo obversantur casus de tinea capitis, falsis ad oculos defluxionibus, glandularum colli tumoribus, aurium fluxibus, pertinacibus coryzis & acribus ad epiglottidem destillationibus, quæ omnem medicorum eluserunt operam, post pubertatis autem periodum, præsertim juncta loci victusque mutatione, vel sponte cessarunt. De quibus tamen omnibus historias, quarum nobis suppetit numerus, hic inferere, brevitati studentes superfedemus.

26. Quam variis, difficilibus & contumacibus passionibus femellæ pubescentes, antequam mensium experiantur pro-

fluvium, attententur, res tam clara est, quam quæ clarissima, omnes tamen hæ affectiones, simulac tributum lunare decimo quarto anno persolvunt, expirant penitusque disparent. Paucos ante dies veritatem hujus observati nobis confirmavit generosa puella. Fuerat hæc prima ætate floridi semper adspectus & vegeta, accedente vero decimo tertio anno, tussim continuam, vomitionem, lassitudinem totius corporis, inappetentiam, lentum calorem ac gliscentem febrem, incurrebat, quæ secta in pede vena magis incresebant, donec ipsa natura, medicamentis temperate balsamicis, laxantibus & stomachicis adjuta, menstruum sanguinis stillicidium inducens, exoptatam afferret medelam, prioribus penitus evanescentibus pathematibus. Adolescentes crebrioribus nocturnis pollutionibus diu afflictos mirumque debilitatos novimus, qui nihil levaminis a probatæ alias virtutis præsidii experti, sed vigesimum primum annum ingressi, lenissimis remediis, maxima ex parte sponte, ab hoc liberati sunt incommodo. Pari ratione sunt nobis inter exempla juvenes noviter matrimonium ineuntes, qui semen non continere potuerunt, sed ad contactum feminæ illico dimiserunt, elapsis vero aliquot annis, molestum hoc & in conjugio infestum pathema discessit prorsus atque evanuit.

27. Neque etiam hoc loco prætereundum est id, quod ad illustrationem & confirmationem huius nostri argumenti apprime facit, observatum. Multi scilicet exemplis confirmatum habemus: virgines nobiles sævis & rebellibus sic dictis hystericeis, spasmodico flatulentis ac convulsivis pathematibus fuisse exagitatas, nec prius ad sanitatem potuisse perducì, quam quum viro collocatæ eundem expertæ sunt. Primis enim coitibus, quibus etiam CELSUS lib. II cap. 3. magnam solvendi morbos tribuit virtutem, plane peculiaris in solidis & fluidis partibus inducitur mutatio. Spiritus quippe, ut ita loquamur, genitura virilis, elastica & expansiva facultate pol-



te pollens, in interiora uteri admissus, occlusa vasorum oscula aperit atque expandit, ut liberior sanguinis per uterinam compagem fiat circuitus, ac in ipsis fibris motricibus novi oscillatorii & systaltici motus ac impetus obortiantur, quorum ministerio subacti & emendati morbidi succi deferunt latibula, eliminantur, & restituto simul debito sanguinis progressu, sanitas redit.

28. Hæc autem omnia, quæ hæcenus pluribus exposuimus, apertius confirmant, vix ullam inter medicas doctrinam, tantum lucis in causarum, quæ morbos gignunt, investigatione & hos arcendi ac curandi ratione, asferre, quam hanc, quæ de morbis ætatum horumque vera origine, tractat. Hæc enim luculenter docet, præcipuas & proximas morborum causas non tantum a fluidorum vitiis & perversis motibus, verum etiam, & quidem potissimum, a solidorum labe eorumque prava dispositione, textura & conformatione dependere. Hæc idem tamen tradit, in sanandis etiam morbis, præsertim longioribus & difficilioribus, medicationem non tam ad humorum correctionem & emendationem, quam potius ad solidorum vitia corrigenda & submovenda, ab artifice perito per congrua & efficacia auxilia esse dirigendam. Nam profecto vix dici potest, quantum ad morbos tam arcendos, quam curandos valeat illa, quæ in solidis corporis partibus contingit mutatio. Hac quippe non modo fibræ & membranæ nervosæ & musculosæ aliam texturam, structuram & conformationem adipiscuntur, ac vel subtiliores & teneriores, vel crassiores ac densiores, vel etiam magis tensæ, aut remissæ redduntur, ut alios motus oscillatorios & systalticos, eosque vel majores, vel minores, edant, sed & ipsa vasa & canales fluida vehentia, tum contrahuntur, angustantur & clauduntur, tum elongantur, ampliantur & aperiuntur, ut novam plane figuram atque flexuram nanciscantur, & fluidorum motum aliter etiam dispensent ac dirigant.

29. Et certe, quod tamen obiter tantum hoc loco tangimus, medicamenta, & ipsa quoque venena, testatum faciunt, adeo immutari posse ab ipsis solidorum naturalem conditionem, ut universi corporis integritas inde graviter luat. Novimus exempla, quod a rebus, quæ venenatæ sunt naturæ, ut emeticis, mercurialibus, arsenicalibus, narcoticis, capiatis, validius quoque adstringentibus, debitus solidorum, maxime ventriculi, intestinorum & nervosarum partium tonus, penitus fuerit labefactatus atque destructus, ut corpus postea nunquam sanitatem perfectam recipere potuerit, sed semper infirmum, causarium ac debile manserit. Hinc vicissim illum medentum præstantissimum & peritissimum merito censemus, qui per remedia, quæ immediate & proxime in solida agunt, eorundem vitiis auspiciato succurrere morbosque depellere novit. Absolvitur hoc tam salubri effectu tantopere celebratorum specificorum, si quæ dantur, adversus certos morbos virtute, & efficacia: referenda huc quoque illa magnarum virium pharmaca, emetica, antimonialia, sudorifera, mercurialia, anodyna, vesicantia, balnea, quæ imprudenter usurpata, maximam solidis affricare possunt labem, vitæ sanitatisque periculo stipatam, provide contra atque perite adhibita, præsentanea & efficacissima pollent salubri facultate.

30. Inter ea vero, quæ ex hac rationali morborum ætatum disquisitione in usum medico practicum elicienda, hæc adhuc merito referri debent. Scilicet tum felici & fructuoso labore curationem rebellium morborum, capitis præsertim & nervorum, medentem aggredi, quando instante hoc termino accedit, quo solidorum in melius fit ob ætatis rationem mutatio, ipsaque natura molimen secundat, uti maxime est, anno septimo, decimo quarto & vigesimo primo. Quando vero superatis his annis, infantiles, pueriles, vel juveniles morbi nihilominus eadem persistunt atrociam, nec solvuntur; certo est indicio: eosdem fore maxime diuturnos ac contumaces, quia



quin plane infanabiles. Recte enim **MERCURIALIS** prælect. Patav. pag. 271. scribit; illis temporibus natura in motu est, & sua sponte materiam morbi expellit, cui si Medicus auxilietur remediis, quibus ars utitur adversus hos morbos, & illi non superantur, tunc non amplius, natura veluti quiescente, curantur, sed in longum protrahuntur. Dein artis operibus manum admoturus discat hinc: epilepsiæ aliorumque gravium morborum curationem in ætate infantili & puerili non tam in eo positam esse, ut per pharmaca fluidorum vitia, pravam scilicet qualitatem ac intemperiem, vel eorundem nimiam molem corrigat & mutet, quam potius, ut solidis partibus aliam tecturam & texturam, per congrua medicamenta & specifica sic dicta antepileptica inducat, quæ tum certe non prorsus laude sua defraudanda, eo quod infantili ætate nondum adeo firmatus solidorum tonus emendationem facilius, quam in senescentibus admittit.

31. Demum, quum hi ætatum morbi tam rebelles sint tamque multi; quisque vel ultro perspicit, plus utique studii atque operæ impendendum esse iisdem præcindendis ac avertendis, quam quidem huc usque a medentibus factum; id quod etiam detectis & cognitis veris eorum causis perficere non adeo est arduum. Scilicet pueriles morbi & infantiles a nimia fibrarum laxitate & succorum nutrientium abundantia proveniunt; ideoque recte concluditur: ad arcendos ipsos temperata nervina, roborantia & blanda laxantia atque diuretica optima esse præsidia. Affectiones, quæ adolescentibus, juvenes, nec non viros detinent, sanguinis calidioris copię, intensiori solidorum motui nimięque humorum ad certas partes congestionem, ortum debent. Hinc ad declinandum earum insultum apprime conferunt, tam diætetica, quam pharmaceutica, quæ nimium æstum & ebullitionem sanguinis contemperant, ut sunt aquea diluentia, nitrosa, nec non tempestivæ sanguinis missiones, rejectis omnibus calidioribus, sudoriferis, exagitantibus, validio-

ribus purgantibus, vehementioribus quoque animi corporisque exagitationibus. In senio qui infestant morbi, a nimia fibrarum siccitate & rigiditate, tubulorum angustia, & secretionum atque excretionum impeditiori successu pendent. Omnia igitur intemperata, tam in victus, quam pharmacorum administratione evitanda, nimis videlicet calida, frigida, acida, falsa, tanto magis exsiccantia, adstringentia & tonum fibrarum minuentia; contra eam salubritatis laudem ferunt merito omnia temperata, ex medicamentis diaphoretica, laxantia, nutrientia, stomachica, roborantia, ex alimentis, quæ facile digeruntur, vimque emolliendi, humectandi & temperandi habent. Quod si vero jam impetunt ac præsto sunt hi morbi, non penitus omitenda sunt remedia, nec concedendum, ut morbus libere sæviat, sed occurrendum potius iis, quæ causam leniendo ejusque vim sensim infringendo, naturam adjuvant, semperque, quo ipsa vergit, ducunt.

## DISSERTATIO II.

### DE SALIUM MORBOSORUM GENERATIONE IN CORPORE HUMANO.

#### §. I.

**T** Otam rerum naturam salibus diversissimi generis esse refertissimam, & non tantum in macrocosmo, sed & in microcosmo ex diversis mixtionibus, combinationibus, nec non efficacissimo motus instrumento nova quotidie generari & produci, eaque invicem converti ac immutari, & ubivis ferme salia in producendis effectibus atque phenomenon præcipuam causam existere, nemo, nisi qui hospes in physicis, chymicis atque medicis est, in dubium vocabit. Natura enim nunquam quiescit, sed perpetuo vicissitudines & alterationes parit. Motus enim, qui per vocabulum naturæ hic exprimitur, semper statum rerum mutat, mixtiones, con-



junctiones ac separationes efficit, & diversissimas ex uno subjecto formas producit, adeoque verus ille salium genitor est dicendus. Hic enim ex insipidis & salium expertibus solo actu immateriali producit lapida & magnæ efficacæ corpora. Ita ex insipida aqua pluviali & tenera terra vegetabilia suum augmentum sumunt, & sulphure ac salibus diversi saporis ac virtutis imbuuntur, quæ non nisi terreæ & aquei principii variæ a motu alterationi, divisioni, attritioni, & translocationi debentur. Animantia nullo alio succo quam insipido, sensu medico, dulci ac gelatinoso roscido nutriuntur, nihilominus, analysi chymica teste, salium volatilium ac sulphuris maximam quantitatem largiuntur. In artificialibus, chymicis ac physicis mediante fermentativo putredinoso motu nec non ignis & caloris efficacia, aerisque libero accessu, ex corporibus mixtis, diversi generis salia volatilia, fixa, acida, spiritus sulphura non modo de novo produci, sed & invicem transmutari possunt; quod innumeris experimentis, si temporis & instituti ratio posceret, comprobare possemus.

2. Primogenium autem & simplicissimum sal quod natura primum producit, & quod fons est reliquorum omnium nostra sententia est tale sal, quod ad acidæ naturam accedit; hoc variâ mixtione cum corpusculis terreis & aqueis, & pro varietate intestinæ ætheris agitationis in varia salia convertitur, sicuti id olim deduxi & demonstravi. In aere videtur tale sal acidæ indolis manifestissime, dum in terris pinguibus calcareis concentratum & mixtione denuo cum subtilissimis hujus terræ partibus intime sociatum abit in sal sulphureum, elasticum, inflammabile, quod vocatur nitrum. Aluminosas terras jam tale privatas coctione, per annum libero aeri commissas, denuo magnam quantitatem aluminis præbere, res est certissima. Neque ignotum est, mineras sulphureas, quæ in Anglia & Hassia reperiuntur, in aere diu retentas in ele-

gans vitriolum concreescere. Præterea quoque manifestum in aere acidum ostendit experimentum, quodcumque sal alkali vel cineres clavellati sicco & sereno aeri per longum tempus objiciuntur; tum enim sal mediæ naturæ, amaricantis saporis instar tartari vitriolati in satis ingenti quantitate generatur, quod debita encheiresi commode potest separari. Hoc sale universali imbuti maxime sunt venti orientales & septentrionales, serenitatem atmosphæræ nostræ inferentes, quare hisce flantibus, præsertim tempore æstivo, longe uberior dictorum salium est proventus, ac si austrini vel occidentales dominantur. Et hinc etiam probabile est, incommoda & morbosas dispositiones, quæ corpora humana accipiunt a diu regnantibus hisce ventis non modo ab eorum rigiditate, siccitate, sed & a materiali simul influxu dependere.

3. Tandem etiam acidæ salis copiam in atmosphæra nostra ostendit aliud singulare phænomenon nempe fulguris & fulminum productio: hanc sobolem esse sulphuris, quoad naturam atque effectus vulgari ac minerali ex omni parte similis, nullum subest dubium. Odor etiam sulphureus penetrantissimus, inflammabilitas, sulphur in aere præsens esse minerali analogon abunde demonstrat. Unde autem id habeat suam originem jure meritoque venit in quæstionem. Vulgaris sententia est, hoc ipsum ex subterraneis cavernis & speluncis evaporare, & in atmosphæram mediante calore elevari. At vero non sine ratione dubitandum est, solarem calorem tantæ esse efficacæ, ut ex intimis terræ meatibus sulphureas partes a mineris separare possit, quæ non nisi ingenti ignis, uti notum est, tortura sequestrantur ac sublimantur; sed potius statuo sulphur hoc, quod fulguris materiam constituit esse valde affine minerali, & ex mixtione de novo in aere produci ac generari. Certum enim est, quod ex resinosis corporibus cum oleo vitrioli mixtis, debita encheiresi sulphur perfectum inflammabile possit obtineri, & tale



& tale quoque eduxi & sublimavi, quod in omnibus tam colore quam consistencia inflammabilitate, odore, simile est vulgari minerali, ex opio & oleo vitrioli per destillationem in retorta. Quum itaque in aere acidum illud universale ad naturam acidi sulphurei & vitriolici multum accedat, inque maxima quantitate ibi generetur, nec non exhalationes resinosa, ex arboribus resiniferis nunquam deficient, praesertim fervente tempore aestivo, hinc veritati consentaneum est, ex harum cum acido intima mixtione concretum propullulare sulphureum. Ex quo consequitur, non modo salia, sed & ipsa sulphura in macrocosmo posse progigni.

4. Quemadmodum autem in toto macrocosmo, inque animantium ac vegetabilium regno, magna copia salium productorum conspicitur: ita etiam naturam microcosmicam ad generationem salium & sulphurum valde idoneam deprehendimus atque dispositam. Notatu autem perquam dignum est, quod utut homo vescatur multis rebus acido impraegnatis, utut etiam aerem, continuo hauriat, qui salis hujus universalis non expers est, nihilominus acidi salis vestigia extra ventriculi regionem in corpore sano non reperiantur, quandoquidem omnes hominis partes tam fluidae quam solidae exsiccatae & igne tractatae, copiam salis volatilis & olei, non autem alterius generis salis momentum suppeditant. Quod autem animale regnum salium volatilium copiam ministrat abundantissimam, non aliae causae adscribendum est, quam motui intestino aereoxthereo, qui in animantium succis actuosissimus & viridissimus est, & acida spicula cum oleosis mixta, quae in alimentis sufficientissime deprehenduntur perpetuo attritu, divisione, subtilisat, & ex fixis partibus summe volatiles, ex acidis vero alkalinas reddit. Quod autem ex acido & oleo item ex rebus sale volatili expertibus, rapidissimus motus ignei & aerei fluidi, sal volatile quoddam progignere queat, clarissime docet fuligo, utpote

ligna in vase clauso cremata nil nisi acidum, flagma & oleum fundunt; quod si autem in aere aperto accendantur & vapores concentrentur in fuliginem, & si haec denuo in retorta destilletur, sal volatile vere urinosum in igenti copia inde prolicitur.

5. Tametsi autem in iis partibus, quae proprie ad humani vivi & sani corporis constitutionem spectant, nulla alia salia quam volatilia oleosa arte produci possint, nihilominus quae secernuntur & ex homine excernuntur, salibus praesertim mediis tartareis, ammoniacalibus, sulphureis foeta & impraegnata sunt. Nullus enim ferme humor est excepto muco, qui secretioni & excretioni ad extra destinatus est, qui non participet de manifesta falsedine plus minus cum sulphure mixta. In sudore, bile & urina, nemo negabit falsedinem: salivam etiam recondere tenue quoddam salinum elementum, variis evinci potest experimentis. Ex dictis igitur patet, salia ut extricata & in se considerata libera, non esse principia constitutiva corporis nostri vera, neque ad nutritionem vel ad spiritualitatem proximè idonea existere.

6. Verum enim vero, concludere quis ex dictis poterit, si salia non constituunt, & ingrediuntur corporis nostri humores, alimenta & medicamenta, quae salinae profapiae ac virtutis sunt, esse noxiosissima & potius ex corpore excludenda, quam in illud recipienda. Neutiquam tamen haec succedit argumentatio, sed potius statuimus, sine salibus nec vitam nec sanitatem factam tectamque servari posse, unde non modo in alimentis, sed & medicamentis praecipuum ea ipsa inveniunt locum. Monstrat experientia, quod ii homines, qui a pane, quod subtile continet acidum, qui a sale communi inter cibos, qui ab acidis, acris condimentis, vino etiam abstinere, & nil nisi insipida nutritiva ingerunt, agitudinibus atque variis incommodis perpetuo sint obnoxii, adeo scorbutico sic dicto morbo, alvi quoque obstructionibus,



nibus, catarrhis, rheumatismis & multis chronicis morbis, viscerumque obstructionibus plus pateant, quam illi ipsi, qui excessum in dictis hisce rebus committunt. Certe sal commune balsamum corporis nostri est, & non tam saporis causa adjicitur, quam ut defendat sanguinem & humores a putredine. Neque minus acidum blandum in pane, item condimenta aromatica sanitatem egregie conservant ac tuentur. Ex medicamentis salia tam media quam alkalia fixa & volatilia ad sanitatem recuperandam principem locum obtinere, uno ore peritiores medentum affirmabunt.

7. Etenim, utut non ea præsertim, quæ acidæ & salæ indolis sunt, ingrediantur fluidas vel solidas corporis nostri partes, nihilominus quoniam irritando ac stimulando fibras motum accelerant sanguinis & humorum, excretiones quoque per debita emunctoria promonent, viasque apertas servant, visciditates solvunt, neque minus humores ad fluxilitates disponunt, atque etiam ciborum dissolutionem adjuvant, omnino egregie sanitati ac vitæ velificantur. Et hæc est ratio cur ipsa natura quosdam humores a sanguine secretos uti v. g. salivam, lympham intestinalem & gastricam nec non bilem principio salino refertos, antequam excernantur, usui impendat, & cum alimentis denuo misceat non modo ut debite dissolvantur, verum etiam ut chylus extractus & sic conditus eo melius per vasa & emunctoria corporis postea propellatur. Salia itaque ad sanitatem custodiendam egregie conferre extra dubium est.

8. E re itaque erit jam demonstrare, qua ratione ipsa salia morborum causas constituere possint. Meretur autem hunc in finem perpendi insignis & celebris locus scite ab HIPPOCRATE in tr. de prisca medicina notatus. Est, inquit, in corpore humano & amarum & salsum & dulce & acerbum aliaque sexcenta, quæ pro copia & viribus habent facultates. Et hac quidem mixtione & mutua inter se contemperatione neque cernuntur, neque quenquam molestia afficiunt, At

ubi horum quicquam secretum fuerit & per se exstiterit, tunc & conspicuum fit, & hominem molestia afficit. Hæc & alia si præpotentia fuerint & supra naturam humanam, adeo ut ab ea superari non possint, id lædere censuerunt & tollere conati sunt prisca medici. Quo textu prudentissimus senex salia, quæ ordinario sive materiali proxima aptitudine, sive formali actu insunt humoribus, quamdiu probe inter se temperata & mixta sunt, non judicat perniciofa, sed tantum si excessu peccant, si extricata, imtemperata & præpotentia sint, ut naturæ humanæ non corresponsdeant, adeoque nec bene vinci & evacuari possint, tunc hominem lædere & morbos parere edixit. Operæ itaque pretium esse arbitramur, paulo curatius inquirere, qua ratione salia tam copia, quam qualitate ac virtute corpori nostro insensa adeoque morbosa generentur atque producantur. Jam autem si omnia externa, quæ materialiter in corpus nostrum influunt, & ad ejus constitutionem faciunt, examinemus, liquidissime deprehendimus, primo aerem salium esse minus expertem, ut in superioribus deduximus, deinde in plurimis etiam esculentis & potulentis non tam materiali dispositione, sed potius ipso actu formali salia & sulphura sapore & virtute satis conspicua insigni in copia adesse. Namque nullum ferme cibum assumimus, qui non salino vel aromatico sapore sit imprægnatus: in cerevisiis & vinis manifestum inesse acidum neminem latet. Quod si itaque intempestive inque nimia & excessiva quantitate salia diversi generis, fixa & volatilia, vel acris sulphurea ingerantur, quis dubitabit, sanguinem & humores non inde salina potentia imbui atque imprægnari?

9. Verum restat adhuc alius modus, quo salia in corpore nostro possunt accumulari, nempe per motum intestinum, quo agitativissimo sanguinis & humorum partes inter se cientur ac volvuntur. Nam natura microcosmica ex insipidis & omnis salis expertibus salia per dictum



dictum modum, fabricat ita, ut quo major ille, vehementior atque intentior sit eo major salium progenies cernatur. Animantia omnia utut ferme insipidis vescantur, nihilominus eorum excrementa salibus abundare notissimum est. Tempore æstivo cum omnia calent, in febrili quoque intensa sanguinis commotione universa, quæ secedunt excrementa per alvum, urinam sulphure & sale extraordinarie abundant, adeo, ut in hæctico morbo tota ferme sanguinis & humorum massa in excrementa viscosa salinæ ac sulphureæ indolis resolvatur. Ex hisce dictis itaque patet, salia quoad quantitatem non tantum per externam immissionem, sed & per specialem in sanguine ex insipida materia mediante motu generationem in corpore posse augeri.

10. Jam autem, quum salia, uti supra dictum est, non directe corporis nostri materiam & succos bonos ingrediuntur, utut officium quoddam, si in moderatione sint, adhuc præstare possint; quare provida natura certa construxit colatoria ac quasi cribra ex diversissimis canaliculis ratione diametri & structuræ composita, per quæ illa salinæ indolis excrementa ratione consistentiæ crassioris vel tenuioris diversa ordinario secernuntur. Inter hæcce autem emunctoria principem obtinet locum cutis, quæ ratione fibrosæ arctiorisque structuræ tantum halituosum idque tenuissimum serum salso sulphureum transmittit. Renes canaliculis paulo amplioribus aqua, muco ac oleosa pinguedine salia terrestria tartarea evēhant. Secretoria adhuc majoris diametri hepatis vasa secedente prius fluxili per vasa lymphatica lymphæ, crassum salino-sulphureum biliosum humorem ex sanguine per venas viscerum abdominis reliquorum redeunte sequestrant. Hæc sunt solennia illa ac præcipua salium sulphureorum emunctoria, quæ si non rite suo funguntur officio, id est secernenda non secernunt & excernunt, vel quod sanguis non debito motu ad ea appellat, vel quod ipsa obstruata, infarcta, obstructa sint, fieri ali-

*Opusc. Path.*

ter nequit, quin remanente illa excrementorum salino charactere imbutorum colluvie vitales illi fluores, qui dulces, temperie benigni esse debebant, falsi, acres & intemperati evadant, & sic fecundam matrem ac materiam morborum constituent. Talis sanguinis status dicitur cacochymia, vel impura falsa sulphurea dyscrasia. Et quoniam ipsa salia ratione indolis assumptorum ipsiusque aeris multum inter se variant, atque promutua inter se facta mixtione & motu intestino differente, proque diverso vitio emunctorii plane dissidentem atque alienam indolem & facultatem nanciscuntur; hinc non adeo mirandum est, si acria caustica salia ex aliis benignis producantur.

11. Quod quidem adsertum, ut eo clarius pateat, consultum fore arbitror, id ipsum notabilioribus quibusdam confirmare observationibus, quas inter maxime omnium memorabilis est CVII. quæ exstat in Dec. II. A. II. M. N. C. ubi ex vena in brachio secta sanguis exiliit, cujus unica guttula ad denudatum brachium cecidit, cum maximo doloris & ardoris sensu, ut vulneratus ad ejulandum fuerit coactus. Exusserat enim non tantum cuticulam excitata in ea vesicula, sed etiam subjectam cutim cum eschara, phleboto- mum autem in cuspide livido tinctum colore tam friabilem reddidit, ut levi attritu in particulas abierit, unde juvenis per alvum, urinam, vomitum, tussim, non tantum sanguinem sed etiam carunculas membranulis & venulis conspicuas egressit. SENNERTUS *Tr. de Consensu & dissensu Chymicorum Lib. I. C. XVI. p. 16.* Urinam scorbuticorum linthea corrodentem vidit, item DORING *Tr. de scorbuto p. 109.* Sanguinis admodum caustici etiam mentio fit in BONETTI *Medicina septentrionali part. II. L. II. Sect. 22. obs. 2.* Porro urinam acerrimam indusium bidui spatio erodentem annotat Salmuth. *Cent. 2. obs. IV.* Neque minus memorabilia sunt, quæ scribit D. Wolfius de lacte ex mamma puerperæ profluente, cujus acrimonia mammarum propinqua loca erodit & ulcera ipsis induxit, ut fuerit opus vasculis admotis

B

exci-



excipere illud, & subinde ex illis effundere. Vid. *obs. LXXII. Dec. II. anno VIII. M.N.C.* Plura exempla excrementorum & humorum sale refertorum infra recenserebimus.

12. Placet jam brevius determinare quænam copiosæ salium generationi in corpore nostro maxime velificentur; inter hæc autem principem locum obtinet plenitudo sive nimia humorum copia, quæ semper ratione virium motricium sive roboris musculorum in quovis individuo debet menturari. Quod si enim proportio illa inter movens & mobile læditur, adeo ut copia sanguinis & humorum resistat potentia ac virtuti loco motrici musculorum, ita ut non satis valide & velociter pro debita conservanda crasi circulentur humores, fit ut ob tardio rem motum a fluiditate & tenuitate sibi debita deflectant, & crassi, rudes & viscosi evadant. Lenti autem & crassi humores obstructionum postea promptissimi fiunt fabri, dum in minutissimis capillaribus tubulis hærent, illos obstant, infarciunt, unde emunctoria & colatoria publica excrementitios humores non rite separando inutiles salvas scorias, impuritatem & cacochymiam efficiunt. Et hinc fluit ratio, quare morbis ex intemperie & dyscrasia falsa ortis ii, qui sedentariæ vitæ dediti sunt, & qui sunt mollis spongiosi habitus corporis & delicatulis cibis sese saginant, catarrhis, defluxionibus, rheumatismis valde sunt obnoxii. E contra agricolas, bajulos, nautas laboribus deditos rarius cacochymia & ex hac obortis morbis videmus vexari, utpote abstinentia, exercitatio & motus corporis plethoram absumit, humores attenuat, fluxilesque reddit, sicque ab intemperie falsa præservat. Spectat huc aphorismus HIPPOCR. XI. Lib. II. veritate ac utilitate commendatissimus. *Corpora impura quo magis nutritur eo magis læseris.* Per impuritatem hic intelligitur intemperies viscido falsa, quæ ex emuncteriorum obstructione & officio neglecto ordinario solet oriri. In tali itaque corpore, ubi magna alimentorum & succorum copia oneratur,

augentur cruditates, obstructiones, & inde crecit intemperies & cacochymia.

13. Deinceps verissime monet HIPPOCRATES de *prisca med.* non modo ex plenitudine, sed etiam ex inanitione gravia oriri mala, estque ex iis præcipuum magna succorum impuritas. Quod si enim ex sanguinis defectu, qui ob varias causas & maxime ob enormes effusiones fieri potest, pauci spiritus generantur, & ubi pauci spiritus, languidus ac imbecillis motus est, necessario hinc consequitur, circulum sanguinis, & debitam quoque secretionem inutilium salifarum partium fieri languidiorem; præterea sub defectu sanguinis ipse non ad vasa capillaria in extremo habitu corporis & in emunctoriis potissimum sita non potest contingere; unde cum ea non sufficienter expanduntur, & aperta servantur, sed cum tempore subsident & contrahuntur, fit ut scirrhescentia & callositates atque obstructiones viscerum inde oriantur, quæ immedicabiles magnæ impuritatis & scorbuticæ quoque generatrices certissimæ fiunt. Præterea dantur adhuc aliæ causæ, quæ proventum salium morbosorum secundant. Et hæ sunt certi morbi & inter eos præsertim febres, quæ cum magno motu ac calore sunt stipatæ. Mediante enim febrili percalida commotione & succi corporis alias benigni ac lenti copiosa, manifesta & excrementitio sulphurea imbuuntur falsedine. In tertianis quidem continuis id manifesto conspiciere licet, in quibus mirabile omnino est, quanta biliosi humoris copia per alvum, imo per vomitum & urinam, quæ a bilis miscela saturatissime tincta est, indies egeratur, qui de novo semper ex motu intestino adaucto generatur; quod vel ex eo clarissime efficitur, si chinæ chinæ debita dosi atque administratione vel alio quodam remedio sistente ac roborante febriles paroxysmi per aliquot dies compescuntur; tum enim mox copiosæ istæ per alvum & urinam electiones cessant. In hectica pinguis illa saturate rubicunda urina, sputum perpetuo salsum, faeces acres & foetidæ nullum alium quoque



que agnoscunt ortum, quam quod intestina illa vehementi calida particularum sanguinis commotione, terreum illud ac mucidum sanguinis insipidum sulphuris ac salis schema induat. Nil frequentius in praxi est, quam quod mox post febres perpeffas, graves dolores, rheumatismi, tusses catharrhales, defluxiones falsæ asperam arteriam & oculos infestent, scabies itidem & ulcera oriantur, quæ nullam aliam causam agnoscere videntur, quam quod sub paroxysmis morbofis & vehementibus humorum commotionibus falsedo insignis biliosa in sanguine fuerit producta, quæ nisi debite temperetur, & per congrua evacuatoria eliminetur, multas passionis excitare potens est.

14. Tandem etiam medicamenta multum conferunt ad salium in corpore augmentationem. Quod si enim alimenta falsis rigidis partibus plena, nec non calidis sulphureis particulis stipata corporis partibus & maxime solidis, infesta sunt, ut catarrhi falsi, raucedines, oculorum defluxiones, odontalgia inde oriantur, arthritici paroxysmi incrementum accipiant, & scorbutica ulcera omnia inde exacerbentur, quidni etiam medicamenta, quæ adhuc activioris indolis sunt, falsa & acria augebunt intemperiem sanguinis falsam? Toties observavimus in scabie præsertim sicca, in scorbuticis & arthriticis doloribus, in odontalgicis etiam affectibus omnia remedia, quæ notabili falsedine, calore, acredine notata fuerunt, aucta semper pathemata fuisse & dolores, rosiones, exulcerationes atrociores exinde factas. Etenim non solum salia manifesta sed & spirituosas ad salium morbificorum genesis symbolum suum addunt. Si enim motus intestinus concitator salia producit, facile exinde fluit, omnia calida & spirituosas, quoniam motum hunc sanguinis calidum mirifice augent, salibus quoque producendis ac generandis apta & idonea esse.

15. Cum autem salia in microcosmo, uti notum est, non unius ejusdemque sint indolis, & viribus quoque & effectibus mirum quantum dissideant, ne-

que in statu sano & morbofo inter se convenient; hinc perutile fore judicamus, accuratius paulo determinare, cujusnam naturæ salia in corpore humano præter naturam abundare ipsique infesta esse possint, quæ certos morbos foveant atque progignant, quænam porro certis individuis ratione ætatis, temperamentorum, habitus corporis, vitæque generis valde distinctis, magis vel minus sint familiaria, & quibus partibus hæc vel illa salia, plus vel minus noceant. His enim perspectis eo melius ac felicius in enodandis & explicandis morborum & symptomatum causis ipsaque medicina cum ratione applicanda progredi poterimus. Ante omnia vero circumspiciendum est, quænam speciâtim salia in corpore humano, sive in statu secundum sive præter naturam versetur, reperiantur. Primo autem asserimus, sal acidum purum, liberum & extricatum sapore & virtute tale in corporis nostri succis, qui motu circulari circumvolvuntur, non inveniri. Ea enim acidi conditio est, atque indoles, ut propter spicula sua, quibus constat, acuta, facillime cohæreat, & sese intime fixis terrestribus immobilioribus, & pinguibus particulis, quibus solet irretiri, & quas in motu suo intestino sistere solet, associet; unde dependet ratio, quare acida concentratiora cum terreis, oleosis, pinguibus mixta coagulentur, & in massam sive salinam sive, in resini-forme vel aliud crassum magma coagmententur, unde etiam sal acidum in copia ingestum, quando cum sanguine nostro miscetur, naturam suam non retinet, sed pro varia partium inter se facta miscela, vel in sal neutrum falsum ammoniacali simile, vel in tartareum, vel in acre transmutatur. Quapropter nullus facile artifex ex sanguine vel partibus solidis animantium producere poterit acidum formale. Equidem mentionem facit *Cl. Viensens* in peculiari epistola ad *Lipsienses* acidi, mediante argilla ex sanguine humano exsiccatæ ignis calore propulsi. At vero probe monitum est a *Cl. Pittcarne* in Dissertationibus ex argilla, quæ per se propter sulphur,



quod alit minerale, acidum stigma fundit, hujus spiritus acidi ortum esse derivandum. Non negamus acida sanguinis & humorum crasin invertendi, nec non partibus solidis & nerveis nocendi efficacia pollere, nihilominus formale acidum tale morborum causam proximam & immediatam, uti communis est opinio, constituere, & ad hoc absumendum ferme totam medendi methodum debere esse directam negamus, quod olim jam deduximus.

16. Deinceps neque in corpore humano purum datur alkali, sive fixum sive volatile. Acida salia magis sunt universalis & pura exstant in mineralibus ac vegetabilibus, alkalia autem præsertim fixa magis artis sunt effectus, & purum sal volatile urinosum sine prævia putredine & sine combustione nunquam ostenditur, multo minus sal alkali fixum, quod tantum per combustionem ex vegetabilibus neque ex omnibus, sed ex iis tantum, quæ sal acidum, particulas terreas & sulphureas in debita mixtione custodiunt, in abundantia paratur. Hinc alkalia sive fixa sive vegetabilia sint, mixturæ sanguinis sunt plane contraria, sicuti patet clarissimo exemplo ex chirurgia infusoria desumpto, ubi liquore alkalino sive urinoso sive fixo in venam animalis vivi injecto, non secus ac ab acido liquore infuso, mox animal interficitur, ea tantum differentia, quod sanguis fluidus & floridissimus ab injectione salis volatilis urinosi, fixus autem coagulatus & crassus nigricans ab infuso acido fuerit repertus.

17. Præcipua autem salia, quæ tam in sano corpore, quam in eo, quod indolis morbosæ est, occurrunt, potissimum sunt media neutra, & quidem vel tartarea vel acria salia, quæ tam copia, quam volatilitate & tenuitate, differentes morbosos exhibent effectus. Quemadmodum autem in superioribus & alibi etiam latius deduximus, acidum quasi primam reliquorum salium in macrocosmo esse matrem & originem: ita etiam statuimus, acidum salium plurimorum, quæ in corpore humano tam in statu naturali,

quam præternaturali reperiuntur, præcipuam esse causam. Tametsi enim illud purum in sanguine & vitalibus succis non reperiatur, nihilominus in primis viis & maxime ventriculi & intestinorum canale in statu secundum & præter naturam illud purum deprehendere licet. Nam acidum naturale temperatum ac modicum ventriculo & primis viis non est hostile, sed potius appetitum, digestionem & alimentorum resolutionem egregie adjuvat, unde etiam acida remedia, qualia sunt vinum, succi acidi & panis, qui subtile acidum recondit, ventriculi actionem egregie juvare & promovere solet. Quod si autem acidum illud propter nimis acida ingesta nimium & excessivum sit, vel si humores in ventriculo diu morantes & peregrinum acorem induant, præternaturale illud fit & morborum causas ministrat.

18. Ad generationem autem hujus salis acidi excessivi dispositi sunt maxime infantes lactantes & pueri. Lac enim, uti notum est, facillime mora acorem concipit, quod etiam accidit in ventriculo infantum, si nimium lacte nutriuntur, illudque per alvum non bene excernitur, & hoc præcipua morborum, quibus infantes subjecti sunt, causa est. Tormina & erosiones in intestinis, maximeque in colo efficit, unde alvi adstrictiones spasmodicæ, epilepticæ & convulsivæ agitationes corporis dependent. Quod autem acidum in iis delinquat, ex eo apparet, quod plerumque feces viridissimo colore, qui ex bilis & acidi mixtura nascitur, tinctæ sint. Nam acidum corrosivum v.g. spiritus vitrioli cum bile mixtus viridem colorem inducit. Quapropter infantilibus in morbis egregiam efficaciam præstant omnia alkalina, terrea, absorbentia, oleum tartari per deliquium, tincturæ tartari & clysteres oleosi demulcentes. Porro in ætate puerili, sexu foemino & tempore autumnali, maxime ob esum fructuum horæorum ingens acescentia in primis viis præsto est. Unde deducimus, quod ad crustam lacteam, achores capitis, ad fluxio.



fluxiones in auribus & oculis infantilis ætas valde sit proclivis. Acidum enim in sanguinem delatum lympham coagulat, falsam reddit, glandulas obstipat, transpirationem impedit & prædicta mala certo certius infert. Qua de causa etiam omnia quæ acidum in primis viis absorbent, quæ humores temperant fluxiles reddunt, humorumque excretionem promovent, dictis in affectibus emolumentum præstant egregium. Verminosa dispositio, quæ ætati puerili infantili & adolescentibus perquam familiaris est, identidem lentiori, acescentiæ atque corruptioni humorum debetur. Utut enim acida penetrantia vermibus noceant, lenia tamen bene ferre possunt; ubi autem acidum in primis viis hospitatur, ibi bilis, quæ antidotus vermium est, deficit, ibi calor est temperatus, ibi alvi contenta ex intestinis non sufficienter propelluntur, nausea oritur, saliva in os fluit, phlogoses laborantes patiuntur, & quandoque forti appetitu gaudent. Quoniam itaque acidum ad vermium generationem confert, hinc hypochondriacorum intestina, præsertim in sexu sequiori ascaridum copia sæpius scatere deprehendimus.

19. Acidum porro exsuperans inque primis viis congestum ex acidorum nimio usu maxime in phlegmaticis, phlegmatico melancholicis, vitæ sedentariæ & lubricationibus addictis, ac imbecilibus subjectis pathematum hypochondriacorum causa remota præcipua existit. Notum namque est, quod alvi adstrictio & obstructio plerumque præcedat veletiam comitetur malum hypochondriacum, quæ tamen a nulla re magis, quam ab acidis assumptis fovetur. Acida porro in sanguinem delata impediunt transpirationem, serum reddunt viscidum & ad motum ineptum; unde circulatio per viscera præsertim abdominis fit tardior, & sic obstructions hepatis, lienis, indeque dyscrasiæ falsæ, acres, corrosivæ, spasmodum autores, promptissime generantur. In hypochondriacis autem acidum corrosivum prima in regione plerumque oberrare, non modo ructus sed

& vomitus acidi virides patefaciunt, idque vera causa est, quod purgantia etiam fortiora emetica effectu suo sæpius frustrentur, & martialia sicca assumpta mox nigerrimas fæces efficiant. Et hinc quoque deducenda est pulverum martialium energia, utpote qui præcipitando & absorbendo primarum viarum acidum, atrocium pathematum levamentum afferunt egregium.

20. Illud autem observatione dignum est, quod, utut frequentius tales ægroti absorbentia assumant, adeo ut omne acidum absumptum videatur, nihilominus acor in os mox regurgitet, & priora pathemata repetat. Hoc vero mea sententia exinde deduci debet, quod, tametsi acidum in intestinis sit saturatum, illud tamen, nisi excernatur per alvum propter affluentem ex glandulis intestinalibus novam lympham, mora acidam factam, quæ coagulatum jam in partibus terreis acidum resuscitat, mox resuscitatur; non secus ac videmus, oleum vitrioli sali communi affusum, vel spiritum vitrioli saccharo saturni admixtum ex ipsis leni ignis calore acidum rursus expellere. Unde optimo consilio post absorbentia & martialia assumpta subungi debent evacuantia, ut simul illud acidum evacuetur. Rarum est quod refert III. Boyle in *Chymista sceptico* p. 68. de milite hypochondriaco lapides & frustula devorante & ita consumente, ut alvi excrementa arenosa secuta fuerint lapidibus ab acido stomacho in arenulas resolutis.

21. Quod autem de hypochondriacis dictum est, illud etiam de hystericis valet. Acidum enim plerumque est hujus morbi causa remota, & postea etiam malo jam suscitato humores serosi ad acescentiam valde inclinant, qui rodendo, vellicando, digestionem turbando, flatulentias, cardialgias multaque alia incommoda pariunt. Febrem lentam post intermittentes curatas sæpius observavimus, adeo ut metus fuerit hecticæ, nisi præsentissimum levamen a lenioribus emeticis ægrotantes fuissent experti. Ita pariter aliquot exempla in praxi notavi,



ubi colluvie humorum viscidorum viridium evacuata, calor febrilis mox fuit mitigatus & dolores pedum ostocopi remiserunt; quod medicamentum aliquoties repetitum, saburram removendo, febrem felicissime curavit.

22. Deinceps acidum in prima regione coacervatum in phlegmaticis, phlegmatico-melancholicis, maxime in sexu foeminino, & sub vita sedentaria disponit ad mensium suppressionem, quæ mille malorum origo est. Quotidianæ enim est experientiæ, ad ordinarium sanguinis fluxum inhibendum, chlorosin & cachexiam inducendam & innumera mala proferenda, foeminis præter acidorum & aceti &c. usum nihil esse nocentius. Hæc enim in sanguine delata, ejus sulphur, quod matrix vitalis caloris ac spirituscentiæ est, figunt, deprimunt, enervant, lentiores humorum cursum efficiunt, & sic cacochymiam viscido salis impuritatemque magnam, pathematum variorum productricem ingenerant: quam ob causam & illi, qui ordinario patiuntur fluxum hæmorrhoidalem, omni studio sibi cavere debent ab intempestivo acidorum usu præsertim tunc temporis, quando fluxus instat. Ex iis jam patet, utut non semper causa materialis morborum proxima sit acidum, ex remotis tamen principem locum obtinere.

23. Denique acidum in massam sanguinis & humorum delatum, & cum partibus sulphureis terreis nuptum, degenerat in sal falsum, quod si non rite per universale illud sanguinis evacuatorium cutim nec non per renes secernitur & e corpore exterminatur, ulteriore commotione intestina acre simul factum & ad glandulas subcutaneas delatum, facit ibi rosiones, pruritus tenuissimarum fibrillarum, dilacerationem variasque exulcerationes, scabiem, phymata, & cutis defœdationes. Et scabies ista humida in adolescentibus vitæ sedentariæ deditis, præsertim si fructibus horæis ventriculum onerant, nullam aliam habet causam, quam acrum salium erodentium in sero viscido abundantium quantitatem. Longe autem molestior sca-

bies sicca est, & in melancholicis ac senibus, quibus serum roscidum deficit, insigni ut plurimum pruritu stipata. Quapropter in utroque casu omnia, quæ salia diluunt, eorum acrimoniam temperant, emunctoria, præsertim cutim aperiant, indicatissima & certissima sunt præsidia. In humida autem scabie valde proficui deprehenduntur pulveres absorbentes circa tempus noctis adhibiti. Externe saturnina, terrea & quæ leniter exsiccant egregiam foenerant utilitatem, ut perspicuum exinde fiat, quare in dictis affectibus cuncta, quæ salibus motum & acredinem conciliant, ut sunt spirituosæ, calidiora, falsa, &c. majores & acerbiores inducant erosiones.

24. Cumque acidum secundum nostram sententiam sit fundamentum reliquorum salium morbosorum, hinc pro differentia sanguinis & succorum in varias non modo species transmutatur, sed & pro diversitate partium, quas affligit, peculiares producit morbosas adfectiones. In ætate juvenili & virili, præsertim in sanguineis & sanguineo cholericis excretionibus per transpirationem impeditæ, & alimenterum acido exsuperantium crebra assumptio, inque edendo intemperantia, morbos a sale acri proferunt; ex quorum censu sunt arthritidis vaga, rheumatismi, odontalgia, catarrhi, tusses, diarrhææ. Hæc ægritudines plerumque esse epidemias, & sub certis anni temporibus & tempestatibus dominari, constans est experientia. Præcipue autem generantur post cœli statum austrinum & humidum, quem si boreales venti vel frigora excipiunt, protinus una nocte dispositos dictæ passionis invadunt, vix aliam ob rationem, quam quod sub cœli statu humido spirituum, qui ex aere sumunt pabulum, vigor pereat, partesque fibrosæ & musculosæ flaccescant, sicque ob lentiores sanguinis circulum copiosa impuritatum excrementitiarum fiat collectio, quas majori motu & impetu facto venti boreales, qui rigiditatem partibus solidis, elasticitatem fluidis conciliant, sive in emunctoria sive in partes membranaceas hinc inde pellunt; unde postea, quum



quum proportio ratione quantitatis vel qualitatis cum eorum poris non respondeat, fiunt stimuli, resiones, quas sequuntur stases, congestiones, dolores, febres aliaque symptomata. In coryza sal tenue acre per sternutationem ipsumque gustum sese exferit efficacissime. In odontalgicis defluxionibus, quæ sæpius dimidiam partem capitis occupant, non raro tam falsa acris lymphæ per nares & fauces defluit, ut valde acris percipiatur. Haud aliter comparatum est cum iis fluxionibus, quæ oculos cum rubore & tumore infestant, ubi sæpius tanta acris sese offert, quæ non tantum gustu percipi potest, sed ipsam quoque cutim faciei erodit. In arthriticis & rheumaticis doloribus sal tenue biliosum corrosivum plerumque peccat, & insensibilissimis partibus cruciatus maximos suscitatur. Salinum autem in his affectibus esse principium ex eo argumentari licet, quod a transpiratione prohibita, vinorum potu & acidorum assumptione nec non magna ciborum intemperie, in subjectis debilioribus, veneri deditis & otio assuetis per familiares sint isti morbi, qui per leniora diaphoretica, transpirationem liberiolem promoventia, per temperantia, demulcentia, lac & serum lactis curantur; quum contra omnia falsa, acris, calida, tam ex alimentorum quam medicamentorum classe summe deprehenduntur hostilia.

25. In diarrhæis, quæ plerumque sunt epidemice & ab intercepta transpiratione in intemperantiæ deditis corporibus suscitantur, sal biliosum falsum ex habitu corporis ad intestina præcipitatum, resiones, irritationes nimiasque excretiones producit. Quis autem hic vellet dubitare salinum acre stimulare, sulphureum principium esse accusandum? quoniam omnia purgantia, quæ diarrhæam artificialem efficiunt, ob principium tale salinum sulphureum acre operantur. Monstrat id quoque ipsa cura, dum omnia demulcentia, acrimoniam temperantia, incrassantia & quæcunque transpirationem in cute liberiolem & expeditiolem reddunt, opem ferunt præcipuam;

quod etiam valet de dyfenteria, ubi tanta corrosivorum humorum sæpenuero indoles est, ut ipsæ membranulæ intestinales plane erodantur.

26. Ulterius acidum in senili ætate & in sanguine terrestri crasso, sub diætâ viscida & dura exsuperans degenerare solet in sal tartareum, quale ex terra fixa, oleo & acido conflatur. Hoc si non debite per congrua evacuatoria eicitur, varias tartareas calculosas, præsertim in renibus & vesica, tam urinaria quam biliaria producit concretiones. Præterea stranguriam efficit, quæ ideo senibus & calculosis valde est familiaris. Quod si autem tale sal tartareum resolutum ad glandulas & membranas articulorum pedum præcipitetur ibique hæreat, dolores lancinatorios & podagricos causat. Podagra enim, præsertim fixa, nodosa, tophacea, omnium consensu, a sale tartareo fixo terreo oritur; unde ratio dependet, quare hypochondriaci & calculosi podagra facile afficiantur: quin imo juncturarum ligamenta a sabulo tartareo ibi subsistente erosa in sectionibus cadaverum sæpius fuerunt reposita, imo ex ipsis tophis quandoque tartarea terrea materia exempta. Neque rei medicæ peritos fugit, in articulis podagricorum sæpe colligi & quandoque vesicatoriorum usu effundi summe corrosivæ indolis liquorem; & quod acidorum & viscidorum abusus, calculosam & podagricam dispositionem corporibus ingeneret; unde omnia antacida terrea & quæ salina tartarea excrementa ex corpore educunt, nimiam calculosæ vel etiam podagricæ materiæ genesin impediunt.

27. Nullus autem morbus maiori ferocia salium copia stipatus est, quam ipse scorbutus. Unde hic morbus oritur, non nemini in medicis paullulum versato notum est, quod nempe ex defectu spiritus ascensivi sanguinis, ejusque tardiori circuitu, viscerum obstructione & hinc vacillante excretionum negotio pronascatur: quare foecundissima scoriarum salino-sulphurearum progenies fit, quæ dolorum, ulcerum malignorum,



spasmodicarum contractionum, nimiarum defluxionum & excretionum, præcipuam causam materiale fovet. Et sicut ex alimentis, sale copioso præditis hic adfectus potissimum nascitur: ita quoque per ea ipsa exacerbatur. Plura autem sunt, quæ clarissime docent, in scorbuto mirabilem salium peccare copiam. Argumento potest esse sola urina, quæ saturato rubicundo colore tincta mingitur; &, quoniam salium copia scattet, ponderosior est sani hominis lotio, & non modo evaporatione facta, sed & per præcipitationem cum oleo tartari per deliquium, magnam copiam mucidæ substantiæ exhibet. Urinam in sale lixiviosum coagulata vide in *Act. N. C. Dec. I. A. II. p. 162. 141.* crySTALLISATAM describunt identidem *Miscellanea Dec. I. A. VI. & VII. p. 93.* arenosam *Dec. I. A. II. p. 35.* sabulosam perhibent *Dec. II. A. X. p. 44.* & urinæ corrodentis exemplum *Dec. II. A. VIII. p. 157.* Urinæ viridis RHODIUS meminit *Cent. III. observat. 21.* Et quoniam falsugine succi corporis nostri referti sunt, hinc omnia ea, quæ diluunt & temperant, plus efficacæ in medendo spondent, quam omnia volatilia, acria & spirituosas, quæ dum, experientia teste, salia acuiunt, iisque penetrantiam addunt, & exacerbationem symptomatum efficiunt. Eam ob causam cavendum quoque est, ne scorbutici tractentur mercurialibus. Notum enim est, hæc ipsa salibus corporis associata insignem acquirere corrositatem & causticitatem; unde sævissima non secus ac a formali veneno nasci solent symptomata. Luem quoque veneream & virulentam gonorrhœam a principio caustico oriri nemo facile negabit, ubi tamen notandum, quod in hoc morbo non modo salia simpliciter vi rodente caustica agant, sed simul intestina putredinosa motione in partes solidas & corporis nostri succos grassentur, adeo ut abominandæ istæ, quæ his affectibus familiares sunt, partium & ossium erosiones non tantum a sale erodente, sed & a motu putrefactorio destructivo sint deducendæ.

28. Probe autem hoc loco tenendum est, quod salia, quæ in scorbuticorum sanguine ac succis regnant, non sint domestica neque unius eiusdemque generis, sed statuimus potius, salia illa impura in corpore retenta, toties facta, repetita & aucta intestina motione, fermentatione & variarum partium inter se mixtione prorsus in alterius schematis salia mutari, quæ lixivii acris calcinati salis & similium qualitates & vires exserunt.

29. Tandem etiam in variis morbis sal tenue, causticæ & acris indolis accusatum venit, quod ob penetrantiam & subtilitatem, stimulando hinc inde fibras nerveas & per corpus vagando, maxime noxium & perniciosum est. Talismodi generis sal extra corpus deprehendimus in validioribus purgantibus, emeticis, in venenis quamplurimis, in cicuta, cantharidibus, araneis, butonibus, arsenico, mercurialibus &c. Et quemadmodum secundum nostram sententiam acidum primum salium constituit fundamentum, ita quoque asserere non dubitamus, tale causticum volatile primum suum ortum ab acido habere, quod vel ex eo apparet, dum salia alcalia omnium purgantium & causticorum vim, debita commixtione facta, egregie infringunt atque enervant. Tale sal quoque generatur in corpore nostro & in variolis, morbillis, purpura manifesto conspicitur, licet gradu virulentæ & acredinis valde differat. Cognoscitur ejus effectus ex cutis erosione pustulosa, pruritu maximo, ex vomitu, diarrhæa, cardialgia, urina cruenta, stranguria, sternutatione, tussi & salivatione, quæ sæpiusculæ eruptionem in cute antecedere solent & comitari. Porro etiam nos certiores reddit de hoc sale ipsa cura, quæ maxime in dilutione & spiculatorum acrium contemperatione versatur; contra omnia, quæ humidum absumunt, salia commovent, exagitant, perniciosissima sunt, & præterea damnum inferunt. Inter morbos quoque, qui ex principio summe subtili caustico oriuntur, merito referenda quoque venit



nit pestis, quæ halitu summe tenui solet propagari. Et quoniam mox vertiginem, syncopen, anxietates, nauseam, cardialgias, imo in ipso ventriculo, uti nota sunt exempla, escharas producere solet, de causticitate non dubitandum est. Venena enim, quæ simili principio operantur ex vegetabilibus & mineralibus, iisdem symptomatibus infesta sunt, tantum quod hoc venenum, quoniam ex regno animali desumptum est, facilius intestina motione propagetur, quod circa alia venena non accidit. Neque mihi pestis & febrium petechialium miasma agere videtur, corruptionem putredinosam sanguini introducendo, utpote in sanis corporibus, quæ etiam pestis invadit, succi, qui in circulatione perenni existunt, non tam in instanti in putredinem rapi possunt. Nullum enim fluidum, quod fortiter movetur, ad putredinem concipiendam aptum est, neque etiam tam subito ea in corpus potest introduci, ut prædicta symptomata statim ab ea producantur. Præterea carbunculi & bubonis pestilentialis exortus id ipsum clarius videtur demonstrare: hæret enim ibi principium summe activum lancinans, summosque dolores procreans, quod spasmodica contractione sanguinis stagnationem efficit putredinemque sphacelofam inducit. Morbi autem maligni, qui a causa interna sunt, plerumque ex dispositione sanguinis putredinosa originem suam agnoscunt. Tandem etiam tale virulentum sal penetrans & causticæ indolis generatur in corpore nostro ex sordibus recrementitiis retropulsis, sive id fiat per externa refrigerantia, repellentia, sive per anodyna aliaque perperam administrata remedia, & locum maxime habet in scabie, in achoribus capitis, variolis, morbillis, purpura, arthriticis, podagricis doloribus, erysipelate &c. quod in dissertatione de generatione veneni in corpore humano fusius deduxi.

30. Ex hætenus dictis & adductis clarissime apparere arbitror, plures ac graves morbos foveri ac sustentari a salibus, & ex illis non solum oriri, ve-

rum etiam per remedia falsa exasperari. Neque tamen in ea sumus sententia, ac si tantum salia materiam morborum internorum præbeant, sive eorum omnium causam constituent. Multæ enim & gravissimæ ægritudines excitantur, ubi principium salinum nullum invenit locum, quandoquidem ex stasi, extravasatione & motu humorum impedito, inflammationes, spasmi, dolores, convulsiones, febres, sensuum motuumque abolitiones fiunt frequentissime, ipsa quoque putredo ac corruptio, quando partes corporis visceraque infestat, pathemata summe periculosa excitat, adeo, ut in morbificis causis non modo ad qualitatem salinosulphuream, sed & ad quantitatem peccantem & motum præsertim impeditum, & putredinosum sit respiciendum. Interea tamen negari non debet, nec commode potest, salia ex morbificis causis esse excludenda. Equidem varia prostant dubia, quibus hæc doctrina possit labefactari, quæ brevibus adhuc perpendere lubet. Palmarium est, quod dicant: si salia morbosa præsentia sunt in certi individui sanguine, cur non omnes tales morbos, qui fiunt a salibus, v. g. podagram, scorbutum, calculum, scabiem, diarrhæam producant, cum tamen calculus, arthritis, podagra sint morbi certarum tantum ætatum. Verum enim vero non omnia promiscue salia quoslibet morbos prodigunt: alii enim foveantur ab acido, alii a falso sale, alii a tartareo fixo, alii a caustico. Neque deinceps omnis ætas, vel omne temperamentum & quodcunque vitæ genus ad talia salia, quæ ad certum morbum gignendum requiruntur, sunt disposita, nec omnes partes corporis æqualiter sunt constitutæ, ut æque facilius adficiantur a causa morbifica salina; sed cum partes differunt structura, accidit etiam, ut principium quoddam noxium huic parti non noceat, alteri grave damnum inferat. Quemadmodum itaque morbus quidam salinus, non a quocunque, sed certo tantum & determinato sale proficiscitur, & quævis ætas, temperamentum, vitæ  
genus



genus certa etiam salia proferunt: ita etiam non cuius ætati, temperamento, vel vitæ generi omnis morbus salinus quadrat. Nam ad morbi cujusdam generis non una causa remota ex naturalibus & non naturalibus sufficit, sed plures in unum principium materiale morbosum debent conspirare. Postremo etiam hoc solet urgeri: si salia morborum sint fabri, eaque morbosa in corpore semper sint præsentia, cur non semper etiam effectus morbosos prodant, cum tamen experientia doceat, plurimos morbos periodice recurrere & plane quandoque intermittere & remittere. At vero non semper sequitur: posita causa poni & sequi etiam effectum. Habemus præsentissimum exemplum in purgantibus, quæ caustico quidem sale intestinorum fibrillas irritant, nihilominus tamen in corpus ingesta, excretionem per alvum & tormina non continuo, sed temporis certo intervallo efficiunt, adeo ut intermedio tempore nihil incommodi & molestiæ ab iis mentiat, salis huius purgantis licet non desit in irritando efficacia. Quis autem est, qui exinde velit argumentari, si talem irritationem non perpetuo sequitur effectus excretionis; ergo sal in purgante non perpetuo in intestina agit. Patet itaque, salia in corpore peregrina posse consistere, ut ut non semper ex ipsis fluat operatio, nam ad certum effectum seu motum & excretionem præstandam, semper inter movens & inter mobile requiritur proportio, quæ si deest nullus sequitur motus. Deinde opus est dispositione causæ agentis, imo non modo receptivitas sed & dispositio ad reagendum debet considerari. Hinc, ponamus exemplum, quandocumque causa acris stimulans in eadem activitate præsens, nec dolorem nec spasmum, nec excretionem efficiat, tunc culpa non in ipsam causam materiale est reiicienda eaque neganda, sed in id quod modum recipere & reddere debet, nimirum fibras spiritu animali turgidas. Minime itaque video, si fibræ membranaceæ & musculosæ post diuturnos spasmos ad tempus in robore

ac tono suo debilitentur, & quum spiritus non amplius æquali nisu in eas influant, relaxentur, cur motus non possit ferriari, præsertim cum aperte perspicimus, in fibris nimium relaxatis & non sufficienti copia spirituum turgidis nullum motum reddi nihilque sentiri: contrario autem, si rursus successive spiritus influunt & ad partem debilitatam tendunt, utique hos vim motus sui rursus imprimere. Hæc mechanica si probe attendantur, non amplius difficile erit iudicari, cur præsentibus licet causis morbificis motus morbosus non semper præsentibus sint, sed certis temporibus quidam ex iis revertantur. Quod autem nonnullis individuis spirituosum, etiam in excessiva quantitate assumptum, item acria volatilia non manifestum damnum vel morbos salinos dictos inferant, nulla alia ratio est, quam quod in sanis corporibus, ubi humores sunt fluxiles inque perpetuo motu & evacuatoria aperta constituta, superflua hæc salia partim per alvum, partim per sudorem & urinam rursus ejiciuntur. Deinceps sæpius accidit, quod error in rebus non naturalibus commissus uni individuo non noceat; imo & hoc accedit, quod ætas, temperamentum, anni tempus, cælum aliaque externa symbolo quasi quodam in eundem lædentis causæ effectum conspirent, atque tunc promptissime effectus morbosus sequatur, quod tamen minime contingit, si ita sint comparata, ut effectui ac operationi morbosæ peccantis materiæ sint contraria.

31 Paucissimis adhuc attingere juvabit, quæ ad præservationem & curam morborum a sale oriundorum aliquo modo spectant. Primo itaque monendum arbitror, cum acidum & viscidum sanguinis motui progressivo valde resistunt, & sic plurimum excrementorum salino-sulphureorum in sanguine accumulationi occasionem & simul materiam eorum præbent, hæc esse fugienda; & quoniam ex nimia succorum abundantia nascitur cacoehymia, hinc abstinendum & motum convenientem, item, si opus est, venæsectiones & purgationes debito tem-



tempore institutas mirifice ab istis morbis præservare judicamus. Porro quoque omnia ea, quæ sanguinem fluidum & tenuem reddunt, quæ circulum debite promovent, transpirationemque liberam servant, ea & curant & ab iisdem præservant. Nec denique negligenda sunt medicamenta, quæ obstructiones glandularum & viscerum veteres potenter referunt, ex quibus eminent, martialia, antimonialia, sulphurea, thermæ acidulæ, utpote quæ ad eradicandos diuturnos istos morbos effectum spondent præsentissimum. Sed hæc circa hanc materiam, dixisse sufficiant.

### DISSERTATIO III.

## DE PUTREDINIS DOCTRINA EJUSQUE AMPLISSIMO IN MEDICINA USU.

#### §. I.

**S**I quis demonstrationes conficere & veras ac solidas phænomenorum & effectuum, qui in medicina obveniunt, rationes apposite & intelligenter reddere velit, is plures ex physicis veritates antea cognitæ præspectasque habere debet. Veritatem enim adhuc incognitam detegere, vel doctrinam quandam clarius explicare nemo facile poterit, nisi illud, quod quærit, vel explanare instituit, ex veritatibus jam notis cognitisque scienter eruere didicerit; quandoquidem veritatis ea est indoles isque character, ut non modo mentem ad assensum cogat, sed & frugifera sit, seque multiplici usu propaget, & uberrima aliarum veritatum sit genitrix. Uti vero quævis disciplina ulterius excolenda suas ipsi congruas & respondentes supponit veritates atque principia domestica: ita doctrina medica, si in formam scientiæ redigi debet, non nisi veritatibus & fundamentis physicis jam jam detectis & publicam assensionem habentibus, ad ulteriorem perfectionis gradum evehitur. Dicit enim

vix potest, quam eximio usu atque utilitate studium anatomes paulo diligentius excultum, quod mechanicam corporis humani structuram eiusque partium contextum monstrat, neque minus paulo subtilior rerum physicarum, & chymicarum per experimenta instituta contemplatio atque motuum ex mechanicis scientia incrementis artis medicæ provehendis inserviant. Nisi enim quis hisce disciplinis earumque principiis atque præceptis probe imbutus sit, is certe nunquam solidas, quæ intelligi & demonstrari possunt, causas in medicina asserere, vel solidi quid in explicandis rebus præstare poterit. Nam qui his destituti sunt scientiis, illi loco demonstrationum & veritatum nomina tantum rerum, obscuros & confusos terminos, qui intelligi nequeunt, in medium proferunt, atque adeo sermonem in medicina, non vero medicinam tradidisse videntur. Qui vero speculationum suarum fundamenta ex hypothesebus depro-munt, ii quidem melius agunt, & veritates quasdam in aprico ponunt, quæ tamen tantum sunt probabiles, & omnibus phænomenis explicandis minus sunt idoneæ. Optima itaque ea est in medicina philosophandi ratio, ubi quis ex simplicibus, claris atque jam probatis rerum principiis physicis, mechanicis, vitæ, mortis, morborum & sanitatis restituendæ causas dare atque investigare conatur, & partim synthetica methodo incedit, dum motuum in genere causas, leges, materiæ indolem ac vires ex selectis quibusdam phænomenis atque experimentis in physicis deducit, & ex his deinde per synthesein motuum microcosmicorum causas, leges, sanguinis & humorum indolem, constitutiones & vires tradit & derivat. Quam vero insignem usum atque eximiam utilitatem veritates in physicis ac chymicis jam cognitæ in rebus medicis explicandis præstent, exemplo putredinis fusius ostendere atque demonstrare allaborabimus.

2. Cum itaque nobis constitutum sit, quam eximium doctrina de putredine in medi-



medicina habeat usum, & quam scitu hæc ipsa necessaria sit omnibus, qui hac in arte proficere volunt, pluribus argumentis paulo plenius atque uberius tradere; primo omnium consultum nobis visum fuit, putredinis indolem, causas & effectus ex ipsis physicis & chymicis fontibus paulo altius accersere, ut postea hujus doctrinæ utilitas in applicatione rerum, quæ ad medicum spectant usum, eo clarius innotescat. Ordinem vero ab ejus non tam nominali, quam reali definitione, eo quod omnes rerum definitiones ejus indolis atque usus sint, ut ceu principia demonstrationum considerari debeant. Corporis igitur putredo nihil aliud est, quam intima partium, ex quibus mixtum corpus constat, ex unione & nexu suo dissolutio cum foetido & volatili halitu juncta, totam mixti crasin, proprietates & vires immutans.

3. Corporum dissolutio rectissime in superficiei & intimam sive radicalem distinguitur, in illa tantum corpus in tenuissimas partes, ex quibus aggregatum est, dividitur atque discerpitur, quarum singulæ adhuc suam indolem atque virtutem, nec non proprias & específicas qualitates ac vires retinent. Exemplo poterit esse solutio auri cum aqua regis adornata, in qua etiam si aurum in stupendæ exiguitatis particulas seu atomos fuerit resolutum, quod exinde patet, dum ejus aliquot guttæ integram libram spiritus vini alio sapore imbuere possunt, tamen ex præcipitatione, quæ fit cum sale quodam sive volatili, corpuscula hæc auri naturam perfecte in se retinuisse apparet. Intima vero & radicalis solutio ea habetur, qua partes corporis e nexu, & situ suo dimoventur, atque arctissima mixtione, a qua essentia & specifica corporum differentia dependet, penitus exsolvantur, ut in aliam prorsus texturam & habitum transformatae, novas plane qualitates atque vires induant. Atque ejusmodi intimæ solutionis exemplum solutio ciborum in ventriculo & intestinorum canale exhibet, in quo a sub-

tilissimo illo menstruo universali microcosmico salivali, & caloris animalis influxu intima alimentorum mixtio & textura ita dissolvitur atque destruitur, ut sapore, odore, colore, consistentia & cæteris omnibus qualitatibus ablatis novus chylus & fœculentiæ alvo eliminandæ exsurgant. Pariter intimæ solutionis exemplum conspiciamus in fermentatione vegetabilium, dum dulces uvarum & fructuum horæorum succi beneficio fermentationis dulcem & temperatam suam naturam plane deponunt, & in liquorem acido-spirituosum sive vinosum inebriantem immutantur. Ad hanc itaque solutionis intimæ classem referri etiam debet putredo, cujus natura & effectus in eo consistit, ut corporis mixtionem & ab hac dependentem formam, qualitates atque vires plane extinguat.

4. Causa hujus dissolutionis intimæ tam fermentativæ, quam putridæ, est motus intestinalis partium humidarum & copiosus materiæ agitativæ calidæ influxus. Nam sicuti nulla unquam potest fieri sine humido corporis solidi solutio, ita etiam sine aqua, quæ primum humidum est, nec fermentatio, nec putredo perficitur. Est enim aqua universale menstruum, quod non modo poris corporum sese altius insinuat, sed etiam, quia ejus partes in continuo intestino motu constitutæ sunt, eorum partes, quæ variis modis mixtæ & unitæ sunt, disjungere, & de loco ac situ suo deturbare potest. Multo vero felicius id præstat, ubi a calore adjuvatur, qui non nisi rapidior materiæ æthereæ cœlestis motus est, magna expansiva, a centro ad circumferentiam propellente, potentia instructus. Humidum itaque in materiam fermentescibilem & putrescibilem dum agit, partes tam salinas, quam sulphureas & terreas resolvit, in se recipit, easque in similem fluiditatis motum abripit.

5. Ut ut vero fermentatio & putrefactio in eo convenient, quod utraque a motu intestino humidi & calidi elementi fiat, tamen differens valde est earum effectus. Nam fermentatione spiritus sulphu-



sulphureus inflammabilis, putrefactione vero spiritus urinosus volatilis produci-  
tur, & inde fit, ut putredo semper fœ-  
torem comitem habeat. Deinde notan-  
dum est, animalium succos nullam ad-  
mittere fermentationem, neque ex iis  
spiritum inflammabilem vinosum præpa-  
rari posse, cum vegetabilia hac sola gau-  
deant prærogativa, quæ tamen non fe-  
cus ac animantia putredinem concipiunt.  
Ratio vero, cur animantia eorumque  
partes tantummodo putrescant, nunquam  
vero ex iis per fermentationem elici in-  
flammabilis spiritus possit, unice in vegeta-  
bilium differente ab animantibus mixtione  
quærenda est: quandoquidem hæc in suam  
mixtionem præter oleum etiam acidum  
mittunt, quod etiam ex iis destillatione  
elicitur, cum in animantibus tale non  
reperire liceat, utpote quæ magis oleo  
& terra subtiliori volatili, quæ igne sal-  
sedinem induit, fœta sunt. In fermenta-  
tione itaque vegetabilium a motu in-  
testino calido primo solvitur acidum tar-  
tareum, quo, dum deinde in partes  
sulphureas & oleosas incipit agere, non  
modo mutua hac actione & reactione  
effervescentia concitatur, sed & copio-  
sus penetrans vapor exsurgit atque in  
auras fertur, & denique mutua combi-  
natione partium acidarum & oleosarum  
acidospirituosus sive vinosus liquor emer-  
git. In putrefactione vero, ubi acidum  
deficit, principium oleosum & sulphu-  
reum una cum salino volatili statim abri-  
pitur, neque ab acido figitur aut corri-  
gitur, sed libere cum tetra fœtore avo-  
lat inque auras diffatur; utpote experi-  
mentis chymicis certo constat, fœtorem  
ab oleoso sulphureo principio & sale  
volatili proficisci. Clarissimum exem-  
plum habemus in sulphure minerali,  
quod inodorum est, si vero igne cum  
sale lixivioso funditur, ingratum acci-  
pit odorem. Eodem modo si sulphur mi-  
nerale cum calce viva & sale ammoniaco  
destillatur, spiritus perpetuo fumans eli-  
citur. Quod si itaque sal volatile oleo-  
sum fœtidum ex animantibus elicere ve-  
limus, opus est, ut ea vel putrefactioni  
subjiciamus, vel igne fortiori, ut combu-

rantur, tractemus; ita & oleosæ & vola-  
tiles partes a contextu aliarum partium,  
in quibus irretitæ hærebant, liberantur.

6. Diximus in superioribus, humidum  
& calidum esse præcipua motus disso-  
lutorii in putrefactione & fermentatio-  
ne instrumenta, adeo, ut absque illis  
neutra harum perfici queat. Ex hisce  
jam sequitur, corpus in putredinem ali-  
as valde proclive, non meliori ratio-  
ne ab ea defendi salvumque & inte-  
grum servari posse, ac si humiditatem  
& calorem removeamus. Qua de causa  
etiam fit, ut corpora probe exsiccata  
nunquam putredini & corruptioni su-  
bjecta conspiciere liceat. Carnes suillæ  
& bovinæ, per fumi halitus & aeris  
flatum exsiccata, non facile putrescunt:  
quod si vero maceratione in aqua humi-  
ditatem recipiunt, sub calido mox aere  
facile ruunt in putredinem. Frigoris  
quoque ea est peculiaris indoles, ut cor-  
pora a putrefactione tueatur, idque non  
alia ratione quam quod motu quodam  
rectilineo partes premat & arctissime in-  
ter se jungat, ut esitu suo non facile  
possint dimoveri, cum potius calor id  
habeat, ut motu vorticoso & circa axem  
poros ampliet, expandat, & partes a  
centro ad circumferentiam propellat.

7. Cum vero humiditatis absumentio va-  
ria ratione possit perfici; varii etiam  
modi dantur conservationis corporum  
a putredine. Ita constat experientia,  
rectificatissimum vini spiritum conser-  
vandis corporibus maxime esse idoneum,  
si in eo detinentur, & quidem ob hanc  
rationem, quia videlicet humiditatem,  
quæ vegetabilibus & animantibus inest,  
ex interioribus eorum poris & partibus  
promte imbibit & absorbet, hinc etiam  
corpora antea mollia indurescunt; feli-  
cius vero res succedit, si aliquot vici-  
bus novus spiritus dephlegmatus affun-  
ditur. Et ut ut per olea destillata & per  
balsama liquida corporum balsamatio,  
sive a putredine conservatio adornari  
queat, tamen iis omnibus rectificatissi-  
mus spiritus longe multumque antefe-  
rendus est, eo quod penetrantioris est  
naturæ, atque in intima corporum faci-  
lius,



lius, quam corpus resinofum balsamicum, sese insinuat.

8. Præterea alius adhuc datur modus corpus acorruptione præservandi, nimirum per salia, inter quæ maxime eminent sal commune & alumen, quæ egregie etiam humidum recipiunt, quo absumto fibræ carneæ duriores redduntur. Hæc salia quo magis sunt pura & exsiccata, eo felicius hunc præstant effectum. Et quoniam alumen propter copiosas particulas terrestres simul constringentem facultatem obtinet, qua partes inter se invicem firmiter uniuntur & connectuntur; hinc beneficio lixivii, ex alumine & sale communi præparati, omnia humani corporis viscera per plures annos integra conservari possunt.

9. Notandum est, humida corruptibilia, si continuo agitantur motu, non facile in putredinem abire, stagnantia vero & putrescentia, uti videmus in aquis paludosis, facillime corruptionem admittere. Etenim calor & humiditas dum continuo in particulas quiescentes agunt easque afficiunt, facilius earum mixtionem dissolvunt ac destruunt, ac si locum & situm suum perpetuo mutant, ubi actio & mutatio caloris magis est transitoria, quæ contra in quiescentibus magis constans & permanens est. Videmus etiam, vegetabilia humiditate imbuta atque in ingentem molem ac acervum congesta, longe facilius incallescere inque putredinem abire, quam si sparsa jacent, ubi a putredine immunia manent. Cujus rei hanc subesse rationem putamus: si in acervum collecta fuerint, effluvia a motu humidi & intestini calidi excitata in liberum aerem evehi & exspirare nequeunt, sed coercita, conclusa & in se quasi redeuntia, notum, intestinum putredinosum accelerant; tantum abest, ut eum imminuant. Nihil vero magis corruptionem a rebus corruptibilibus arceat & incipientem aufert ac dissipat, quam liberioris aeris, præsertim sicci & frigidi, afflatus ac transitus. Denique & illud observatione perquam dignum est, quod putredo incipiens se valde multi-

plicet ac subito se disseminet ac diffundat; agit enim instar semini seu fermenti, quod in similem putredinosum motum congeneres & vicinas maxime partes cito abripit; quemadmodum id clare videmus in rebus fermentescibilibus, ubi parum fermenti massæ farinaceæ vel vegetabilium succis additum, eos mox in similem fermentationis motum conjicit.

10. Evoluta sic paulo ex fontibus physico medicis putredinis natura, generis atque effectus, longe facilius jam erit hæc, quæ jam diximus, in corpore nostro ad usum medicum applicare, in quo illud singulare & plane mirabile occurrit explicandum, quare animantium corpora, inque iis contenti succi, in se & sua natura putredini concipiendæ admodum apti, humido & calore adhuc præsentē, & quamdiu viva animantia existunt, eam non subeant, sed integra, salva & a corruptione immunia persistant, cum tamen statim post mortem celeriter in putredinem ruant. Atque in eo conservationis vitalis ratio maxime posita est, cujus causam utique paulo exquisitius investigare diligentis ac sciscitabundi medici est. Falluntur ii quam maxime, qui in spiritu aut balsamo quodam vitali & calido innato hujus admirandæ conservationis causam quærunt. Quandoquidem pro veris causis hic tantummodo allegantur termini, qui rem nullam significant, & hinc quoque nihil explicant. Falluntur etiam, qui sale & sulphure, quod vitalibus inest succis, id conservationis negotium confici autumant. Indubia namque & plane infallibili constat experientia, neque salina, neque spirituosā, neque medicamenta balsamica, copiosius etiam in corpore humanum assumpta, tantum valere, ut avertere putredinem possint, ut potius ad hanc promovendam non parum conferant. Videmus enim corpora scorbuticorum, quorum succi salinis & sulphureis partibus abundant, facillime in corruptionem sphacelofam incidere; quapropter utique hujus durationis vitalis aliæ afferendæ & investigandæ sunt causæ. Jam vero obser-



observamus, sanguinis & humorum valde corruptibilem massam, quamdiu perenni ac jugi progressivo motu ac circuitu per compagem corporis mere vasculosam circumvolvitur, a corruptione esse immunem; quamprimum autem hi ipsi humores, extra motum & circulum positi, in partibus solidis quiescunt aut subsistunt, paratam ipsis esse putredinem, quæ mox sese diffundit, atque ad vicinas partes adhuc sinceræ serpens, iisdem mortem & sphacelum inducit. Et quodcumque etiam ipse sanguinis circuitus penitus sufflaminatur ac tollitur, quod fit in morte, e vestigio sequitur putredo, ceu mortis indivulsa comes ac pedissequa, nisi a frigore vel causa alia externa violenter arceatur.

11. Ex hisce apparet, solum sanguinis itum ac reditum esse præstantissimum illud balsamum, quod corpora animantium a corruptione defendit atque tuetur, quo motu salvo atque integro corpus omnes putredinis injurias eludit. Id vero maxime omnium inquirendum venit, utrum hic sanguinis fluxus ac refluxus solo progressivo motu id perficiat, an potius aliæ causæ cum hoc motu in circulum eunte ad hunc effectum præstandum conspirent; quod vero maxime videtur consentaneum. Nam per continuum & perennem illum sanguinis circulum & progressum motus partium, sanguinis mixtionem constituentium, intestinus calidus, qui dissolutoriæ est naturæ, valde increscit, & sanguinem ac succos temperatos non modo consumit, sed & sensim paulatimque in falsos sulphureos & excrementitios convertit. Ex quo patet, illum ipsum progressivum motum ad destructionem potius, quam conservationem sanguineæ mixturæ, tendere, id quod clarissime intensior in febribus æstus testatur, ubi ob velociorem sanguinis motum major fit intestina partium agitatio & major accenditur calor, qui & corpus & ejus succos atque vires non modo consumit & destruit, sed & eos in copiosas excrementitias partes, quæ partim per cutim, partim per urinam & alvum foras debent proscribi, resolvit. Acce-

dit & illud, quod cum aere, esculentis & potulentis plures a mixtura sanguinis alienæ & in corruptionem pronæ partes in succos vitales subinde irrepant, quæ si intus retineantur, non possunt non ex sua natura mixtionem sanguinis nativam & benignam turbare atque destruere. Insuper sub ipso etiam vitali actu & motu perpetuo corruptibiles aptasque ad putredinem inducendam materias in sanguine generari animadvertimus. Quare ipsa ratio dicitur, quod hæ partes vitæ infensæ, ne damnum mixturæ sanguineæ inferant, continuo separari, secerni & e corporis sphaera eliminari debeant.

12. Et inde quoque est, quod naturæ benignitas in artificiosissima animantium structura tot innumera efformavit secretoria & excretoria organa, quorum ope non modo fixioris, sed & mobilioris & agilioris naturæ, & falsæ sulphuræ, aqueæ & aeræ indolis excrementa continuo & non interrupto actu a sanguine & humoribus vitalibus sequestrantur. Quem in finem conditum est a natura vastum illud viscus, hepar, quod in secernendis scoris, sulphureis, adustis, salinis & serosis partibus nunquam non occupatum est. Tum innumerabiles hinc inde in corpore glandulæ extant conglomeratæ, quæ ex infinite parvis tubulis coagmentatæ laticem subtiliorem valde fermentescibilem, salivalem naturæ, continuo secernunt, qui officio suo defunctus e corpore eliminatur. Cutis tota tubulosa & porosa universale & publicum quasi est emunctorium, quo serosæ & sulphureo-falsæ sub humoris specie excrementitiæ partes foras proscribuntur. Renes seri falsi sulphurei crassioris colatoria sunt, ac per intestina crassa fœculentæ sordes & alvi purgamenta evacuantur.

13. Verum enim vero, ad mixtionem humorum vitalium conservandam, non sola sufficit perpetua partium inutilium separatio, sed opus est alio adhuc ad vitam & sanitatem tuendam præsidio, de quo altum apud autores nostri ævi est silentium, idque in nova succorum blandorum



dorum & temperie gaudentium accessione positum est, qui in locum eorum, qui corrupti secesserunt e corpore, surrogari & substitui debent. Ex quo apertissime videmus causam, quare homines & animantia, ne putredinem intus concipiant, atque ut vitam tueantur, alimenta semper assumere debeant, ex quibus rursus boni nutriendisque viribus apti, temperati, dulces succi, quales sunt chylosi lactei, generentur: nam sine eorum accessione & novo affluxu vita & vires diu durare nequeunt. Igitur vita conservatur, & mortifera putredo a corporibus animantium per assumpta & excreta, per ingesta & egesta optime avertitur. Ubi in genere notari velim, in adultis, & quæ non amplius indigent auctione, corporibus excretiones æquales esse debere ingestis, si prospera & æquabili valetudine gaudere velint.

14. Firmum itaque & inconcussum sanitatis fundamentum, in eo consistens, ut omnis materia corruptioni proxima & quæ corpori interitum & destructionem minatur, continuo removeatur, plura eaque utilissima corollaria & theoremata in medicum & practicum usum nobis suppeditat. Primo ex hisce jam allatis veritatibus mortis, & quæ eam sequitur, putredinis, vitæ infensissimæ rationem formalem & proximam causam elicere possumus, quæ est destructus sanguinis motus & progressus, indeque enata putredo & corruptio, quæ vice versa plerumque est causa totius circuli destructi atque ipsius mortis: quandoquidem frequenti & paulo attentiori corporum, morbis sive acutis, sive chronicis defunctorum, dissectione constat, manifestam semper & conspicuam mortis causam reperiri, dum vel viscus aut pars nobilis interna, vel etiam plures partes, per vim morbi ab extravasato vel stagnante humore corruptæ & putredine vel sphacelo tactæ apparent. Frequentissime vero accidit, ut in iis, qui subita morte extincti sunt, vel morbis gravibus chronicis, difficilioris paulo cognitionis, perierunt, ex variis fibris & membranis concreta corpora, quæ

medici polypos nominant, intra majora vasa & potissimum cordis ventriculos, vel etiam duræ matris sinus reperiantur, quæ liberum sanguinis iter impediendo turbandoque vitam tollunt.

15. Quum itaque præcipuum medici officium in eo versetur, ut vitam longam præstet, corporis integritatem servet, ac denique mortem præmaturam & morbos ad eam ducentes avertere quærat, non aliter certe id fieri potest, quam ut putredinem & corruptionem a partibus internis & externis arceat. Hoc vero non meliori modo ipse perficere potest, ac si omne consilium & operam eo dirigat, ut sanguinis circulum liberum per universi corporis tubulosam structuram conservet, omniaque impedimenta huic motui contraria removeat.

16. Plura vero sunt, quæ liberum hunc sanguinis progressum pervertendi atque impediendi potentia valent: quorum in numero præcipuum locum tenet nimia sanguinis & humorum abundantia, quæ vi multum resistente nimiaque expansione elaterem fibrarum cordis eiusque auricularum infringit atque minuit, ut valde tarda & legnis fiat progressio, ex qua tandem, nisi cito succurramus, humorum stagnationes, viscerum infarctus, obstructions, indurationes, humorum extravasationes, & partium corruptelæ putredinosæ vel apostematicæ prodeunt. Hac tarda sanguinis & humorum progressionem excretiones imminuuntur, præsertim ea, quæ fit perspiratione, & maxime humorum biliosorum, qui magna in quantitate quotidie in hepatis tubulis secernuntur, unde ingens cacochymia, sive varii generis impuritatum in sanguine fit proventus.

17. Quam infesta vero est conservationi nostræ vitæ plethora, tam frequens quoque & familiare iis est vitium, qui spongioso habitu præditi laute vivunt & dulci otio & quiete fruuntur; maxime vero omnium fœminæ præ viris plus sanguinis quam ad nutritionem & vitam est necessarius, colligunt. Ne igitur exuberans illa sanguinis & humorum copia sanitatem lædat, vel vitæ periculum minetur,



minetur, sapientissimo structuræ machinæ nostræ artificio factum est, ut a stagnatione & copia humorum talis præter naturam & ordinem motuum fiat in vasis & partibus nervosis dispositio, cujus beneficio natura ab infensa sanguinis redundantia se liberat, in tenera ætate ordinario per nares, in foeminis per uterum, in viris per ani venas certis & statis periodis superfluum, qui in vitio est, sanguinem evacuando. Quodcumque itaque solennes & salutares ejusmodi minuendæ sanguinis plenitudini dicatæ excretiones variis de causis deficiunt, minuuntur, vel cum violentia quadam cohibentur, illas malorum exoritur, ita ut nisi cito succurras, corpus omnis generis morbis tam acutis quam chronicis pateat, quod in *Tom. II. Medicinæ ration.* fusius exposui. Vidimus non semel foeminas sanguine abundantes, ex cohibito per terrorem mensium fluxu, accedente refrigeratione, vel validiori purgante admissio, brevitemore exisphacelosa partium corruptione extinctas, ubi statim post mortem totum corpus intumuit, foetidissima putredine cum magnis vesicis hinc inde emergentibus correptum.

18. Ecquis itaque ex his, quæ jam a nobis dicta sunt, non intelligit, a sola sanguinis benigni abundantia putredinem & mortem generari posse? ad quam avergendam non convenientius est auxilium, quam sanguinis missio, vel excretionum consuetarum sanguinearum restitutio. Quod si quis autem venæsectionibus non sit adsuetus vel, ab iis natura abhorreat, & talem agat vitam, talique victu fruatur, qui nimix copix sanguinis ingenerandæ convenit, natura vero in excretionibus otiosa vel iners sit, vel plane deficiat, hunc oportet alio modo tractare ipsique prospicere, ne in gravem veletiam lethalem a putredine oriundum morbum incidat. Ea enim, quæ nimiam sanguinis & humorum copiam detrahunt, pro ratione circumstantiarum, adhibenda sunt, cujus generis sunt labor & exercitatio corporis abstinentia, cibibus, & potus tenuis, balneum, laxantia, infusa

*Opusc. Patb.*

theiforma, & ducens aquarum mineralium, ut thermarum & acidularum, usus.

19. Quæstio jam incidit, num etiam ex inopia & defectu sanguinis putredo lethifera in corpore humano ejusque partibus subnasci possit? Equidem diversi generis causas diversos & dissimiles effectus producere debere, judicandum videtur; attamen in negotio vitali causas morbi contrarias in eundem effectum & generationem unius morbi conspirare posse, variis exemplis confirmare possemus; sed satis jam nobis erit hoc loco demonstrare, quomodo nimia sanguinis abundantia & nimia ejus inopia corruptionem lethiferam humoribus partibusque solidis inferre possit. Diximus supra sanguinem luxuriantem facillime in vasis stagnare & facile quoque impurum reddi, ob imminutas ab eadem plethora secretiones & excretiones, quæ sanguinem a sordibus impuris & inquinamentis, in corruptionem pronis liberant & tuentur. Idem pariter fit a sanguinis boni defectu; nam quemadmodum ab ejus naturali & convenienti quantitate omnis generis tubuli aperti servantur: ita ab ejus inopia concidunt, cocunt, angustantur, vel tandem penitus occluduntur, unde nec benigni alibiles succi ad solidas partes accedere, neque sufficiens fluidi mobilissimi in cerebro generari potest copia, unde vires ingens capiunt decrementum. Accedit & illud, quod impulsus sanguinis a corde & arteriis earumque debita diastole, qualis observatur in pulsu, a sufficienti quantitate sanguinis proficiatur, sub cujus defectu non potest aliter fieri, quam ut pulsus valde fiat debilis & languidus, ipseque sanguis per vasa minima capillaria viscerum non debite propellatur, sed hinc inde visceribus, ut sunt pulmones, lien, hepar, subsistat, & corruptiones, cachexiæ, febres lentæ & hæticæ sequantur.

20. Non vero expeditior ad putredinem & ex ea oriundos morbos via est, ac si viribus per immodicas sanguinis profusiones, per gravem antecedentem

C

mor.



morbum, aut diuturnos animi affectus, tristitiam, vel etiam famem, consumptis, homines nimia voracitate & avidissime ciborum copiam ingerunt, qui cum nec possint a natura corporis valde languida satis recte digeri & utile ab inutili secerni, ingens non solum fit vitiosorum humorum in prima regione coluvies, sed & valde impuris & corruptibilibus succis vasa ob impeditas excretiones replentur, atque ad febres malignas putridas, vel etiam heclicas lentas, magna fit dispositio. Observatione quoque certa & indubia constat, morbos perniciosos illos castrenses, febres nempe malignas petechiales, morbum Hungaricum, diarrhoeam atque dysenteriam mali moris autumnali maxime tempore, & quando castra relinquere coeperunt, gravissime militum deditos affligere, & longe lateque infesto contagio serpere. Cuius rei non alia subest causa, quam quod aestate sub diurno calore, nocturno frigore & continuis fatigationibus, vigiliis, fame, vel etiam corruptis esculentis ac potulentis & vires & bonum sanguinem amiserint, & huius loco venas & primas vias multis corruptis succis confertas habeant, qui ad putredinem subeundam admodum sunt faciles, atque in febribus acutis lethalem ut plurimum sphacelum partibus internis imprimunt.

21. Exposita sic horum, qui malignitate infesti sunt, morborum causa, quæ est succorum & sanguinis benigni defectus, & ex eo contractus perquam facilis ad putredinem transitus, exercitator quisque & intelligens medicus clare & evidenter jam perspicit, nihil periculosius esse, quam ex morbis vel aliis de causis imbecillia corpora, quæ juxta *Celsi* effatum morbis putridis patent, nimia ciborum, præsertim qui mali succi sunt, copia replere; sed præstat tali in casu sensim paulatimque absumtum sanguinem reparare, & cruditates inde evenientes vel per regionem alvinam, vel per cutim clementer evacuantibus educere, & insuper digestionis negotium ac stomachi vim concoctricem temperatis roborantibus & stomachicis acuire & corroborare, qua

methodo longe optime graves ex putredine & corruptione humorum metuentæ ægritudines possunt præcaveri.

22. Datur adhuc alius modus celerissime in sanis etiam, integris florentisque ætatis corporibus mortiferam putredinem inferendi, idque fit per subministrata venena, præsertim ea, quæ sunt causticæ indolis, quorum in numero sunt arsenici factitii tres species, vel etiam purgantia acriora, aut emetica ex antimonio validiora. Hæc nimia dosi data, nisi cito convenientibus auxiliis violentissima eorum operatio impediatur, brevi tempore per truculentissimos partium nervosarum spasmos & per illatam partibus nobilioribus putredinem enecant. Cadaveribus dissectis statim sphacelosa macula in ventriculo & intestinis cum terribissimo foetore oculis sese offerunt; utpote huius generis venena vehementissime partes nerveas & vasa ventriculi constringendo, inflammationes in sphacelum abeuntes producant, qui eo infestior vitæ est, quo plus nerveo-membranosas partes obsidet, ut sunt ventriculus & intestina, quæ cum systemate earum partium, quæ exquisitissima sensatione & vivido motu instructæ sunt, amicabilem habent consensum, similesque in motus inordinatos eas rapiunt. Id vero maxime mirandum est, quod valde frigida potio in corpus, calore & sudore diffluens, ingesta perniciosissima sit & venenum æmuletur, non raro sphacelum & mortem, cum celeritate quadam inferendo: & quamvis non semper tam funestus sequatur eventus, habemus tamen aliquot exempla in promptu, solum frigidum potum, corpori calefacto immisissimum, mortem intulisse, ubi dissectio corporis viscera sphacelosa ostendit. Ita ante aliquot annos Serenissimus Princeps quidam, in florentissima ætate constitutus, a vehementi corporis exercitatione totus sudore perfusus, duas mensuras frigida cerevisiæ simul & semel hausit, inde summo languore, nec non anxietate præcordiorum conatuque vomendi & frequenti animi deliquio correptus, quarto die convulsionibus obiit, ubi post

sectio.



fectionem non modo pars ventriculi sphacelo correpta, sed & lien & sinister pulmo in foetidissimam & instar atramenti nigerrimam, putrilaginem resoluta fuerunt reperta. Cum enim viscera ex vasorum minutissimorum congerie fere tota sint conflata, quam facile locum & acceptionem dant stagnationibus & infarctibus sanguinis patent; copioso itaque accedente ad sanguinem, ob calorem & motum valde tenuem & fluxilem, actu frigido liquore, non mirum est, si sanguis statim in coagulum densetur, inque vasis firmiter inclusus putrescat. Non datur hoc in casu praesentius auxilium, quam si mature & tempestive post ejusmodi grave diæticum erratum motu, sive equitatione, sive vectione, corpus exerceatur, assumpta prius ingenti quantitate potus calidi sive theiformis ex floribus bellidis, chamomillæ vulgaris, cardui benedicti, veronicæ, scordii &c. quo infensum illud vitæ coagulum impediatur, sanguinisque liber circuitus per vasa promoveatur. Unde videmus, quam simplicia, efficacissima tamen sint ad mortem tristissimam avertendam præsidia.

23. Inter affectus, ex putredine funestos, morbus ab Hippocrate niger dictus jure meritoque debet recenseri, quo incidente non modo per superiora humores atro colore tincti, sed & foetidissima purgamenta per alvum secedunt atque feruntur. Notandum hic est, vomitum cruentum & nigrum rarius esse lethalem, si vero sanguis copiosior ex venis intestini ilei ruptis ad stercorea intestini coli delabatur, ibique non statim ejectus, sed subsistens, in motum putredinosum cum ipsis alvi excrementis abripitur, intolerabilis foetor fit, qui brevi hominem exanimat. Nam, nostro judicio, qui ex hoc morbo extinguuntur, non ex profusione sanguinis, quæ non tanta est ut valde debilitare, vel ipsam mortem inferre possit, sed ex sola putredine, quam sanguis cum excrementis mixtus constituit, vita privantur. Siquidem foetidissimus ille vapor naturæ humanæ inimicissimus est, utpote qui ob subtilitatem suam intime ad fluidum, quod mem-

branofas ac nervofas partes animat, motusque & tensiones gubernat, inficit, contaminat, ac penitus destruit, unde est, quod vires, quarum origo non alia nisi subtilissima humorum constitutio est, mox vacillare & tandem penitus deficere incipiant, quemadmodum id in sphacelo & cancro exulcerato externarum partium videmus, ubi non nisi putredo, ad intima penetrans, spirituum animalium agilitatem tollendo, homines jugulat.

24. Inter morbos, qui putredinem, vitæ hostilem, fovant & maligni vocantur, sunt maxime pestis & febres petechiales, quæ interdum vehementia pestem superant, licet contagio pesti sint inferiores; siquidem hi ipsi miasmate, quod non nisi putredinosum fermentum est, propagantur & cum corpore communicantur. Nam quemadmodum exigua moles massæ, jam jam putredine correptæ, rebus corruptibilis indolis admixta, protinus eas putredine inficit & sese mirifice propagat: ita etiam tenuissimus ex peste vel ex febre petechiali infectis emissus & ab aliis corporibus aeris vehiculo susceptus vapor, partim immediate per patulos oris & nasi tubulos ac poros ad ipsam sanguinis massam, partim etiam cum saliva deglutita & alimentis ad ipsas primas vias transit, celerrime se multiplicat, & totam humorum massam tandem coinquinat, pessima symptomata producendo. Quod vero dictorum horum morborum essentia & natura in putrefactione consistat, id summa virium omnium prostratio, pulsus valde debilis & inæqualis, carbunculorum & bubonum abscessus, exulcerationes foetidissimæ, excrementa alvina foetentia, & maculæ per totum corpus dispersæ nigræ & lividæ, quæ non nisi sphacelationis species sunt, & corporis post mortem intumescencia satis abundeque indicant. Et ut ut hæc miasmata etiam sanos & qui temperatum sanguinem in venis alunt, homines infestent, id tamen ordinario observare licet, quod in corporibus cacochymicis, quorum prima regio pravis humoribus obsessa est, ma-



jorem vim atque perniciem exercent eo quod humores offendant jam ad putredinem & corruptionem pronos, cujus naturæ maxime sunt salivales, qui facile in motum fermentativum conciliuntur. Atque ex hisce jam facile patebit ratio, cur pestis maxime in pauperes grassetur, & quare illi, qui fame premuntur & inordinato victus generi adfueti sunt, hisce putridis morbis quam maxime sint obnoxii. Dysenteria, variolæ, morbilli, purpura si malignitatis speciem referunt & plures necant, non aliunde malam indolem suam, quam a pravis humoribus & succis ad putredinem inclinantibus & corruptis atque a pravo corporum habitu, accipiunt.

25. Evoluta sic pestis & malignorum morborum ac febrium natura, quæ vel in ipsa putredine, aut facili in ipsam transitu consistit, facillimum jam erit prudenti medico, apta remedia & commodam iis utendi viam ac methodum tam ad præservationem, quam ad curationem invenire. Nullum enim ad præservandum tutius ac convenientius est auxilium, quam bona diæta & prudens vitæ regimen, ne nimia alimentorum, præsertim corruptibilium, copia ventriculus oneretur. Deinde circumspiciendum est, ut salutare, quibus sanguis optime depuratur, excretiones expedite fiant & rite sese habeant. Ita enim miasma, sibi simile non inveniens, vel plane nihil operatur, vel feliciorum progressum & exitum morbi efficit. In ipsa curatione cane pejus & angue vitanda sunt illa, quæ motum intestinum sanguinis & humorum augent, uti sunt omnia sic dicta alexipharmaca & calida bezoardica ac spiritiosa, quæ ad putredinem diffundendam & accelerandam plus juvant, tantum abest, ut eam impediant. Exulent quoque omnia alcalina, volatilia, foetida, oleosa, quippe quæ non nisi putredinis producta sunt; contra vero acida, quæ figendo partes oleosas & volatiles, putredini mirifice resistunt, longe optima in peste sunt medicamenta. Quo spectant etiam terrea be-

zoardica, & quæ blande corpus in diaphoresi conservant, utpote cum non præsentior via sit ad putredinem, quæ jam incepit, removendam & partes subtilioris & fermentescibilis naturæ evacuan- das, quam cutis emunctorium, inter quæ primas tenent analeptica, quæ vires restaurant & circuitum sanguinis promovent. Terreæ vero & bezoardica id habent peculiare, ut sanguinis mixtionem quodammodo conservent, & quo minus tam cito dissolvatur impediant.

26. Spectant etiam ad morbos malignos febres hæticæ, quæ ex putredine non tam activa, sed lentius procedente & quasi domestica & vires depascentes nascuntur: has ipsas ex abscessibus corruptis & in sphacelum abeuntibus visceribus, hepate, pulmonibus, ortum traxisse, anatome corporum his morbis defunctorum testatur. Et hæc partium internarum corruptela causa quoque est, quare difficilem vel plane nullam hæc febres sanationem admittant.

27. Denique nec illud prætereundum est, quod pleræque ex acutis febres non alia ratione, quam putredine, mortem interant: testantur id sectiones statim post mortem institutæ, ubi intolerabilis foetor, qui non nisi ex putrefactione oritur, deprehenditur, & plerumque etiam ventriculus & intestina vel alia viscera nobiliora sphacelo correpta inveniuntur. Cum vero ingenerandæ putredini & sphacelationi internarum partium nihil magis resistat, quam stasis sanguinis impedire & illius æquabilem circulum conservare: quare omnis medentis intentio eo dirigi debet, ut ea medicamentorum genera præscribantur, quæ sanguinis progressum conservant, vires restaurant, & transpirationem promovent, qualia maxime sunt temperatæ mixturæ bezoardicæ, quæ e. g. aquas florum acaciæ, cerasorum nigrorum, cardui benedicti, rosarum, cinnamomi, sive vino acetum destillatum, syrupum acetositis citri, mixturam simplicem, cancrorum lapides, antimonium diaphoreticum, cornu cervi philosophice præparatum, cinna-



cinnabarim nativam vel vulgarem complectuntur, quarum usui diutius insistentum, neque concedendum est, ut alvus diu clausa maneat, quia putridæ sordes, ex universo corpore ad intestinorum canalem translatae, ibi per confectionem peiores factæ, fomitem putredinis præbent. Hoc vero artis & consilii est, ita prospicere primarum viarum evacuationi, ne plus detrimenti inferamus. Nunquam tamen huic scopo fortiora stimulantia inserviunt, sed non nisi blande & leniter laxantia & intestina eluentes clysteres adhiberi debent, idque non omni, sed remittentis morbi tempore.

28. Jam oritur quæstio pragmatica, an camphora, quæ putredini tam vehementer resistit, ut etiam ad sphacelum & gangrænam externam nihil ipsa præstantius inveniatur, & hanc ob causam alexipharmacorum princeps vocetur, ad cohibendam putredinem tuto usurpari possit? Nos hac de re ita sentimus: camphora oleum quidem est subtilissimum, sed coagulatum, admodum evaporabile, in eo tamen ab aliis oleis destillatis differt, quod hæc longe majorem æstum sanguini conciliant, quam camphora, quæ mox transpirat, cum illa ob viscidam naturam & tenaciorem contextum diutius poris & partibus immorentur, quod experimento confirmari potest: nam a drachma dimidia camphoræ, in drachma una spiritus vini soluta, & interne a sano homine sumpta, refrigerium potius in internis partibus, quam æstus percipitur, nec pulsus intenditur vel urina rubicunda fit; si vero viginti guttæ olei cinnamomi vel caryophyllorum, in spiritu vini prius solutæ, assumuntur, notabile caloris & pulsus augmentum observatur. Plurimum itaque, imo summopere in malignis commendamus interne camphorata tam ad inflammationes, quam malignas febres sanandas, idque non ex theoria vel vana speculatione, sed ex solida ratione & experientia suademus, quæ observatio in usu omnium remediorum, quæ virtute excellunt, & efficacia insigni pollent, merito adhibenda est. Nimirum sub vigo-

re & exacerbatione morbi, si cutis vel omnia excretoria spasmo contracta sunt, & interiora valido æstu utuntur, præsertim si corpus simul juvenile est & spirituosius assuetum, ab iis abstinere præstat. Commodissime initio usurpantur, si opus est, per vomitum prima regione purgata, cum pulvere bezoardico cinnabarino & ad aliquot grana admixto nitro purificato cum regimine sudorifero. Novi plurima exempla, ubi quidam maligna contagiosa febre certis indicibus videbantur correpti, qui hoc remedio mature semel vel bis adhibito, subsecuto sudore, ex toto a malo hoc liberati sunt. Tempore remissionis sub cute madida, pulsu debili, viribus prostratis camphora additis bezoardicis acidulis magno erit adversus malignitatem præsidio; urgente delirio nihil præstantius est nitro, si modico camphoræ armatum fuerit. Viribus insuper a vehementia morbi exhaustis, ut pene vacillare, nec sanguini movendo sufficere videantur, aliquot grana camphoræ, in oleo amygdalarum dulcium solutæ, egregie iis restaurandis conveniunt. Deinde in febribus, ab inflammationibus partium internarum subortis, camphora refracta dosi ad granum dimidium vel unum pro dosi cum nitro miscenda & repetitis vicibus usurpanda est, qualem pulverem in gravi peripneumonia summo cum fructu sæpius usurpavi.

29. Sequitur nunc, ut paulo diligentiori prosequamur indagine, quare scorbutici vel etiam senio confecti tam facile ex levi causa externa, vel etiam sine hac, ex interno sanguinis vitio in sphacelum fere semper funestum prolabantur. Dicimus id fieri ob sanguinem valde in putredinosam corruptionem pronum atque proclivem, si quidem scorbutus est summa sanguinis impuritas, sive cachochymia, a copia partium salino sulphurearum, quæ ob imminutas excretiones remanent, humores benignos & temperie gaudentes inquinant, eorumque mixtionem destruunt, suborta. Sanguis itaque ejusmodi impuritatibus repletus, quam facile labitur in putredinem, quare etiam fit, ut



in scorbuticis sæpius oris, faucium vel etiam aliarum partium pravæ cum ichore foetido exulcerationes incidant, gingivarum caro tumida fiat & putrescat cum summo oris foetore & lividis ac in cœruleum colorem vergentibus maculis, inferiores corporis partes corripientibus, quæ non nisi levioris sphacelationis indicia sunt. Non itaque mirum videri poterit, quare ex levissima causa sanguis in partibus subsistens in putredinem sphacelofam mortiferam abeat, & cur a causa, ut loquuntur, interna oriens sphacelus nullam admittat sanationem. Etenim sanguis in corruptionem proclivis a putredine, partem quandam jam obsidente, protinus totus inficitur, ut medicamenta etiam efficacissima periculum avertere nequeant. Senibus etiam & internarum & externarum partium sphacelatio valde est familiaris, idque ob hanc rationem, quoniam ii cum scorbuticis multum habent commune, siquidem ob densitatem & rigiditatem fibrarum, quas per ætatem contrahunt, omnis generis secretorii & excretorii tubuli angustantur, & minorem accipiunt diametrum, unde secretiones laudabilium humorum, succi nutritii in poris partium appositio & succi fluidissimi in nervosas partes influxus labascunt, totiusque corporis robur & partium vigor minuitur, corpus siccum atque aridum fit lentoque marcore contabescit. Cum vero etiam in hac ætate declinante ob coarctata emunctoria & excretiones imminutas falsæ & acidæ in primis viis accumulatur sordes, hinc sanguis senum salibus scorbuticis repletur, indeque est, quod pruritus, scabies sicca, urina rubra, calculosæ concretiones in renibus & vesica, tophaceæ in podagra, catarrhi, tussis, rheumatismi, stranguriæ, partium exulcerationes huic ætati solennes & familiarissimi sint. Jam apparet ratio, quare etiam cum scorbuticis illud commune habeant, ut eorum partes tam internæ, quam externæ sphacelationi sint obnoxie. Vidimus a levissima externarum partium læsione, v. g. a vespæ punctura, a leviori contusione a discissione clavi

pedis sphacelum in senibus obortum: vidimus etiam decrepitæ ætatis viros, ex dolore cardialgico, colico; a levi errato in diæta concitato, brevi mortuos, dubio procul ob nullam aliam rationem, quam quod in iis partibus, quas dolor occupavit, stasis sphacelofa suborta fuerit.

30. Quamobrem, quoniam humorum cacochymia & scorbutus, item ætas senilis tam gravibus iisque putridis & periculosis morbis patent, si quis se immunem ab hisce malis servare velit, is ab omnibus, quæ impuritatem sanguini inferunt, sibi cavere debet; maxime omnium vero ipsi senes, qui jam semiscorbutici sunt, ab omnibus iis, quæ scorbuto ingenerando apta sunt, abstinere debent, cujus generis sunt cibi ex mari, qui non adeo congruos corpori nostro succos præbent, carnes & cibi fumo indurati, falsi, & omnia ex alimentis rancida, corrupta & semiputrida, alimentum valentioris succi, ut sunt legumina, vita sedentaria & omnis laboris expers, aer nebulosus, frigido-humidus, gravis, aquæ graves, asperæ vel semiputridæ, habitatio & dormitio in locis humidis, diuturna cura & tristitia, excretionum consuetarum neglectus, nimius usus acidorum & spirituosorum, quæ omnia uti nunquam utilia & imbecillioribus maxime nociva sunt, ita quam maxime, ut senes ea evitent, necesse est.

## DISSSERTATIO IV. DE USU ANATOMES IN PRAXI MEDICA:

### §. I.

**Q**ui ad civilem prudentiam animum applicuerunt, hisce in eo maxime elaborandum est, ut præcipuam illius partem, geographiam recte adsequantur, eo quod hujus studio illa doctrina mirifice augetur atque illustratur. Patrem in medicina utilitatem præstat anatomia seu corporis humani notitia, qua ornatus si quis artis nostræ sacra accedit, non potest non feliciter iisdem opera-



operari. Non sufficit vero in geographiæ studio, locorum situs & positus eorumque fluvios & montes nosse, nisi & cetera, quæ hanc doctrinam imprimis commendat, ingenio comprehendantur. Scire enim oportet, quale sit incolarum ingenium, quales mores & instituta, quibus artibus quibus commerciis iidem delectentur. Scire porro oportet, quibus copiis regio adfluat, quinam plantarum atque animalium sit proventus, quænam aeris aquarumque conditio, quales denique lapides & mineralia intra abstrusa terræ viscera ibi recondantur. Hæc ubi quis in geographiæ studio observaverit, ubi in hisce posuerit operam, is certe singularem sibi inde fructum in addiscenda politica pollicebitur. Simile quid in anatomia adnotandum est, cujus exquisitior ac elegantior cognitio non nudum unius alteriusve visceris situm, non magnitudinem, non colorem, non figuram ordinemque intestinorum complectitur, sed latissime fines suos extendit. Necessarium enim est, peculiarem summoque artificio compositam cujusvis partis structuram, curatius nosse, quemque illa usum, quod officium corpori præstet, quæ illi connexio cum aliis membris sit, qualemque vim ac virtutem mirabili plane ratione ceteris iisque remotis partibus infundat, probe tenere.

2. Atque talis anatomie scientia, firmissimum utique fundamentum est, quo medicina tuto inniti potest universa, & quo revulso, rationalis medicarum rerum explicatio vacillat, praxis periclitatur, imo tota denique medicina corruit. Equidem anatomie in chirurgia usus adeo exploratus est, quem nemo temere, nisi in arte medica parum versatus, negabit; hæc enim medicinæ pars, si recte feliciterque debet exerceri, exquisitam externarum partium postulat cognitionem, adeoque anatomie beneficio plurimum præstat & ad summum evchi potest fastigium. De eo tamen a medicis, qui exercendæ magis arti, quam eidem cognoscendæ vacant, posset dubitari, num anatomia in praxi usum aliquem polliceatur? Nos, absit invidia

verbis, ita omnino censemus, medicum solidum peritumque anatomia maxime fieri, adeoque illa carere minime posse. Quod ut uberius, præsertim nostro sæculo, quo post spissas superiorum temporum tenebras clarior scientiis lux adfulsit, confirmetur, usum anatomies in praxi hac dissertatione adseremus, dignitatem hujus argumenti paulo fusiore stilo persecuturi.

3. Rem ipsam itaque adgredimur, eorum primum argumenta consideraturi, qui de anatomie excellentia secus judicant, parum illi in praxi medica utilitatis tribuentes. Hi quidem ut suam confirment sententiam, in corpore nostro naturam, per quam animam intelligunt, constituunt. Ex hac omnes motus, seu primo fonte profluere, penes hanc omnium effectum, qui in corpore accidunt, arbitrium esse existimant, cum ipsum corpus mere passivum sit organon, & ad recipiendos illos motus tantum dispositum. Illam esse dicunt, quæ corpus salvum ac integrum præstet, quæ a morbis tueatur, quæ si tentaverint morbi, eosdem depellat. Quippe hanc, quum exquisita corporis notitia prædita sit, certo ordine, mensura, tempore, gradu ac loco certumque in finem agere, ut non modo servando corpori, sed & morbis, si qui infestent, propullandis sufficiat: siquidem plebeji & imperitissimæ etiam gentes, quæ nec herbas, nec alia in auxilium morborum nossent, solius naturæ beneficio convalescerent. Ex quò concludunt, in eo maxime medico esse adlaborandum, ut solius naturæ virtutem, vias ac intentionem, neglecta corporis, quod mere passivum se haberet, cura, cognoscat. In cujus quidem rei confirmationem illud adjiciunt, & fuisse olim & floruisse medicinam, cum anatomia & physica parum excultæ fuerint: imo mendendi scientiam in nonnullis superasse nostri temporis sollertiam, licet illius ætatis medici, simplicibus contenti, metalla & mineralia ceterosque remediorum adparatus ignorassent. Et de anatomia quidem, ut ejusdem laudes imminuant,



minuant, addunt, summum etiam omnibusque numeris absolutum anatomicum, licet omnes musculos eorumque texturam promptissime intelligat, in eorum tamen curatione, si quid vitii in illos incidat, æque minus proficere, quam illum, qui nec primoribus labris hanc medicinæ partem degustaverit. Animam enim esse, quæ partes corporis componat, quæ mirabilem illam texturam moliat, quæ, si quid fractum, si labefactum sit, restituat & medeatur, frustra medico succurrente. Quum itaque in animæ potestate hæc omnia sint reposita, nihil ex anatomia commodi in praxin medicam redundaret.

4. Enarratis igitur his argumentis, quæ contra anatomiam adferunt, propositi nostri ratio exigit, ut discussis illis, anatomix dignitatem atque amplitudinem ab illorum objectionibus vindicemus. Ac primum quidem paucis dicendum videtur, quid per naturam veterum intelligi debeat. Majores utique nostri, alioquin sapientissimi, licet & ingenio & longo rerum usum plurimum valerent, rationali tamen medicina & naturali scientia, ne dicam, inferiores nostri sæculo erant, sed illa plane destituti salutarem artem solis effectibus & experimentis metiebantur. Inde est, quod illis temporibus medicina rudis traderetur, quia nobilissima doctrina de corporum natura & motu sepulta quasi jacebat, chymia vero plane ignorabatur, ut ideo quoque venia tribuenda sit illius sæculi simplicitati, quæ tot somnia & inaudita nomina nobis reliquit. Varia enim iactitabant entia activa, materiam passivam inertem statuebant, & corpus nostrum cœ merum instrumentum intuebantur. Animam porro vel naturam ens incorporeum & sapiens, ratione instructum, omniumque, quibus corpus valet, motuum rectorem ac principem credebant. Quod fundamentum cum adferrent, necessarium omnino erat, ut, cum principium incognitum obscurumque esset, omnis etiam scientia ac demonstratio collaberetur. Ex qua autem re quantum detrimenti ars medica ce-

perit & quantum e contrario praxeos incrementum inde impeditum fuerit, cum præsentis sæculi luce non obscurum esse potest, tum a nobis infra explicabitur. Etenim quum ex principio incognito nec virtutes nec effectus rerum corporearum, quæ mirabili tamen modo in nos agunt, explicari atque demonstrari potuerint, facile adparet, quantæ illis temporibus incubuerint tenebræ, quoniam in medicis rebus exponendis maximam partem ad ignotam naturam, cœ asylum unicum confugiebant. Majori ergo jure nostro sæculo gratulandum puto, quo saniori philosophia edocti sumus, omne corpus, qualecunque etiam sit, in actione esse, & per motum nihil aliud, quam *exsuperantiam* actionis virtutisque in duobus corporibus significari. Duo enim corpora dum activa illa vi, quæ ab initio a summo conditore ipsis indita & impressa est, sibi invicem resistunt, alterumque alteri cedit, motus existit, & ubi æqualis harum actionum vis contingerit, quies oritur; imo ipsi motus, qui singulari ordine, mensura, proportionem atque tempore fiunt, non aliunde quam ex sola corporum inter se agentium resistentiumque combinatione & situ eveniunt. Mirabile enim est, quam eximii effectus vel ex solo corporum situ producantur. Cujus quidem rei simplex exemplum esse potest vectis, nam ad ordinatos corporum motus non opus est incorporeo externo principio, multo minus prudentia quadam naturæ, quæ movendi instructa sit facultate; sed ipsis etiam corporibus potentia data est motrix, quæ pro illorum dispositione & augeri & imminui potest.

5. Quum proinde in rebus arte factis tam mirabiles tamque accurati effectus ex sola corporum actione profluant, multo magis id accidat necesse est in illis machinis, inque absolutissimo illo opere, quod summus ille artifex Deus composuit. Hominis enim corpus, quod divina effinxit manus, tanto nobilius tantoque excellentius est ceteris machinis, quæ humana solertia molitur, quan-



quanto excelsior augustiorque homine Deus, benignissimus ejus conditor celebratur. Hoc itaque corpus, quum compendium quasi sit omnis artificii, pulcherrima ratione constructum, omnibus fere legibus mechanicis, staticis, hydraulicis, opticis respondet, adeoque omnes motuum species cum admiratione sui repræsentat. Eo magis hinc adnitendum est medico, ut ejusdem machinæ texturam diligentissime scrutetur & exploratam habeat rationem motuum, qui in corpore excitantur, & quos aer, cibi & medicamenta corpori conciliant. Quæ ubi recte quis comprehenderit, naturæ indoles latere minus poterit, atque ex attentiore corporis contemplatione facile adparebit, illam vitæ ac sanitatis esse authorem eandemque medicamentorum operationes ceterosque motus moderari. Atque si hoc modo natura, uti etiam debet, intelligitur, firmissimum habemus munimentum, cui tota medicina recte insistit, aliorum somniis erroribusque non commovenda. Neque hac ratione ignorare potest medicus, quid benignior, quid pejor sit natura, quid vita, quid sanitas & morbus, quid ipsa denique mors denotet, neque fallere illum potest curationis & virtutis in medicamentis ratio.

6. Quod si igitur natura, uti veteribus dicere placuit, morborum *medicatrix* adpellatur nihil aliud intelligitur, quam ipsum corpus, singulari artificio ad certos motus edendos constructum. Quippe hoc solidarum fluidarumque partium, ex quibus constat, beneficio nec non virtute elementorum ciborumque motus promtos ac ordinatos edit, qui non vitam solam tuentur, sed & ad tollendas morborum causas plurimum conferunt. Quare ut hæc pulcherrima corporis fabrica recte cognoscatur, ut abditæ etiam patres oculis pateant, anatomix diligentissime opera danda est, eo quod hæc unice adcuratam corporis nostri tradit cognitionem. Deinceps corporis machina nec subsistere nec vitam tueri morbosque elidere potest, nisi externis præsiidiis, aere, victu re-

mediisque sustineatur; unde facile quisque videre potest, medicinæ necessitatem exinde comprobari. Hæc enim succurrit naturæ, hæc motus, quos molitur, considerat & moderatur, hæc quid secundam, quid adversam valetudinem præstet, perspicit, eademque providet, ut quæ inimica corpori sunt, evitentur. Et licet multi dentur, qui prosperam ac diturnam vitam etiam sine medicis consecuti sunt, minime tamen sine medicina i.e. sine remediis, sine victu comodo ad eandem pervenerunt. Quo minus quis eo insolentiæ processerit, ut temere adfirmare audeat, solam naturam sufficere morborum curæ, cum illa sola in pluribus acutis & chronicis morbis curandis parum vel nihil valeat, nisi medici manu adjuvetur? Minime itaque sufficit, hunc longo rerum usu variisque experimentis eruditum esse, vel ea, quæ prosint vel noceant, quibus signis morbus infestet vel desinat, scire, sed oportet eum quoque rationes expendere, & his innixum morbos judicare, eorum eventus prædicere, & curationem prudenter instituere. Quam quidem viam si quis ingreditur, hanc curationis methodum si servat, in arduo sanitatis negotio adeo non erraverit, ut salutarem ægrotis opem non sit præstiturus. Satis enim constat, experientiam nudam & medico & ægrotanti sæpius imponere, ideoque sub tanto causarum concursu rationem adhibere præstat, ut vera causa inveniat. Inde medicina emergit rationalis, quæ philosophiæ præceptis rite instructa longe anteponenda est ei, quæ angustis experientiae terminis circumscribitur. Rectæ vero rationi superstructa medicina non ea solum, quæ in re medica occurrunt phænomena, ex certis principiis deducit approbatque, sed ipsam etiam praxin adjuvat, saluberrima ministrans præcepta, tutam ac facilem medendi viam inveniendi. Equidem non negandum, medicinam experientiae suos debere natales, solidæ tamen rationi acceptum ferendum est, quod eadem liberalius jam floreat, & ad hoc, in quo jam constituta est, fastigium emerferit.

Ad



Ad hanc autem medicinam rationalem ut perveniamus, anatomia summe est necessaria, sine cuius præsidio frustra illam nobis pollicemur.

7. Equidem anatomia directe & immediate ægrotos non curat, plurimum tamen confert, ut curatio tutius jucundiusque perficiatur. Quam in rem eleganter scribit CORNEL. CELSUS in præfatione p. 13. *Quam, inquit, multa sint, ad ipsas artes proprie non pertinentia, tamen eas adjuvant, excitando ingenium artificis.* Itaque ista quoque rerum naturæ contemplatio, quamvis non faciat medicum, aptiorem tamen medicinæ reddit. Pari ratione nec anatomia medicum constituit, eundem tamen ornat & salubribus præceptis, quibus in praxi egregie proficere potest, instruit. Nam ad errores in praxi detegendos, ad applicanda remedia, & ad prudentiorem prognosin nihil utilius commodiusque est ipsa anatomia. Quæ omnia in nostra dissertatione uberius exsequemur.

8. Placet vero initium capere a divino illo ceterisque omnibus longe præstantiori invento, sanguinis circulo. Ex quo divino munere detecto quanta medicinæ lux adfulserit, & quam atroces inde tenebræ ab hac arte depulsæ fuerint, non difficile est judicare. Nam cum ex accuratiori corporis inspectione pateat, sanguinem ceterosque humores partium solidarum musculorumque pulsu ac tono continuoque per innumeros tubulos motu circumvolvi, manifesto inde, quid vita sit, edocemur. Ex quo simul intelligi poterit anatomix præstantia, si perpendere velimus, quantum veteres, qui utilissimæ huius artis culturam neglexerunt, in definienda vita adeo hallucinati fuerint, ita prorsus, ut mera sibi somnia & nugæ de re tam necessaria imaginati fuerint; unde est, quod causam vitæ, animæ vel naturæ actionem, in corpus, spiritum vitalem, cordis flammulam, calidum innatum, quatuor humorum temperiem, spiritumque insitum & influum esse statuerint. Quæ figmenta cum nullius sint usus, uno quasi ictu conciderunt, sanguinis circulo in lucem

prolato, qui quandiu corpus perenni flumine perluit, ipso sensu teste, vita adesse dicitur. Hujus quippe salutaris motus officium est, ut corpus corruptioni alioquin valde opportunum, salvum & ab omni labe integrum præstet. Neque enim ignorare oportet, vitam corporis nostri proprie ac formaliter non esse durationem seu conservationem mixti, quoniam, si hac ratione vita sustineretur, lapidi vel pani etiam, quamdiu huic mixtio sui constaret, vita tribui posset; sed vita rectius est perennis actio & motus, cuius præcipuus effectus est, ut a tetra corruptione corpus præservetur. Scilicet, uti putredo nihil aliud est, quam motus intestinus ab externo principio excitatus mixturamque partium destruens, ita etiam nulla re perinde inhibetur, quam motu intrinseco, qui a progressivo promovetur. Isque motus circumfuso aeri, externæque eius in intimam sanguinis mixtionem ac crasin actioni mirifice resistit, siquidem corpus statim ejus injuriis patet, simulac fluidæ partes illius conquiescunt. Incredibile vero est, quantum utilitatis egregium hoc inventum, ut rei medicæ universæ, ita maxime pathologiæ & therapix attulerit. Quippe ex hoc discimus, nihil vitæ esse intestius, nihilque valetudinem magis adfligere, quam ea, quæ hunc salutarem sanguinis motum impedire, vel turbare ullo modo valent. Unde haud sollicitè circumspicienda causa est, cur frigus vehementius corpori adeo sit inimicum, cur frigidus potus corpori æstu soluto ingestus spiritum sæpius elidat, hominemque exanimet. Patet etiam exinde, cur concretiones polyposæ intra oscula vasorum cordis pulmonumque hærentes, sanguinis iter intercludendo, repentina inopinataque morte suffocent. Ex eodem sanguinis motu ratio nobis constat, cur venena corpori tam sint infesta, quod nostro quidem iudicio vix alia ratione accidit, quam quod spasmodum atrocitate vasa constricta perennem sanguinis circulum interceptant. Cognoscimus porro inde, omnia acida, viscida & alimentorum copiam vitæ corpori-



porique esse infensam, quod vitalem corporis succum crassum vel copiosum reddendo, liberum ejus motum cum præsenti valetudinis damno remorantur. Quæ cum ita sint, facile nobis inde optima valetudinis vitæque prorogandæ præcepta elicere possumus; quippe is, qui vitam diuturnam prosperamque appetit, hujus inventi beneficio facile videt, in eo sibi elaborandum maxime esse, ut perennis ille sanguinis motus salvus incolumisque conservetur. Unde vitanda sunt, quæ sanguinem coagulant, aut quæ eundem, ut propter abundantiam minus recte vasa transire possit, nimium augment. Sicut contra illa unice commendari debent, quæ vitalem hunc laticem fluidum reddunt, uti sunt salia volatilia, aromatica, infusa herbarum balsamicarum calida, quæ motum debitum corporis optime tuentur. Imo exinde iudicatu facillimum est, sanguinem, si nimium adfluat, esse imminuendum, adeoque sanguinis missionem, ceu summum præsidium, merito hoc fine adhiberi.

9. Deinceps quoque ex anatomia, ceu fonte uberrimo, facile causam haurimus, cur omnibus mors certa atque necessaria, nec ullis evitanda remediis impendeat. Vita nempe, quæ perpetuus fluidorum motus est, non temperie tantum fluidorum absolvitur, sed solidarum maxime motu velut fultura quadam sustinetur. Jam ubi adpropinquat senectus, fibræ motrices sensim indurescunt, crassæque & immobiles fiunt, pori occluduntur, & vasa opplentur; unde fibræ, tenuissimo nervorum fluido parum recte animantur, rigidæ minusque flexibiles & sanguini per corpus propellendo fiunt ineptæ. Accedit, quod spiraculis incute obstructis, excretiones retardentur, sordibusque intra corpus accumulatis cacochymia primum, mox ipsa mors inevitabili sorte consequatur. Quod dum accuratius consideramus, facile nobis vitam diuturnam consequendi suppetit ratio, optimeque perspicitur, eo præcipue adnitendum esse, ut succi corporis subtiles tenuesque semper maneant, ne

fibræ inde crassitudinem & rigiditatem induant, porique obdurentur. Cui fini mirifice inservit motus & exercitatio corporis, qua fluida corporis nostri egregie conservantur. Referri huc porro debet aer subtilis & temperatus, aqua levis & tenuis, item vinum tenuissimum ac temperatum, victus, qui non multum terrestribus compactæque substantiæ habet, levis & facilis, animique tranquillitas. Hæc ubi diligenter custodiuntur, ad has leges valetudo componitur, non potest non illa protrahi diutissime. Neque eodem fine omittenda est crebrior venarum sectio, quæ quantum ad vitam producendam valeat, ex hoc invento idem tamen comprobatur. Satis enim constat, hoc remedio sanguini, qui copia sua redundat, rectum per corpus cursum restitui, cum alioquin propter abundantiam crassior factus, suum per corpus iter tardius explicet. Neque verendum est, ut hoc remedio vitalis ille fons exhauriatur, siquidem compertum est, veteres non ad uncias, ut hodie fieri solet, sed ad integras libras sanguinem sine ulla singulari noxa detraxisse, Galenoid bene adnotante.

10. Anatomix porro beneficio exploratissima nobis est formalis mortis causa, quæ, utcumque etiam e vita tollat hominem, intra quatuor omnino classes concluditur. Adest enim vel inflammatio partium nobiliorum, uti meningum, pulmonum, ventriculi, ac intestinorum; vel sanguis aut serum extra vasa secessit, uti in cerebro, thorace, & abdomine fieri solet. Vel etiam viscus porro aliquod corruptum est; vel polypus intra cordis pulmonumque vasa hærens, liberiori sanguinis cursui obicem ponendo, hominem strangulavit. Hisce quatuor causis omnes omnis temporis homines extincti sunt, & quotquot eorum incideris, unam ex his semper reperies. Et inflammatio quidem in acutis, corruptio viscerum & seri sanguinisve extra vasa secessio in chronicis morbis mortem adfert, polypus vero repentinæ mortis causa plerumque observatur. Quæ quidem causæ & illud demonstrant, mor-



mortem nihil aliud, quam sanguinis circuli esse eversionem. Et ex eadem contemplatione sequitur, illum, qui mortem præcavere tentat, eo respicere oportere, ne partes corporis internæ inflammantur, ne labem & obstructionem viscera contrahant & sanguis vel serum extra vasa sua delabatur.

11. Idem fundamentum, quo nihil in re medica præstantius utiliusque est, clarissime causas sanitatis explicat & abunde satis comprobat, illam haud aliunde, quam ex libero & moderato sanguinis humorumque circuitu & iusta excretionum progressionem derivandam esse. Ubi enim sanguis tranquillo placidoque & disposito cursu per corpus fertur, tunc non modo diversa illa elementa invicem recte miscentur, sed inutilia etiam, & quæ tam copia quam qualitate nocent, extra corpus ejiciuntur. Ita omnes actiones secundum naturæ ordinem & regulam procedunt, ita sanitas & ejus vigor conservatur. Errant proinde, qui vitam in excretionibus versari adserunt, quod vita nulla, excretionum habitatione potest desinere, imo experimentis constat, plurimos mortalium sub ipsis excretionibus interire. Quapropter rectius adfirmamus, sanitatem a sanguinis circulo dependere, qui ubi valet, & ordinate corporis transit, excretiones etiam illibatas præstat, quæ contra, languescente illo, vel per morbum immunito intercipiuntur. Neque enim quisquam morbus est, ubi excretiones non adfligantur; imo sæpe ægrotos non tam his impeditis quam nimium procedentibus decedere videmus, uti quidem in acutis passionibus, in hæctica, dysenteria similisque generis morbis observare licet. Atque ideo is medicus officio suo convenientem se gerit, qui in curatione morbi non sanguinis tantum circulum, sed excretionem etiam, præsertim transpirationem intuetur.

12. Quum vero fluida corporis nostri sæpius de die corpus transeant, & natura ubique congrua excernendis sordibus emunctoria constituerit, ut eadem aperta semper servantur, providere oportet.

Ita enim sanguis subtilis, purus ac temperatus redditur, & quæ fomitem morborum præbere poterant, ex corpore eliminantur. Inter hæc autem emunctoria, quorum plura in corpore sunt obvia, primas tenet cutis, & quæ hujus ope per invisibilia foramina, ut CELSUS inquit, perficitur transpiratio. Hæc quid corpori præstet, quantumque conservandæ valetudini intersit, vel exinde de conjicere licet, quod per hanc plures cum mole tum virulenta qualitate noxiæ sordes exeant, quam per reliquas excretionem omnes. Ex quo manifestum est, nihil æque morbis occasionem præbere, quam si excretionem supprimuntur, maximeque sordium exspiratio inhibetur. Unde recte curat, qui, cum origo causæ ipsum non fallat, excretionem restituit, & obstructa emunctoria, malignis sordibus promptum facilemque exitum moliendo, recludit. Longe vero optimum est, motu auctiore id perficere, qui cum in acutis passionibus, præsertim febribus præsens sit, facile ratio patet, cur, qui ejusmodi malis detinentur, solius naturæ beneficio, medicorum parum admodum juvante, plerumque sanescant. Intensior enim ille motus causam morbi expellit, emunctoria reserat, humoresque resolvit, & intra breve spatium valetudinem reddit. Quod aliter evenit in longis morbis, in quibus dum tarde cunctanterque motus fiant, arte excitandi augendique sunt, ut naturæ imbecillitati hoc modo succurratur. Ideoque in ejusmodi malis juvant sudorifera, martialia, amara, salina, purgantia, item thermæ & acidulæ; quorum remediorum virtus unice exinde deducenda est, quod fortiori motu obstructions solvant, & excretionibus restitutis fluida in ordinem ac numeros redigant. Par ratio est, cur motus, cur aquarum salubrium thermarumque potus, item aeris cælique clementia egregie diuturnos morbos allevant, plurimumque in illis evellendis valeant.

13. At cum nobilissimum hoc inventum veteres ignoraverint, minus mirari debemus, varios eos in praxi errores



commisisse. Ut alia omittamus, notum omnino est, quam solliciti, imo religiosi fuerint in venis incidendis, falso persuasi, hanc vel illam venam proprie capiti, cordi, hepati vel certæ parti esse consecratam, eamque in hujus partis morbo pertundi oportere. Quæ somnia, procedente tempore, quo anatomia subtilius cœpit excoli, plane exspirarunt; siquidem edocti sumus, duplicem tantum V. Snis ulum, evacuatorium atque derivatorium celebrari; quorum ille in adfluentia sanguinis adhiberi debet, parumque refert, quam venam aperias: in hoc vero, seu derivatorio sufficit, in superiore vel inferiori corporis parte, prout morbi ratio exigit, sanguinem educere.

14. Ex anatomia quoque constat, quatuor illos humores eorumque intemperies ceu morborum causas falso a veteribus fuisse propositas. Illi enim humores nusquam in corpore adparent, adeoque ruat necesse est illorum medicina, quam in tam lubrico fundamento constituerunt. Inde enim est, quod illorum medicamenta maxima ex parte purgantibus validis absolverentur, dum purgantia, uti vocabant *electiva* sibi fingeant, ex quibus aliud bilem, aliud melancholiam vel pituitam educere arbitrabantur. Ac licet facile concedamus, ex his etiam remediis, uti in ceteris alterum alteri præstare, & in certis morbis certisque subjectis elidendæ morbi causæ magis convenire, sicut hac de re latius olim egi in *dissertatione de medicamentis specificis*, minus tamen probanda est illorum sententia, quod hæc sanguinis circulo, ex quo unice vitæ morborumque ratio fuit, manifesto adversatur. Nam quod validius fortiusque purgat, illud omnes humores, quicunque corpori insident, seu viscidi seu biliosi sint, ejicit, unde & in eo peccabant, quod tam frequens ipsis fuerit valentissimorum purgantium usus. Galeni enim, maximeque Hippocratis ætate non locus erat clementioribus laxantibus, sed helleboro, colocynthide, scammonio & elaterio similisque commatis purgantibus ægri torquebantur. Quæ tamen me-

dicamenta, experientia teste, corpori nostro sunt perniciosissima, tantum abest, ut singularem opem adferant. Hæc enim intestinorum tonum ac robur, quod ad tuendam vitam summe necessarium est, solvunt, spasmodicis membranarum contractionibus vires infringunt, bilis balsamum evacuant, & humorem, qui per cutim secedere debebat, ab ambitu corporis ad centrum provocando, salutare excretionum opus interturbant. Neque alia hujus erroris causa fuit, quam anatomix ignoratio & contemptus, quæ postquam suas eluctata est tenebras, & hos errores denudat, & ut ab iis caveamus, saluberrime nos instruit.

15. Dein, quid ingens illa medicamentorum copia, quæ in immensam propesylvam excrevit, aliud demonstrat, quam intempestivum in praxi studium & vanam industriam? Quid enim volunt tot cordialia, hepatica, splenetica, uterina, antepileptica, anthelmintica singulisque corporis partibus dicata remedia, nisi ut aperte contestentur, medicum, cum in tanta remediorum adfluentia versetur, ne paucorum quidem vires satis intellexisse. Paucis enim selectisque auxiliis curantur morbi, quæ dum ignorarunt veteres, necessario tantam remediorum molem, tamque ineptas, inutiles & contrarias confarcinarunt species. Accedebat, quod eorum ævo generosa remedia nondum innotuerint, ut sunt salia volatilia, salia neutra, rectus anodynorum usus, item quæ ex marte, antimonio & mercurio adparantur medicamenta, unde & chronicis malis expugnandis parum apti erant, aut quid in ejusmodi morbis auxilii adferebant, id victu, abstinentia, sanguinis missione, frictionibus, balneis, exercitationibus, aeris mutatione, ferro denique & igne præstabant. Neque mediocriter curam juvabat ipsa coeli ratio, sub quo degebant præsci medici; quippe in locis illis calidis, ut in Græcia & Italia non tam altis radicibus defixi morbi inhærebant, adeoque vel mediocri accedente cura evincebantur. In acutis vero passionibus ut ubique



que plus natura, quam ars sibi vindicat, ita nec dubium est, quin apud veteres ejusdem beneficio cœlique & aeris clementia celeres isti morbi fuerint curati. Quod itaque non simili remedium legere nos indigeamus; quodque facilis, tuta paucisque auxiliis curandi ratio nobis contigerit, anatomiae in acceptis ferendum esse indicamus. Nam cum in omni valetudinis genere id maxime medicus debeat curare, ut proportio ad vasa & vires, temperiesque & mixtio humorum conservetur, & ut iidem in suo circulo retineantur, excretionibus rite procedentibus; facile conjicere licet, quam pauca ad hoc ipsum perficiendum requirantur remedia.

16. Proposita igitur jam sanguinis circuli in praxi utilitate, pergimus ad ceterarum partium considerationem, quam illae in praxi usum promittant, explicaturi. Sistemus vero primum velamentum corporis nostri cutem, cujus texturam si ex anatomia penitus inspicimus, vulgi circa eandem errores facile evitare & egregie inde in curatione adjuvari possumus. Desinunt in cutem varia vasa, tendines & nervi, quibus intertextae sunt minimae glandulae seu villosa corpuscula, eo fine, ut serum crassum, salum agilissimumque aereum principium inde separetur. Quam structuram si practicus recte intelligit, ex facili videre potest, per cutem, quae tenuissimis partibus excernendis constituta est, colluviem viscidam, & biliosam, in primis viis residentem inique prorsus expurgari. Ubicunque igitur ejusmodi humoribus ventriculus & intestina turgent, uti quidem in febribus intermittentibus, in quartana, in hysterico & hypochondriaco morbo accidere solet, sedulo fugere oportet medicum calidiora, & quae sudorem fortius provocant medicamenta. Haec enim alvum, quae tamen maxime moveri debebat, omnino non movent, ut eandem potius adstringant, sordium colluviem a centro ad totum ambitum corporis pellendo eademque cum sanguine commiscendo.

Idem pariter summa cum cura vitandum est, si bilis ex subita iracundia suas egressa alveos ventriculum vel intestina inundavit, quippe si calidioribus commota ad sanguinem transit, veneni naturam atque noxas æmulatur, cum praesenti ægrotantis discrimine. In tali itaque casu recte suo defungitur officio medicus, qui mosem istam humorum ventriculo & intestinis insidentem per congrua loca lenibusque laxantibus evacuare satagit.

17. Minus contra hanc evacuandi rationem congruere, cum salinae, causticae & subtiles fordes sanguini & lymphæ sunt admixtae, eadem anatomica observatione erudimur. Hisce enim per cutem parari debet exitus, ideoque curandum, ut pori conveniente calore & remediis aperiantur. Idque in omnibus morbis, ubi ejusmodi fordes peccant, animadvertere oportet, quales sunt erysipelas, scabies, purpura, petechiae, variolae, morbilli, arthritis, podagra &c. praesertim si exanthemata retro in corpus abierunt. Quae omnia confirmant, medico, qui minister naturae esse debet, in hoc addiscendo nihil melius quam anatomiam epitulari. Quoniam autem cutis propter nervos ac tendines, qui in illam terminantur, mollissimi exquisitissimi que est sensus adeoque facillime constringitur, practico exinde illud succurret, vitanda esse diligentissime, quae poros stringunt & salutarem corporis transpirationem impediunt. Idque in primis observare oportet, ubi impuris falsisque sordibus sanguis abundat, sollicitèque providendum est, ne acris & noxia materia, quae per cutem exspirare debebat, imprudenter intra corpus & ad sanguinem retro pellatur. Quo fine abstinendum est a frigidis, ab unguentis, emplastris, humidis, ceterisque quae cutem contrahunt omnibus: quod observare maxime convenit in exanthematicis malis, in scabie, arthritide, tinea capitis, lepra, erysipellate, item in sudoribus criticis, quia metus est, ne incauto talium rerum usu in perniciem ægrotum præcipitemus.

18. Pro-



18. Proxima cuti pinguedo est, a cuius contemplatione non sine fructu artem exercens dimittetur. Nam hæc cum alias partes liberalius, alias parcius investiat, exquisitam tradit rationem, qua externa remedia seu topica, ut vocant, recte applicari debeant. Ita v. g. parum is adlevabit ischiadicos dolores, qui natibus vel femori auxilia externa admoveat, quoniam ob abundantiam adipis musculorumque crassitudinem medicamenti vis adfectam partem minus penetrare valet. Neque melius fecerit, qui stomachi morbos repressurus emplastra stomachica abdomini vel sterno imponit, quod hæc remedia ob pinguedinem, qua abdomen turget, parum ibi operantur. Illud proinde ex anatomicis præceptis tenere oportet, adplicandis topicis eas convenire corporis partes, quæ minus robustioribus musculis & nimia pinguedine conteguntur. Quare optima sunt nervea & tendinosa loca, uti plantæ pedum, volæ carpique manuum, tempora, nucha, commodumque etiam est, sub axillis, sub genibus ejusmodi remedia imponere, unde mirificam illorum vim per totum corpus experimur. Ubi itaque in æstu ac fervore nimio refrigerandum corpus est, præstat his partibus, quas recensuimus, acidula clementerque reprimentia admoveat, quorum usu corpus egregie refocillatur. Idem fieri oportet in compescendis febrium spasmodis, quo in casu roborantia & subadstringentia emplastra nuchæ temporibusque & manuum carpi non sine fructu adplicantur. At ubi confirmandum est nervosum genus, juvat idem tamen nucham, futuras capitis & tempora blandis balsamicis & corroborantibus fovere. Ubi vero torpens nervorum vis excitanda, vel viscosus humor intra partem aliquam defixus avertendus est, vesicatoriis nuchæ adplicatis optime id perficitur. In lue porro venerea & scabie, quæ mala opportuna sæpe salivatione tolluntur, optime tutissimeque movetur saliva, si sub axillis ejusmodi remedia imponuntur.

19. Pari felicitate ac prudentia in ad-

hibendis copiosis uti poterit medicus, si accuratorem umbilici notitiam sibi adquisiverit. Notum quippe est, circum umbilicum, qui per se sensibilissimus est, lineam albam poni, in qua concurrunt tendines eximii, ut clare inde eluceat, hanc partem corporis subtilissimo omnino sensu præditam esse, ideoque cum toto corpore conspirare. Memorabile enim est, omnes partes corporis nervosas, si validius irritantur, vel alio modo adficiuntur, totum simul corpus, ob nervos mutuo perpetuoque nexu per universum corpus dispersos, commovere. Quare non mirandum est, remedia umbilico admota, virtutem suam non intra spatium illud continere, sed eandem in remotissimas etiam partes diffundere, eximiis per umbilicum nervis discurrentibus. Ita vel domestico experimento constat, butyrum insulsum avellanæ magnitudine umbilico inditum infantibus alvum movere. Imo quoque si vermes intestina vexant, inunctus felle taurino inspissato cum unguento de arthanita & oleo colocynthidis mixto umbilicus intestina ad vermes ejiciendos stimulat. In colica convulsiva, gravissimo aliquin malo, mirifice sedantur atrocissimi dolores, si aliquot zibethi granis umbilicus illinitur. Neque minus levamenti expectandum est in urinæ suppressione, si umbilicus oleo terebinthinæ diligenter fovetur, quippe urina inde mirifice cietur, cum arteriæ umbilici vesicæ lateribus jungantur.

20. Facilius autem partium interiorum morbi accurationes in notitiam venient, si quis earum sedes atque situs recte consideraverit. Scimus igitur, ventriculum maxima ex parte ad sinistram latum inclinare, orificiumque illius superius spinæ dorsi adnecti, cum inferius contra cordis scrobiculo contegatur. Ex quo manifesto adferitur, acutissimum illum dolorem, qui perperam a corde adpellationem trahit, ex ventriculo omnino provenire & cardialgiæ sedem non in sinistra ventriculi parte, quæ male illi dolori assignatur, sed in dextra potius residere. Præter ipsum enim situm dolo-



doloris, qui sub scrobiculo cordis urit, vel exinde etiam id adparet, quod bilis, quæ frequenter hunc adfectum excitat, huic quam sinistro orificio vicinior sit, unde etiam, ii, qui hepatis obstructione laborant, frequentissime hoc malo detorquentur. Jam cum ipse dolor ad dorsum usque pervagetur, necesse est, ut sinistrum etiam osculum simul patiatur. Ostendit igitur anatomia, emplastra, externa spiritiosa, balsamica & quæ ventriculo corroborando sedandisque doloribus inserviunt, scrobiculo cordis & sinistro lateri sub costis spuriis esse adplicanda. Perspicimus etiam inde, optime hunc adfectum levare posse ab iis remediis, quæ humorum acridinem temperant, & flatus bene discutunt. Quoniam porro ventriculus, uti ex anatomia constat, sub diaphragmate situs est, sæpius accidit, ut a sola ejus inflatione summa excitetur anxietas spirandique difficultas; quo in casu ignarus anatomie medicus vehementer erraverit, si pectoralia dulcia & emollientia adhibet, in pulmonibus causam mali positurus, sed removenda potius est causa, quæ est crassa pituita & inflatio, spasmusque ventriculi sunt tollendi, quod leni sæpe emetico laxantibusque optime peragitur.

21. Coli situs & sinuosa ejus textura, quam ex anatomie contemptu ignorabant veteres, & ipsos & plurimos ex recentioribus ita fefellit, ut tumores maxime sinistri lateris, qui flatibus & scybalis intra flexuras coli detentis in malo hypochondriaco nascuntur, ex lienis vitio arcesserent. Hi si didicerint, sub diaphragmate jacere lienem, eundemque propiorem esse spinæ, facile tam gravem errorem evitassent. Notum enim est, hypochondriorum dolores, ardores, tumoresque sub costis spuriis, maxime in sinistro latere adparere. Accedit, quod lien minore sensu polleat, & propter magnitudinem, qua molestus plerumque est, gravativo fixoque magis dolore vexet, cum in hypochondriaco malo acutior quidem dolor, sed qui citius transit, omnino observetur. Quæ cum

ita sint, clare patet, in curatione illius mali clysteres carminativos, & qui acrimoniam humorum diluunt, nerveasque coli membranas deliniunt, ceteris omnibus remediis merito anteferri. Quo loco nec prætereunda sunt emplastra carminativa, quæ sinistro lateri imposita, tonum coliroborando, eximium in hoc malo præstant adlevamentum.

22. Ingenium medicorum, qui paulo rudiores in anatomia sunt, aliud interdum malum torquet, quod ex colo idem tamen proficiscitur. Quandoque enim accidit, ut in dextro latere circa iliocostam subitus & atrox dolor cum contramaci alvi adstrictione invadat. Cujus mali causa inde petenda est, quod coli ibi principium situm sit, idque eodem loco ex satis robustis membranis atque ligamentis constet, ut eo promptius sterora sursum protrudere possit. Ubi vero imbecillioribus personis ex morbo graviore tonus ac robur hujus intestini imminutum fuerit, flatus & excrementa ibi retenta illud distendunt, tumorem mentiuntur, summisque cruciatibus ægrotum conficiunt. Causa igitur mali demonstrat, unice hic auxilio esse cataplasmata carminativa, ex seminibus & herbis carminativis parata, & aptissimum quoque esse, clysteribus oleosis intestina eluere, quod hi, dum coli principium subeunt, sordes egregie emolliunt & foras ejiciunt.

23. Gravissimi sæpe dolores circa umbilicum infestant, qui in ilio existentes perverse pro colicis a quibusdam medicis, qui expertes anatomie sunt, habentur. Frequens certe hoc malum est, frequentius tamen Hippocratis sæculo, qui sæpe hujus, colici autem doloris nunquam meminit. Idque inde accidere videtur, quod cœli beneficio in Græcia hæc passio, uti & hypochondriacum malum facile evitari potuit. Proinde in cura valde expedit, hunc intestinorum situm recte perspexisse, quia verendum alioquin est, ne frustra huic morbo medicinam moliamur. Nam cum in colico dolore clysteres omnino convenient, minus tamen in illi dolore eosdem juvare tanto



tanto minus dubitaveris, quanto clarius est, clysteres ultra coli valvulam nunquam pervenire. Quare in hoc adfectu frustra ad clysteres pervenitur, sed conducit potius externe emplastra & unguenta, interne oleum amygdalarum dulcium cum oleo anisi mixtum adhibere. Recte etiam dantur theriacalia & quæ ex castoreo parantur, medicamenta, quoniam hisce spasmorum ferocitas egregie sedatur.

24. Qui intestini recti situm, & huius arctissimam cum vesica connexionem tenet, eum non fugere poterit ratio, cur in urinæ difficultate, præsertim si a læsione vel calculo accidit, perpetuo teneamus adsit, & in eodem malo alvus sæpe superne delabatur. Reddet idem & facile rationem, cur versa vice in tenesmo vesica ad reddendam continuo urinam stimuletur. Tali itaque in casu probe examinandum est, an vesica, an intestinum rectum laboret, ne, fallente causa, secus cedat curatio. Male enim vesicæ admoventur remedia, si recto intestino malum inhæreret.

25. Æque necessarium est vesicæ situm perpendere. Posita hæc est in ipso sinu sive pelvis superiori parte, jungiturque ossi, quod pubi subest. Hæc speciosas copiosasque & carneas fibras ostendit, quarum contractione urina redditur, quæ contra, ubi ex nimia humoris copia vesica distenditur, fibrarumque elater relaxatur, ibi supprimitur. Unde in adlevando hoc malo discimus, pubis regioni admovenda esse remedia, quæ fibras ad contractionem sollicitant, ut hoc modo urinæ fluxus restituatur. Proinde non contemnendæ virtutis in hoc malo sunt olea, uti scorpionum, juniperi, item allium, cepa tosta ceteraque remedia, quæ collapsum vesicæ tonum excitant & corroborant.

26. Ad vesicam ureteres feruntur, qui obliquo itinere supra musculos psoas posteriori vesicæ parti inferuntur. Hic cum ex fibris musculosis & tendinosi contexti sint, a calculo intra illos desidente acriter irritantur. Quo igitur ab hac etiam anatomica contemplatione doctior

recedat medicus, scire omnino licet, vitandum hic esse oleum juniperi, terebinthinæ, balsamum sulphuris & illius generis auxilia, quæ pellendo juvant, quoniam in hoc malo relaxare oportet partes spasmis contractas, quo majori commodo ad olea expressa, ut oleum amygdalarum dulcium, nucis moschatæ, oleum liliorum albor. scorpionum, seminis papav. carvi & cetera transire convenit, quippe hæc lumbis & ureterum regioni illinita mirifice dolores consopunt.

27. Eiusdem momenti utilitas exinde ad curandos morbos fluit, quando egregios illos nervorum plexus, varias arterias, venas & tendines consideramus, qui circa dorsalem ultimam & primam lumborum vertebra mesenterio impliuntur. Inde enim facile auguramur, acutum illum dolorem, qui in principio febrium intermittentium in variolis, morbillis, item in passione hysterica ceterisque acutis passionibus adoritur, non a renum calculo derivandum esse, uti plerumque solet, sed a plexibus potius nervosis mesenterii merito deduci. Quippe si hi distenti & vellicati fuerint a flatibus intra intestina hærentibus, vel a sanguine ibi stagnante, dolor in spina dorsi, oritur. Peritissimum olim practicum in extinguendo hoc malo frequenti in usum emplastrum spermatidis ranarum cum oleo hyoscyami & camphora habuisse novi. Contra narcoticis adstringentibus remediis, item saturninis emplastris pro auxilio perniciæ ægrotis potest accelerari. Et ejusmodi quoque remedia ad sedandum menstruorum fluxum adhibita eundem non tam cohibuisse, quam cum summa perniciæ plane intercepisse, sanguine ad alias partes vi medicaminis inclinata, sæpius mihi observare licuit.

28. Descendimus jam ad intimam viscerum fabricam, ut exinde doceamus, quantum lumen facemque praxi anatomia præferat. Ut a pulmonibus igitur initium faciamus satis liquet, hoc viscus, cum ex meris vasis constructum sit, sanguine mirifice abundare, quippe per



hoc innumerabiles vasorum propagines flexu multiplici & tortuoso serpunt, continuo itinere bronchia amplectentes. Ipsa quoque arteria pulmonalis, qua ex dextro cordis ventriculo in pulmones sanguis effunditur, majorem amplitudinem refert ipsa aorta. Præterea pulmonalis vena tot mirabiles ramos per hoc viscus dispergit, ut, si injiciatur liquida cera, insignis vasorum numerus inspicientium oculis se offerat. Quod argumento esse potest, eos morbos, qui pulmones male habent, maxime ex sanguinis stagnatione ejusque per hoc viscus motu impedito provenire. Loquuntur id hæmoptysis, peripneumonia, pleuritis, phthisis ceterique fere morbi omnes, qui in hoc viscus incidunt. Quibus recte perpenſis, evidens est, in pulmonum malis venæsectionem non succurrere solum, sed necessariam omnino esse, & cum ad ipsam curam tum ad præſervationem singularem præſtare opem. Atque hinc satis commodè cernimus, omnia remedia, quæ sanguinem, qui intra hoc viscus coit, solvunt fluidumque reddunt, in pulmonum malis merito prædicari. Inter quæ remedia excellunt infusa calida, quæ ex herbis balsamicis, & subtile sal nitrosum continentibus, parantur. Perspicuum etiam inde est, in ejusmodi malis nihil infestius nihilque perniciosius esse, quam acida adstringentia, styptica, viscida, & quæ sanguinem in cursu suo impediunt, adhibere. Et quoniam pulmonem aspera arteria intrat, eaque interius membrana nervosa circumdatur, hinc necesse est, ut omnia acida & acria in pectoris adfectibus, quippe noxiosissima, sollicitè fugiantur. Hæc enim non tantum majorem sanguinis copiam alliciunt, quæ tamen jam præsto est, sed quod pessimum est, sanguinis etiam motum sistunt.

29. Sequitur, ut hepatis structuram oculis subjiciamus, quod viscus, si ullum aliud, sanguine turget, & varia vasa, quorum numerum inire difficile est, ostendit. Imo ipsæ glandulæ, quæ hepatis subeunt, nihil aliud sunt, quam in-

numeræ vasorum propagines, quæ a vena portæ & cava ortæ membranaceas cellulas ovalis figuræ convolutæ efformant, uti probe adnotat vir omni laudis genere abundans *Vienssens in novo vasorum systemate p. 119*. Glandulæ enim hepaticæ, muscum quasi exprimunt, qui ex variis vasculis varie intertextis & coherentibus invicem coagmentatur. Quod si itaque perpendimus, in hepar maximam sanguinis partem ex liene, omento, ventriculo ceterisque intestinis per venam portæ exonerari, hanc vero debito carere pulsu, facile intellectu erit, hoc viscus maxime stagnationibus sanguinis & iis malis quæ inde sequuntur, obnoxium esse. Fatiscientem enim sanguinis motum per hoc viscus excipiunt obstructions vasorum, infarctus atque indurationes, & plurimi ex chronicis malis inde oriuntur. Nam si per venam portæ pariter ac per cavam clausum est sanguini iter, repetit viscera, unde exierat, & ad lienem, pancreas, mesenterium ceterasque partes derivatur. Quo fit, ut, dum ibi residet, vasa distendat, membranasque nerveas irritans varia spasmodica mala & obstructions excitet. Inde lymphæ extra vasa elabatur, inde tumores, hæmorrhoidum fluxus vomitus cruentus, morbus niger & alia tot malorum agmina adoriuntur. Ut ejusmodi igitur mala a corpore arceantur, ex anatomia prudens medicus sine ullo negotio intelligit, caput curationis hoc esse, ut sanguinis motus per hoc viscus liberior reddatur. Unde auxilio sunt acidulæ, thermæ, aquæ salubres liberalius potæ, item omnia amara, salina, salia fixa neutra, & ut breviter dicam, omnia, quæ fluidum sanguinem præstant, quæ robur solidis addunt, sanguinisque circulum pristinæ integritati restitunt. Cumque sanguis uberiori copia accumulatus, uti sæpe fieri solet, vehementer noceat, non arduum est judicare, sanguinis detractionem malis hujusmodi egregie auxiliari, eo quod hæc sanguinis abundantiam, quæ extendendo vasa infestat & obstructions parit, salutaris eventu imminuit.



30. Porro in anatomia hepar diaphragmati adnecti deprehendimus, quod singulari providentia ab autore naturæ eo hinc factum est, ut diaphragmatis motu, quod respiratione crebriore fit, hepar simul concussum sanguinis motum imbecilliores alioquin adaugeat. Quod indicio esse potest, salubrem medicinam in ejusmodi morbis motum esse, & merito exinde gestationem, vectorem, equitationem ceterasque motus species ægrotis imperari. Si quis ulterius etiam perpendit, vasa hæmorrhoidalia, quæ secundum coli longitudinem & rectum intestinum exporriguntur, a trunco venæ portæ quam remotissima esse, somnem vero adscensum ad perpendiculum, uti dicunt, difficulter peragi, non potest non inde intelligi quod, cum sanguis difficiliter per venam portæ abdominisque viscera transeat, facile stagnet, & rupture vasorum facta, præsertim si spasmus insuper corripiant, sanguis per venarum ora profundatur. Utile inde est, in ejusmodi adfectu solidas partes roborare, sanguinisque motum per diluentia restituere, omnibus interdictis purgantibus, acerbis aloeticis, & adstringentibus, quippe quæ intestinum rectum irritando, in pejus salutarem alioquin hunc fluxum conjiciunt.

31. Satis jam dictum de hepate, ideoque ad ipsam uterum digredimur, cujus penitior consideratio non parum momenti adfert ad curandas muliebris sexus passiones. Est uterus, anatomia teste, viscus idemtidem sanguineum, quod præter musculosam fibrosamque substantiam insigni vasorum multitudine abundat, quæ ex hypogastricis spermaticisque vasis flexuoso itinere in eum deferuntur. Et cum vasa hæc variis nexibus invicem sibi alligentur, atque implicentur, fieri omnino oportet, ut sanguis propter anfractuosos istos canales, præsertim ubi mole nimis turget, minus expedito circuitu per hanc partem volvatur. Ex his facile adsequi possumus, quod, si sanguis ibi stagnet, minusque recte per tortuosos venarum anfractus reveletur, gravissima omnino mala impendeant.

Quippe effusiones inde sanguinis, concretiones sanguineæ viscidæ, quæ polyporum nomine veniunt, & innumera denique mala, velut ex fœcundo matris sinu enascuntur. Inde quoque frequentissimi abortus, hydropes, tumores, cachexiæ, obstructions, & quicquid denique malorum sequiorem sexum affligit, oriuntur.

32. Quæ cum ita sint, liquido affirmant, summo studio ea omnia vitanda esse, quæ sanguinis motum retardant, uti acida, styptica, adstringentia, quia his omnibus hæc mala exasperantur. Uti contra sunt, quæ sanguinem subtilem, floridum tenuemque efficiunt, partesque solidas firmant, ut vitalis humor eo promptius salutari flumine corpus irriget. In quem censum referenda sunt balnea, salia volatilia oleosa, amara balsamica, quæ medicamenta tempestive prudenterque adhibita, in dictis adfectibus opem certe non contemnendam pollicentur. Neque aliter sentiendum velim de venæsectione, quæ ab abortu ceterisque egregie tuetur.

33. Lienem jam accedimus, ex illius textura, quid anatomia praxim juvet, perlustraturi. Adnotavit jam olim D. SPIGELIUS, variisque experimentis hodiernum adseruit anatomicorum, quos nostra ætas tulit, facile princeps RUYSCHIUS, lienem ex copiosissimis vasis arteriis & venis componi. Quod nonnullos ex recentioribus eo adduxit, ut viscus hoc pene vasculosum & quasi sanguineam glandulam existimarent. Nos certe inde facile videmus, lienem aptum esse natum sanguini, qui crassior ad illum accedit, attenuando, ut subtilior longe floridiorque ad hepar deferatur. Quibus cognitis manifestum omnino est, quanta noxa valetudini immineat, si lien obstruitur, si intumescit, & sanguine infarcitur, quia inde sanguis crassus & viscosus ad ceteras partes transit & dum per angustias vasorum non bene progreditur, ibidem desidet variaque mala machinatur. Ex quo in praxi illud annotari potest, contra ejusmodi mala nihil æque valere, nihil paratius eadem tollere,



quam ea remedia, quæ sanguinem fluidum reddunt, vasa recludunt, obstructions referant, tonumque solidorum corroborant. Hisce enim efficitur, ut languens sanguinis motus excitetur, & expeditius iter suum absolvat, & illibato cursu in orbem feratur. Ad discutiendum ergo viscosum sanguinem prodest potus salubris aquæ liberalior, & in promptu est ratio, cur thermæ & acidulæ in ejusmodi morbis juvent, omnibusque auxiliis longe sint superiores. Jam cum etiam solidarum partium tono circulatio sanguinis adjuvetur, hic vero tonus distentione vasorum languelcat, facile adparet, leniter adstringentia, uti sunt martialia & sic dicta splenetica, in hujusmodi adfectibus non esse negligenda.

34. Inter sanguinea viscera merito & renes numeramus, quorum cognitio in praxi utilissima minus a nobis debet præteriri. In his enim secretio feri falsi a liberiore sanguinis circulatione per hoc viscus unice dependet, quem sanguinis motum per renes celerrimum esse duobus maxime compertum est argumentis. Primum enim arteriæ emulgentes non multum distant a corde, in quo systole arteriarum vehementissima est, deinde liquida, quæ intra corpus adsumuntur, brevi spatio per vesicam descendunt. Idque in calido imprimis potu accidit, uti infuso Thee veronicæ item cerevisia tenui, ex quorum potu copiosa mox urina effunditur. Quæcunque igitur mala renes vexant, uti sunt exulceratio, inflammatio, calculi dolor, urinæ suppressio vel profluvium, ex sanguinis stagnatione proficiscuntur. Discere inde potest practicus, sanguinis abundantiam, seu plethoram horum malorum causam esse, adeoque iisdem optime sanguinis detractione subveniri. Discimus etiam inde, thermas, acidulas, item infusa calida ex herbis veronicæ, hederæ terrestris, & aliaquæ coagulatum sanguinem dissipant, in renum malis convenire.

35. Peculiarem etiam animadversionem desiderant membranaceæ corporis partes, quia multum interest harum

structuram, quippe quæ subtilissimo sensu instructæ sunt, a medico intelligi. Sunt vero hæc viscera, quæ ex membranis maxime constant, ventriculus, œsophagus, intestina & vesica. Nempe ex anatomia colligitur, eas partes, quæ ex membranis constructæ sunt, parum sanguinis vehere, eadem vero multis nervorum ramis fibrisque carneis eo fine instructas esse, ut & contrahere & relaxare se possint. Quibus de causis ad spasmos promptæ paratæque sunt, unde sanguis per pressas ac impeditas venas segnius progrediens facillime stagnat, & pestifera inde mala producit. Videmus enim inflammationes exinde ortas periculosissimas quoniam partes nerveæ totum genus nervosum propter incredibile illud nervorum commercium simul irritant & adficiunt, ita, ut gravissima symptomata plerumque conjungantur; quippe huic malo adsunt febres acutæ, vigiliæ, cibi fastidium, internarum partium ardor, externarum frigus, inquietudo, convulsiones, animique alienatio. Emergit etiam inde hoc, quod quo nobilius præstantiusque sit membrum, gravior ac periculosior existimari debeat inflammatio, tantoque magis adniti, ut mature imbecillitati jacentis succurratur. Cujus doctrinæ ratio demonstrat, ad defendendum ab hoc malo corpus ea expedire remedia, quæ tonum atque vires harum partium tuentur, & nec adstringunt nec nimis relaxant. Inter quæ laudare juvat nervina, temperata balsamica, item infusa herbarum calida, salia volatilia oleosa, essentias alexipharmacas &c. Opus etiam est, ut sanguis, si abundat, detrahatur, & contra omnia purgantia, vomitoria, styptica, opiata, ex victu acida, viscosa & quæ frigore corpus vexant, removeantur, eo quod ejusmodi res, fibras ad spasmos sollicitando, facile hoc malum provocant.

36. Ut speciatim vero strictimque aliquid de ventriculo dicamus, dignitas & amplitudo hujus visceris exigit. In quo cum cetera tum hoc imprimis memorabile est, quod in superiore cavitate fini-



sinistræ partis vasa sanguinea brevia tenuissima membrana muniantur, carnea & villosa exinde tenuissima ibidem existente. Ex quo dilucide liquet, cur in malo hypochondriaco & obstructione lienis hæc vasa copia sanguinis distenta facile rumpantur, & per os copiosum sanguinem effundant. Qui cruentus vomitus familiaris etiam feminis esse solet, non alia de causa, quam quod sanguis, qui per menstrua exire debebat, retentus & ad ventriculum delatus vasa hæc primum distendat, deinde plane disrumpat. Porro fundus ventriculi & inferius ejus osculum, item duodenum crassa admodum & villosa tunica teguntur, qua nervea, eaque sensibilis tunica investitur, ut ideo minus mirari debeamus, cur hæc intestinorum partes reliquis sensu omnino cedant, cum anatomica demonstratio illas tunica hac destitutas doceat. Quod prudenti quidem naturæ instituto factum esse constat, ne bile vel alimentis, quæ in his partibus maxime morantur, irritata hæc tunica sanitati sit molesta. Unde & in praxi illud intelligi potest, salina purgantia & quæ clementer alvum provocant, nihil in ejusmodi morbis proficere, ubi moles acidæ vel biliosæ materiæ ventriculi fundo, duodeno, jejuni que principio insidet; quippe hæc partes, sensu hebetiore præditæ stimulos ejusmodi remedium non sentiunt. Nihil vero educendis his sordibus, quæ altius inhærent aptius est, quam lenia emetica; etenim hæc sulphure & sale subtili caustico, quo constant, villosam tunicam penetrant, & nerveam irritando, facile spasmodicam in his partibus contractionem efficiunt, unde fordes, quæ intra eas desident, vi remedii eliciuntur.

37. Dum de duodeno loquimur, non inutile fuerit, texturam ejus accuratorem, paucis adhuc satis exploratam, breviter explicare. Imitatur duodenum sacculum & parvum quasi ventriculum refert, ea naturæ providentia, ut bilis ex ductibus suis in hoc intestinum effusa longius ibi morari possit, quo eo

melius cum cibis, quod ad sanitatem apprimè necessarium est, commisceatur. Quæ cum ita sint, nihil est dubii, quin ex hoc sacculo magnum morborum fiat proventus, si bilis copiosior ibi hæret, & si præsertim motus languet mora longiore corrupta virulentam naturam induit. Certum omnino est, & urgeo unice, quod scio, hujus rei animadversionem, in hoc sacculo gravissimorum malorum causas contineri. Quo præcipue intermittentes tertianas ardentesque & biliosas febres, item dysenteriam, diarrhœam & cardialgiam referre licet. Delitescit etiam ibi materia maligna, quæ in sanguinem postea translata variolas, purpuram, varique generis dolores sulcit. Ex quo haud temere colligitur, non exoptatius præstantiusque in ejusmodi malis, vel ubi ab iisdem metus est, dari præsidium, quam ut leni emetico ille morborum fomes exhauriatur, ne evacuatis diligenter sordibus, sanguis iisdem commaculetur. Pertinent huc etiam nitrosa absorbentia abstersiva, quæ proxime in materiam morbi agunt, ejusdemque aculeos infringunt.

38. Nefas foret necessarium corporis nostri humorem, bilem hoc loco præterire, cujus copia in corpore merito miranda est, cum in amplissimo hoc viscere generata per duo itinera intestinis infundatur. Cujus quidem rei non alia causa est, quam quod hic humor summe necessarius sit corpori, dum duodenum & prima intestina lubeundo, cum chylo miscetur, contentaque ad exitum proritat. Unde & commode addiscimus, bilem plurimum sanitati conferre, eandemque si corrupta est, aut deficit, varia mala excitare. Quod argumentum cum proluxa dissertatione persecutus sim, supervacuum esse existimo, huic diutius immorari. Illud tamen exinde commodi in praxin fluit, omnia, quæ bilis defectum, ejusdemque temperiem & balsamicam amaritudinem restituant, optima valetudinis tuendæ esse præsidia. Quapropter digna laude sunt amara extracta absynthii, centaurii minoris, car-



dui bened. extracti aloes & hujus census alia. Sicut enim bilis secundum naturam constituta, intestinorum motum roborat, & excretionem alvi debito motu adjuvat, acidumque & viscidum incidit, & sic a frigidis maxime morbis corpus tuetur: ita nec dubium est, quin amara, adjectis balsamicis, in ejusmodi malis insignem præstent usum. Jam nec ratio deest, cur hæc remedia cachexiæ, hydropi, malo hysterico & hypochondriaco egregie opitulentur.

40. Non alienum jam erit, de lymphæ circulo, & quid idem in praxi præstet, paucis differere. Et primo quidem scire oportet, lympham seu tenuissimam lectissimamque feri partem, ab arteriis separari, per vasa vero lymphatica ad ductum thoracicum & ad cor revehi, ea intentione, ut sufficiente humore sanguis irrigetur. Ex quo illud attendimus, debito fluido corpus in primis nostrum sustineri. Chymicis enim staticisque constat experimentis, vitalem nostrum fontem unam tantum partem solidi, undecim vero humidi continere. Proinde fluidum omnino præcipuum elementum est sanguinis, quo hic conservatur, quo ita diluitur, ut per angustos vasorum tubulos commode pervolvatur. Neque ignotum inde esse potest, quid fluidum, etiam copiosissime adsumtum ad bonam valetudinem faciat, quod quo levius, quo subtilius & tenuius sanguinisque mixtioni non alienum est, eo præstantius jure habebitur. Quem in finem sagacius examinare aquas debet medicus, ut sciat, quæ in potum maxime dandæ ægris sint, & quæ valetudini conducant. Neque minus inde perspiciet, ad sanguinem crassum resolvendum nihil æque valere, quam humidi abundantiam & hinc in pertinacissimis etiam malis, uti sunt, quæ ex obstructionibus viscerum & sanguinis viscositate nascuntur, acidulas & thermas optimam ferre opem, sed ut majori in copia hauriantur, necesse est.

41. Anatomica lymphæ contemplatio illud etiam docet, lymphæ cursum, quem retro instituit, esse difficillimum. Cui

negotio ut solertia naturæ succurreret, vasa lymphatica multis diverticulis instruxit, dum glandulas conglobatas, per quas transeunt vasa lymphatica, fibris nerveis corroboravit, ut earum robore & impulsu tanto promptius lymphæ cursus ad cor peragatur. Inde etiam est, quod sollertissimus vasorum lymphaticorum scrutator NUCKIUS recte eas cum siphonibus conferat. Quod si itaque hic motus languescit, si lymphæ viscida sit, vel vires deficiunt, ipsa lymphæ circa glandulas subsistit, easque obstruit. Ipsa vero lymphæ dum conveniens ipsi motus deest, corrumpitur, vappescit & multis iisque gravibus malis occasionem subministrat, qualia sunt, quæ ex impuritate lymphæ fiunt & deformando atque erodendo cutem se produnt. Inter quæ lepra, herpes, pustulæ, scabies, scorbutus, lues venerea &c. numerantur. Considerata igitur ejusmodi morborum causa, quam sine anatomia nunquam adsequimur, commode medicus admonetur, in iis curandis lymphæ in primis circuitum esse restituendum, i. e. glandulas obstructas esse aperiendas, ut lymphæ motus augeatur. Ideoque in ejusmodi casu non venæ sectiones, non purgantia, non absorbentia vel salia juvant, sed validiora oportet adhibere, quæ penetrant, quorum textura salva & incolumis manet, & quæ stimulando fibras, vasa & glandulas recludunt. Hæc autem regnum minerale suppeditat, uti sunt sulphura metallorum, antimonialia, mercurialia, quorum mirabilis in glandulas & lymphæ motum vis non satis potest deprædicari.

30. Lymphæ circulus si impeditur, præsertim ab hepate obstructo, vasa lymphatica intumescunt primum, deinde etiam rumpuntur, unde serum extravasa in copia delatum varias hydropis species producit, quæ pro diversitate partium diversis nominibus insigniuntur. Ex quo manifestò demonstratur, ægre hos morbos curationem admittere: quam difficile enim sit, indurata viscera emolliere & disrupta consolidare vasa, non multa indiget probatione.

31. Acce-



31. Accedimus jam ad cerebrum nervorumque systema, ut & ex horum consideratione anatomiae in praxi usum confirmemus. Et veteres quidem has partes frigidas appellarunt, non quod ipsis non calor suus constet, sed quia cum aliis membris collatae pauciore sanguine perfluuntur. Sensu porro in se & sua substantia caret cerebrum, unde & facile elucet, minus conferre his partibus sanguinis in corpore paucitatem, sicuti videmus, sub sanguinis missione, sub largiore ejus fluxu animum deficere, manifesto documento, his partibus inde suum quasi pabulum subtrahi. Discimus exinde, calidiora cerebro imprimis esse amica, quia haec, membranarum robur addendo, circulum sanguinis celeriores promtioresque per cerebrum efficiunt. Quare non laude carent sic dicta cephalica, uti sunt olea destillata ex herbis aromaticis parata, item balsama apoplectica & salia volatilia oleosa. Nam si membranis cerebri minus roboris inest, facile in iis sanguis detinetur, unde gravissimi adfectus proveniunt. Hujusmodi sunt apoplexia, aphonia, melancholia, visus auditusque difficultas, gutta serena, incubus, insomnia terroris plena, affectus soporosi, sensuumque & motuum imminutio. Quam egregie autem morbos roborantia depellunt, tam infeste contra cerebrum sunt eiusmodi res, quae nimiam laxitatem, frigus torporemque ipsi inducunt: Quo ex numero sunt vaporosa, aer humidior, copiosior somnus, animi adfectus & imprimis mæstitia, & quaecunque sulphure vaporoso caput feriunt, ut fere opiata, narcotica, nec non acida, refrigerantia fructusque autumnales. Pro sunt contra salia volatilia oleosa balsamica, ex quibus eminet balsamum nostrum liquidum, quod cum ex optimis & genuinis oleis, quae difficulter alibi reperias, compositum sit, in cerebri nervorumque adfectibus cum minifico levamine in subsidium vocatur. Pari ratione inde admonemur, in malis, quae ex capite nervorumque obstructione proveniunt, uti paralytis est, externa remedia

balsamica non tam debilitato membro, quam principio nervorum & nuchae recte superimponi.

32. Superesset iam ut in amplissimam de nervis doctrinam excurreremus, sed sufficiet, paucis hanc doctrinae partem attigisse. Certe si quid ex anatomia medicum scire expedit, nervorum mirabilem structuram & consensum accurate teneat, necesse est. Nisi enim hac ornatus est notitia, non discernere potest, unde originem habeant symptomata, & quae mala per consensum tantum adficiant. Unde quos errores in praxi admittere possint medici, non difficile est intellectu. In genere enim monendum est, causam morbi curandam esse, & sinistre facere eum medicum, qui ignarus anatomiae, neglecta, causa ad symptomata oculos deflectit. Symptomatum vero non alia ratio est, quam quod partes nervae intime inter se conspirant, unde mirificus iste consensus excitatur, nam mirabile certe est, quod una parte nervea commota, totum simul corpus concutitur. Ita a graviore remotae etiam partis dolore, a nervo vel tendine laeso, a dolore calculi, a dolore colico, illi &c. febres, deliria, convulsiones & alia atrocissima proficiunt mala.

33. Intercostalis ramus & par octavum omnes fere corporis partes pervagantur, ex quo plerumque accidit, ut capitis adfectus, epilepsiam, apoplexiam, item contusionem capitis, vomitus, diarrhoea, asthma, alvi constriction, urinae suppressio & praecordiorum spiritusque gravitas excipiant. Idem in passione hypochondriaca vel hysterica evenit, in hac quippe si a flatibus, vel ab acri materia plexus nervosi mesenterii, ventriculi & pulmonum nervi trahuntur, strangulatio faucium, cordis palpitatio, vertigo, capitis dolor, animi defectio, cervicis dolor, asthma, catalepsis & convulsiones imminet. Nihil ageret hic medicus, qui symptomatum habita ratione contra haec remedia pararet, cum tamen, si causam satis perspectam haberet, tanta malorum moles



unico sæpe carminativo clystere, vel antispasmodico medicamento possit removeri. Dolori ex calculo sæpius vomitus, colicus dolor, stupor femoris, testis retractio, quandoque etiam, quod magis terrere potest, epilepsia, & summa præcordiorum anxietas jungitur, quo casu non alia causa subest, quam quod intercostales & paris octavi nervi vesicam atque renes ingrediuntur. Neglectis itaque symptomatibus, ad calculi dolorem cura hic convertenda est medico, quo levato & cetera mala exspirabunt. Ad quem scopum impetrandum balnea, unguenta oleosa & blanda anodyna commendamus, ut relaxatis viis dolor sopiatur.

34. Aequè necessaria observatio est circa vermes, qui si intestinum ileon occupant, membranam eius nerveam arrodendo, sævos in pueris spasmos & convulsiones excitant. Quæ tamen symptomata facile cessabunt, si medicus, cognita malorum causa, remedia recte suppeditat, & lumbricos per anthelmintica enecare satagit. Erosionem vesicæ a calculo infesti sæpe dolores, tenesmus, cibi fastidium, vigilæ, sudoresque frigidi consequuntur. Si ad causam mali, anatomix beneficio, animum advertimus, facile adparebit, ad propellenda tot mala curam in submovendo calculo defigi oportere; quod optime impetramus oleosis & balneis, vel si nimium urget malum, de calculo perita manu extrahendo est cogitandum.

35. Longum foret, & reliquarum partium meminisse, quæ ex mirabili illo nervorum vinculo, quo invicem artissime connectuntur, gravissimis tormentis cruciantur. Ex re tamen nostra erit, pauca de hoc argumento adduxisse. Ita dentium dolorem, dentitionem difficilem in pueris, atrocissima mala, ut diarrhœa, tussis, febres, alvus adstricta, præcordiorum gravitas, convulsiones & alia comitantur: quæ symptomata cum tantum non opprimant ægrotum, statim remittunt, sedato dolore, vel evulso etiam dente, qui negotium facessabat. Mirum vero est, quam atroces cru-

ciatus inflammatum ventriculum comitentur, quia hæc corporis pars eximiis instructa nervis totum simul corpus adficit. Inde ab adsumto veneno, ab acri materia intra ventriculum latente cardialgiæ intolerabiles, deliria, anxietates funesto sæpe eventu excitantur. Internæ porro partes, maximeque pectoris regio, exæstuant & velut flamma extormentur, & externæ contra frigent, pulsus denique venarum inæqualiter moventur, quæ symptomata cum gravia & truculenta sint, medicum quidem terrere quam maxime possunt, omnia tamen decedunt, si ventriculo consulitur, ejecto per olea vel per lac veneno, sive materia acri convenientibus auxiliis attemperata. Neque minus in vulneribus tendinum id evenit, quippe nonnunquam ex læso manus vel pedis digito, ex clavo imprudenter exciso, ingens malorum agmen concitatur. Tumen enim spasmi cynici, convulsiones, dolores & alia symptomata exercent, quæ summum sæpe periculum ægroti minantur. Remittit tamen hic symptomatum furor, si tempestivo remedio nervorum dolor mitigatur.

36. In hysterica passione, solemnifeminis malo, ægræ velut apoplexia vel fulmine tactæ prosteruntur, dum ob nervos paris octavi & vagi, qui uterum subeunt, membranæ cerebri simul adfectæ spasmis corripiuntur. Ut taceamus reliqua mala, quæ, quum infesto agmine in hoc adfectu ægrotas adpetant, non aliunde proveniunt, quam quod nervi continua serie per totum corpus eiusque partes extenduntur.

37. Ex hoc mirifico nervorum consensu accersenda sæpe ratio est adfectuum, in quibus bilis non immerito arguitur. Nam cum plexus hepaticus nervorum & qui ad vesicam felleam fertur, pylorum, pancreas & duodenum simul percurrat, ratio in promptu est, cur irritato ventriculo bilis cum ex ductibus tum ex cystide prorumpat, & quare icterus ipsum ventriculum simul adficiat, ad nauseam ac vomitum eundem simulando.



38. Ureterum quoque & vesicæ magna est consensus, quod iidem nervi per has partes indissolubili vinculo pervagantur. Unde si ureterum principium ex calculo vel spasmō dolet, non raro, urinæ suppressio, stranguria & frustra-nea mingendi cupiditas adsociatur.

39. Sed satis jam huic argumento de nervorum consensu immorati sumus, quod tamen, si omnia persequenda essent, diutius nos moraretur. Interim & ex hoc habebit medicus, quod discat, & in quo proficere possit, ut causam morbi a symptomatibus recte discernat. Ceterum qui plura de hoc legere cupit, adeat diligentissimum hujus rei scriptorem *CL. Wierssens*, qui effusiore stilo hanc de nervis doctrinam pertractavit. Licet vero omnia, quæ adduximus, satis superque anatomie in praxi usum comprobent, chirurgia tamen, si in hujus contemplationem descendere placeret, magis eundem comprobatura esset. Hujus enim effectus inter omnes medicinæ partes evidentissimus est, cum contra in internorum morborum curatione dubitari sæpe possit, medicinæ an naturæ beneficio secunda valetudo contigerit. At in ea artis parte, quæ manu curat, oculis statim deprehenditur, medici imprimis manu ægrum adjuvari. Unde facile adparet, quantum ex chirurgia laudem ferre possit medicus, qui anatomica corporis scientia imbutus hanc ad usum rite transferre novit. Plura de anatomie in chirurgia usu non addo, quum hæc materia tantæ sit dignitatis, ut peculiarem postulet tractationem.

## DISSERTATIO V.

### DE MORBIS FOETUUM IN UTERO MATERNO.

#### S. I.

**T**Am misera ac ærumnosa generis humani conditio est, ut non modo innumeris malis per vitam homines crucientur, verum etiam, ut intra carceres uterinos adhuc conclusi foetus, antequam

vitali hac aura fruantur, & lucem aspiciant, a malis atque ægritudinibus non immunes sint. Ita nihil familiarius est, quam ut foetus in utero, ex gravi præsertim matris affectu, convulsionibus & inordinatis membrorum agitationibus, matre id abunde perferente, distorqueantur. Insuper ipsa experientia addocet quotidiana, peculiaribus morbis eos in utero affligi, & afflictos in lucem prodire. Tanta vero matrum cum foetibus, quos utero gerunt, est consensus, ut hi illis intime compatiantur, adeo, ut non modo, ad omnem gravem animi affectum matris, tristitiam & iram, teneræ foetus fibrillæ, in anomolos motus concitentur, sed quod magis est, a forti imaginatione eorum, quæ in sensus inciderunt, formatio partium plane impediatur, turbetur, ac vitietur, similesque characteres ac imagines, quas mater in cerebrum recepit, tenello infanti certis in partibus affricentur. Ex quibus abunde dilucescit, magnam esse sympathiam ac affinitatem matris cum foetu quoad partes spirituosas impetum facientes, sive ipsam animam, ut loquuntur, sensitivam. Similis quoque consensus manifesto deprehenditur inter fluidas, humidas, ac solidas matris partes: unde si ipsæ conceperunt vitium & dyscrasiam, ipsi infantes mox in utero labem inde luunt, similibusque morbis afficiuntur, vel extra uterum degentes ad eosdem affectus, qui successu temporis sese exerunt, dispositi sunt. Hæc omnia cum profundius paulo mecum meditatus fuërim, placuit affectus hos morbosos, qui infantibus in utero familiares esse solent, recensere atque evolvere; præsertim cum hanc materiam speciali labore tractatam nondum mihi videre contigerit. Spenitor firmissima, fore, ut opus hoc, & labor, non sine utilitate, atque emolumento proximi esse possit.

2. Princeps autem nostra erit intentio, ex fide dignis auctoribus & observationibus historias atque exempla afferre variorum morborum, quibus foetus in ipsius uteri ergastulo laborarunt, & afflicti fuerunt, quorum postea ortum ac cau-



causas specialius, quantum fieri potest, inquirere, & qua ratione impoſterum averti poſſint, exactius paulo perſcrutari lubet. Primum autem morbum variorum, quo gravida corripitur, ſæpe in ipſum fœtum tranſire deprehendimus. Ita *Hildan. Cent. IV. Obſ. 56.* duo inſinuatur exempla fœtus nempe maſculini, itemque fœminini varioloſorum, quia matre tali morbo laborante, prodierunt: ſimilem caſum refert *Thom. Bartholin. Cent. IV. hiſtor. 50. ubi anno 1656. in Dania illud accidiffe tradidit. Foreſtus quoque auctor fide dignus obſervavit lib. 5. Obſ. 44. p. 196.* fœtum a variolis non fuiſſe immunem. Ita etiam *Mællenbrocius in Miſcell. Natur. Curioſ. Dec. I. p. I. p. 131.* hanc dedit obſervationem; generoſi cujuſdam viri uxor, cum ante variolis laboraſſet, filiam peperit veſtigiiſ variolarum conſpicuam. Unde liquet ipſam adhuc in utero materno, ſimul cum matre, variolis fuiſſe affectam. *Miſcell. Nat. Curioſ. Dec. II. An. VI. Obſ. 61.* hanc recentent hiſtoriam: juvencula quædam gravida, dum detenta eſſet variolis, enixa eſt fœtum, in toto corpuſculo variolis plenum. Plura evolvi poſſunt exempla in *Dec. I. AN. I. Obſ. 53. it. Rbodii Cent. III. Obſ. 83. in Bartholini Cent. III. epiſt. 85.* At vero illud non perpetuo contingere, ut mater varioloſa infantem in utero talem quoque reddat, præclare oſtendit *Borrichius in Act. Med. Hafnienſibus vol. V. Obſ. 75.* adducens exemplum infantis, qui ſine variolis a matre, quæ graviffime iſtis laboravit, exclusus fuerit. Prout etiam fœtum in clauſtro materno hærentem variolis corripit matre ab iſdem immuni, *Job Fernellii* teſtimonio ſupprimis conſtat, qui libro II. de *abditis rerum cauſis* Cap. 12. Sæpe, inquit, deprehenſum, prægnantes maturos fœtus edidiſſe hac lue perſuſos, ~~quarum~~ alia nihil omnino foris, alia non niſi multis poſt diebus, incommoda ſenſerunt, idque proprio ſuo exemplo *Franciſc. Mauriceau* lib. I. de morbis gravidarum cap. 2. comprobat. Morbillorum morbo infantes quoque in utero materno affligi identidem experientia comprobat. Ita *Baroniſſa de*

K. ultimo imprægnationis menſe corripiebatur morbillis periculoſiſſime, reſtuebatur quidem feliciter per convenientia auxilia, attamen fœtus, qui ſtatim prodibat, maculas rubras oſtendebat, *vid. Dec. II. An. III. Obſ. 97.*

3. Majus adhuc & atrocius malum eſt, lues venerea, quam ex corporibus gravidarum tranſuſam in fœtus legimus, qua de re conſuli poſſunt *Dec. II. An. VI. Obſ. 61. & Monſ. Gervais Uçay, vid. Problem Curieux XII. dans le nouveau traite de la maladie venerienne.*

4. Perquam familiaris quoque & communis morbus eſt ipſis fœtibus cum matre icterus, quem puerum in utero matris contraxiſſe *Panorolus Pentecoſt. IV. Obſ. 44. p. 137.* recentet. Curioſa eſt obſervatio *57. Kerkringii*, quam narrat hoc modo; mater ictero laborans, octavo gravidationis menſe peperit mortuum puerum, ſed ita flavum, ut de cera factus, non partus humanus videretur, ſic, inquit, cum poteſtatis meæ factum ſecor pro ſanguine humorem fellis inſtar flavum reperi, eumque diligenter, lagenæ exceptum ſervo; ad oſſa ut perventum, ea ſic erant, eodem humore, eodemque colore flavo imbuta, ut ſi non ipſe ſecuiſſem corpuſculum, illud mihi, atque arte tinctum fuiſſe putarim. Eſt penes me etiamnum plena iſto ſanguine lagenæ, eſt ſkeleton ipſius pueri, non minus rara ſui compoſitione, quam colore iſto viſendum. Vix credes fucum abeſſe, niſi ſinceritatem meam ex aliis, quæ hic narro, & in muſeo ſervata oſtendo, comprobaveris *vid. Obſ. 57.*

5. Quod attinet ad febres intermittentes, eæ ipſæ quoque, ſi matres gravidæ illis laborant, in prolem tranſire ſolent. In hujus rei confirmationem meretur adduci egregius locus ex *Fernellio*, qui exſtat *Patb. lib. I. cap. XI.* ſi gravida medio geſtationis tempore quartana febris afficitur, partum edi, qui diu poſtea quartana febre conſiſtabitur, atque ſi nono ea menſe phrenitide prematur, prolem gigni in pleuritidem proclivem, quemadmodum & ejus, cui abiceſſus ex octavo menſe præruerat, filium in omnem



nem vitam habuisse purulentas aures, unde intelligi potest, non modo prima conformatione ex semine, verum etiam toto gestationis tempore, tum ex materno sanguine, tum ex aliis humoribus, atque alimentis morborum proclivitates in fœtum contrahi. Similem observationem conspicies in *Dec. II. An. 5. Obs. 41.* fœminam nempe cujusdam militis invaserat pertinax quartana altero statim mense, ultimis mensibus ante & post paroxysmum embryonem maxime inquietum, tremulum, & ab uno in aliud latus sese volutantem manifeste sensit, ut tristem sibi met ipsa prædiceret eventum, tandem superato eodem terribili paroxysmo circa decimam vespertinam peperit filiolum, quæ una eademque hora, una cum matre febre ista misere affligebatur, & tenerrimo corpusculo, septimam usque in septimanam, gravissimos hos sustinuit insultus. Hujusmodi exempli ipsemet quoque memini quod ante 10. annos in consulis primarii Ascaniensis uxore gravida quartana laborante notavi, cui remediis opem tuli; quæ filium enixa est, per longum tempus eadem febre correptum. Illud autem observatione erat dignum, quod brevi post partum matrem deseruerit, *Dan. Puerarius* medicus testatur, *Genevæ*, recensente *Bartbol. Cent. IV. Ep. 86. p. 488.* observatos a se infantes, qui in utero materno febricitarunt, certissimis cum indiciiis, & quorum demortuorum totius corporis habitus maculis quibusdam rubris & lividis distincti fuerint. Meretur quoque adduci hic historia, quam recenset *Gockelius Dec. II. An. IV. Obs. 131.* Fœmina quædam binos ante puerperium menses, tertiana exquisite laborans, curata vero, iusto tempore puellam peperit cum cuticula pustulosa, quam paulo post plenaria velut excoriatio excepit, haud secus, ac si fervida aqua macerata esset cutis, cuticula vero regenerata fuit medicamenti oleosis, in specie oleo lini tepesfacto.

6. Hydropicum quoque tumorem in fœtum ex vitio matris derivari posse, experientia testatum facit. Ita uxor gra-

vida ex ingenti terrore propter incendiura siti molestissima urgetur, quam cerevisiæ secundariæ largiori potu abigere tentavit, decimo autem post die enixa est filiolum hydropicam, quæ, medicamenti nihil quicquam conferentibus, paucis post diebus hydrope periit. Hydrocephalus, uti est affectus familiaris & quasi proprius infantibus, ita prostant exempla, eum in utero jam radices suas sumsisse. Sic *Blancardus in Collect. Phys. Med. Cent. 1. Obs. 73. fol. 65.* se in septem mensium abortu inter duram ac piam matrem magnam aquæ sanguinæ quantitatem animadvertisse memorat. *Baldwin. Rufaus de extractione fœtus Cap. 23.* se puerum quendam vidisse hydrocephalo laborantem scribit, cui mortuo in lucem prodeunti caput toto corpore fuit gravius. *Job. LEDELIUS Miscell. Curios. Dec. II. A. II. Obs. 178.* exemplum habet pueri masculi, cui recens nato caput hydrocephalo obsidebatur, cujusque non multo post mortui cerebrum non excedebat calami scriptorii crassitiem, quo separato, loco ventriculorum offendisse se, ait, amplam quasi vesicam limpidissimam & insipida aqua repletam, quantitate uncias L. excedente. Simile exemplum exhibet *Frid. RUYSCHIIUS in thes. anatomic.* adiuncta icone elegantissima.

7. Recensendum quoque est egregium exemplum de vesicæ calculo, qui in ipso infante intra uterum concretus fuit; ante viginti nempe & quod excurrit annos, Serenissimi Ducis Zeizensis Mauritii uxor ex renali calculo magnos subinde dolores perpeffa, peperit filiam principem, quæ mox a partu atrociora tormina experta fuit, præsertim in mictione, tertia septimana moriebatur, aperto corpore in vesica inventus fuit calculus instar nuclei mali perfici maioris. Nullum hic dubium est, jam in utero, lapidem accepisse sua rudimenta ac principia: extra uterum enim, tam brevi temporis spatii tantæ magnitudinis lapis gigni vix poterat.

8. Nullus autem affectus familiarior solet esse proli in utero, quam epilepsia, utpote subinde experiuntur gravidæ, a

vehe-



vehementi animi motu seu terrore seu ira ingentes jactationes ac volutationes fœtus in utero, ut sæpius ipsæ exinde deficere videantur. Multo magis autem illud ipsum apparet, si mater, quæ utero gerit, sævissimo hoc morbo corripitur. Memorabilis hinc est casus, quem insinuant *Miscell. Nat. Cur. Dec. I. A. III. Obs. 106.* fœmina ultra quartum mensem gravida epilepsia corripiebatur crebra, effluebat ei postea e pudendis albicans humor teterrimi odoris cum ipsorum tumore, anxietate ingenti, inguinum doloribus, & summa virium prostratione; existimarunt fœtum esse mortuum, mox autem motum fœtus percepit ægra vehementissimum & simulac fuerunt propinata epileptica, convulsivum motum fœtus sensit, tandem convulsa his graviter in paroxysmo peperit filium, & ab eo tempore, nec mater, nec filius sensit insultus. Majorem adhuc considerationem meretur observatio, quam allegatam habemus *Dec II. A. IV. Obs. 15. Misc. N. Cur.* Fœmina ultimis gestationis mensibus, de molesto admodum & sæpius reciprocante fœtus motu conque- rebatur, præsertim cum inde ita defatigaretur, ut non raro animi deliquiis proxima, hic motus subsultorius suos quasi rythmos observans, quoties percipiebatur, toties matris abdomen percutiebat, singulis diebus ter ad minimum hunc paroxysmum illa sustinebat. Effectum tandem est medicamentis acridinem obtundentibus, ut cessante motu hoc convulsivo, fœtus absque violentia naturaliter sese moveret, sanusque aliquot post septimanas in lucem mitteretur.

9. Ultimo loco memorandum etiam aliquid est de malo, quod non adeo raro contingit: quod nempe infantes in lucem eduntur intestinis, vel etiam visceribus extra naturalem abdominis cavitatem propendentibus, in abdomine circa umbilicum facta ruptura, tale quid ante XII. annos observavi Halberstadtii in infante, qui nascebatur sine apertura ani, & sine distinctione sexus, magna autem moles intestinorum, flavo obscuro colore tinctorum, propen-

debat extra corpus, quæ erat intestini coli portio, cum dimidia parte ilei, mirifice erant expansa, & lucco fœtido, obscure nigricantis coloris referta tertio die moriebatur infans, baptismo prius accepto. Similis casus ante aliquot annos Querfurti a Dn. SCHAUMBURGO Practico & Physico ibi egregio animadversus est. *Blancardus lib. de morbis puerorum Obs. XI. lib. I. fol. 299.* meminit infantis, qui intestinis extra abdomen propendentibus natus erat. *Et Elzholzius de conceptione tubaria* ita scribit: fœmina primipara vivum enixa est puerum prope umbilicum in sinistro latere rotundo tumore, & caput infantile magnitudinem multum superante, deformatum. Ut vero appareret, quid intus aleret tumor ille, apertio fuit concessa, ubi portionem magnam intestinorum inclusam deprehendimus, copiosa flavescens aqua abdominis viscera, cæterum naturaliter se habentia nec ulla labe deturpata, circumfluente. Innotuitque una cum peritoneo tendinosam illam musculorum abdominis partem, quæ lineam albam constituit, fuisse disruptam, sicque per datam portam erumpentibus intestinis extensioni aptam cutis substantiam cecisse. Dantur etiam exempla, ubi a causa externa & violenta fœtibus in utero læsio quædam ac vitium accedere potest, maxime in conformatione partium solidarum. Ita historias legere licet, ubi infantes pronati fuere cum umbilicali hernia, sive potius ejus prominentia, quæ nihil aliud solet esse, quam umbilicalis funiculi maxima dilatatio, nam aperto hoc, illico in conspectum venit peritoneum. Vitium tale evenire potest, si gestationis tempore lapsa fuerit mater, vel ventrem duro corpori admoverit: qua de re legi meretur *Stalpart. van der wiel. Cent. II. Obs. 23.*

10. Restat iam, ut etiam hoc loco quædam recenseamus exempla, quibus corroborari ac demonstrari possit, perversum ac concitatum spirituum animalium motum per graves animi affectus insigne damnum & atrocia symptomata inferre.



inferre posse fœtibus. Sicuti autem nullus perniciosior generi humano affectus, & præsertim gravidis est, quam terror: ita etiam ultra modum infestus solet esse tenerimis in utero fœtibus. Ita in *Miscell. Curios. Dec. II. A. X. Obs. 18. Sommerus* recenset historiam, ubi mater sexto mense prægnans, gravissimo terrore perculsa, omnibus viribus destituebatur, & omnis fœtus motus per viginti quatuor dies disparebat, ut inter propriarum virium extremam iacturam de vita fœtus actum esse mater indubie crederet. Interim continua analepticorum interna & externa applicatione, post tres septimanas fœtus tremore quodam intercalari animulam superesse adhuc docebat, & semper cum matris anxio dolore, post hæc successive veri fœtus motus redibant. Memoratu quoque digna est *Obs. 83. Dec. I. A. II. Miscell.* gravis nempè circa initium noni mensis inopinato motu percellitur propter incendium in urbe, dum illa ab eo temporis momento male se habere cœpit, motumque infantis per triduum nullum sensit, sequentibus vero diebus admodum debilem, variis usurpatis roborantibus octavo die peperit filium bihoriæ tantum viventem, cuius totum finistrum latus a capite usque ad calcem colore flammeo conspiciendum erat. Recensenda hoc loco etiam est *Obs. 61. Dec. I. A. II.* dum nempè gravida partu iam instante & valde consternata, ut in lipothymiam incideret, paucis diebus elapsis filium curvis manibus ac pedibus enixa est.

11. Tandem etiam animam, specificè per varias ideas obiectorum externorum & fortem impressionem matris characterisatam, similes effectus & stupenda phænomena in infantibus producere, res est in foro medico notissima, & nolumus in huiusmodi exemplis numerosissimis recensendis prolixiores esse, sed potius candidum lectorem remittimus ad *Marci a Kronland lib. 1. idearum operatricium Cap. IV. Saxii Gammarologiam Curiosam lib. II. Cap. IV. p. 596. ad Thom. Fienum de viribus imaginationis. Schrad.*

*Disp. de viribus imaginationis maternæ in fœtum, it. Harderi Apiarium p. 340. ad. A. I. Dec. III. Miscell. Obs. 117. it. Stalpart van der Wiel. Cent. II. Obs. 36. de navis maternis.*

12. Variæ superius adductæ ægritudines & affectiones, quibus conflictantur fœtus in utero materno, ita sunt comparatæ, ut exactissimam consensionem atque harmoniam & communicationem matris cum fœtu addoceant. Ut pote tota formatio, nutritio, vita, ac sanitas infantis in utero dependet a vita & sanitate matris; sine matris enim arctissima unione progigni ac produci nunquam fœtus poterit. Tanta autem est communio, ut anima matris cum anima fœtus conspiret, & nullum dubium est, quod sensationes, perceptiones, ac passionem in matris anima excitatæ transeant quoque in ipsum infantem, sicuti id perversæ phantasie effectus luculenter loquuntur. Consentit quoque motus spirituum seu fluidi tenuissimi nervi in matre cum motu spirituum in infante, seu similis spirituum motus matris efficitur in infantibus, quod liquidissime conspicitur in motibus convulsivis, irregularibus spirituum agitationibus ministerio affectuum animi, qui in omnibus similes sunt in ipsis infantibus. Quocirca eo minus dubium erit, quod motus & circulatio sanguinis, eiusque temperies ac crasis in matre, exacte quoque correspondeat cum sanguinis motu ac temperie in infantibus, adeo ut si hic temperatus placide & æquabiliter moveatur, talis circulatio & motio quoque in ipsis fœtibus deprehendatur, & vice versa, si intemperies subest, si motu agitur sanguis irregulari morbofo, eundem quoque teneri in utero infantes experiantur.

13. Quivis tamen hic facile perspiciet, quicquid vitii in motu ac crasi contraxerint spiritus ac humores in matre, id gravius persentire infantes, adeo ut quod illis præsentaneam noxam non infert, hisce maximum damnum, ac læsionem affricet. Quod etiam manifestissimum apparet in vehementi ac firma impres-



impressionem ac phantasia matris, quæ tenellis fibrillis ac staminibus suam determinatam motus efficaciam imprimit, minime autem partibus matris robustioribus ac validioribus. Unde etiam familiare est, a terrore incommodum mox accedere infanti, quale quid matres in tanto gradu non percipiunt. Sed propositi nostri ratio postulabit paulo accuratius consensionem illam matris cum fœtu, inquirere ac indagare;

14. Primum autem pro certo ac comperto habendum est, sicuti omne animal, ita etiam præstantissimum omnium hominem progigni ex solido principio, nempe vesicula membranacea, cui tenuissimus, lymphaticus, spirituosus liquor inclusus est, & vocatur ovulum fœmininum, in quo omnia lineamenta ac rudimenta animalis compendio præexistunt, quæ tandem expansivo similis materiæ genitalis motu intestino fœcundata, succi nutritii debito accessu evolvuntur ac visibilia redduntur. Equidem diversissimæ inter eruditos de abstruso & a sensu remotissimo formationis negotio prostant sententiæ. Quæ quoniam tantum probabilitate nituntur, inter se, ut cum iis rebus accidit, non exacte conveniunt, minime autem has omnes adducere & examinare nostrum propositum est: per paucis tamen non possumus non commemorare, eorum sententiam nobis minime atridere, qui existimant, in ovario Evæ totum genus humanum delituisse: neque nobis concipiendam esse recentiorum quorundam opinionem, quasi Deus corpuscula innumera organica, quæ servire possint propagationi vegetabilium & animalium, in prima creatione produxisset stupenda exiguitate donata, eaque hinc inde in fluidis natate sicque in corpora recipi. Non enim perspicere possum, quomodo conciliari cum hisce hypothesebus possit, quod infantes non tantum lineamentis & partium conformatione valde similes parentibus generentur, sed & dispositionem ad similes morbos, inclinationes, vitia, & virtutes acquirant, & postea, quod maximum est, quod sola

phantasia matris evertere, immutare, & deturbare possit totum formationis negotium, etiam in fœtu jam aliquot menses adulto & vitali. Multo minus autem nobis persuadere possumus, quod productio prima organicorum horum corporum ex principio fluat interno, notitia, intellectu, intentione prædita, quod secundum has spirituales affectiones dirigat ac moveat materiam; quoniam secundum nostra principia hæ affectiones sunt tantum propriæ substantiis immaterialibus & libere agentibus, non autem corporeis & ex necessitate quadam suas operationes edentibus. Taceamus, quod ratio, intellectus, ac voluntas per se nullum jus quoddam habeant seu directionis, seu immediatæ motionis in corpora, sed saltem quod ea potentia seu potius imperium limitatum ex singulari beneplacito ad certos actus tantum homini a Deo sit concessum. Statuimus ergo animam, non quæ rationalis est, & a Deo fœtui creaturæ rationalis jam formato per creationem infunditur, sed quæ format corpus, quæ illud conservat, quæ varias ac específicas motiones in ipso efficit, esse fluidum tenuissimum in actuoso motu existens, quod veteribus ætheris ac ignis nomine venit. Hoc enim, non ut in crassiori mechanismo, simplices tantum ab agentibus externis recipit motuum impressiones, & ex his facit reactiones, sed ut tenuissimum, innumerabilis específicas secundum numerum & ordinem impressiones ab organicis creaturis a Deo in creatione prima constructis recipit, retinet, & secundum hos motus organicos & regulares commovet & disponit aptam præsentem materiam. Hæ sunt nostræ rationales cogitationes, & si quis meliores afferre poterit, nobis nemo nisi iniquus censor, vitio vertet, si illas deserimus, & alias amplectamur, quod omnes ingenui viri semper in physicis & probabilibus fecerunt. Ex hoc principio facillime deducemus, quæ ratione non modo morbosæ partium dispositiones, fluidorum temperiei vitia, inclinationes transfundantur in liberos, verum



verum etiam, quo pacto motus in anima adusfacti, vel firmissime ab objectis externis in sensoriis impressi potentiam agendi certas in materiæ partes retineant. Hæc omnia autem fieri mechanice, id est, physice, naturaliter, & ex quadam necessitatis lege in corporeis substantiis, libere & aperte dicimus ac profitemur.

15. In ovulo autem fœcundato, corpus organicum infantis, utut exilissima mole latet, ulterius nempe extendendum, evolvendum, atque visibile reddendum est. Nam exiguitas corporis ordini atque organicæ partium conformationi nihil derogat. Videmus id manifesto in minimis insectis, v. g. acaro, qui non nisi oculo armato exacte conspici potest: in quo tamen & musculos & canales, cavitates, humores, ac spiritus, summo artificio ac ordinæ compositos esse nemo physicorum facile in dubium vocabit. Quin imo in primorum mensium abortibus observare sæpenumero licuit embryones instar formicæ natantes in crystallina lympa, vesicula conclusa, qualem observationem perelegantem notavit Cl. *Bergerus* in *Lib. de Natura humana*. p. 468. Ante omnia itaque opus est, ut augeatur hoc organum extensione, & continua succi nutritii, blandi, gelatinosi, lymphatici accessione. Hujus autem copia a matre subministratur, adeo, ut non secus, ac aliæ matris partes, totum infantile corpus succo alibili, & quidem delibatissimo, nutriatur. Ingens quidem adhuc viget inter physiologos controversia, qua ratione & quibus viis humor ille alibilis matris communicetur cum ipso fœtu, ubi alii, & quidem veteres mediantibus vasis umbilicalibus ex placenta transferri istum succum ad corpus fœtus asseverarunt. Deinceps surrexerunt alii, qui non tantum per umbilicum sed per os nutriri infantem humore intra amnium collecto, profitebantur. Recentiores autem, ex quibus primum nominandus *Stalpart. van der Wiel*, repudiata veterum de nutritione fœtus per umbilicum sententia, unice contendit,

fœtum nutriri & crescere succo tantummodo per os sumto. Temporis autem ac instituti ratio hic non permittit, exactam trutinam præsentis argumenti instituire: nihilominus non possumus non fateri, admodum dubiam nobis apparere nutritionem solummodo per os, quoniam in ipsa membrana chorii ac amnii accuratissime inspecta nulla vascula arteriosa vel venosa, aut alia conspiciuntur, hinc qua ratione succus possit hic advehi, penetrare non possumus. Accedit maxime illud quod provida natura, in elaborando secundinarum corpore primo tempore sit admodum occupata, ut non incrementum singulare fœtus animadvertatur, antequam placenta uteri insignis molis fuerit utero annexa.

16. Statuendum itaque potius esse existimamus, placentam eum in finem maxime esse formatam, ut recipiat ex osculis arteriarum & glandulosa uteri substantia lymphaticum probe digestum alibilem succum, eumque, si non detur alia via, per poros venularum ab extra intro spectantes cum sanguine fœtus intime misceat ac uniat. Præter hunc usum alium adhuc placentiæ uterinæ assignamus, qui in eo consistit, ut vicem gerat pulmonum, non ut sanguis refrigeretur & ventiletur, sed ut transeundo per capillaria innumera vasa, attritione intima facta exacte, quoad sua principia misceatur, sicque tenuis, fluidus, spirituosus ac calidus evadat, utpote pulmonum usum non refrigerare sanguinem, uti veteres statuerunt, sed spirituscentiam ipsi conferre a præstantissimis viris, SYLVIO, MAUROCOR. DATO, CHARLETON, BORELLO, SWAMMERDAMIO, BOHNIO probe notatum est. Nam si accurate perspicimus placentæ substantiam & structuram, ex meris membranaceis cellulis & innumeris vasorum ramificationibus affabre confata est, & quoniam paucus vel plane nullus sanguis pulmonum vasa intrat, necesse fuit, ut in illud viscus, illorum vices gerens, derivaretur sanguis; ubi tamen non negandum, quod simul ibi roscidi & lymphatici



phatici succi accessione, per glandulas ac poros communicati, ad vitam & nutritionem sustentandam imbutus redeat ad tenellum infansem. Merito autem talem usum placentæ negamus, qualem nonnulli affingunt, existimantes, aereas partes, per eam sanguini inspirari, quibus certe non opus fuit, cum humores, subtili aeris elastici portione iam subactos & retentos a matre recipiat infans. Cæterum tamen non inficiabimur, non impossibile esse, ultimis imprimis mensibus, succum quandam, qui continetur intra cavum amnii & variam habens originem, qua de re consuli potest Bohnius in Circulo anatomico, in patentiore oris, œsophagi & ventriculi cavitatem impelli & per totum corpus sic distribui. Nam per os aliquid humoris ab extra in intestina ingeri copia succorum, quæ observata fuit in superius memorato infante qui clausa alvo & urethra intestinisque extra abdomen propendentibus natus fuit, perspicere licet, utut non ad nutriendum corpus specificè, ut opinamur, destinatus sit.

17. Ex dictis illis facile colligitur, magnam intercedere consensionem matri cum fœtu, ratione huius nutritionis, cuius materiam infans recipit a matre. Quamvis enim non immediate sanguis maternus per arteriosos vel venosos canales ex matre derivetur ad corpus fœtus, neque spiritus animales seu fluidum nervum immediate & directe feratur ex matre ad infansem, nihilominus cum succus ille, quo alitur, & extenditur & vitalis sit infans, delibatissima & defœcatissima sanguinis materni sit portio ac quasi quinta essentia, spirituum animalium copia sufficienter perfusa, (nam non crudum, non indigestum, non ætiositatis expers esse debet illud quod nutrit, sed optimum, subtile, depuratum spirituosum ac temperatum;) ratione huius succi maxima illa consensio matris cum fœtu, non tantum in rebus corporeis, sed in immaterialibus ac specificis motionibus fiat necesse est. Nisi enim in succo illo alibili, qui per placentam fœtui committitur, insit flui-

dum elasticum animale, quod in cerebro ac nervis maxime subsistit, non possemus causas atque ortus ducere ac derivare passionum atque pathematum, quæ sunt ex terrore, vel ira matris in ipsis fœtibus, neque phantasiæ matris effectus in infantibus utero conclusis rite explicare. Equidem non diffitemur, harum rerum explicationem, quoad dicti admodum esse difficilem, quoniam hæ res a sensibus alienissimæ, & subtilissimi mechanismi sunt, hinc temerarium hic esset pro simplici & nuda veritate, meditationes hac de re vendicare, & usque ad extremum vitæ halitum defendere, sed sufficiat, si modo non tale aliquid statuamus, quod sano conceptui refragetur, quod non misceat principia inter se, & tollat spiritus strictè sic dicti, & corporis summe necessarias differentias.

18. Statuimus itaque animam, non quæ rationalis est, ut supra innuimus, sed quæ format, movet & conservat corpus in animantibus tenuissimam esse fluidam substantiam motus agitativissimi. Omnes autem vires cuiusvis substantiæ creatæ immateriales sunt, id est, ipsi effectus, qui fluunt ex creaturis in alias creaturas non sunt materiales, non extensi, satis tamen activi, adeo, ut non nisi immateriali ratione concipi queant; & sicuti crassum corpus vim alterius immaterialem in motu recipit, & secundum hanc reagit, id est, novum motum inchoat; ita quo tenuiora & fluidiora sunt corpora, eo magis sunt apta, ab aliis corporibus innumeras impressiones in se recipere, & propagare, uti id manifesto videmus in vorticibus luminosis, sonoris, qui ex instanti per aerem & ætherem ferri solent; quid ni etiam exinde colligendum erit talem mobilissimam substantiam, veteribus igneam dictam, in fibrillis cerebri ac nervorum existentem, innumerabiles impressiones motuum ab obiectis externis in variis sensoriis recipere, & secundum has, positis omnibus requisitis, ordinatos & determinatos motus efficere. Et quemadmodum in fluidissimis corporibus excitati



excitati motus luminosi, perniciosissime transfunduntur ac propagantur per magnum spatium, ita etiam motus in anima, seu fluido mobilissimo suscitati per totum corpus penetrant, imaginem & impressionem specificam efficiunt, quale quid percipimus in animi affectibus totum corpus alterantibus, ut ideo nullum dubium sit, speciales, & quasi sigillatas in certa figura ac magnitudine vires has motrices immateriales per totum abripi corpus, non sine operatione & activitate, nisi valde sit resistens mobilis materia. Et hac ratione explicari debet radiatio illa spirituum, quam **CARTESIUS** exponere solet phantasie effectus: hinc perspicuum erit, ad effectus istos stupendos, qui per phantasiam accidunt infantibus, deducendos, non opus esse ut advocemus in subsidium proprietates ac potentias spiritibus strictis sic dictis competentes, nempe intellectum, intentionem, directionem ac notitiam.

19. **MORBI** autem, qui ex humoribus seu materno sanguine & sero oriuntur, non aliam agnoscunt originem, quam succum nutritium matris, quo fœtus nutritur, a temperie ac indole sua blanda debitaque mixtione deflectentem: quod si enim vitales matris fluores impuri sunt, variis excrementitiis salinis & sulphureis sordibus viscidis deturpati, quod fit ex vitio diætæ, circulatione debiliore, & excrementorum secretionem in matre impedita, non potest aliter fieri, quin succus nutritivus infantis similis naturæ ac indolis fiat, eodemque imo graviores effectus morbosos in infante, quam in matre producat.

20. Sed ut paulo specialius progrediamur in explicandis ac enodandis affectuum infantum in utero causis operæ pretium esse existimamus. Primum quod attinet ad morbum variolarum, hic infantes in utero facile corripere potest, si mater eodem laborat: etenim a sale tenui, sulphureo, caustico a massa humorum & sanguinis, quin imo a partium solidarum, quibus implicitum diu latuit, nexu ac involucris libera-

*Opusc. Patb.*

to originem suam ducit; quod vehiculo lymphæ per totum corpus distribuitur, & spasmodicas contractiones, anxietates, irregulares sanguinis & spirituum motiones efficit, donec relaxata cute vigore motus musculorum, præsertim cordis, ad habitum corporis propellatur. Idem causticum principium, mediante lymphæ communicatur quoque ex facili ipsi fœtui, inque eo similes commotiones morbosas excitare aptum est, donec etiam vigore cordis intrinseco relegatur ad relaxatam infantis cutem. Eodem modo morbillorum morbus, qui ex simili mitioris tamen acrimoniæ elemento constat, pronascitur, & vitium præcipue in sero ac lymphæ complectitur. Multo magis autem putredinosa ingens destructio lymphæ ac sanguinis in lue venerea & accumulatio multarum salino-acrium causticarum partium infesta ac exitialis erit tenellis infantibus.

21. **QUARTANAM** ex matre transire in fœtum curiose superioribus observationibus notatum fuit. Nam febrem, maxime intermittentem, esse irregularem spirituum commotionem, & fibrillarum musculorum spasmodicam, præsertim in principio, externi habitus corporis constrictionem, quam postea citatus ac vehemens motus cordis & artiarum, & consequenter progressivus motus sanguinis velocior, plane tamen inæqualis, sub vigore morbi & æstu subsequitur, ut symptomata ac phænomena satis testantur, notissimum est. Revertitur autem hic motus per periodos, & quidem quarto die, quoniam materiæ febrilis, procul dubio causticæ, acris, salino-sulphuræ indolis ad spasmos spiritus stimulantis activitas, quæ in certa quantitate ac qualitate, antequam motum inordinatum in spiritus inchoare queat, consistere debet, ad vigorem & statum illum requisitum, propter sanguinem valde viscidum, qualis solet esse in quartanis, non prius pervenire & efficaciam nocentem exserere potest, quam die quarto. Ex quibus jure meritoque concludimus, cum similis sanguinis, &

E

luc.



succorum viscida intemperies quartanæ nutrix & sustentatrix in infantibus deprehendatur non secus ac in matre, nec non principium illud materiale sulphuræ acris indolis, quod ex transpirationis impeditæ, vel excretionum prohibito officio generatur, tali ratione communicari etiam cum ipso infante. Unde ratio in promptu erit, quare infans in lucem editus diu adhuc febri hac corripi possit.

22. Qua ratione autem icterus matris in infantem derivetur, res adhuc facilior conceptu est. Tinctura enim bilis flava, sulphurea non in sanguine, sed in lympa ac sero conspicitur. Jam si firmiter supponamus, non sanguine, sed succo lymphatico nutriri fœtum in utero, necesse est, ut flava hæc tinctura a lympa non tam facile rursus separanda amandetur etiam ad ipsum infantem, ejusque corpus simili colore afficiat. *Amatus Lusitanus curationum medicarum Cent. V. fol. 71.* refert; mulierem quandam ab epoto medicamento, cui admixtus crocus erat, duas puellas coloris lutei peperisse. Experimentum etiam fecit *Cl. Hertod*, cani gestanti in utero alimenta croco copiose condita offerens, catelli erant de nigro ad albedinem variegati coloris, excepta abdominis regione, hinc inde sese volutantes, in quibus albidiores cutis particulæ, plenarie croceo colore tinctæ fuerant.

23. CACHECTICAS & hydropicas gravidas fœtus in lucem edere œdematoso tumore turgidos, observationes supra adductæ loquuntur. Ratio etiam hujus rei facilis videtur: etenim hydrops ex spiritus ascentiæ defectu, circulatione sanguinis & consequenter transpiratione impedita, & glandulosorum viscerum infarctu a seri copia nascitur. Qualis autem sanguis & lympa matris, & qualis spirituum constitutio, quale robur partium, talis etiam spirituum, humorum, ac solidarum partium dispositio ac status erit in ipso infante, & consequenter similis ad morbos proclivitas. Ex hisce quoque non difficilis explicatio est, quare calculosæ concrectiones in vesica, quibus affligitur

mater, in infantibus etiam recens natis deprehendantur, utpote ex sero, tartareis, terreis salibus ad coagulationem aptissimis imprægnato, in substantia renali, vel vesica læsa promptissime calculi generantur, tale serum tartareum ad infantem transire & similes effectus edere posse, res omnis dubitationis expers est.

24. EPILEPTICI insultus & omnes spirituum inordinatæ commotiones, spasmos & convulsiones hinc inde in partibus dispositis efficientes, lubentissime ex matre proficiscuntur in infantem, motus enim facilius penetrat, quam qualitas vitiosæ materiæ; unde quotidiana docet experientia, ad omnes animi commotiones, & nervosi generis pathemata vehementia, debilitari & affici ultra modum infantes; & quamvis nervi non pertingant ad ipsum infantem, fluidum tamen illud elasticum actuosissimum, quod in nervis existit, transit in succum alibilem & sic cum infante communicatur. Si enim lac & salivam ingreditur illud fluidum, quidni etiam in succum corporis nostri puriorem, subtiliorem transibit. Jam autem morsus animalium rabidorum, ira percitorum, luculenter comprobatur, spiritus communicationem habere cum saliva, & terror quoque nutricis, qui sæpenumero fugientibus infantibus lethalis est, clarissime demonstrat, a commercio spirituum ipsum lac non esse immune.

25. DARI etiam casus experientia abunde docet, ubi gravidæ laborant ex vehementi morbo fœtusque edunt vitales & primo intuitu sanos, qui tamen brevi post graviter ægrotant & moriuntur. Ita proxime talem nobis historiam communicavit *Excellent. Dn. Lichtenbanius, Archiater Saxonicus*, referens, illustrem matronam partui jam proximam correptam fuisse variolis, tunc temporis epidemice grassantibus, quæ die ab invasione tertia præsentem enormissimam hæmorrhagiam enixa est fœtum vivum quidem, & nullis maculis conspurcatum, qui tamen sexta post nativitatem die, convulsionibus moriebatur, sphacelo in visce.



visceribus hinc inde apparente. Non potest enim aliter fieri, quin matris succi vitales conspurcati similem characterem sanguini foetus imprimant: qui autem non illico, successively tamen, virulentiam suam prodit.

26. Ultimo loco subjungendam quædam sunt circa signa, ex quibus iudicium formare licet, foetum in utero esse imbecillum seu morbosum: & audiendus hac in re primo omnium est *Hippocrates* qui *Secl. V. Aphor. 52.* scribit. *Mulier utero gerenti, si lac fluat e mammis copiose, foetum imbecillum significat. Si vero firma solidaque mammae fuerint, valentioris conceptionem indicant.* Hic canon non destituitur suo ratiocinio, & experientia quoque corroboratur. Quod si enim gravidæ ultimis mensibus præter morem solitum magnum affluxum lactis sentiant ad mammas, indicium est, non tanta in abundantia amplius sanguinem cum succo fluere in uterum, sed ex quadam causa præternaturali vasa uterina compressa, & constricta esse, ut hac ratione intercipiatur illius affluxus. Hinc necesse est, ut impetus copiosi sanguinis ad mammas, seu corpora flaccida distensibilia, deriveatur; unde, materia spirituum & alimentis infantibus subtracta, necessario hi debent fieri imbecilliores. Ex adverso etiam si mammae in gravidis nimis fuerint extenuatæ, pariter indicium est foetus imbecillioris & intermorituri, sicuti id in subsequenti aphorismo magnus noster *Hippocr.* præclare confitetur: nam si mammae, quæ alioquin a motu foetus ad extremum usque gestationis tempus, a lactis copia solidæ esse debent, non sensim & pedetentim, sed subito extenuentur, indicium maximum est, oportere subesse causam, & vehementem mutationem in sanguinis & spirituum motu præcessisse, dum vel ipse in aliis partibus stagnat, inflammationem parit, vel ob defectum spirituum & virium chylus non generatur, vel ad mammas vehitur; uno verbo, omnes extenuationes gravidarum subitæ periculi non sunt expertes. Quod etiam innuit laudatissimus *Hippocr. aph. 55. ejusd. Secl.* dum inquit, quæ gestantes uterum fe-

bribus corripuntur aut vehementer sine evidente causa extenuantur, eæ difficulter cum periculo pariunt, aut abortientes periclitantur. Nam extenuatio illa non leve vitium in sanguine, & robur destructum indicat. Ubi enim caco-chymia est, ibi non potest consistere virium robur: quodcumque autem corpus matris vitiosis humoribus abundat, vel intestinus calidus depascens humidum motus in sanguine custoditur, fieri non poterit, quin mater & foetus sit imbecillior. Quandoque autem accidit, ut mulieres gravidæ extenuentur, quia foetus nimium consumit alimoniam matris; unde etiam non sine ratione scribit *Hippocr.* quod tales foeminae cum periculo pariunt, quia causæ necessariae ad partum facile tolluntur, ut sunt robur matris, viæ apertæ, molles, ac lubricæ.

27. Præterea vel excessivus vel deficiens motus infantis in utero, signum est certissimum vel morbofi vel imbecillis foetus. Motus enim plane languidus vel nullus si percipitur, extremam debilitatem significat, qui ex imminuto affluxu boni succi ex matre, & defectu spiritaliscentiæ in sanguine, nascitur; si autem nimis & vehementes observantur commotiones & jactationes membrorum infantis in utero, infallibile indicium est, convulsionibus agitari tenera membra.

28. Postremo ea consideranda quoque veniunt, quæ magna facultate pollent foetum morbosum in utero efficiendi. Ex omnibus autem hic obtinet principatum aer, & quidem tempestas aeris, præsertim in hyeme, nimis humida, austrina, succedente vere sicco & aquilonio. Magnæ considerationis hac de re est *Aph. XII. Secl. II. Hippocr.* Si hyems, inquit, austrina & admodum pluviosa fuerit, ver autem siccum & aquilonium, mulieres, quibus vere imminet partus, ex quacunque causa abortiunt, aut si pariunt, imbecilles aut morbosos partus edunt: ita ut vel ipsi statim intereant, vel tenues, vel valetudinarii vivant. Ratio hæc esse videtur



quando hyems flatibus meridianis, austro nimirum, Africo, euronoto, & libonoto constat, & coelum justo magis pluviosum, transpiratio & circulatio sanguinis in gravidis, quæ ordinario plethoricæ sunt, languidior & depressior est, tali veroratione, copiosi, pituitosi, crudi in corpore generantur humores, qui, accedente aere frigidiori, vento aspero boreali, ex ambitu & cortice corporis ad interiora ipsumque uterum magis trudentur & urgentur. Unde dum nimiam relaxationem uteri, infarctum & sanguinis impeditum motum efficiunt, non modo causam præbent abortus, sed & infirmum & morbosum reddunt infantem. Aeris itaque tempestates in culpa sunt, ut foetus reddantur morbofi, & ut certum anni tempus noxium ac funestum quibusdam prægnantibus sit. Egrege hoc insinuat *Tbom. Barthol. Hist. Anatom. Cent. III. Hist. 59.* Primis anni 1654. inquit, mensibus satis calidis, post æstatem æstuantem Hassniæ plerisque prægnantibus male cessit graviditas, calidioris cœli vitio. Petechiis enim plurimæ occubuerunt, & gravidarum periculum secuturam pestilentiam prælagiebat. Infectus certe & intemperie quacunque vitiatus aer a matre attractus facillime tenellum foetum vel in utero enecat, suffocat, vel si robustior est, ut inquinatum sibi que noxium aerem fugiat, ante statum tempus expellit. Hinc aliæ prægnantes eadem hyeme primis mensibus abortierunt, aliquæ postremis, magno propriæ vitæ discrimine, aliæ petechiis infectæ, una cum foetu expirarunt, aliæ epilepsia convulsæ, quæ sine intermissione miseras comprehendens paucarum horarum spatio e medio sustulit.

29. Secundo loco & ciborum assumptio, excessus vel defectus, sive nimia satietas & abstinentia, matrem & foetum ad morbos disponere solet. Nimia enim alimentorum copia gravidis semper est insalubris, quæ sua natura ad statum plethoricum & cacochymicum inclinant. Succorum enim copia non rite subigi, circulari, & a superfluis evacuari potest. Unde impurus alibilis succus nasci-

tur, qui totum nutritionis negotium in foetu pervertit. Nimia autem abstinentia, vel inedia, subtrahendo spiritibus & corpori necessarium pabulum, non potest non esse foetibus summe exitialis. Meretur hic adduci, quod JOHANN. MEURSIUS Vir Clariss. lib. 1. de urbe Leidensi Cap. XII. p. 58. habet, dum ingentem famem, qua istius urbis incolæ tempore obsidionis Hispanicæ afflictæ fuerunt, latius describit, & inter alia hæc refert: ægro- tantibus & puerperis, quæ lactarunt, in dies singulos buccellatum ad quartantem libræ adpensum, nonnullis in ipso utero foetus inedia extinctus, & abortum multæ fecerunt. Ante omnia acidorum usum esse noxium annotarunt Medici, vid. GARMANN. A. II. Dec. I. Obs. 149. fructus horæi & crudi penitus ab usu excludantur. Infantes enim nasci exinde solent laborantes defluxionibus catarrhalibus, narium obstructione, anxia respiratione, ut de vita periclitentur, qua de re vide *Miscell. Cur. Dec. II. A. X. Obs. 83.*

30. Affectus animi immoderatos & intempestivos, quod concernit, quantum si noceant corporibus humanis, & imprimis tenellis matrum foetibus, judicari facillime poterit. In instanti enim hi ipsi labem inferunt foetibus, & nulla causa solennior est, & celerius abortum procurare solet, quam vehemens terror, & diuturnus mœror, angor, & tristitia.

31. Hisce jam discussis, è re fore judico, quædam addere ex therapeutico fonte, quibus tam matri, quam foetui infirmo succurrere possimus. Non autem nostri propositi est, curam specialem cujusvis affectus, quo gravida laborat, texere vel commendare, sed saltem eo nostra tendit intentio, qua ratione foetus imbecillitas averti, & si ea præsens sit, emendari possit. Primo omnium itaque moderationem & mediocritatem in lex rerum non naturalium usu commendatissimum sibi habeat gravida, & occasiones affectuum & phantasmatum omni modo ac studio evitet, sique sanguine abundans est, necesse est, ut plethora & cacochymia avertatur circa



Circa medium gestationis tempus per debitam venæsectionem, quæ solet intempestivam fœtus expulsionem præcavere. Alvus quoque quotidie respondeat, eaque ad suum officium revocanda opoclysteris emollientis, sive leniori rhabarbarino passulato assumto pharmaco.

32. Denique studeat maxime omnium virium conservationi, cui fini ex fonte pharmaceutico inserviunt analeptica, mitiora aromatica, carminativa, balsamica, essent. ambræ, si ferri potest, cum balsamo vitæ nostro & spiritu nistri mixta; item pulveres ex C. C. præparat: coralliis, unicornu animali, ebo- re; externe aquæ vitæ, hungariæ, balsam. & spiritus apoplect. regioni abdominis sunt applicandi. Si vero convulsionibus videtur infans in utero agitari, aquæ antispasmod. ex floribus, pulvis marchion. specificum cephalicum Michael. mixtura simplex, propinanda erunt. In universum autem tenendum, ab omnibus fortioribus purgantibus, sudoriferis, medicamentis calidioribus, opiatis, penitus abstinendum esse, quocunque etiam affectu laboret gravida; sed potius blande ac temperate semper agendum erit, ne damnum ac noxam inde infans in utero contrahat.

## DISSSERTATIO VI. DE DENTIBUS, EORUM MORBIS ET CURA.

### §. I.

**Q**uemadmodum nulla ad constitutionem machinæ nostræ artificiosissimæ faciens pars est, quæ non luculentissime ineffabilem magni opificis sapientiam atque benignitatem demonstrat: ita etiam dentes, illorumque ordo & structura opus identidem Dei miraculosum ostendunt. Primum circa illorum naturam illud maxime occurrit notabile, quod cunctas animantis partes duritie & durabilitate vincant lon-

Opusc. Path.

gissime. Unde etiam. TERTULLIA-  
NO teste lib. de resurrectione, antiqua pietas dentes ob perennationem post multos centum & mille annos sub terra voluit recondere, pro integrando corporis in resurrectione seminario. Quade re latius videri potest GALENUS de ossibus p. 480. Deinde, quando admirandum illum ordinem & perpulchram seriem, qua in utriusque maxillæ extremitatibus lyræ ad instar positi sunt, contemplamur, non possumus, quin & in hoc providentissimæ naturæ solertiam admiremur. Ita enim ipsos locatos conspiciamus, ut superiores cum inferioribus committi queant, non tamen omnes simul & semel, ut variari actus possint incisionis & contusionis ciborum: commissis enim molaribus, anteriores superiores transgressi, inferiores tegunt, coeuntibus anterioribus, hiant molares, quiete & actione utrinque mutua intercedente. Mirabile hoc artificium sufficiens jamdudum visum fuit GALENO loc. cit. naturæ calumniatores, qui artificiosa ejus opera fortuito atomorum concursui adscribebant exinde refutare. Concinnum & longe utilissimum hoc organon sive molam microcosmicam, sine qua masticatio alimentorum, quæ tamen vitam longam, bene monente HELMONTIO in tractatu de vietus ratione, multum facit, legitima fieri nequit, in præsentî, paulo penitus perscrutari, illorum naturam, structuram, connexionem & usum, nec non quæ ratione lædi, & quibus remediis restitui queant, expendendo, apud animum constituimus.

2. Omisso autem omni curioso & prolixo, minusque utili nominis scrutinio, saltim, quod dentes quasi edentes olim nominati fuerint, sub principio statim dentium descriptionem quandam exhibebimus. Sunt itaque dentes partes corporis ossæ, ex substantia duplici, una durissima & quasi lapidea, altera molliori, ossæa tamen constantes, intus cavitate quadam instructæ, maxillarum alveolis per gomphosin inarticulatæ in usum masticationis, melioris loquelæ



& ornatus. Primum itaque notandum: dentes gaudere diversa substantia, exteriori, quæ est durissima, instar lapidis, utut de natura lapidis non participet. Experimento enim clarissime ostendere id possumus, dum integer dens humanus, immissus sufficienti aquæ fortis quantitati per aliquot horarum spatium promptissime dissolvitur, remanente paucissima, glutinosa, quæ sulphurea & pinguiuscula dentis portio videtur, substantia. Solutioni quando ad saturationem debitam affunditur oleum tartari per deliquium, candidissimum exsurgit magisterium in usibus medicis cum illo, quod ex dente apri, aut ungula alcis fit, conveniens. Hanc chymicam mechanicam non instituere & perficere licebit cum silicibus & lapidibus genuinis. Est autem tam dura & solida exterior dentium substantia, ut sub vehementiori attritu & concussione cum ferro scintillulas copiosissimas edat, quod tamen tantum valet de dentibus molaribus grandiorum animalium, qui propter magnitudinem magis resistunt. Lapidea hæc dura pars observatur tantum in illa portione dentium, quæ extra gingivas prominet, & instar corticis & involucri investit osseam dentis partem: radices quippe dentium, quæ in alveolis & sub gingivis latitant, osseæ tantum naturæ, & hinc non tam candidi, splendidique coloris sunt, quam externa pars, promovens libera a tegmine. Durissima autem est externa, ut non tantum ab omni injuria & læsione immunis sit, verum etiam, ut incisioni & confractioni durorum alimentorum eo melius inservire queat. Materia interior ossea facilius propter poros laxiores dissolvi & consumi potest, unde etiam externo cortice duriore tegitur, ne forsan particule acres corrosivæ ciborum illam ipsam lædant ac destruant. Hæc itaque est, quæ in carie maxime læditur & afficitur: cortex enim raro ab acri corrosivo succo consumptus videtur totus, sed saltem quoad partem. Deinde differt etiam silicea dentium pars corticalis exterior ab interiori, ipsa structura: in illa enim

obliquo situ in circellos terminantur striæ; altera autem interior, mollior, & præcipua, qua dentes constant, pars ex multis fibrarum planis secundum longitudinem sibi firmiter superinductis constructa est. Patent singula plana resolutione facta per longam ossium macerationem; integræ namque osseæ reticulares bracteæ evelluntur, qua de re legi meretur MALPIGHIUS in *anatomie plant.* p. 19.

3. Diximus in definitione, cavitatem quandam reperiri ipsis in dentibus, quæ etiam luculentissime se ostendit, quando secundum longitudinem per medium dentem dissecamus, ubi observamus, singulas dentis radices cavitate esse donatas, quæ autem satis insignis est in ipsa basi, seu ea, quæ ex gingivis eminet, parte. In cavitate enim dentis, ex quocunque animante ipse sit, semper & perpetuo reperitur substantia quædam mucosa, membranacea, seu funiculus quidam mucosus, forma vesicæ oblongæ extenuissimis vasis sanguifluis, membranis nerveis, & glutinosa quadam substantia compositus, qui etiam usque ad extremitatem dentis pertingit, ibi membranis quasi magis constrictis quodammodo durior & rubicundior apparet. In foetibus & pueris ipsa hæc cavitas satis ampla ac magna est, tenui squama, notante EUSTACHIO *tr. de dentibus* ad septimum annum instar favorum apum circumsepta, quæ tamen in adultis magis imminuta est. In pueris hoc cavum refertum est mucosa materia, circumsepta membrana, quæ quoad exteriorem superficiem rubicunda, interius magis alba apparet, & hic ipse mucus tandem convertitur in ipsam dentium, substantiam, & genuinum illorum nutrimentum existit. Videmus enim, quo magis dentium substantia solidescit, ac firmiter evadit, uti in adultis, eo paucior deprehendi hunc mucum, & vice versa in infantibus, quorum dentes ex tenuibus lamellis constant, copiosum reperiri. In vitulinis dentibus, hanc materiam commodissime oculis lustrare licet, in superficie ejus vestigia sanguinis



nis sub rubedine aliquali subinde se re-  
præsentant, quam etiam compressa ma-  
teria mucosa manifesto evomit

4. Hisce decursis, placet iam forma-  
tionem & generationem dentium paulo  
penitius inspicere. Hic autem primo  
annotandum venit, dentes omnes, non  
secus ac reliquas partes, statim in ute-  
ro accepisse rudimentum, ibique iam  
dum esse efformatos. *Αὐτοψία* enim ana-  
tomica hic omnem exsuperat rationem.  
Pulcherrime scribit EUSTACHIUS *de*  
*dent. c. 15.* se plures maxillas fœtuum,  
tam abortivorum, quam maturorum  
aperuisse, ibidemque dentes incisores,  
caninos, & tres molares adhuc molles,  
tenuissimo interstitio osseo disjunctos ob-  
servasse, quibus singulis folliculus mucosus  
& tenax, extrema parte perforatus,  
unde mucro dentis pullulantis procedit,  
fuisset appensus. Imo his artificiose se-  
paratis, novus iste, licet exiguus, ad-  
huc ordo obsconditus latuit, qui quasi  
germen est pro renovatione ordinis prio-  
ris, uti latius id dicto loco describit;  
imo posteriores & extraordinarios den-  
tes, quos sapientiæ communiter vocant,  
in calvariis demortuorum adhuc lati-  
tasse, testis est ANDREAS VESALI-  
US *de corp. hum. l. 1. cap. 11.* Eadem ra-  
tione COLUMBUS *l. 1. c. 10.* in abor-  
tibus septem & octo mensium, item in  
recens natis demortuis exiguos dentes  
in suis alveolis invenit, & ex ipsis  
eruit. Ex hisce dictis facile intelligitur,  
nullos de novo dentes creari, quando  
priors decidunt, sed deiectis prioribus,  
latentes saltem succedere; unde fabula  
est, in senio de novo creari quosdam  
dentes, quando nimirum decrepitæ æ-  
tatis homines, vel cum summo vel sine  
dolore pariunt dentes. Historias vide in  
M. N. C. Dec. II. anno IV. p. 73. SCHEN-  
CKIO *observ. med. p. 215.* LAUREN-  
TIO *in anat. p. 728.* SEBIZIO *disp. de*  
*dent. EUSTACHIO loc. cit.* BARTHO-  
LINO *in anat. p. 728.* HELMONTIO  
*arcan. Paracels. p. 740.* Ceterum illud  
notabile est, incisores præ ceteris in fœ-  
tibus laminam seu squamam candidam  
solidiusculam, caninos vero minorem,  
nec ita solidam possidere; molares autem

tenuissimam, & fere chartaceam: quare  
non mirandum est, si quidam citius,  
quidam tardius, suum adipiscantur com-  
plementum, & eodem ordine, quo in  
utero quoad rudimenta sunt, distincti  
egrediantur. Vid. EYSSONIUS *de offi-*  
*bis infant. cap. 3. p. 51.* Apparent autem  
ordinario in homine primum inciso-  
res, mense septimo, vel serius, deci-  
mo, item post anni cursum: canini  
nono aut decimo mense, maxillares  
vero ante secundum annum, & se-  
cundo anno producuntur, nonnullis ci-  
tius superiores, nonnullis inferiores.  
Decem autem in utraque maxilla rursus  
excidere solent, quatuor nempe inciso-  
rii, duo canini, & quatuor maxillares,  
& excidunt quarto, quinto & sexto  
anno. Novi vero seu succedentes, vel  
circa septimum, vel circa decimum quar-  
tum annum erumpere solent. Confera-  
tur huc BARTHOLINUS *in anat. p.*  
*728.* Verheyem *anat. p. 224. 225.* & FO-  
RESTUS *lib. 14. observ. 3. in scholiis.*

5. Dictum antea fuit de materia dentium  
alimentari, quod sit mucosa. Depre-  
hendimus id ipsum non tantum in pue-  
rorum dentibus, sed magis adhuc in fœ-  
tibus & abortibus, ubi tres sese partes  
exhibent, folliculus membranofus, aut  
potius mucosus, totum dentem inclu-  
dens, facile ab eo secedens, a basi æque  
ac radice perforandus: radix mucosa,  
pellucida, vasis scatens, compressa san-  
guinem sudans, cavitate notabili præ-  
dita, successu ætatis a circumferentia ad  
centrum magis magisque offescens, ita  
tamen, ut levis cavitas semper rema-  
neat; & basis ipsa candidæ squamæ te-  
nuis & excavatæ similis. Vid. BLASI-  
US *in anatom. contract. pag. 100.* Mucosa  
& glutinosa hæc materia verum pa-  
bulum ac alimentum dentium est, quo  
crescunt, extenduntur, & soliditatem  
acquirunt. Solida produci ex fluidis ex-  
perientia multiplici comprobatur con-  
stat. Testantur id ossa corporis solidis-  
sima, quæ nonnisi ex succo terrestri,  
fluido tamen, sanguinis ortum suum ha-  
bent; lapides crescere ex aquis stillaticis  
in subterraneis fornicibus, notissima a-  
pud curiosos res est. Aquam communem



liquore certo petrifico affuso, successu temporis, quoad partem indurescere ac in lapidem converti posse, nostrum est experimentum. Eadem ratione nullum dubium est, mucosam illam materiam in dentibus contentam cedere in substantiam ipsorum osseam. Comprobat inter alia hoc ipsum analysis chymica, dum mediante machina; quæ ab inventore dicitur Papiniana, nostra autem industria longe maiori perfectione & effectu splendet, non tantum omnia ossa, sed & ipsi dentes brevi spatio emolliri, inque succum gelatinosum resolvi possunt, remanente terrestri quadam mucosa substantia, ut adeo hac ratione elementa ossium clarissime demonstrari queant. Certissimum enim est, non secus ac alias corporis solidas partes ipsa componi ex succo gelatinoso; terrestriori tamen & crassiori, cum minus solidæ ac molliores partes, v. gr. fibrosæ ex fluido gelatinoso succo, in quem etiam omnis caro machina Papiniana resolvitur, consistit. Originem mucosa dentium alimentaris materia habet ex ipso sanguine, & advehitur mediantibus ramulis arteriolarum minutissimis, ex carotide externa oriundis, per ipsius dentis poros. Antea jam dictum fuit, materiam hanc mucosam in dentibus repertam membrana contineri satis valida, quæ copiosissimas vasorum sanguiferorum & advehentium, & revehentium ramificationes repræsentat. Intensa autem huius membranæ rubedo præcipue apparet in infima parte cavitatis dentis brutorum. Ratio hinc facile deducenda est, quare e dente carioso serum sæpius sanguineum exstillet, sive suctione evocari queat, manifesto indicio, sanguifera vasa in ipsam dentium cavitatem penetrare. Mea itaque sententia ex poris arteriolarum cribratur & transsudat succus lymphaticus pellucidus, qui in membranæ cavitatem effusus, illic subsistit, & successive concrescit, quoniam vasa dubio procul lymphatica, quæ iuxta SCHENCKIUM *anat. part. hum. corp. p. 2. c. 6.* cavitatem dentis intrant, tenuiorem & liquidior partem absorbent & revehant, remanente crassiore,

& ad concrescendum aptiore, quæ primo in superficie & circumferentia longo transpiratu solidescit, cuius postea interstitiis, novus succus affusus, tandem successu temporis maiorem soliditatem conciliat. Revera enim osseæ dentis partes nutriuntur succo, qui per poros advehitur. Videmus nutriri ossa, quoniam tendines & cartilagine temporis diuturnitate osseæ redduntur, & ossa mollissima in infantibus durissima tandem evadunt. Osseus denique succus, qui ex ipsis ossibus fractis transsudat, facillime concrescit, & ad callorum generationem, quibus mediantibus ossa glutinantur, facit. Statuendum itaque esse existimamus, ossa non tantum ad iustam mensuram augeri, sed ad senium usque nutriri, dum nova semper materia alimentaris per vasa sanguinea accedit. Et hæc est ratio, cur accessu novæ materiæ in infantibus aucti & extensi dentes, tandem protrudantur ac ex gingivis appareant. Dentes autem continuo crescunt, alioquin ex continua attritione & masticatione cito forent contriti, sicut gutta cavat lapidem: quantum ergo atteruntur, tantum rursus augefcunt. Quando autem dentes vel deficiunt, vel excidunt, succus ille pro dente augendo in alveolum vacuum delatus, ipsum ossea substantia replet, gingivali carne, etiam durior reddita, ut dentium vices aliqua ex parte supplere possit.

6. Perspecta hæcenus dentium generatione ac nutritione, restat iam, ut explicemus, unde dentes ceu ossa sentiendi vim obtineant. Sentiunt autem dentes non eatenus, quatenus ossei sunt: absurdum enim esset ossibus sensum adscribere velle, qui adeo duri sunt, ut vix igne ac ferro sint domabiles, sed quatenus singulis dentium radicibus per poros minimos in hominis adulti præsertim incisoriis & caninis vix conspicuos, in maioribus autem brutis satis observabiles, tenues nervorum surculi, qui ex quinta secundum enumerationem recentiorum prodeunt, implantantur. Nervuli hi cum vasis sanguineis ope membranæ velut in funiculum constricti sub denti-



dentibus decurrunt, & dentium cavita-  
tem ingrediuntur. Horum nervosorum  
furculorum, utut minimorum, sensibi-  
lissimorum tamen gratia dentes dunta-  
xat, evidenti inter ossa sentiendi facul-  
tate donatos credimus. Noverat nam-  
que rerum opifex, cum dentes nudicre-  
bro variis alterationibus, rosionibus,  
fractionibus exponantur, illos plus cate-  
ris ossibus enutriri, & incrementum lon-  
giore vitæ tempore accipere debere, un-  
de ipsis nervos dedit, ut influxu spiri-  
tuum pro majore accretione juvanda &  
nutritione gauderent. Nervus autem, qui  
per maxillam tam superiorem, quam in-  
feriorem transeunt, ac ipsis dentibus im-  
plantantur, ab ipso quinto pari originem  
suam habent. Distribuitur nimirum hic  
nervus in varios ramos, quorum pri-  
marii hi sunt, unus ophthalmicus, qui  
oculi orbitam ingressus adnatæ oculi tu-  
nicæ, glandulæ lacrymali, palpebris,  
musculis nasum sursum moventibus, i-  
tem frontis musculis suas fibrillas imper-  
titur. Crassior ac interior propago hujus  
rami ophthalmici per foramen peculiare  
in orbita, calvariam juxta cristam galli  
ingrediendo, crassam meningem pene-  
trat, ac subinde e cranio exeundo per  
foramen ossis cribriformis nasum ingre-  
ditur, & per membranam ejus distribui-  
tur. Alter ramus quinti paris maxilla-  
ris e cranio per tertium foramen emer-  
git ramulis variis conspicuus, quorum  
primus postquam furculos musculo maste-  
teri, gingivarum carni & radicibus den-  
tium maxillæ superioris per foraminula  
conspicua eis in postica impertit maxil-  
læ parte, sinum peculiarem ossis infimam  
orbitæ partem constituendis subit, &  
ubi primum ex ipso per foramen pecu-  
liare ipsimet orbitæ subditum egressus  
est, modo in tres, modo in quatuor  
dirimitur propagines, quæ utrinque fa-  
ciei tegumentis, labro superiori, mus-  
culo infimam nasi partem ad latera du-  
centi, nec non interno ipsius nasi mus-  
culo, fibrillas plures largitur. Alter ra-  
mus deorsum recta fere tendens circa  
posticam ductuum seu canalium ad fau-  
ces tendentium regionem in duas pro-

pagines dividitur, quorum superior ad  
membranam pituitariam, quæ sinum  
sphenoideorum, ethmoideorum, fronta-  
lium sinuum & maxillarium interiora  
obducit: inferior vero per foramen pe-  
culiare parti ossium palati incisum tran-  
sit per carnem peculiarem & spongio-  
sam palati ossibus substratam, ubi mi-  
nimi ramuli dentes anteriores superioris  
maxillæ, mea sententia, etiam ingredi-  
untur. Ramus tertius maxillaris infe-  
rior seu gustatorius dictus per quintum  
utriusque lateris foramen emergit, in  
tres insignes propagines finditur, qua-  
rum prima ac interior, utrinque lin-  
guæ lateri, paulo supra radicem illius  
subiicitur, & per mediam linguæ regio-  
nem & glandulas maxillares trajicitur.  
Secunda propago sinum infra os man-  
dibulæ inferioris excavatum ingreditur,  
ubi plures exserit fibrillas, quo denti-  
um radices penetrant, & cum nervus  
hic ad radicem quinti dentis molaris  
pertingat, per foramen in antica parte  
maxillæ exit, & anterieus ad labium  
ejusque musculos excurrit. Tertia pro-  
pago ramus eiusdem maioris glandulam  
parotidem subit, & in ipsa terminatur.  
Cognita sic ramificatione paris quinti,  
in promptu erit deducere inferius, quo-  
modo dentes per consensum etiam ali-  
as partes afficiant, & quare medicamen-  
ta naribus, temporibus, item posticæ  
parti maxillæ inferioris applicata in si-  
stenda odontalgia insignem habeant effi-  
cacia.

7. Quod numerum dentium illorum  
magnitudinem, figuram & officium at-  
tinet, dentes ut plurimum triginta duo  
numerantur, una serie in utraque ma-  
xilla sedecim instar iustissimæ choreæ fi-  
ti, in foeminis vero sæpius quatuordecim.  
Natura communiter homini con-  
cedit dentium pluralitatem, ita disposi-  
tam, ut qualibet mandibula detur unus  
dentium ordo, quo nimirum eo melius  
alimenta comminuantur & ad chylica-  
tionem præparentur. Quæstio hic move-  
ri posset, an ex frequentia dentium vi-  
tæ longitudo brevitæque diiudicanda sit?  
Notatum enim jamdudum est ab Hippocr.  
lib.



lib. VI. epidem. sect. 6. t. 2. Qui longa vita sunt, plures dentes habent BARTHO-  
LINUS in instit. anat. p. 730. Paucitas, in-  
quit, dentium & signum est materia inop-  
ia, & debilis vis formatricis, aut causa  
est, quare cibi non bene preparari queant,  
unde concoctio prima & secunda quoque  
vitiatur. Plura vide in M. N. C. Dec. I.  
an. VI. & VII. obs. 138. & SCALIGE-  
RO de subtil. ad Cardanum. Plures ad-  
sunt dentes, & quidem divisi, quo sta-  
tuto tempore non uno impetu omnes,  
quod valde dolorificum esset propter do-  
lorum augmentum, sed divisim e toru-  
lis suis egredi possint, deinde dum unus  
ab officio suo desciscit, nec huic variis  
de causis amplius præesse potest, facile  
ceu rebellis sine alterius adhuc sani læ-  
sione ejici queat, quæ omnia minus fe-  
liciter contingerent, si omnes dentes  
unum os continuum facerent, læsa enim  
illius tunc aliqua parte totum corpus  
facilius afficeretur necesse esset. Magni-  
tudine dentes in homine sunt medio-  
res. Ratione figuræ & officii varia ade-  
pti sunt nomina, quorum quatuor me-  
dii priores incisarii vocantur, sunt enim  
lati & acuti, quo oblatum ipsis cibum  
mordendo cultri modo promte abscin-  
dant dividantque, vocantur etiam riso-  
rii, quod inter ridendum primo denu-  
dentur, item lactei, quoniam primi pro-  
dire solent: dein sequuntur canini, qui  
incisariis proximi sunt, suntque utrius-  
que maxillæ duo, basin habent amplam,  
& radicem longam, in fine autem a  
gingivis remoto, acuti sunt, ut si quid  
propter duritiem, ab incisariis non præ-  
scinderetur, hoc illi confringerent: ipsis  
hoc nomen inditum est, quod exsertis  
canum, qui hos multos, habent denti-  
bus correspondent, vulgo etiam dicun-  
tur oculares, quod evulsi oculis mole-  
stiam creant, de cujus rei causa vulgo  
disceptatur. Alii arbitrantur, quod ad  
orbitam oculorum radice sua maxima  
pertingant, cum tamen vix infirmam  
alarum nasi partem tangant. Alii dicunt  
ærvum ex orbita oculi inferiore, qui  
per foramen maxillæ egreditur, ad di-  
ctos dentes portione quadam propaga-

ri, quæ sententia videtur probabilior;  
sed quoniam dentes canini maxillæ in-  
ferioris portionem istius nervi non ad-  
mittunt, ideo nec dici possunt oculares.  
Post hos maxillares seu molares quinque  
ab utroque latere habentur ampliores,  
asperiores & lata, ac inequali basi con-  
spectiores, ut eo melius omnia asperi-  
tate sua conterere queant in lævorem  
exactum, quæ ab incisariis incisa, & a  
caninis diffracta fuerant. Interdum in  
utroque latere quinque molares occur-  
runt, interdum quatuor: nonnunquam  
quatuor a sinistris, quinque vero a dex-  
tris: vel contra in sinistris quinque, ex  
dextris quatuor: vel infra quatuor, su-  
pra autem quinque, quam differentiam  
potissimum pariunt postremi dentes,  
quos plerique genuinos vocant, etiam  
si Cicero ita molares vocaverit. Sunt  
autem illi, qui primum post puberta-  
tem, venerisque usum, hominibus cum  
maximis subinde cruciatibus prodeunt:  
id quod Medici parum observantes, aut  
alios dentes evellunt, aut humorum vi-  
tio eos infestari sibi persuadentes, ægros  
captatoriis, atque id genus aliis phar-  
macis obruunt; cum dolore affectis nul-  
lum, levi gingivarum ad postremum  
dentem scarificatione, ac interdum ossis  
pertusione, præsentius remedium adfer-  
ri possit, id quod ipse etiam expertus  
sum, cui trigesimus secundus dens æta-  
tis meæ vigesimo sexto anno succrevit.  
Hactenus verba VESALII, de corp. hum.  
fabrica l. 1 p. 34. Quoad colorem den-  
tium, is quo candidior eo melior est,  
& sanitatis dentium certius indicium;  
impediunt vero candorem illum negli-  
gentia, senectus & morbus, vid. BAR-  
THOLINUS anat. p. 729. cui adstipu-  
latur VERHEYEN in anat. p. 6. & 225.  
inquiens: colorem flavum & nigrum,  
non, nisi præter naturam, & ordinarie  
per corruptionem accedere. In juven-  
te vero usque ad annum circiter trigesi-  
mum dentes albissimi sunt, & deinde  
tendere solent nonnihil ad flavedinem,  
quæ cum majore ætate intenditur, red-  
diturque color albus obscurior, eo ta-  
men nunquam, nisi præternaturaliter  
spoliantur.



spoliantur & ætates dentium secundum colores HELMONTIUS distinguere docet. Variat tamen hic color etiam ratione climatum, hinc australes dentes nitidiores habent borealibus, Æthiopum & Ægyptiorum candor & ob aeris benignitatem, & nili sanitatem, cæteris palmam præripit, quod idem HELMONTIUS animadvertit, nec non PETRUS JOHANNES FABER. ac PROSPER ALPINUS de Medicina Ægyptiorum ita scribens: *Ægyptiorum dentes juventutem suam servant & vigorem, nec cariem sentiunt, nec dolorem.*

8. Dentes ad unum omnes maxillarum finibus, quos alveolos, fossulas & præsepiola vocant, cuneorum seu clavorum in modum, beneficio articulationis, γυνώσκουσιν dictæ firmissime infiguntur, ut nequaquam in duriorum ciborum comminutione vacillent aut commoveantur. Cæterum dentes omnes non paribus collocantur in maxillarum alveolis radicibus, incisarii singulis immittuntur, canini quoque habent singulas, quæ incisiorum radicibus multo altius inferuntur: tantoque majores sunt, quantum caninorum robur excedit, unde & inter incisarios duo medii altioribus hærent radicibus, quoniam latiores grandioresque sunt, quam duo laterales caninis proximi. Molares radicibus inter se variant; superiores, maxime posteriores duo ternis subinde infiguntur, inferiores autem duabus præditi sunt, partim quoniam substantia maxillæ superioris mollior & rarior est, quam inferioris, unde duabus radicibus tam firmiter inhærere non possunt, partim quod inferiores gravitate sua incumbant in radices, contra ac superiores, qui penduli sunt, adeoque pluribus indigent vinculis. Reliqui molares superiores canino denti succedentes duas radices, inferiores autem unam saltem habent. Cæterum non prætereundum est puerorum dentes imperfectis & mollibus, & quasi medullosis constare radicibus, unde vacillantes, & præcipue incisarii unguibus, aut filo denti circumdato eximi possunt. Illud autem

adhuc porro observationem meretur, radices dentium ligamentis membranaceis, nerveis interius omnes cinctas esse, quibus dentes oculis suis firmiter affinguntur, externe autem firmiter ambit ac unit dentes gingivalis substantia, quæ caro est dura, ex fibrosis lamellis juxta se positis conflata, infinitis vasculis sanguineis intertexta, unde etiam rubedine intensa fulget. Præterea copiosis membranulis, glandulis atque nervorum ramis scatet, unde sensibilis est, & subinde humiditate irrigata observatur, hæc caro instar valli dentes cingit, & instar musculorum ipsos roborat, unde gingivali carne vel exesa, vel nimis relaxata aut flaccida reddita, dentes facillime excidunt & vacillant. Membrana autem illa, quæ radices dentium & illorum partem, quæ obvelata est, investit, bene monente CLOPTON HAVERS in osteolog. non est continuatio perioestii maxillaris, sed potius ea propagatur, quæ gingivas contingit, ac universo ori communis est, & revera glandulosa, quæque non cum gingivis terminatur, sed quam primum ad extremas earum oras pervenit, intorquetur, & intra alterum gingivæ & dentis latus reflectitur, ossea vero in alveolum descendit, & immediate illis dentium partibus adhæret, quæ in alveolis situantur. Nonnullorum dentium radicibus in specie in maxilla superiore, una cum hac membrana aliquid duræ & carneæ gingivarum substantiæ communicatur, per quam dentes eo firmitus in loculamentis suis affixi & annexi sunt. Et quamvis dentes ipsi de communi perioestio haud participant, alveoli tamen eo gaudent, & cum ipsa membrana, quæ dentes tegit, coalescit, ut unam quasi constituere videatur.

9. Postremo de usu dentium pauca adhuc monenda esse arbitror. Diximus in definitione, non tantum ad masticationem ciborum sed etiam ad vocis expressionem ipsos conducere. Primarius autem usus est masticatio, seu ciborum solidorum incisio, fractio & comminutio, ad quam omnes dentes requiruntur, qua-



quapropter omni tempore dentium magna fuit æstimatio. Egregie MOEBIUS in *fundament. med. cap. 9.* ostendit, quod non solum Deus in lege Motaica servum, cui dominus dentes effregisset, manu mittendum mandaverit, sed & veteres plumbeum odontagagon in Apollinis templo suspenderint, ne eos evellerent posteri, nisi cariosos & summe mobiles, plumbeoque instrumento cessuros. Turcæ itidem, MENAVIO scriptore ITALO *lib. 3. cap. 22.* referente, non, nisi impetrata regis licentia, dentes extrahere ausi fuerunt. Secundarius usus est vocis articulatio, dum valli instar linguæ acrique refluenti objiciuntur, hinc infantes, dum dentes non habent, vagitum edunt, qui duos aut tres mustitant, qui plures distinctius loquuntur, imo qui aliquot amiserunt, vocis læsionem incurrunt, *vid. LINDANUS in physiol.* Præter duplicem hunc usum etiam ad ornatum faciunt, nam ingrata est facies, cui gelatinus abest, quare & incolæ occidentalis Indiæ stulte agunt, qui ornatus gratia anteriores dentes sibi evelli curant. Videatur ea de re HIERONYMUS BENZO *de rebus indicis.* Deformes etiam habentur, qui nigricantes & cariosos habent.

10. Postquam hætenus, ut arbitror, satis copiose & enucleate dentium statum secundum naturam consideravimus, quali gaudeant substantia, qua ratione generentur, quomodo & quibus viis nutriantur, unde suum habeant sensum, quomodo alveolis suis firmissime inclusi ac connexi sint, promptum ac facile jam erit, illorum læsiones morbosas, statumque præternaturalem perspicere & illius varias causas tam mediatas, quam immediatas eruere.

11. Quoniam autem dentium pathologiam specialius perlustrare animus est, consultum fore arbitror, omnes dentium affectus dispefcere in eos, quibus dolor jungitur, & qui dolore vacui sunt, nec non in illos, qui ex vitiata nutritione, vel ex nervorum aut ligamentorum, & gingivæ, quæ juxta dentes est, debilitate aut vitio oriuntur. Primum

autem occurrit communissimum illud dentium vitium, ratione ipsorum substantiæ, nempe caries aut exesio, quam non tantum sæpius gravis dolor, mutilatio, sed & fœtor putredinosus, verminosa progenies, & fistularum generatio subsequitur. Originem suam habet caries a causa potissimum interna, dum mucus iste gelatinosus, qui dentium cavitatem replet, ob lympham impuram scorbuticam, acredine & falsugine quadam erodente imbuatur, unde non secus ac caro ex lymphâ falsa impura nutriente destruitur, corroditur, in ulcuscula abit, dens quoque ob vitiosum nutrimentum emolitur, corroditur ac successive destruitur. Quod autem non singuli dentes a lymphâ tota corrupta illud vitium patiantur, ratio hæc esse videtur, quod singularis debilitas vasorum, quibus dens constat, aut dispositio ab externa causa accedat necesse est. Inchoat enim plerumque caries dentis ab extra per parvum quoddam nigricans punctulum seu foraminulum, præsertim in maxillaribus, qui latiores sunt, & in medio successu temporis substantia corticali absunta cavitates quasdam acquirunt quibus adhærentes ciborum reliquiæ mora acriores redditæ, motu putredinoso intestino facillime ossæam dentium substantiam excavare atque dissolvere aptæ sunt: simulac autem in parte quasi vacuum quoddam spatium factum est, protinus ad illud invitatur major humidi ab intra influxus atque accessus, & ita successive totus ferme dens consumitur, ut frustulatim excidat, id quod mutilatio dicitur; accidit autem hæc anterioribus dentibus absque prævia excavatione, sed cuniculi carioli exitum non invenientes librorum, latera eorum statim diffidunt.

12. Quando sanies carioli dentis per angustum foraminulum libere satis effluere nequit, & versus radices inferius agit ipsosque alveolos & maxillam aggreditur, oritur fistula, quamvis etiam ipsa non semper ex dente cariolo originem ducat, sed sæpius etiam in maxilla incipiat, in ipsoque dente terminetur, & illum



illum demum reddat cariosum. Historiam talem fistulæ ZWINGERUS in *M. N.C. Dec. II. an. VII. obs.* 233. refert, ubi ex dente carioso fistula, & ex fistula iterum plures dentes cariosi facti sunt; potest etiam hanc in rem legi *disputatio Argentoratensis de genæ fistula, in dentem cariosum terminata*. Excavatis dentibus foetor supervenit teterrimus, isque ex sanie dentis cariosi cadaverosa, quæ ex ciborum reliquiis in cavitatem putredinem suscipientibus oritur: sanies enim dentis salino-sulphurea motu intestino vehementi instructa agit in ipsas ciborum reliquias intimam unionem partium dissolvendo, ex quibus constat, unde putredo, quæ nihil aliud est, quam dissolutio elementorum corpus constituentium, mediante motu intestino vehementiori, exsurgit, cujus perpetuus ac individuus comes est ipse foetor, qui ex successione & evaporatione particularum tenuissimarum salino sulphurearum producitur. Sub putredine tali foetida dentis conspicitur sæpius verminosa progenies: nihil enim magis facit ad generationem vermium, quam motus intestinalis putredinosus, utpote qui seminia verminosa actuat, vivificat atque expansiva virtute sua brevi tempore ipsa infecta excludit, multumque illa nutrit. Nolumus jam hanc litem decernere, an infecta talismodi verminosa semper supponant seminium quoddam, an vero juxta veterum æquivocam generationem ex disposita quadam materia mediante motu intestino putredinoso saltem produci queant; placet tamen in illustrationem hujus rei memorabiles duas adjicere observationes. Retulit nempe nobis ante aliquot annos *Professor Lipsiensium*, reparatum quondam fuisse in collegio principum majori hypocauftum quoddam, & vermem insignis longitudinis & crassitie in trabe tegumentum hypocaufti sustinente cariosa facta reperi- tum, qui figuræ monstruosissimæ, dimidiam trabis longitudinem fere adæquavit. Altera ibidem annotata fuit. Ovum quoddam rubrica tinctorum infectum integrum, nec ullam fissuram ostendens, per totam æstatem linteis involutum &

superstratum in scatula asservatum est. Accidit autem, ut linteis opus habens scatulam aperiret, quo facto, magna formicarum ad instar, alatorum vermiculorum quantitas evolabat, acidissimo interim odore omnibus linteis imprægnans; tandem ovo conspecto, in basi aperturam offendit, ex qua animalcula dicta egrediebantur; diffracto demum ovo, vermiculos caseosis illis non dissimiles, alatis nigris succedentes, ac in albumine nidulantes, (de vitello autem nihil amplius apparebat,) in conspectum veniebant. Quemadmodum autem nulla pars humani corporis est, in qua non vermes generari possint, uti observationes in *FORESTO lib. XIV. p. 330.* aliisque testantur, ita non video, cur in dubium vocandum sit, in dentibus illos non progigni, cum quotidie cibis vescamur, qui verminoso inquinati sunt seminio: confirmat id quoque ipsa experientia, cum ex ipsis dentibus evulsis, cariosis, diffractis vermiculi extracti fuerunt, quam in rem evolvi possunt *SGHULZIUS & PECHLINUS, M.N.C. Dec. I. an. IX. X. p. 433.* *HOLLERIUS, in perioche ad lib. V. Galenus de compos. med.*, *JOHANNES AGRICOLA in not. ad Job. Popp. de tartaro*, *SALMUTHIUS obs. med.* Confer præterea *FORESTUM pag. 399.* *SCHENKIUM & ETTMULLERUM in prax. p. 66. a et b. it. p. 822.*

13. Ex vitioso nutrimento, quod non tam dentium, quam gingivarum est, perficitur quoque generatio lithodonti seu lapidis dentalis, tartari dentium vulgo dicti. *HELMONTIUS* gingivas ipsis dentibus nutrimentum suppeditare putat, quod si in excrementum vertitur, & ex læsis gingivis emittitur, circa dentes ipsum indurescere, cum jam tum aliqualem susceperit determinationem sive potentiam dentalis duritie. Nostra sententia hæc est, tartarum dentibus adhærentem, productum esse partim saliva terrestribus, tartareis & viscosis partibus stipata, partim etiam lymphæ gingivali impura tartarea, quæ subinde dentes humectando, successive ipsis viscosas tartareas partes apponit: hic tartarus propter acedinem suam paulatim ipsam dentium substantiam consu-



consumit, & nigredinem, quæ propter poros copiosiores inductos lucem suffocantes oritur, ipsam cariem inducit. Cæterum hic dentalis lapis, spiritus salis affricu in momento resolvitur ac abstergitur, indicio, terra alcalina ipsum constare. Solet hic affectus familiarissimus esse infantibus, qui lacticiis viscosis & saccharatis vescuntur, item scorbuticis, arthriticis, nephriticis, hypochondriacis, non aliam ob rationem, quam quod illorum serum scateat impuris terrestribus tartareis copiosis partibus, quocirca ex hisce concludendum esse existimo, inspectionem gingivarum merito commendandam esse Medicis, quoniam harum status feri ac lymphæ statum nobis indicat luculentissime.

14. Accedimus jam ad illos dentium affectus, qui ex vitio ac imbecillitate nervorum nascuntur, & primum occurrit dolor, qui interdum crudelissimus percipitur in tota dentis substantia, imo in gingivis & vicinis partibus, tota sæpius maxilla. Membranam enim licet tenuem, exquisitissimi tamen sensus per cavitationem dentium dispersam esse, nec non nerveam tunicam, ipsas gingivas, alveolos, & radices immediate cingere, ex physiologicis sufficienter notum est; quando itaque ipsa sanies cariosi dentis fibrillas membranaceas in medulla dentis contentas aggreditur, dolor excitatur truculentus. Unde experientia quotidiana comprehendimus, raro excitari odontalgiam, nisi dentes existant cariosi. Defluxio enim quæ e capitis vertice per tempora in maxillas ruit, dentem, qui exelus est, in eum maxime insilit. Interdum etiam dentibus salvis ac integris dolor se manifestat una cum rubore, tumore, pulsatione arteriolarum, facie rubicunda, perpetuo salivæ stillicidio, calore præternaturali & febriculosa quadam sanguinis commotione, assiduaque vigilia, quæ cuncta symptomata arthritidem quasi dentium & partium vicinarum inflammationem patefaciunt. Invadit sæpius hic affectus plethoricos, scorbuticos, & quibus solennis evacuatio sanguinea, in foeminis per menses, in viris per hæmor-

rhoides aut per omissionem venæsectionis cohibita & suppressa fuerit, hinc gravidæ ob statum plethoricum, cui caco-chymia sæpius se associat, valde obnoxie sunt huic affectui. Fit nimirum a decubitu feri acris circa radices, gingivas ac membranas dentium stagnantis, quandoque cum affectu erysipelaceo, qui cutem externam faciei & substratos musculos, & glandulas parotites infestat, jungitur odontalgia, & spasmodica partium constrictione ipsos dentium nervos in consensum trahit. Cæterum notissima veterum distinctio est odontalgie a causa calida vel frigida, quæ etiam sano sensu potest admitti: calida dicitur, quæ cum fervore ac æstu in sanguineis, plethoricis, cholericis, ætate existente juvenili vel virili, cum symptomatum ac febris vehementia invadit, facie rubicunda, & vasorum intumescencia. Ex causa dicitur frigida, si corpora cachectica, subiecta serosa, senes, foeminas adoritur & cum facie pallida, pulsus debilitate, tumore œdematoso jungitur: & notandum in genere est, quando odontalgia proficiscitur ex causa calida, acerbiores, breviores tamen existere dolores, quando ex humore frigido, remissiores, aut diuturniores fieri. Secundo loco attentione dignum est, odontalgiam, quæ cariem dentis pro causa agnoscit, magis esse continuam, ita tamen, ut occasione multiplici externa & interna excitetur & exacerbetur, quæ autem est inflammatoria, & a decubitu feri visceris acris suboritur ac arthriticis, rheumaticis, hypochondriacis, plethoricis, & qui consuetas narium hæmorrhagias non patiuntur, familiaris est, cum febriculoso horrore, capitis gravitate, corporis lassitudine, faciei distensione per periodos invadere solet, & certo quoque tempore finitur. Simile quid hic affectus, ratione invasionis, ratione causarum, symptomatum, & curationis habet cum erysipelate, arthritide, podagra, rheumatismo; adest nimirum in hisce omnibus inflammatoria feri vel sanguinis congestio cum spasmodico dolore, tumore, rubore, ardore, pulsatione conjuncta, quæ debitam dissipat-



diffipationem & resolutionem requirit.

15. Neque hoc loco silentio prætereundus est ille dolor, qui a pruritione dentium suscitatur in infantibus ac pueris, præsertim quando canini, qui præ reliquis satis duri ac acuti sunt, gingivalem carnem pervadere nituntur. Profecto enim longe majori cruciatu atque molestia hi prodeunt, quoniam acutius gingivas afficiunt, quam molares majores & obstrusiores. Unica doloris causa est perruptio, lacinatio & irritatio gingivalis carnis, quæ ex variis fibris, nervis ac membranis contexta est, unde ex hac irritatione exsuscitatur dolor, ex dolore dein, qui semper cum spasmo & impetuoso spirituum animalium per systema nervosum commotione junctus est, proficiscuntur atrocia dentientibus supervenire solita symptomata, quæ recenset divinus *Senex Sect. 3. Aphor. 25.* inquit: *cum dentire cœperint, gingivarum molesti pruritus, febres, convulsiones, diarrhææ oriuntur, maximeque cum edunt caninos dentes, & qui inter pueros crassissimi sunt, alvoque adstricta.* Quibustantum frequentioribus junguntur etiam vigilæ, vomitiones, salivatio crebra, asthma, tussis. Et ordinario adest major horum symptomatum imo convulsionum truculentia, quo major ad eas diathesis ex utero materno, nutrice morbosa aut prægnante, lacte in ventriculo coagulato, aut in putrilaginem acidam aut amurcam degenerante, pultibus ferventibus, aeris frigidi admissione, capitis aliarumque partium ulceribus aut exanthematibus subito evanescentibus, lumbricorum in intestinis præsentia, accedit. Plura hac de re legi possunt in *WILLISIO lib. de morbis convulsionis pag. 54. & 58.*

16. Transitum jam facimus ad illos affectus, qui ex vitio nervorum, illorum nempe resolutione ac ligamentorum laxitate dependent, & primus dicitur vacillatio: vacillant autem dentes ob duplicem rationem vel vitio dentis proprio vel ratione gingivarum; ratione prioris causa vacillationis proxima est vinculorum seu ligamentorum laxitas,

flacciditas, corrosio & ruptio, Ratione posterioris vero sunt vel gingivæ in toto resolutæ, vel in unitate solutæ, idque vel in simplici cruentatione, vel in putrida simul.

17. Ligamenta laxantur & flaccescunt narcoticorum & opiatorum ope, unguento hyoscyamialiisque, quale exemplum *M. N. C. Dec. 11. an. 2. pag. 273.* supeditant, 2. a violentia externa, casu, ictu, rerum durarum obviatione, alaparum inflictione &c. idque periculosius in anterioribus, quippe qui ob radicem simplicem facile vacillant, incisores imprimis parum profunde inhærent, vid. *anatomici & FORESTUS lib. XIV. obs. 12.* ad quam violentiam externam & rerum durarum mordicatio pertinet, imprimis si nucleos ceraforum, prunorum dentibus diffringere quis studeat. 3. a convulsionibus laxatur e. g. in stridore & collisionibus dentium quod infantibus familiare, de quo *FORESTUS p. 405.* in collisione inprimis, 4. Ob defectum nutrimenti in convalescentibus, interdum & in senibus, confer etiam *FORESTUM p. 413.* Ligamenta seu fibrosi illi hamuli porro corroduntur & mortificantur ab acri corrosivo quocunque, sive sit tartarus & caries, sive scorbutica affectio, sive mercurii reliquæ. Sic *EUSTACHIUS de dentibus* non semel ex defluxionibus, quibus dentes obnoxii, in præsepiolis tantam materiæ gypseæ, quam *ETMULLERUS in praxi p. 68.* pro topi dentalis uberiori incremento habet, copiam coacervatam invenit, quæ vincula laxarit, ac tandem ipsos dentes extruserit, quem in *SCHENKII* observationibus allegatum vide. In scorbuto vero acre peregrinum ex gingivis corrosis ad dentis radices & ligamenta elabens eandem corrosionem inducit. Mercurius firmitati dentium insensissimus est, ubicunque enim poros invenit, (invenit autem ob tenuitatem etiam in subtilissimis) ibi se insinuat, & corrodere incipit, nervis imprimis ac ligamenti infestus: huc facit *BOYLEI* observatio, *tract. de poris cap. VII.* qui mercurii guttulam in dentis alveolo invenit



venit ab inunctione mercuriali reliquam, quæ & dentis elapsi causa fuit; eundem effectum aquæ cosmeticæ mercurio imprægnatæ sæpissime producant, de quo **FORESTUS & ETTMULLERUS** plura habent. Tandem violentia externa ligamenta etiam rumpuntur, si non omnia, saltem plurima, ut leviter saltem adhuc alveolis dens adæreat, idque vel per dentiducis extractionem, vel per ictum, vel per excussionem, aut per casum. Gingivas quod attinet, illæ in tono suo plerumque resolvuntur vel odontalgis cessantibus; propterea, quod inflammatæ antea intumuerant; nam omnis caro inflammata postmodum flaccescit, vel a salivatione cessante, gingivis antea non ruptis, sed rarefcentibus saltem. Unitas earum soluta in simplici saltem cruentatione fit, si saliva acri caractere infecta, sive simplici sive scorbutico, gingivarum carnem in spongiositatem ac tumorem attollit, unde modo leviter tactæ rumpuntur & sanguinem fundunt. Jam longe facilius erit de dentium casu & defectu differere: dicitur autem casus, quando vel vacillatione vel vi externa excidit dens. Defectus est, quando propter ætatem prioribus novi non subcrescunt.

18. Devolvimur jam ad stuporem dentium, qui peculiare quasi quoddam doloris genus est, quando nimirum membrana dentes investiens sensu quodammodo privatur. Causa petenda est maxime ab acido austero assumpto, vel etiam per vomitum rejecto, unde hypochondriacis ex acido & austero laborantibus hic affectus valde familiaris est, vid. *M. N. C. Dec. II. an. VII. p. 142.* Quo de morbo etiam legi meretur **FORESTUS lib. XIV. obs. IX. pag. 406.** Superest stridor dentium seu eorundem crebrior collisio: est peculiare convulsionis genus a spasmo reciproco musculorum in genis adductioni & adductioni mutua opera inservientium, qui aliquali convulsivo motu affecti, stridorem talem inferunt. Causæ sunt, quæcunque ad convulsiones aliquid conferre possunt e. g. frigus intentissimum, dolores

ex vermibus, ex dentitione difficili, suppressio catameniorum, circa quam consuli possunt **ETTMULLERUS in Praxi pag. 70.** & **FORESTUS obs. IX. pag. 460.** Hæc circa dentium pathologiam hoc loco sufficiant.

19. Postquam diversos in superioribus consideravimus dentium affectus, illorumque causas exposuimus, restat jam, ut singulis seorsim convenienti medendi via & remediis ad causas tollendas potentibus aptissimisque occurramus. Primum autem in considerationem merito venit ipsa dentis caries, sive ejus destructio ac corruptio faniosa, ubi illud notandum, cariem seu corruptionem & mortificationem dentis nec ulla arte vel remedio reparari posse. Quod enim corruptum & mortuum est, uti videmus in sphacelo, illud ad integritatem & vitam minime potest revocari; nam quod sphacelosa putredo & corruptela est in carne, illud caries est in ossibus. Interim tamen eo ellaborandum est ne illud malum quod in principio sæpenumero leve & exiguum est ulterius serpat & vires acquirendo, totum dentem destructione afficiat. Si enim semel inceperit caries in dente, propter putredinem, quæ subinde sese multiplicat, & continuo partem rapidissimo suo motu inficit, maxime si aeris ceu fluidi gravis penetrantissimi, vehementissimi, vehementi in motu intestino existentis liber fuerit accessus, non desistit, donec totum os consumserit; quinimo observamus, quod caries, dente uno consumto, etiam alterum vicinum adoriatur & simili labe afficiat, huic itaque corruptioni ponenda sunt obstacula. Ea autem omnia, quæ alias cariei ossium magno cum effectû opponi solent, qualia sunt euphorbium, camphora, oleum cochleariæ, caryophyllorum hoc loco insufficientia deprehendo; hanc potissimum ob rationem, quoniam partim commode non applicantur, partim etiam accessione ciborum & continuæ salivæ virtute sua imminuntur. Illud unicum expertissimum pro conservatione dentis qui jam excavatus & carie tactus fuit depre-



deprehendi remedium, nimirum curavi parari ex plumbo massulas & molleculas, quæ exactissime cavitati dentis respondebant illasque decenti applicatione intrusi: ita ad multos annos dens servatus fuit integer, quod felicissimi effectus esse sum expertus; impeditur nimirum hac ratione, ne reliquæ ciborum intrantes dentis cavitatem in putrilaginem abeant foetidissimam, quæ non tantum ulterius depascit osseam dentis substantiam, verum etiam male olente odore totum palatum imbuunt. Addimus etiam, quod plumbum saniem istam cadaverosam, acidam, acrem substantia sua alcalina temperet, corrigat, immutet, uno verbo: fermentum sic dictum ulcerosum penitus destruat, nec non ulterius aeris liberum aditum præpediat.

20. Notissimum in foro medico est, nullos gravioribus conflictari doloribus dentium, quam qui dentes exesos & excavatos alunt; in illos enim, cum via jam pateat, fluxio feri acris magis insilit & irritando membranam nerveam, quæ cavitatem dentis interiorē investit, crudeles dolores efficit. Ut itaque talismodi dens cariosus nunquam amplius dolore afficiatur, optimum arcanum hoc est; applicetur nempe cauterium actuale, & hujus beneficio comburatur membrana interior nervea, per quam sentit dens. Accidit hæc operatio sine ullo dolore & citra ullum periculum: quod non tantum me ipso, sed & in compluribus individuis illud tentasse testor, instrumento singulari hunc in finem elaborato, aulpicatissimo semper cum effectu, cavitati postmodum dentis intrudenda est massa, ut antea dictum fuit, plumbea. **FORESTUS** lib. XIV. p. 410. actuale cauterium applicat per cannulam, & dentes vicinos cera vel re simili munit. Instrumentum huic fini aptum communicat **SCULTETUS** in *armament. chirurg. appendice* p. 5. In genere hic tenendum, actuale cauterium potentialibus, cuiusmodi sunt oleum vitrioli, aqua fortis, caput mortuum vitrioli, longe præferendum esse, hæc enim simul destruunt dentium texturam & fauces lædunt, illud

*Opusc. Patb.*

autem humiditatem dentis nimiam exsiccando, & simul fermentum, ut vocant extinguendo, juvat, adeoque ex duplici effectu merito laudatissimum est.

21. Accedimus jam dentis extractionem, circa quam etiam nonnulla merentur animadverti: asserimus autem dentium extractionem aliquando non juvare vel necessariam non esse, quandoque periculosam esse, interdum autem summe necessariam. Non juvat, quando inflammatio & exulceratio, non tantum dentem & gingivam, sed totam viciniam, ob congestionem impurorum ex corpore humorum ibi factam, occupat: quando enim nullum in dente vitium est manifestum, tunc dolor minime tollitur dentis extractione. Non necessaria etiam est in odontalgia ex dente carioso, quoniam, uti supra innuimus, dens servari & caries ulterior nec non dolor dentis ex carie generatus, præcaveri potest debita cauterii actualis applicatione. Periculosa est in extractione dentium caninorum, qui satis longam ac latam radicem habent, cui implantatur portio nervi, qui ex foramine orbitæ prodit, unde facile dolor acutus vel inflammatorius oculorum, & cephalalgia excitari potest. Confirmat id quoque observatio notabilis **HIGHMORI** in *disquisit. anat. c. 2. p. 1.* Larga quoque hæmorrhagia ab extractione dentium, qui altius insident alveolis, præcipue in plethoricis, mensibus instantibus, scorbuticis, febre ardente laborantibus obvenire potest, quæ etiam mortem post se trahit. Exemplum videri possunt apud **HIGHMORUM**, **HOLLERIUM**, *comment. in sect. 2. lib. 2. apb. 18.* **PLATERUM** & **ROUSSETUM** lib. de *hom. primordis, & hysteriis adfectibus*. Cavendum quoque est, ne dens eo tempore evellatur, quo caput dolet & congestio nimia sanguinis est ad caput, aut crudelis dolor urget: quia tunc cum omnia irritata sunt, atrociora symptomata creantur. Plures cautelas circa evulsionem observandas tradit **RIVERIUS** *prax med. L. VI. c. 1.* Si hæmorrhagia enormis fit a dente evulso, caput mortuum vitrioli admoveere oportet. Periculosa idem

F

tidem



tidem est extractio, præcipue dentium molarium, præsertim in maxilla superiori existentium duorum, nempe penultimi & succedentis tertii, non tantum quod ternis subinde infigantur radicibus, adeoque major læsio carnis gingivalis metuenda sit, sed maxime, quod maxillæ os simul facillime dilacerari possit. In hujus rei illustrationem sequens historia plurimum faciet. Accessit ad me ante aliquod tempus generosissima scæmina, quæ conquerebatur de fistula existente in maxilla superiori, in illa parte, ubi penultimus dens, qui extractus erat ante annum ob doloris atrocitatem, positus erat, ab hoc tempore statim, dicebat ægra, non consolidatam se observasse cavitationem, & ex hac perpetuum materiæ serosæ effluxum in os habuisse. Admittebat hæc cavitas stylum tres transversos pollices longum; & quando applicandum fuit huic cavitati pro fine consolidandi balsamum Peruvianum, vel aliud remedium penetrantis odoris, sensit illud ipsum ægra in naribus efficacissime, quasi illud ab extranaribus fuerit immissum: observavit porro, quando nares non bene fluebant, accumulari & incrementum sumere effusionem materiæ serosæ per illam ipsam notatam cavitationem, & vice versa, quando dicto in loco non bene profluebat mucosa materia, in naribus excretio fuit adaucta. In consilium vocavit celebres & peritissimos multorum locorum medicos & professores, nec non chirurgos expertissimos, qui unanimi ferme ore dixerunt esse fistulam, in cujus sanationem ordinarunt usum thermarum, decoctorum exsiccantium ex lignis & radicibus confectorum, nec non purgantia. Usi quoque fuerunt externis balsamicis, traumaticis, constringentibus, sed sine omni effectu. Chirurghi incisione curandam esse putarunt, sed quomodo hanc celebrare potuissent, lubentissime voluissim edoceri. Hæc omnia cum mihi narraret & a me peteret auxilium, statim edixi non esse fistulam, sed per violentam extractionem læsam fuisse maxillam superiorem & insignem illum sinum seu cavernam aut antrum accurate a Cl. HIGHMORO

l. c. descriptum, (quod pituitaria satis valida tunica pro mucæ secretionem instruitum est, & in ipsas nares exitum suum habet,) apertum fuisse. Et hoc ipsa generosa scæmina confirmat cum ediceret, radici dentis extracti adhæsisse materiam solidam, satis copiosam & pumicosam, statim in capite sceleti ipsi ægrotanti monstravi, quam tenuis sit, circa illum sinum in fine, ubi radix inferitur, substantia alvearis penultimi dentis, & qua ratione hac læsa stylus possit admitti usque ad orbitam oculi, item, quomodo in nares terminetur. Itaque impossibilem esse sanationem plenariam judicavi præcipue in scæmina ad senectutem inclinante, nec ullam chirurgicam operationem, aut ullam medicinam internam locum habere posse, sed jussi tantum, ut cavitas illa plumbo occludatur, ne aer libere accedens ad sinum illum, majorem putredinem ac corruptionem efficeret. Ceterum usum balsami vitæ, ut ipsum attrahat naribus commendavi, quibus remediis etiam optime se habet.

22. Necessaria autem extractio dentis est in fistulis, si illæ extumore inflammatorio gingivarum & maxillæ rupto dentem cariosum efficientem, si ex dente carioso & putrido, non mature exempto ortum suum habeant, cum in finem, ut saniosæ materiæ præbeatur exitus. Legi meretur hac de re FORESTUS lib. XIV. p. 394. Etenim necesse est, ut materia hac ratione exitum inveniat; quæ alias a stasi majorem acrimoniam & erodendi vim concipit. Accidit sæpius, ut cum dente simul evellatur callus, & sanguinis profluvius ex fistula subsequatur, unde felix subsequitur curatio, qua de cura videri potest SENNERTUS, lib. 2. prax. part. 1. c. X. MARC. AUREL. SEVERINUS chirurg. efficaci part. 2. c. I. 120. GUIDON. de CAULICO, it. FORESTUS, qui aliquot historias curatarum fistularum una cum cautelis præstantissimis consignavit, duas nimirum describit gingivarum fistulas ex dente carioso Lib. 14. obs. 17. unam ex gingivarum inflammatione dentes cariosos reddente, libro eodem; obs. 15. unam quoque partis externæ, ita



ita ut in barbam virus manaret, *obs.* 7.

23. Quando dentes cariosi ac putridi vermibus præbent hospitium, dolor subinde pruriginosus, arrodens, cum nulla aut pauca salivatione observatur, notante id doctissimo FORESTO in *observationibus lib. XIV. p. 339.* Odontalgia ex vermibus orta difficulter sanescit, & ægre domari potest; spernere enim solet omnia specifica alioquin odontalgica: accersenda itaque talia sunt, quæ singulariter verminosæ progeniei adversantur, quem in finem laudatus FORESTUS l. c. decoctum colocynthidis, pilulas ex aloe & myrrha, item pulverem contra vermes commendat. Quidam fumum hyoscyami ad eliciendos vermes laudant, sed noxas huius suffitus deducit egregie HAGEN-DORNIUS, in *hist. med. p. 395.* tutior est fumus sabinæ. CLAUDERUS in *M. N. C. Dec. II. an. 5. p. 304.* evulsionem dentis suadet, at vero nunquam ad extremum hoc præsidium est refugiendum, nisi durissima adsit necessitas. Ceterum tartarea & tephacea materia, quæ scorbuti & lymphæ impuræ soboles est, & subinde dentibus firmissime cohæret, non melius tolli & amoveri potest, quam operatione chirurgica, per certa instrumenta ex chalybe, hunc in finem affabre confecta. Etenim abstergendus & abradendus tartarus ille est, ne cariem, insignem fetorem, abominabilem nigredinem & vermes producat; si levius saltem adhæret, pulvis ex osse sepiæ, cornu cervi uto, testis ovorum calcinatis, tartaro vitriolato, iride florent: & moscho paratus, ad dentium dealbationem, & a tartaro corrosivo purgationem commendari mereatur. Ita etiam spiritus vitrioli, cum syrupo cochleariæ & violarum subactus medicina non spernenda est, ad tartarum mucosum a dentibus auferendum; prudenter tamen adhibeatur, ne ipsa ossea substantia simul in corruptionem beat.

24. Accedimus jam ad dolorem inflammatorium, quo maxilla cum dentibus a decubitu sanguinis vel potius feri prioris affici & sæpe graviter solet corripui. Commendamus hoc loco omnia illa,

quæ alias inflammationibus solent opponi, nimirum ante omnia materia ibi hærens per blandam diaphoresin est discutienda, & enormes dolores, qui quandoque febrem, vigilias assiduas, insignes cephalalgias, imo convulsiones producunt, blandis anodynis & nervinis componendi sunt. Quando corpus est plethoricum, vel solennis & consueta evacuatio sanguinis suppressa est, sanguinem educere convenit, sive ex brachio, sive ex lingua, incisus venis raninis. Ita fœminam plethoricam largissima venæsectione in pede a sæva odontalgia statim liberabat THONERUS *cap. XI. obs.* Postea diaphoretica cum anodynis mixta in usum vocentur, qualia sunt diascordium Fracastorii, roob. sambuci, camphora, nitrum, theriaca cœlestis, essentia scordii, aqua Fl. sambuci, tinctura bezoard, mixtura simplex, ess. castorei, anodyna, cinnabaris, quæ sub varia forma adhibenda & subinde continuanda sunt, expectando semper lenem ac moderatam diaphoresin ac discussionem, hæc enim ingravescenti feбри simul obviam eunt. Abstinendum autem merito est a regimine impetuose sudorifero, utpote quod sanguinem vehementer commovendo ardorem, dolorem & symptomata magis adauget, & vires ipsas præmature destruit. Externe ad dissipationem doloris & tumoris convenientissimi sunt sacculi ex speciebus discutientibus & sale volatili oleoso & sulphure evaporabili demulcente constantibus parati, calideque applicati, sunt autem ejusdem generis flores chamomillæ simpl. & roman. sambuci, meliloti, papaveris rhæados herba, card. bened. chærefolii hyssopi hormini, semen anisi, carvi, anathi, baccæ junip. camphora, crocus, succinum, farina fabarum, sal commune, nitrum, quæ omnia potentissima sunt resolventia & discutientia; præterea ab omnibus frigidis tam siccis quam humidis est abstinendum. Dein interne, si dolor atrocissimus est, pilulæ WILDEGANSIÆ & MATTHIÆ, quæ ex opio cen basi, & purgantibus ac diaphoreticis constant, & opium præstantissime correctum exhibent, circa tempus præ-



sertim nocturnum in usum vocari possunt. Ipso in paroxysmo, quando dolorum ferocia urget, spiritum vini camphoratum, vel balsamum vitæ ad guttas aliquot in nares attractum ex tempore & instar incantamenti inducias doloribus facere sæpius observavi, quamvis non continuas; cujus ratio hæc esse videtur, quoniam ramus nervi ad narium membranas pertingens, ex eodem provenit trunco: nimirum ex quinta conjugatione nervus ad dentes fertur. Thus quoque in balsamo nostro vitæ solutum & cum gossypio denti dolenti admotum, item cum aqua Caroli cephalica gingivarum frictio opem adfert præsentissimam. Ad mitigandum vero dolorem clystere nil est præsentius. In statu cacochymico, purgantia, specifica, etiam ex gummatibus, mercurio dulci, sale succini, resina ligni guaiaci, extracto aloes parata, & per epicrasin purgando forma pilularum exhibita, summe erunt proficua.

25. De cætero in deliberationem hoc loco venit, an cauteria vel vesicatoria in odontalgia alicujus sint usus & fructus. Practici non satis deprædicare possunt singularem eorum usum in gravissima odontalgia. Notum est anthelici auris aut musculis temporum affecti lateris applicari hunc in finem cauteria, vid. ZWINGERUS in ephemerid. l. c. obs. 233. Alii moxam circa tempora apponunt, cujus loco clarissimus FRANKIUS fune inflammabili carpto, consilio B. Sereta, præstantissimi medici utitur, vid. M. N. C. Dec. 2. ann. 1. obs. 27. In odontalgia periodica non minus feliciter SPIGELIUS usus est cauterio actuali, quo eam anthelici partem, quæ superiorem tragi immediate contingit, incidere, vulnusque debite consolidare solitus est. Loco cauteriorum potentialium specificè inservire queunt ranunculus nemorosus, raphanus rusticanus & alia. Allii contusi ad cubitum applicatione vesicas excitatas, eisque odontalgiam sedatam M. N. C. Dec. 2. ann. 9. pag. 221. narrant. Ita etiam ranunculi nemorosi JACOBUS WOLFFIUS M. N. C. Dec. 2. ann. 7. pag. 351. meminit, qui cum spi-

ritu vini contusus, brachio lateris affecti, grossi magnitudine in parte carnosæ applicatus, vesica relicta, dolores sedat: plumbaginis seu dentariæ radix contusa & carpo manus imposita per noctem relicta, mane maculam plumbeam relinquit & dentium dolorem dissipat, quod ETTMULLERUS in praxi pag. 824. ceu verum experimentum allegat. Idem ex BARTHOLINO de raphano cubito applicando, aliisque sale volatili acri gaudentibus M. N. C. Dec. 2. anat. 4. pag. 181. 182. tradunt. Linimentum quoque ex octo cantharidibus, tribus allii radicibus & theriaca cum linteolo flexuræ cubiti admovendum enarrant M. N. C. Dec. 2. anat. 5. pag. 335. Alios allii ad hunc finem applicandi modos ex PLATERI observationibus lib. 2. pag. 371. & 375. & Paræi Chirurgia, lib. 16. cap. 25. eadem ephemerides communicarunt. Quantum vero vesicatoria in dolore dentium conferant, testantur observationes in dictis miscellaneis passim occurrentes. Nostra sententia est, non inutiliter nec sine fructu in graviore odontalgia, præsertim si ex sero acri corrosivo, nervum obsidente, oriuntur, dicta remedia applicari posse, partim ut ipsam peccantem materiam foras eiciant, partim etiam, ut motum enormem impetuosum spirituum ex dentium membranis in alium locum derivent. Vesicatoria dicta, nec non nervina antispasmodica & anodyna optimè cum successu pone vel sub aures applicantur, ob hanc rationem, quoniam arteria una cum nervo & vena sub aurem maxillam inferiorem ingreditur, & secundum ejus longitudinem in omnium dentium inferiorum radices disseminatur. Commodissime itaque hoc loco serum acre influens advocatur & divertitur, vel etiam impetuosus spirituum per nervum motus compescitur. Ob eandem rationem firmior compressio pone maxillam inferiorem digitis facta, ipso in doloris dentium paroxysmo dolorum ferociam ex tempore sistere solet. Præterea observamus in praxi, temporibus, item infra orbitam applicata emplastra ex nervinis & antispasmodicis facta, nominatim masti-



massiche, balsamo de peru, extracto castorei, camphora, oleo nucistæ, croco, & in graviore casu, oleo hyosciami expresso, addito simul opio, promptissime & repente auxilium ferre, quoniam ramus nervi ad musculos temporales transiens ejusdem originis est cum nervis, qui ad dentium cavitatem feruntur, & nervus sub orbita statim egreditur in maxilla superiori dentes anteriores.

26. In dentitione seu pruritione dentium difficili, quæ convulsiones, febri- culas & diarrhœas in pusillis infantibus sæpenumero post se trahit; præter interna antepileptica, antispasmodica, præ- cipitantia & maximi hoc in casu æstima- tum usum gelatinæ cornu cervi in potu dissolutæ una cum essentia papaveris rhœ- ados, liquor noster anodynus mineralis ad aliquot guttas frequentius datus om- nibus palmam præripit. *Paræus l. 23. chi- rurg. c. 67.* scalpello gingivas aperire jus- sit antequam lethalia signa superveniant: quod remedium exoptato cum successu aliquot suis liberis, præsentibus *Fen- reo, Altino, Curtino*, Medicis regiis & Guillelmo chirurgo applicavit. Inci- sio potest fieri scalpello non phlebo- tomo. Externe prodest, ipsa illa in parte, ubi dens prorumpere conatur & tumorem, dolorem ac ardorem gignit, ficum per medium dissectam applicare, vel etiam mucilaginem cydoniorum cum vitelli ovorum momento, aqua rosacea & syrupo violarum dissolutam, vel ad- huc melius cerebrum leporinum, quod specificè a peritissimis hunc in finem com- mendatur, adhibere.

27. Quando dentes vacillant ex gin- givarum consumptione, corruptione, vel exulceratione scorbutica putrida, nec non nervorum imbecillitate, non negle- ctis internis antiscorbuticis, sanguinem & lympham depurantibus lignosis, ra- dicem mali auferentibus, externe quo- que, quæ gingivas mundant & firmant, in usum trahenda sunt. Laudo autem instar omnium in gravi gingivarum ero- sione, foetore & exinde emergente den- tium debilitate, liquorem præstantissi- mum sequentem: recipe massiches, myr-

*Opusc. Patb.*

rhæ, gummi elemi ana drachmas duas, herbæ scordii, hormini, salviæ, fol. myrthi ana pugillos duos, florum rosa- rum rubrarum pugillos tres, aluminis drachmam unam & dimidiam caryo- phyllorum drachmam, vini rubri galli- ci uncias octo, spiritus vini camphorati unciam unam: debito calore fiat extra- ctio; filtratis potest addi pro re nata spi- tus cochleariæ. Hic liquor sæpius te- neatur in ore & gingivis immediate ap- plicetur, ac dici vix potest, quam vali- de ab ulteriori putredine gingivas defen- dat, dentes firmet, & carnem consum- tam de novo generet. Poterit tamen eo- dem fine eodemq; fructu etiam adhiberi essentia balsami Peruviani cum liquore nostro balsamico & mellis rosati portio- ne remixta, quæ insignem mundificantem & roborantem obtinet virtutem. Quan- doque rebellis gingivarum adest ulcera- tio, & expertissimis remediis cedere re- nuit, sed remanent semper ulcera gingi- varum stillantia & aperta, ubi bene in- vestigandum est, an non subsit dentis ca- ries, in quam ulcus desinit, quo in casu caries radicitus tollenda, vel ipse dens cariosus extrahendus est. Ceterum ad dentium ab omni nigredine, carie, & tartaro præservationem, nec non ad gin- givarum firmitatem utilissimum erit, in- terdum mane, jejune os colluere & den- tes fricare vino, cui infusum fuit salvia, quod etiam senibus, quibus dentes ex im- becillitate nervorum vacillant, nec non illis, qui fetidum anhelitum habent, etiam atque etiam commendandum est. Quan- do deficiunt dentes, & in alveolis nulli amplius supersunt, medicus regeneratio- nem nullam novit, sed curam palliati- vam instituit, ac per artem chirurgicam naturæ defectum nonnihil supplet, den- tes ex ebore aut dente hippopotami, co- medendi tempore exemtiles, substituendo, quo tamen artificio non masticatio, sed loquela saltem adjuvatur, & ornatui consulitur. Alligant vero & devinciunt tum inter se, tum ad proximos sanos & in- tegros, præcipue quidem aureo aut argen- teo filo, sin minus, etiam lineo, ut ex *Hip- pocrate Paræus l. 2. c. 3.* adducit. Alii pectine ebur-



eburneo alligant, & exemplum de *Merulo Alexandrino A. Benedictus*, l. 3. cap. 22. qui sibi dentes, cum excidissent, aureo filo ad pronunciandum alligavit, enarrat. Historias vero de excussis dentibus subito repositis & iterum innatis, item illius foeminae nobilis, quæ pedissequæ suæ sanum dentem illi avulsum sibi deficientis loco restitui curavit, idque cum felici novæ radicationis successu, tum ipse *Paræus* priorem casum enarrans, l. 16. c. 26. tum *ETTMULLERUS* in *Pr. p. 65.* quoque in dubium vocant. Conferatur præterea *RIVERIUS* in *obs. comm. p. 357. vel 685.* & *BORELLUS*, l. *obs. 10. p. 18.*

28. Quando fluxus sanguinis ex gingivis exulceratis vel scorbutis affectis vehemens & nimius est, quem aliquoties annotarunt Practici, ita ut etiam periculum post se trahat, præter interna diaphoretica, acrimoniam temperantia, sanguinis ebullitionem sistentia, externa malactica & fortiter glutinantia suadenda sunt. Expertum ac fidum deprehendimus spiritum vini rectificatissimum, essentiam succini bene saturatam, vel etiam liquorem, ex decocto corticum granatorum, flor. balaustiorum & syrupo granatorum acidorum paratum: his enim egregie sanguinis profusio sistitur. Si enormis est hæmorrhagia, ut coerceri non commode possit, rectissime deveniendum est, annotante *Tulpio* in *observationibus*, ad applicationem fungi dicti Bovist.

29. Ex illis, quæ dentium substantiæ nocentissima sunt, merito primam in considerationem venit frigidum, hoc enim, juxta *aphorismum 28. lib. 5. HIPPOCRATIS: bellum indicit dentibus, nervis, cerebro, dorsali medulla.* Quandoquidem frigus partes exsanguis vel etiam sensu eximio præditas valde lædit, dum strictura pororum & vehementi ad lineam rectam ætheris motu (in quo essentia frigoris versatur) resistit libero spirituum transfluxui, proinde in omni dentium graviore dolore & quacunque illorum morbosa dispositione, ut vehemens evitetur frigus, autor suæque

sum; unde facies semper, præsertim in paroxysmo potius caleat, nec externum frigus genas libere tangat. Exinde proficiscitur ratio, quare dolor ex dente excavato notabiliter remittat, si cavitas illa globulis plumbeis vel frustulis nucis moschatae repleatur. *FORESTUS lib. 14. obs. 11.* ob metum ingredientis aeris ex dentibus laboranti consulit, ne ore aperto dormiat, nec multum loquatur, qua ratione etiam collutiones oris cum aqua frigida nunquam, semper cum calida instituantur. Altera parte nimium calidum minus quoque feliciter confert dentibus, ex sententia ipsius *HIPPOCRATIS lib. 5. aph. 16. Excessivum calidum carniū laxationem & nervorum infirmitatem affert, spiritus enim nimio calore dissipantur, unde fibræ laxantur, quia nervorum robur, quod maxime consistit in mediocritate siccitatis, perit. Quapropter scorbutici & qui largas dentium hæmorrhagias patiuntur & ipsorum vacillationem habent, excessiva calida & simul humida omni studio ac modo evitent. Scite inquit *schola salernitana: pulvis ferventes faciunt corrumpere dentes.**

30. Secundo loco dentium texturæ inimicissima sunt omnia acida, præsertim corrosiva, hisce enim non tantum ipsis stupor conciliatur, verum etiam tota illorum substantia successive dissolvitur atque destruitur, quo nomine spiritus nitri omnium nocentissimus, utpote qui brevi tempore solidissimum dentem in liquorem convertere judicatur. Perperam itaque medici consulunt illis, qui candidos dentes desiderant, ut utantur hisce spiritibus, etenim non potest non exinde dentium friabilitas & destructio subsequi. vid. *TIMÆUS a GULDENKLEE casu medicinal. lib. 40. cap. 1.* unde non audiendus hic *MONTANUS*, qui in *consultatione medica III.* illa in dentium dealbatione ad cælum extollit. Interne etiam acida in copia assumpta, uti vina & cerevisiæ acedentes, dum acredinem scorbuticam sanguini & lymphæ ingenerant, ad corruptionem ac cariem dentium & gingivarum erosio-

nem



nem magnum contribuunt symbolum. Præterea omnia viscosa, lacticia, caseosa, dulcia, saccharina, dentibus minus amica sunt, partim quod elementa sanguinis scorbutici suppeditent, partim etiam, quod crassitie particularum gingivarum substantiæ adhæreant & fœdo lentore illam obducant, liberamque præpediant transpirationem. Nulla enim existit pars, quæ non propter nutritionem necessaria egeat transpiratione, unde cernimus ab hisce dictis, tephaceam materiam, corruptionem & nigredinem dentibus accedere. Deinde nimis acris, salita, aromatica, alliacea, spirituosæ nocent dentibus, breviter: omnia quæ lympham nimia falsedine atque acrimonia inquinant, seu ad scorbuti genesis faciunt, nutrimentum quoque dentium & gingivarum depravant.

31. Cæterum dentium substantiæ infensissima sunt ipsa mercurialia, tam intus, quam extus adhibita, quandoquidem videmus ab illitu mercurii ad concitandam salivationem in morbis chronicis rebellibus, insignem vacillationem ac nigredinem dentibus, gingivarum carni autem fœdissimam corruptionem & laxationem accedere, partim propter mercurii corrodentem vim causticam, accessu salium factam, partim etiam, quod copiosis humiditatibus glandulosas & nerveas partes, relaxando ipsorum fibras, repleat. Denique nec illud silentio præmendandum est, opiata certam dentium existere ruinam, qua de re consuli possunt M. N. C. Dec 2. ann. 2. obs. 163. spirituum enim influxum sistendo, ad vacillationem & lapsum dentes disponunt. In insigni inflammatione facile gangrænam & sphacelum ac mortem ipsam inducere potest opium, quale exemplum in FORESTO lib. 14. obs. 6. in scholiis legitur. Nocent primario senibus, pituitosis, quia stupiditatem, vertiginem & gravedinem inducunt, testante id observatione SALMUTHI Cent. 3. obs. 32. Dicunt etiam, dentifragibulos semine hyosciami ac opio extractionem facilitare posse, quocirca ad ipsa deveniendum non est, nisi gravissimo

existente dolore: & semper consultius est, ipsa præscribere cum purgantibus, diaphoreticis vel alexipharmacis mixta, quam sibi relicta. Fumus tabaci in assuetis propter vim anodynâ simulque dissipantem gravi in odontalgia non dissuadendus est, correspondente hic undequaque experientia. At vero immoderatum ejus abusum vacillationem & præmaturam dentium iacturam inferre posse ob narcosin, non ibo inficias. Postremo, circa pulveres dentifricos illud meretur notari, quod male illi faciant, qui pulveribus asperis, v. g. paratis ex silicibus calcinatis, pumice, coralliis &c. ad dentium dealbationem subinde utantur, siquidem his ipsa substantia dentium consumitur & tandem atteritur. Præstat itaque ab illis abstinere, & saltem uti subtilissime pulverisatis lap. cancr. conchis præparatis, osse sepiæ, quibus admisceri possunt pulvis nucistæ, iridos, mastiches, alumen & parum molchi. Hic egregie dentem purificat, firmat, detergit & gratum simul facit anhelitum. Tali pulvere, si fieri potest, post quemlibet pastum fricandi dentes sunt, non tamen duriter, sed sumendæ radices malvæ majusculæ, seu althææ eæque bene mundatæ aceto rosaceo immergantur, hinc iisdem in extremitate contusis in fibras & pulvere dentifricio conspersis dentes a sordibus blanda attritione liberandi sunt. Sed hæc de dentium morbosorum therapia in præsentis sufficiant.

## DISSERTATIO VII.

### DE BILE MEDICINA ET VENENO CORPORIS.

#### S. I.

Sapientissimum dictum est HIPPOCRATIS: per qua vivimus & sanis sumus, per ea etiam agrotamus. Luculentum hujus adserti res sic dictæ non naturales præbent documentum; sicuti enim aere, cibo & potu, motu, somno



ac quiete homo necessario utitur; ita, si vitium iis rebus inest, graves inde ac morbosas afflictiones corpori ingenerari, est certissimum. Verum enim vero non solum hoc ipsum de iis rebus, quæ corpori nostro externæ sunt, valere arbitror, sed de iis quoque, quæ intrinsicè proxime ad vitam tuendam & sustentandam conferunt, ut sunt sanguis, lymphæ & spiritus animales. Uti enim ex horum debita indole, temperie, mixtione, motuque vitalium functionum pendet integritas; sic etiam eorum a naturali statu deflexio & morbosa proxima via ex horum labe ac vitio peti ac derivari debet. Plura quoque in corporeprehenduntur, quæ quanquam non proxime, necessario tamen ad sanum corporis statum magnum addunt momentum; ex quo facile intelligi potest, ex ipsorum vitio ac labe sanitatem vehementer perverti, & occasiones ac causas morbis succrescere. Exempli loco instar omnium nobis sit bilis, quæ quamperutilis imo necessarius ad vitam & sanitatem custodiendam sit liquor, nemini solidioris medicinæ perito incognitum esse potest, quod & ejus in quovis animante, etiam minutissimo declarat præsentia, siquidem nec ullum bilioso humore destitutum animal invenies. Et profecto, si rem recte exprimere velimus, bilis in corpore animantium genuinam corporum est medicamentum a natura prudentissime elaboratum, ut per hoc omnes morbosæ afflictiones avertantur, earum causæ præscindantur, & vitia, si quæ adsint, corrigantur; sicque corpus per liquoris hujus virtutem ac plane incomparabilem energiam vivum ac sanum conserveatur; id quod infra uberius demonstrabimus. Cum itaque tantus usus tantaque in corpore sano servando sit præstantia, dum ipsius quasi universalis ac naturalis est medicina; quidni, si ipsa vel deficit vel depravata est & a debita sua temperie ac crassi defleat, ingens ad morbos producendos nascatur occasio. Et quamquam a sapiente antiquitate magno præsertim medicinæ parente bilis inter morborum causas fuerit relata; nihilo tamen minus nostris temporibus fateri cogimur, quibus

omnia vel ex acido, viscido, acri, vel ex archæi aut erroneæ animæ aut prudenti motu deducunt, vix amplius in censum morbificarum causarum bilem venire; cum tamen plurimæ eæque gravissimæ adfectiones ex bilis vitio suas trahunt natales, in quibus maxima medicamentorum virtus ac energia in bilis emendatione, generatione vel evacuatione consistere debet. Quemadmodum enim bilis, si sufficit, pro vera ac genuina corporis medicina est habenda; ita & ea medicamina, quæ ad bilem temperatam & naturalem reddendam accommodata sunt, omnium esse præcipua, in iisque invenendis & rite applicandis palmarium medici munus versari, quisque facile ad sensu suo comprobabit. In præsentī itaque nobis constitutum est, bilem tam secundam naturam ceu universalem corporis medicinam quam, præter naturam, ceu plurimorum morborum causam atque originem considerare.

2. Præcipuum & vere unicum hepatis esse officium, ex sanguine per venæ portæ truncum & arteriam hepaticam ac glandulosos ejus acinos mechanica quadam ratione activum illum salino-sulphureum humorem, qui bilis nomine venit, filtrare & transcolare, res inter anatomicos & medicos est certissima. Equidem propter innumera, quæ ibi conspiciuntur, vasa lymphatica lymphæ secretioni ac dispensationi hepar præesse non inepte quidam judicant; sed secundarium hoc esse officium, quisque qui res ac circumstantias rite considerat, facile perspiciet. Aliter enim minus fieri potest, cum crassiusculus liquor ex sanguinis massa debet separari, quin per tubulos & poros amplioris orificii, quam fluida tenuioris consistentiæ exigunt, ea contingat secretio. Jam vero ipse sensus & ratio suadet mechanica, per quos liquor crassiusculus transire potest, per eosdem quoque facilius tenuiorem una pervadere posse liquorem. Non itaque existimandum, bilem tali forma & consistentia ab hepatis glandulis & sanguine separari, qualis dein ex hepatis viscere per ductus biliarios effluere conspicitur; sed potius valde



valde fluida & diluta cum lymphâ influit, & a glandulis recipitur; ubi postea nova quasi evenit separatio; siquidem per vasa illa lymphatica, quæ glandulis adfistunt, tenuis & aquosa pars fluit, remanente spissiori crassiuscula bilis substantia, quæ ob orificiorum angustiam excluditur. Recipitur vero ab amplioris diametri tubulis hepaticis, qui per totam hepatis substantiam, injectione cum cera teste, dispersi sunt, biliosis, & partim immediate ad duodenum, partim ad capsulam fertur biliariam.

3. In eo quidem inter se anatomici dissentiant, unde biliaria vesica hepati subnexa accipiat bilem. Alii enim tunicam glandulosam ex sanguine, per cysticas arterias advecto, eam separari existimant; alii minimos tubulos bilem advehentes fundo vesicæ implantatos esse statuunt; & denique alii certos ductus cysti hepaticos, per quos immediate bilis ad hoc receptaculum ducatur, affirmare sustinent. Verum enim vero quid de hisce opinionibus sentiendum sit, sequens a Cl. BOHNIO aliisque institutum experimentum declarabit: in aperto scilicet cane omnise vesica bilis expressa ductusque cysticus ligatus est, & nihilominus in subjecto aliquamdiu superstita aliquid bilis in vesica expectarunt non obstante hoc vinculo, negatoque folliculi fellis cum poro hepatico commercio: at nihil fellis, sed loco hujus tantillum sanguinis congrumati deprehenderunt. Hinc recte potius accuratiores statuunt, bilem, quam custodit cystis hepatica, natales suos petere ab ipso solenni ductu hepatico. Horum enim ductuum commercium apertissimum est, flatu enim per cholodochum immisso & cystis & ductus hepaticus inflatur: rursus tubulo immisso in hepaticum biliarem canalem & hepaticus & cystis & cholodochus eodem distenditur flatu. In homine etiam aliisque animantibus ductus hepaticus cysticusque in unum abeunt canalem. Jam vero si consideramus vesiculæ felleæ situm; fundus ejus in decliviori loco, cervix vero & collum ac biliosus ductus in sublimi posita sunt, & hinc est probabile,

quando bilis per porum cholodochum propter ejus obliquam insertionem inter tunicas duodeni, præsertim si hoc ipsum vacuum fuerit, a massa chyli tardius descendit, relabi hanc ipsam in substratam vesiculam, præsertim si ea minus referta est, donec hæc compressione intestinorum vel propria contractione rursus exprimatur. In bove id videtur manifestissime, ubi ductus hepaticus ita in vesicæ collum hiat, quod valde tendineum ac nervosum est, ut eadem facilitate bilis ad vesicam descendere quam per ductum communem ad duodenum amandari possit. In eodem subjecto, quod visu mirabile est, papillula quædam in interiore membrana cystidis fere in medio conspicua est, & protuberat, simili fere modo, uti ductus in intestino apparet duodeno. Papillula hæc orificium esse videtur ductus, qui inter vesicæ membranas fertur, & protuberantia hæc valvulæ munere fungitur, ne semel eructata bilis eandem repetat viam, per quam erat egressa.

4. Verum enim vero, non parum differt bilis vesicæ & hepatica, nam illa longe est crassior, acrior, amaricantior, & colore saturatior; hæc vero magis est fluida, diluta atque minoris amaritiei. Unde & quem in usum talem bilis in vesica subeat mutationem, negotii excellentia paullo accuratorem disquisitionem postulare videtur. Ut vero id ex voto cedat, ante de vesicæ felleæ structura quædam dicenda veniunt. Observamus vero, ex variis membranis cystidem esse conflata, quarum interior in omnibus fere similis est tunicæ villosæ duodeni; observantur porro ibi varii sulci, lacunæ & valvulæ conniventes, glandulas vero notare non licuit. Dein membrana, quæ sequitur, valde est spongiosa & quasi vesicularis ex variis pelliculis, quibus aeræ bullulæ inhærent, composita. Nullum dubium est, quod hæc originem subministret copiosis vasis lymphaticis, ut etiam plurima horum in cystide ex hepate immediate prodeant. Tertia tunica est musculosa sive fibrosa, nerveam vero & tendinosam in vesicæ fundo ejusque cavi



cavitate haud conspiciere licet: ejus col- lum vero & ductus tam hepaticus quam cysticus tunica firmiori tendinoso nervea sunt conflati. Extima tunica est a peritonæo, inter quam & musculosam arteriosi & venosi ductus sparsi videntur. Cervix vesicæ valde est angusta, qualis angustia in vesica fellis bovina aperte visitur, minime autem ibi valvula notari potest. Talem semilunarem & cochleæ in modum extensam, multis rugis asperam in subjectis humanis annotarunt BAUHINUS & SPIGELIUS. Ego fateor ejusmodi valvulam in humanis cadaveribus me non deprehendere potuisse; probe autem notabilem angustiam non rectilineam, sed obliquam & curvam stilo etiam propter obliquitatem resistentem. Et hæc angustia nullum alium usum habere videtur, ac ne bilis semel egressa crassior in cystidem regurgitet, per quam tamen bilis hepatica tenuior commode transit.

5. Interior tunica vesicæ villosa non secus ac ea, quæ in duodeno est, quasi colatorii seu filtri vicem gerit, & tenue illud aquosum bilis fluidum secernit, vasisque lymphaticis infundit. Non enim negandum est, hæc ipla, quæ in vesica & circa hanc perreptant, saporis amaricantis lympham custodire; quinimo in statu præternaturali multæ testantur observationes, ex poris tunicarum vesicæ insignem bilis tenuis copiam transfudasse. Quoniam vero hæc tunica tenuiorem bilis partem separat, relicta crassiore, consistentiam & amarorem acquirit. Præterea propter tunicam carneam & nervos quoque eximios & sensu gaudet vesica & motu, maxime vero omnium ductus ejus biliarii, qui tunica valde robusta & nervea sunt instructi; hinc quoque graves dolores & spasmi in iis oriuntur. Bene igitur notante VIEUSSENS in *neurographia* p. 376. ex nervi intercostalis dextri plexu hepatico semilunari sex emergunt fibræ, quarum tres inferiores ac minores vesiculæ fellæ vasis cholodochis, pyloro, duodeno & pancreati impenduntur, ut ibi debitum tonum & constrictionem præstent,

unde etiam harum partium magna consensio derivatur, nullumque dubium, quod non tantum pondere bilis descendat ad intestina, sed proprio ductuum motu adjuvetur. Sedulam cæterum ductus cholodochi insertio meretur attentionem; qui inter tunicam exteriorem & interiorem unciali fere longitudine prorepat, & tandem meatu rotundo in ejus cavitatem se aperit.

6. Prius vero quam insignem bilis in corpore usum ac necessitatem, ejusque vitia ac noxas exponamus, necessarium esse duco, quædam de ejus natura ac indole institutis cum ipsa experimentis præmittere, ut dein eo melius de variis phænomenis ac vitiis judicare valeamus. Primo omnium vero ipsos sensus intestinum citare placet, cum ex sapore & odore simplicis cujusdam, principiorum, ex quibus mixtum aut compositum, naturam dijudicare possimus. Universale id est, quod cujusvis animantis bilis sapore intenso amaro prædita sit, adeo ut unica guttula bilis in dimidiam aquæ unciam immissa suam dispergat amaritiam. Jam vero apud omnes artis chymicæ peritos in confesso est, ex intima sulphuris mixtione quodammodo terrestris cum sale amarum nasci sapor. Cujus vero naturæ hoc sal sit discernendum nunc est: quantum cernere animo & per experimenta licet, acidum cum terrestri alcalina sulphurea materia intime junctum constituit mixturam amaram; ita spiritus vitrioli sulphureus acidus cum sale tartari vel nitro fixo coagulatus exhibet sal neutrum, saporis amaricantis, uti in tartaro vitriolato & arcano duplicato, licet acetum vini valde sulphureum coralliis & cancrorum lapidibus affusum sal elargitur medium, quod saporis est amariusculi. Constat porro ex chymicis, amarissima v.g. aloen, colocynthidem, absinthium, penetrantiam saporis mixtura alcalinorum salium multum deponere; id quod etiam de bile animalium valet, non obscuro documento, acidum ad amaricantis saporis constitutionem non parum conferre, quo energato



vato omnis simul sapor perit. Dein & hoc experientia est, amara vegetabilia præ reliquis copiosum sal per incinerationem exhibere. Certum vero illud, quod genesis salis alcalini fixi ex intima combinatione acidi sulphuris & terra fiat, sicuti id olim fufius in *dissert. de generatione salium* demonstravimus.

7. Præterea sapor bilis in lingua constantissimus & penetrantissimus eximiam ejus activitatem satis superque prodit; omne enim quod penetrat & latius se diffundit subtilis est naturæ. Inter alia vis ejus valde penetrans ex eo conspicitur: quando enim aliquot guttulæ tunice ventriculi aut intestini instillantur, flavissimus mox inducitur color, nec ulla arte extergendus. Nec minorem ejus penetrantiam pillopæi animadvertunt, dum ad nigredinem pilis inducendam bilem bovinam cum iis rebus miscent, quæ atramentosum exhibent colorem. Croceus quoque color valde explicabilis admodum subtilis & activi sulphuris esse potest, si illud adhuc axioma chymicum valet: colorem realem esse flavum vel rubicundum ex sulphure. Quam maxime vero bilis elementa destillationes ejus & mixtiones patefaciunt. Ita uncia duodecim bilis bovinæ uncias undecim dant phlegmatis, nullius plane saporis; ex residui uncia una prolicitus postea spiritus odoris ingrati ac empyreumatici, qui cum spiritu nitri expedite effervescebat & syrupum violarum viridem in signum naturæ alcalinæ efficiebat, fundebat simul olei quicquam similis cum spiritu indolis & efficaciam. Caput mortuum terreum, quod in retorta restitabat, drachmas duas cum dimidia pendens per incinerationem fixi salis manifesto alcalini drachmam dedit unam. Ex quo allato experimento patet, quam magna copia aquæ ingrediatur bilem; quod ex eo elucescit, dum bilis in extractum redigi potest: uncia enim duæ bilis bovinæ, si leni calore inspissantur, non ultra drachmam unam extracti spissi concedunt. Quinimo si bilis instrumenti statici beneficio ponderetur, uncia qua-

tuor bilis respectu aquæ pure destillatæ vix ipsi drachmis duabus præponderant. Quasi vero extractum bilis bovinæ cum sale tartari anatica portione miscetur, & dein invicem in retorta vitrea ex arena destillantur, tunc spiritus urinosus manifesto alcalinus prodit, qui vehementem ebullitionem cum quovis acido suscitatur; sublimati solutionem lacteam, syrupi vero tunice viridem efficiens, id quod salibus volatilibus urinosis est solemne. Ratio vero cur sal tartari additum spiritum magis alcalinum volatilem & urinosum producat, hæc esse videtur; salia calcinata alcalina intimius oleosorum contextum aggrediuntur, acidumque destruendo sulphur magis volatilifant & alcalifant. Simile quid in destillatione fuliginis, succini & tartari videre licet, quæ si solitaria destillantur, spiritum oleosum acidum obtinemus, si vero prius cum sale fixo miscentur, spiritus prodit valde urinosus ac oleosus.

8. Accedimus jam ad mixtiones, quarum usus in corporum elementis ac virtutibus explorandis maximus est. Observatione itaque constat, bilem cum nullo acido effervesce, excepto spiritu nostro fumante flammifico. Contrariatur hoc vulgari experientia, cum bilis statuitur alcalina. Neque bilis bovina cum oleo vitrioli concentratissimo efficit ebullitionem, nec viridem mox colorem acquirit, quod etiam multorum opinioni refragatur, sed potius sequitur turbatio, coagulatio & præcipitatio. Spiritus vero salis, quod notabile est, bilem reddit spissiore quam spiritus nitri & vitrioli, & minime a spiritu nitri coagulatur. Quando spiritus salis ammoniaci concentratus cum calce viva factus bili admiscetur, exaltatur ejus color, fit saturator & mixtura manet diaphana. Equidem phænomena conspiciuntur, si experimentum cum oleo tartari per deliquium instituat. Scire autem hoc loco oportet, miscelam alcalium saporem ejus amarum valde imminuere. Quando cum syrupo florum tunice aut violarum bilis



bilis permiscetur, non emergit mixtura viridis, sed talis color, qui ex flavo & rubicundo elici solet, nascitur. Spiritus quoque vini rectificatissimus bilem quodammodo turbidam reddit, diaphaneitate amissa; exiguum autem inde præcipitatur, & spiritus valde amaricans evadit. Forte e contrario & crassum saccharum saturni caussatur coagulum, bili exigua etiam quantitate adspersum. Bile vero inspissata affuso oleo vitrioli non effervescebat, sed amittebat nigricantem colorem & luridus inde factus; mixtura olebat pessime. Noster spiritus fumans flammificus movebat cum extracto bilis effervescentiam valde calidam cum ingente spuma fumoque rubro; extractum autem solvebatur in mucum, quod ab oleo vitrioli piceum magis coagulum induebat; totum fere extractum cum spiritu vini item aqua solvebatur. Ulterius bilis extractum siccatum flammæ commissum fluebat, nec statim ignem concipiebat, sed humiditate avolante ardebat, odoremque salis foetidi volatilis in auras spargebat, cinere relicto, multo sale alcalino, sapore teste, imbuto.

9. Hisce experimentis & hæc adiicienda esse puto. Bile scilicet bubula ex folliculo recenter desumpta diaphana est & valde fluida; quandocunque vero per aliquot horas libero exponitur aeri, ejus diaphaneitas turbatur, crassior evadit, odorem mutat, & successu temporis acquirit foetorem. Dicit enim vix potest, quam facile brevi temporis spatio ipso sanguine citius bilis abominabilem foetorem concipiat: id quod argumento esse potest, uti omne animantium fluidum, ita & hoc ex partibus constare, quarum unionem ac mixtionem inter se solus aeris calor sejungit. Deinceps & illud notandum, serum sanguinis vel lympham cochleari inditam sub lenicalore in offam abire gelatinosam; quod frustra cum bile tentatur, quæ minus calore coagulatur, eam ob causam, quod lympa nutritia eam non ingreditur. Quod usum tandem bilis mechanicum attinet, is omnino in fordi-

bus pinguibus vestium extergendis & picturis purificandis est egregius: nec minus pictores ad colorem exaltandum eam adhibere solent. Cæterum interne quoque fel bubulum clysteribus indutum egregie alvum stimulat; & a nonnullis aliorum quoque animantium bilis in epilepsia, quartana, partu difficili & spasmis hystericis cum fructu adhiberi solet.

10. Et hæc sunt experimenta, quæ cum bile bubula tantum instituimus; non tamen diffitemur, aliorum animantium bilem quodammodo differre, nec semper ejusdem animantis bilem omni tempore ejusdem naturæ esse ac indolis. Humanæ bilis copiam, quoniam in manu nostra non fuit, destillationi subicere non licuit; differentiam tamen, respectu bilis bovinæ, in eo positam esse arbitramur, quod nonnihil spissior ac crassior sit; quo fit, ut ab aqua forti affusa, itemque a spiritu vitrioli fortiori calore admoto effervescat, viridisque mixtura fiat; promptius quoque a spiritu vini rectificato coaguletur. Nullum hinc dubium est, quin bilis humana principio salino-sulphureo longe saturatior aliorumque animantium bile sit activior. In universum hoc notari vellem: quo calidiora sunt animalia, eo activiorem possident bilem.

11. Præfata hæc experimenta satis superque docent, bilem non puræ esse naturæ alcalinæ; unde non cum quovis acido, nisi fortiori effervescebat, utpote omne alcali sive terreum sit, sive salinum cum quovis acido etiam lenissimo ebullit paratissime. Dehinc discimus, bilem esse oleosæ naturæ sulphuræ, ideo etiam ardet; pure tamen sulphurea non est, alias cum spiritu nitri vel nostro fumante æstuosa excitaretur effervescencia. Ea enim est oleorum subtilium natura, ut, si cum hisce confundantur, ebulliant; quare bilis potius liquor valde temperatus est, qui ex particulis oleosis, terreis, aqueis, salinis, volatilibus constat. Et ut paucis nos expediamus, amarus ille biliosus succus, quoad mixtionem ac crasin suam

in om-



in omnibus fere similis est succis herbarum amarificantium, maxime omnium vero centaurii minoris, nec ejus extractum multum ab inspissata bile differt, ut omnes hæ plantæ ex sulphure, sale alcali terreo sunt compositæ. De his etiam illud considerari meretur, quod succi hi depurati & simili modo tractati ac destillati, cum menstruis acidis alcalinis spirituosus mixti, similia fera phænomena in omnibus exhibeant, ut certo certius credendum sit, intimas horum simplicium partes quoad mixtionem, crassam ac virtutem esse easdem. Et hinc patet ratio, cur amarificantium plantarum extracta & essentiæ in bilis defectione & qualitate deperdita corrigenda ac restauranda tam ad morbos præcavendos quam eosdem curandos divinum quasi præbeant auxilium.

12. Perlustrata sic bilis natura ac indole, proximum nunc est, ut ad elaborationem & generationem ejus in corpore cognoscendam nos convertamus. Primo omnium igitur hoc dicendum est, bilem non sub tali forma ac schemate, qualis in receptaculis, ejus poro nimirum hepatico & cystide fellea apparet, sanguini inexistere; nam nec sanguis nec serum amaricat, nec in statu sano flavum est, quod vero contingit, quando bilis cum sero miscetur. Qua de causa nullum est dubium, ejus materiam duntaxat in sanguine contineri; quod etiam non incredibile est: sulphur enim, terra, sal, phlegma, & mucus, ex quibus bilis mixta est, in sanguine reperiuntur copiosissime. Notum vero ex chymico-mechanicis est, corporum qualitates, virtutes, odorem & saporem unice dependere a variarum partium mixtione, unione, positione, sive, ut loquuntur, crassi ac textura, cujus mutationem & destructionem saporis, odoris, consistentiæ & virtutis sequitur mutatio. Quapropter peculiaris mixtio partium sanguinis pinguium, salinarum, terrearum & aquearum intestini motus beneficio, a consortio sanguinis & feri prius avulsarum, dein invicem conjunctarum, bilem constituit. Minus vero nobis pro-

babile videtur, bilem immediate ex chylolis partibus, sive iis, quæ superficialiter tantum inhærent sanguini coagmentari; sed ea est nostra sententia, ex intimiori sanguinis nexu omnes has partes diversas mediante intestino motu discerpi atque resolvi, quæ unione postea facta bilem constituunt. Unde clarissime videmus, copiosæ bilis generationem in iis subjectis fieri, ubi motu intestino calido sanguis vehementius exæstuat; hinc cholericis, juvenes, qui corpus exercent, victuque calido utuntur magnam bilis possident copiam; senes contra, infantes phlegmatici, otiosi & torpidi, bilem aquosam, dilutam & inertem fovent. In confirmationem hujus sententiæ luculentum nobis præbent testimonium febres ardentes, continuæ, tertianæ, in quibus magna bilis exundantia, ad motum intestinum vehementem, sanguinisque nexum dissolventem, produciuntur. Mirum enim est, quanta quotidie dictis in febribus bilis abundantia in urina, alvi fæcibus & egestis per vomitum conspiciatur, quæ quoque ratio est, quare veteres bilem hanc, quæ excernitur, causam febris habuerint, quæ tamen potius ejus est productum. Observamus e.g. in tertiana, quod, quo vehementior sit & diutius duret, eo biliosiora sint excrementa. Nec natura bilis copiam gignere desinit, quandiu febris præiensest. Tollitur vero vel tantummodo sistitur ac ad tempus famigeratissimo chinæ chinæ cortice supprimitur, fit enim, ut, paucis tempore elapso, urinæ flammeus color pereat, diluta & aquosa fiat, alvi que scybala ad naturalem redeant colorem; simulac vero febris revertitur, mox ea omnia rursus conspiciuntur. Ex quibus recensitis satis superque elucet, motu intestino calido ipsum sanguinem in hunc aliosque liquores excrementitios resolvi. Id quod etiam hecticæ & latentes febres testantur, ubi ipse sanguis continua & præcalida exæstuatione tandem consumitur ac in bilem & excrementa convertitur. Inter alios, quamvis paucos, qui hoc animadverterunt, adduci meretur HILDANUS qui



qui in *select. medic.* pag. 71. hæc habet: *mirabile est, quod copiosissima bilis nonnunquam evacuetur, nec tamen post obitum vesica vacua inveniatur. Nullum est dubium, inquit, sanguinem ab æstu inflammatorio exuri in bilem.* Ulterius observamus quod quo magis abstinemus ab alimentis, & corpus motu agitamus, eo majorem bilis proventum fieri: & contra sub otio ac copioso victu ejus generatio valde impeditur atque retunditur.

13. Perspecta hætenus ac demonstrata bilis origine ejusque genetrice causa; sequitur nunc, ut dispiciamus, quomodo particulæ per motum intestinum a sanguine avulsæ in liquorem coeant biliosum, quod a sanguinis tardiori per hepar progressu derivamus. Ad meliorem vero hujus rei declarationem ea, quæ sequuntur, mechanica axiomata supponimus. Primo miscibilia, quo magis agitantur cellerrimeque moventur, eo magis eorum particulæ dividuntur. Secundo, in quo minores mediante motu divisæ sunt partes, eo majori stringuntur nexu, & difficilius a reliquis separantur, quia major est in parvis, quam in magnis corporibus superficies, & ob molis parvitatem decrescit illa vis, qua unum fluidum ab altero sejungi nititur. Ex quo illud consequitur, particulæ inter se coeunt, colliguntur & facilius a mixtione heterogeneatum partium recedunt, uti id clarissime videmus in sanguine extravasato, ubi mox, deficiente motu, serum a sanguine separatur. Cum itaque notum sit ex anatomicis, tardissimum in hepate esse sanguinis circuitum, quoniam vena portæ, quæ pulsu est destituta, vehitur & minimis ramificationibus per hepatis parenchyma dispersis adducitur, in quo quidem articularum imitatur indolem, sed cum desit motus impetus, sanguis in hoc viscere tardius movetur, & per consequentiam in omnibus visceribus, quæ vasa habent ex vena portæ, lentior ac tardior debet esse progressio. Liquet hinc ratio, quare hepar, lien, pancreas, mesenterium & intestina plerumque sedes

sint gravissimorum chronicorum morborum, dum in his partibus facile obstructions, indurationes, stases sanguinis, inflammationes & corruptiones fieri possunt. Quapropter cum in hac vena sanguis particulis dulcibus chylosis sit orbatus, crassiores, sulphureæ, salinæ quasi calore adustæ cum mucilaginosi & lymphaticis sub tardiori motu in unum coeunt, colliguntur ac secernuntur, per quam novam unionem ac mixtionem, novus schematismus, nova crasis novusque sapor & color emergit. Non dubitari tamen potest bilem novam ex sanguine ad eam, quæ est in cystide vel in poris successive magis specificari, ut quasi fermenti loco sit. Uti enim sanguis intestino suo motu chyli novi transmutationem in sanguinem adjuvat, & uti acetum vinum affusum in acetum convertit; ita bilis accedente simili succo ex sanguine formam similem ac texturam inducit facillime.

14. Postquam itaque naturam & indolem bilis ejusque generationem investigavimus, oportet jam ad rem ipsam & institutum nostrum propius accedere & demonstrare, bilem esse pernobilem omnis generis animantium medicinam. Id quod hisce comprobabimus argumentis. Primo enim nullum animal in rerum natura datur, quod hoc liquore sit destitutum; non reperitur tantum in quadrupedibus, volatilibus, sed etiam in minimis insectis. Et quamquam vesicula fellis quibusdam desit: minime tamen carent hepate & ex hoc ductibus bilem vel ad intestina vel ventriculum vehentibus. Secundo bilis necessitas in animalibus exinde videtur maxima, quod tam magnæ molis viscus, quod tam eximium in abdomine obtinet spatium, a provida natura cum tantum in finem elaboratum sit, ut bilem secernat atque dispenset: hoc autem viscere nullum animal carere certum est. Tertio ex anatomicis animadversione dignum est, in plerisque & nobilioribus animalibus bilem ad duodenum duplici via ac ductu ex hepate deferri: nam præter hepaticum, qui bilem proxime ex hepate fert, cysticus



cysticus etiam ductus, & hi plerumque junguntur & in unum communem coalescunt, qui cholodochus dicitur. Ex hoc profecto non satis miranda Numinis elucet providentia; nam, cum ille humor sit præstantissimus, quo nec ullum animal carere potest, factum est, ut si quando unus ductus fuerit obstructus, per alterum tamen salvum & apertum balsamicus hisce liquor adfluere possit: vel etiam si certo tempore in nimia quantitate elaboretur, ipsa ne perdat, ut in diverticulum abeat, ibique pro futuro usu tamquam promptuario conservetur. Quarto, quod bilis non inutilis corporis nostri sit liquor, ex eo manifesto elucet, dum in omnibus animantibus mox a ventriculo primum intestinum ingreditur, ibique ciborum massæ affunditur. Si igitur excrementum & naturæ humanæ esset heterogeneum, sapientissimum Numen proxime potius in intestinum colon vel rectum detrussisset, ne chylum, ceu spiritum, sanguinis & totius corporis pabulum, peregrinis suis sordibus atque quisquiliis inquinaret. Ultimo loco ejus insignis quantitas, quæ secundum nonnullorum sententiam, BORELLI præsertim, singulis diebus ad libram unam sese extendit, præcipue in majoribus animantibus plane peculiarem usum atque necessitatem demonstrat.

15. Et quamquam hæc, quæ prolata sunt, rationes probabilitate potissimum nituntur; nihilo tamen minus ad bilis utilitatem adserendam sufficiunt. Ut igitur rem aliquanto clarius explicemus, primo ceu indubium supponi oportet, quod vita nostra, multo magis sanitas, in jugi ac perenni, temperato ac æquabili sanguinis & humorum per corpus motu consistat. Hic motus jure suo ac merito vitalis appellatur; corpus enim a putredine defendit, ipsique integritatem & durationem præstat, nutrit & id ipsum, quod inter animam & corpus est, commercium tanquam hujus instrumentum ac vinculum restaurat; quam diu itaque hic humorum cursus salvus ac liber est, tam diu vita ac sanitas adef-

se dicitur; simulac vero hic motus cessare incipit, variæ mox ægritudines actionum corporis depravationes, dolores, putredo & ipse tandem interitus subsequuntur. Is vero ut illibatus servetur, opus omnino est, ut sanguis sit fluidus, quo angustias minimorum tubulorum transire queat. Dein ut particulæ sanguinem constituentes heterogeneæ in intima mixtione & unione sint positæ; in hoc enim genuina sanguinis crasis ac textura consistit. Est autem experientia, nihil magis huic texturæ adversum esse, quam quod tenax, viscidum, acidum est; hæc enim fluiditati officiunt, nec facile in motum intestinum cientur, nec intimam cum aliis subeunt miscelam. Quem vero fugit, nos varii generis eduliis ac alimentis vesci, quæ multum acidam viscidum, ac tenacis principii in suam recipiunt mixturam, ex quibus non alius nisi crassus, viscosus, male miscibilis, minusque fluidus chylus & sanguis postea emergere potest. Præterea ad vitam non tantum sanguis ad circulationem dispositus sufficit, sed motu etiam seu motore opus est; motus enim maxime de essentia vitæ ac sanitatis est. Constat porro, fibras corporis nostri, quæ motrices sunt seu ad motum & constrictionem idoneæ stimulante quodam promptius meliusve suo officio fungi, i. e. si corpus extraneum in motu existens activitate & penetrantia in eas ipsas agat. Videmus enim odorem saltem penetrantem, quem vinum, spirituosum & salia volatilia de se spargunt, mox totius corporis motus labascentes erigere. Tali itaque motore naturali naturæ quoque opus est, qui perpetuo solidas corporis partes ad debitum motum ac impulsu incitet, sine quo nec circulatio fieri, nec vita & sanitas subsistere potest.

16. Hisce consideratis, videbimus nunc quo pacto bilis corporis nostri sit naturalis ac polychresta medicina, & qui fiat, ut hæc omnia ad fluiditatem & motum sanguinis necessaria præbeat subsidia, quibus morbi ac ipsa mors avertatur. Supra autem ostendimus, bilem esse



esse valde activæ & penetrantis indolis humorem; dum ex partibus sulphureis oleosis cum sale volatili & fixo mixtis fit compositus; temperatæ tamen simul naturæ propter partium aquosarum & terrestrium admixtionem. Hic liquor partim penetrantia, partim textura sua omne id, quod ex ventriculi sinu & viscidum, crassum ac acidum elabitur, incidit, temperat ac corrigit, & quod maximum est, ad subtilisationem, & blandam chyli & dein sanguinis spiritualascentiam premultum contribuit. At vero nullum est dubium, non modo in ventriculo, sed & in tenuibus intestinis ipsa alimenta intimam subire solutionem ac fermentationem, qua eorum nexus, unio ac mixtio quoad intima dissolvitur & destruitur, sapore satis, odore mutato, ac consistentia testante. Jam vero notum est, quando rebus in fermentatione existentibus spirituosæ & activæ indolis admiscantur liquores, motu intestino eos intime solvi, egregiamque spiritualascentiam fermentescibilibus addere. Idem contingit, quando bilis in fermentatione alimentis existentibus affunditur, utpote non modo acidi & visceridi fit correctio & subactio, sed & simul ipsi massæ chylosæ blanda conciliatur spirituositas, ut hac ratione chylus subtilis, spirituosus temperatur ac sapore dulcis evadat. Quod vero bilis fermentationis actum in intestinis subeat, ex eo colligi potest, quod suam penitus deponat amaritiam: fermentativus enim intestinus motus partium unionem crasin ac texturam, a qua sapor & qualitas pendet, intime dissolvit ac plane invertit. Bilis itaque in primis viis chylum præparat, ut aptus & dispositus fiat ad circulum vitalem obeundum & ad nutrimentum toti corpori præstandum, quo sine humore chylus crassus, crudus, male subactus & ad motum progressivum ineptus evadit, qui ad massam sanguineam delatus, non levem ad morbos dispositionem ingenerat.

17. Chylus balsamo spirituosissimo sic conditus, & ad sanguinem accedens intimius immiscetur; fluida enim quo sunt sub-

tiliora, magisque divisa eo facilius in intimam mixtionem admittuntur; & contra, quo crassiora sunt fluida eo facilius ab heterogeneorum copia discendunt. Chylus quoque stimulo quodam & sale armatus, fibrarum in toto corpore motricium tonum & impulsus egregie adjuvat & excitat, ut hinc circulatio fiat promptior & expeditior, quæ sub fibrarum debito vigore maxime salva persistit. Quapropter non sine ratione a veteribus ut & recentioribus bilis corporis balsamum audit, non quod immediate balsamica sua vi dispositionem ac putredinem avertat, sed quod ad liberum & expeditum sanguinis circuitum multum conferat. Hic enim circulus optimum est corporis balsamum, quo vigente corruptio in corpore aliena est; siquidem motus progressivus perpetuusque motus fluiditatis & spiritualascentiæ putredinoso motui resistit. Præterea sub motu isto circulari multæ superflue excrementitiæ partes, quæ ad corruptionem inducendam pronæ sunt, per debita & congrua evacuatoria eliminantur.

18. Restat adhuc alius bilis in primis viis usus magni etiam æstimandus; nempe hæc ipsa moderatum ipsis intestinis præbet stimulum, quo ad debitum motum peristalticum, qui summe necessarius est, & ad chyli in vasa lymphatica expressionem & remanentium sæcum propulsionem continuandam excitantur. Certum est, quod tonus debitus intestinalis, qui in æquali systole & diastole consistit, ad discernendum id, quod inutile est, multum contribuat; excrementa enim si minus debite ejiciuntur, magna certe sanguini & lymphæ non modo accedit impuritas, sed & ad spasmodica pathemata dispositio fit præsentissima. Bilis igitur in statu ordinato & naturali massæ chylosæ affusa excrementorum promovet ejectionem, idque partim acrimonia irritante, partim elastica spiritualascentia, quam chylo scenerat, præstat, nec non chyli & acidi absorptionem.

19. Quod bilis corpori nostro medicinæ instar sit excellentissimæ, quæ a morbis



morbis præservet, & omnem ad eos dispositionem arceat atque extinguat, sufficienter a nobis stabilitum esse credimus. Nihilominus egregiam nostræ ad fertioni confirmationem addit magna salubritas eximiaque virtus in præservandis & tollendis multis incommodis amarorum medicamentorum. Expositum est supra quanta ratione mixtionis, crasseos inter bilem & extracta ac succos herbarum amarificantum, præsertim centaurii minoris, intercedat harmonia ac adfinitas. Jam vero indubitata praxis quotidie docet, non dari ipsis remediis amaris præstantiora, tutiora, & naturæ magis conformia magisque experta tam ad morbos, præservandos quam curandos. Elixir proprietatis ipsaque aloecum extractis amarificantibus additis gummatis balsamicis in formam redacta, item essentia & extracta absynthii, centaurii minoris, fumarie, gentianæ polychresta & tuta sunt, ut fere omnium chronicarum passionum præsidia non solum ad præservationem, sed & morborum curationem sint exoptatissima, quibus medicina carere nequit. Medicina enim multis carere potest remediis, neutiquam autem amaris. Et revera iis plus quam salibus volatilibus, spirituosiss & oleosis & fixis, terreis præstamus; nam naturæ magis sunt conformia magis temperata & blande ac successive correctionem & emendationem instituunt; si modo, quod probe notandum, eorum usus ad tempus continetur. Et ut paucis dicamus: amara sunt optima remedia, quia idem, quod bilis, præstant; ea enim, si bilis deficit, regenerant & restitunt, inertemque & pravam corrigunt. Nec in eo fallimur, dum naturam imitamur providentissimam, hæc quoniam amarum elaborat, quæ medicina corporis est præservatrix; hinc & nos errare non possumus, si etiam amaris utamur.

20. Tandem & hæc resolvenda venit quæstio, num detur bilis circulatio? Primus qui hanc sententiam in medium produxit, est BORELLUS, *lib. de motu animalium*, qui cum iudicaret, bilem

corporis nostri utilissimum humorem maxima quantitate quotidie ex ductibus in intestina prolabi, adeo, ut intra horæ spatium aliquot uncia defluant; talis vero copia ex sanguine generari non possit; hinc maximam ejus partem sanguini rursus per venas mesaraicas adfundi, quæ ad instar hirudinum biliosum humorem exsugendo, ipsum per venam portæ rursus in hepar advehunt. Præterea plures bilis particulas activas chylo immisceri, quæ dein ad sanguinem accedentes novam materiam ac bilis pabulum præbeant. Eadem sententia ante aliquod tempus Lugduni Batavorum in peculiari dissertatione de *motu bilis circularis* est proposita. Hic ipse auctor in ea est sententia, quod ad minimum viginti quatuor horarum spatium uncia sex bilis in intestinum duodenum infundantur, id quod experimento in cane instituto comprobatur; & hanc bilis quantitatem in hepate posse generari minime existimat, nisi ipsius statuatur circulatio; in homine vero singulis diebus libram integram scerini. Dein argumentum ab amplitudine venarum mesaraicarum desumit, quæ tanta est, ut non solum sanguini vehendo, sed & alii humori etiam sit destinata. Postea id quoque embryonis meconio comprobatur, quod bilem in intestinis stagnantem esse iudicat: sed quoniam hoc illi quantitati bilis, quæ quotidie ad intestinum fluit, non respondet, eam igitur ipsam poros rursus venarum mesaraicarum ingredi iudicat. Has putat ad hoc negotium esse aptissimas; quoniam ope tubuli flatus in venam mesaraicam immixtus in intestina ingrediatur; imo in animalibus pennatis, quæ vasis lacteis carent, chylus per venas mesenterii deferatur.

21. Verum enim vero plura sunt, quæ ad credendum minus nos adducunt. Primo enim quod tanta bilis copia in homine separetur, nondum firmo comprobatum est argumento. Ponamus autem hanc quantitatem esse certam, hujus tamen generationi & sericopiam sufficere posse arbitramur, quæ subinde a tanta alimento-



rum gignitur. In hæc vero cum perpetuus motus calidus agat, necesse est, ut rursus in varii generis salfas & excrementitias partes resolvantur. Nam utut omnia alimenta insipida ac sale destituta assumantur; nihilominus quotidie magnus salium sulphureorum in urina & bile conspicuorum fit proventus, quorum copia intestinæ tantum sanguinis commotioni debetur. Cum itaque urina tantam salis, sulphuris, pinguedinis & mucicontineat copiam, quam quotidie externi videmus, & ex sanguine, non autem immediate ex alimentis proveniat: quidni materiam ex sanguine sufficientem bilis accipiat non video, adeo, ut circulari quodam motu non opus sit. Nec in embryonibus bilis in tanta generatur quantitate, ob motum intestinum valde temperatum & a sordibus biliosis in visceribus matris jam depuratum: neque pondus huic sententiæ addit venarum mesaraicarum amplitudo; venæ enim in toto corpore semper sunt majores arteriis, & quando sanguis per hepatis ramos non tam expedite per ramos venæ portæ transit, quam ut adferatur per arterias, hinc accumulatus ibi nimium vasa distendit. Insuper nec ullo experimento comprobatum est, in venas mesaraicas aliquid humidi in homine ex intestinis recipi, & cur eadem bilis non æque poros vasorum lacteorum, utpote patentiores, subeat, perspicere non possumus. Multo minus autem concipiendum est, bilem succo chyloso immixtam specificè deinde a venis mesaraicis sine chyli admixtione rursus separari. Porro ipsa bilis intestinæ mixta fermentationis & intimæ solutionis actu in tenuibus plane immutatur, ejus crasis dissolvitur, amaritiem deponit & formalis bilis esse definit. Nihilo secius non negandum est, sulphureas & spirituosas bilis partes fermentatione resolutas rursus transire in sanguinem, sed non sub forma bilis: neque diffiteri possumus, si bilis nimium in duodenum, vacuo existente ventriculo & intestinis, effunditur, uti quandoque accidit in statu præternaturali, ejus portionem in substantia in

venas lacteas recipi posse. Nam si medicamentis amaris in copia adsumtis id conceditur, cur non etiam id de bile superabundante valeat minus perspicio.

22. Cum in superioribus demonstratum fuerit, bilis necessitatem & utilitatem in corpore nostro esse maximam; imo genuinam ejus medicinam naturalem & universalem existere; facile apparet, quando ea vitio laborat, sive id in quantitate, sive qualitate perversa vel motu consistat, maxima incommoda & dispositiones ad morbos, imo ipsas ægrotudines ex eo in corpus nostrum redundare debere. Primum itaque in considerationem venit, num bilis abundans recte quoad qualitatem & temperiem se habens damnum corporis adferre possit? Ad hæc respondemus, non facile abundare bilem bonam & laudabilem nostris in regionibus, ubi aer crassior, cerevisiam incolæ bibunt, & aquæ non subtiles ac tenues sunt. Nihilominus non negamus, in juvenili ætate, æstate fervente, ex vini, aromatum & dulcium abusu nimiam bilem descendente ad intestina & cum sanguine rursus mixtam, præsertim sub parciore alimentorum solidorum usu nocere posse. Notum quippe est, optima medicamenta activa, si nimia in quantitate sumantur, quod etiam valet de amaris, novam adferre posse: & ita quoque bilis exsuperans præcalidam intemperiem sanguini inducit, & ad hæmorrhagias, animi adfectus, inflammationes, vomitiones, diarrhœas & tabem disponit. Delinquit autem magis defectu, ad quem ætas senilis, infantilis temperamentum ferolum & pituitosum, nimius refrigerantium & opiatorum usus, crebra venæsectio, vita sedentaria, dispositio ad cachexiam, sæpius iterata purgatio, & virium ex longo morbo defectio contribunt. Hic bilis defectus, probe notante HELMONTIO, ad cachexiam, hydropem, hypochondriacum malum & graves chronicos morbos disponit. Perite hanc in rem scribit FERNELIUS in *patbol.* non pauci inquit, ex vivis erepti sunt, in quibus non alia interitus causa apparuit, quam quod folliculus bile omnino esset exbau-



exhaustus. Et MOEBIUS in *fundamentis physiolog.* de tribus infantibus tabe mortuis refert, quod in horum cadaveribus ne vestigium quidem bilis inventum fuerit, & a nimio purgantium usu id factum esse iudicat M N C. Dec. II. obs. 224. mori illum necessario debuisse confirmant, qui per crebras vomitiones bilem e corpore eiecit.

23. Deficit vero quam maxime bilis in intestinis, quando orificium ductus choledochi calculo vel spasmo constrictum fuit, quam adfectionem gravia & plura pathemata insequi solent. Ordinario fit icterus; nam, cum exitus ad intestina non detur, in hepate vero ejus generatio non cesset, aliter fieri non potest, quin non modo ad vesiculam fellis, quam mirifice distendit, sed & ad ductus biliosos & glandulas hepatis ruat, ubi ob nimium factam distensionem & pororum apertionem per vasa lymphatica transit in sanguinem, totamque feri massam flavo illo foedo colore, in toto corpore apparente imbuat. Ingentem autem esse quantitatem, quæ ex hepate in sanguinem transluit, exinde judicare possumus, quoniam urina crassa, bilis colorem æmulans & linteamina etiam croceo colore tingens mingitur. Iungitur insimul ictero alvus adstricta, fæces fiunt albæ cum torminibus & flatulentis; dolor adest in dextro hypochondrio gravativus, vel etiam valde acutus & ardens, vomitus, nausea, appetitus prostratio & cardialgia, præsertim si calculus in ductibus hæreat, vel bilis extravasetur. In superioribus enim traditum fuit, quod ductus biliarii valde sint sensiles & nervosi; si itaque hi ductus vel a calculo vel a bile stagnante nimium distenduntur vel vellicantur; ventriculus simul, oesophagus & intestinum duodenum in consensum trahuntur. Plura sunt quæ id confirmant, quod ductus biliarius ejusque orificium in duodeno constringatur, & ob id icterus, qui tamen facilius evanescit, generetur. Sepissime in hypochondriacis, in hystericis, colica atroci laborantibus, item ab iracundia graviori flavum colorem per totum corpus di-

spergi deprehendimus, cum dolore in scrobiculo cordis pressorio, versus hypochondrium dextrum, ubi duodenum, pylorus, & hi ductus sunt, utpote, orificio vel a flatibus clauso vel a spasmo constricto, bilis ad sanguinem regurgitat. Optime huic malo antispasmodica, carminativa & humorum acrimoniam demulcentia medentur; unde etiam SYLVII experimento crocus, opiata, lac, emulsio cannabina in tali casu juvant egregie; minus vero calida sudorifera, stimulantia & aperientia conveniunt. Jungitur quoque sæpissime febri ardenti biliosa & caufa, tertianæ quoque, sive sit continua sive intermittens aut duplicata, icterica passio, que non aliam quoque habet originem, quam quod viæ ad duodenum vergentes biliariæ constrictæ vel obstructæ sint. Sæpius in febre ardente seu caufa inflammatio est duodeni ejusque partis pancreatis, quæ ipsi adhæret, nec non pylori, præsertim quando ex gravi suppressa iracundia, superingesto potu frigido, fuerit orta. Hinc nullum est dubium, quin ob inflammata hancce partem & tumore ac dolore & spasmus obsessam ductus compressi bilis adfluxum ad duodenum præpediant. Porro ex praxi notum est, venena adsumpta, viperarum & canis rabidi morsum sæpe icterum subsequi; cujus rei non alia videtur causa, quam inflammatio & spasmus in ventriculo & intestinis tenuibus fortior, qui simul bilis ad intestina vias occludit.

24. Quandoque pertinacior est ductuum biliosorum obstructio; tunc vesica biliaria a bilis largiori influxu mirum in modum distenditur. Dein ob stagnationem & quietem crassiores & mucidæ particulae separantur, colliguntur & concretioni biliosa præbent occasionem. Bilis porro pars tenuior & acrior per poros vesicæ fellæ nimis ampliatos transsudat, & tormina, cardialgiam, vomitus gravissimasque ventriculi & intestinorum constrictiones, ut & convulsionem excitat; cujus rei exempla in *Stalpart van der Wiel Cent. I. obs. XLVII.* legi possunt. Quod enim



bilis ex cystide sua transsudare possit, confirmat inter alia TULPIUS obs. lit. cap. 27. ubi historiam adfert prægnantis, in cujus cadavere aperto præter abscessum mesenterii a partu disruptum, colon tam libere flavæ bili innatare repertum fuit, ut cochlearieam inde eximere licuisset. Simile quid D. MELCH. FRIBERG *Ephem. Nat. Curios. German. Dec. an. 3 obs. 100.* de auriga febre continua ardente defuncto refert, in ejus cadavere exenterato inter cætera se observasse, e cystide fellea adhuc integra & illæsa, ovo columbino majore, tenuiorem bilis portiunculam duorum vel trium transversorum digitorum spatio circum circa superas, inferas & adjacentes partes undiquaque croceo colore tingentem, irrigantem ac ita corrodentem exsudasse, ut partes ea illinitas & tinctas putredinem non solum acquisivisse manifesto constiterit, sed & præter hepatis substantiam magnam hypochondrii partem inficiendo rodendoque putridam, illæsa plane biliaria vesicula, reddiderit.

25. Bilis porro in motu suo, repleta cystide, mucro vel calculo, vel etiam in collo vesicæ hærente, quam maxime turbatur; tunc enim bilem hepaticam non recipit, sed hæc ipsa majori quantitate, quam opus est, influit in duodenum; quæ non necessaria est, si ventriculus ab alimentis vacuus est: quod si vero ille is repletus est, tunc hæc bilis minime sufficit, sed propulsione liberaliori spissioris magisque saturatæ ex cystide bilis opus est, ut eo felicius chylicationis & spirituscentiæ absolvi possit negotium. Et talis tempore pastus bilis defectus, multas cruditates acido-viscidas, quæ ad tormina, alvi adstrictionem, cachexiam & hydropem disponunt, progenerat. Jenæ olim ensifabrum sectum fuisse memini, qui dum viveret per integrum vicennium gravissimis torminibus sensu ardoris circa scrobiculum cordis & cardialgia fuit vexatus. Vesicula biliaria miram habebat stricturam, cujus amplitudo & longitudo erat maxima, & 3646 grana bilis

coagulatæ partim pisi, partim globuli forma ibi reperiebantur. Frequentes etiam ejusmodi in statu sunt dolores & dextri hypochondrii, vomitus, icterus, & passionibus colico-hysterico-spasmodicæ, de qua revideatur Cl. Dr. STEINII *lithographia p. 45.* Et quod hydrops sæpenumero talem a calculo vesicæ repletionem consequatur CNOEFELI. *USM. N. C. Dec. I an. 3. obs. 260.* confirmat. It. D. GEORGIUS FRANCUS *Dec. II an. 6. obs. 194.* ex alterius medici observatione calum militis cujusdam, pectoris hydrope demortui, comprobatur, in cujus post mortem dissecti cystide fellea calculus, unciam dimidiam & drachmam semis pendens fuerit repertus. Ager hic durante morbo de dolore gravissimo in hepatis regione valde fuerat conquestus, ut neque erectus stare nec ambulare, sed usque ad vitæ terminum curvus in lecto sedere fuerit coactus.

26. Accidit vero bilem ingenti in quantitate & extra ordinem ex ductibus hepatis in intestinum præternaturaliter eici, ubi, si præsertim qualitate simul peccet, multa incommoda creat, variaque symptomata producit. Evenit id potissimum a gravi iræ excandescencia; tunc magno impetu, convulsis fibris musculosis tam vesicæ quam ductuum, non modo oris amaritiem, nauseam, appetitum prostratum, cardialgiam, sed etiam vomitum parit, vel ventristormina & biliosam diarrhœam excitat; ubi notandum, quod si mox excernatur, periculi res expers est, si vero magis iracundia fuerit suppressa vel cohibita: accidit sæpe, ut commota bilis in cavitate intestinorum hærens non excernatur, sed ad sanguinem perveniat, & febres, acrimas convulsiones, spasmos, & dolores procreare soleat. Maxime omnium vero corpori inducitur noxa, quandoque sudorifera calida, vel spirituosissima volatilia superingeruntur; quo fit ut bilis impura copiose ad massam sanguinis delata, inque partes nerveas & membranas propulsa incommoda periculosa creet. Qua de re elegantissimum in HIPPOCRATE in lib. de veteri medicina §. 34



locum habemus: Ubi, inquit, cum amaritudo quadam diffusa fuerit, quam bilem flavam appellare solemus quales statim anxietates & astus & impotentia occupant: verum ubi liberati fuerimus ab illa & purgati aut sponte, aut per medicamentum, si modo tempestive quid ipsorum fiat, manifesto & a doloribus & a calore liberamur. Quando autem tempore fuerit elevata & cruda, meraca ac intemperata nulla arte neque dolores neque febres sedare possis. Et quos quidem acuta acrisque ac aruginosa bilis adfligit, quales mox rabies & morsus viscerum ac pectoris & desperatio. Bene hic monet Hippocrates, quod bilis intemperata hæc faciat: nam si plus iusto temperata ira in intestinum immittitur, hæc non adeo nocet, sed potius remedio est frigidis; passim id Hippocrate in scriptis notante.

27. Considerabimus iam porro, quoniam morbi ex bile perversa & ad sanguinem traducta fiant. Inter hos autem præcipue febres, & quidem sic dictæ biliosæ, tertianæ duplices continentes recenseri mereantur. Et quamvis ipsæ febres bilem generent; nullum tamen est dubium, quin etiam a bile vitiosa orientur. Consentientem hac in re habemus HIPPOCRATEM, qui lib. de natura humana §. 27. scribit: febres plurimæ a bile fiunt, præsertim continens quotidiana, tertiana & quartana. Primo enim non dubitari potest, & assensum quoque apud antiquitatem invenimus, febrium plurimarum, præsertim intermittentium, ardentium & sic dictarum cholericarum propriam sedem & originem in prima esse corporis regione, circa præcordia, intestina tenuia, iecoris cava, lienem, pancreas, omentum, utpote in hisce locis ordinario sanguinis tardior est circulus, generatio fit impuratum, & corrupti acres humores ex pancreate in intestina influunt, & non modo pathemata ordinario in hypochondriacis spasmodico febrilia, sed & supra dictas febres excitant. Siquidem symptomata, quæ has febres comitari solent, plerumque dicta in regione incipiunt, quod maxime ventriculi & abdominis

inflatio, dolor dorsi, anxietas, nausea, vomitio, & alvi adstrictio testantur; & quoniam sensibili quadam parte in corpore spasmus adfecta, omnes reliquæ in universo corpore facile in consensum trahuntur; hinc horror, rigor in corporis superficie, frigus, dolor externarum partium convulsivus & pandiculatio ex primarum viarum irritatione originem suam agnoscunt. Quinimo ipsæ diarrhææ, deiectiones per vomitum biliosæ, urina flammea, sitis inextinguibilis, ardor intensissimus, tussis ferina stomachalis, faucium erosio, nec non levamen ex refrigerantibus, præcipitantibus, bilis acrimoniam demulcentibus nitratis, lenioribus evacuantibus; & e contrario noxa, quam volatilia, calida, oleosa, acria inferunt, præsentiam vitiosæ bilis in primis viis & massa sanguinea adsertum nostrum sufficienter declarant & confirmant. Insuper & illud observamus, quod corpora biliosa iuniora & ad iram proclivia ex facili in febres exardescant; aliquoties quoque annotavimus, illos qui antea biliosis adæuetis diarrhæis criticis fuerunt obnoxii, si sequenti anno non eveniunt, harum loco febribus tertianis cum morbo, dolore & ventriculi rossione corripi, quæ vomitu atque alvi deiectione materiæ biliosæ flavescens & copiosæ subortis cessare solent.

28. Præter alia elegantissimus locus sententiam nostram confirmans exstat in HIPPOCRATE, qui lib. de adfectionibus §. 11. scribit: ubi febris adest, sitis fortis, lingua aspera & nigra, color biliosus est, & sputa biliosa, & ager extrinsecus frigidus fit, intrinsecus valde calidus, ibi conducunt frigescentia & morbus fit a bile, cum mota intra corpus firmata fuerit. Plerumque itales febres septimo die cessant. Nec minus harum febrium solutiones sententiam nostram confirmant; plerumque enim per criticum icterum, quo corripiuntur, maxime septimo die tertiana continua laborantes, sine ullo gravitatis, tensionis aut doloris in hypochondrio dextro sensu, cessare solent. Perite HIPPOCRATES



ait lib. de morbis §. 6. febrienti ac bilioso in tempore foras dispersa bilis bonum.

29. Veteres & maxime HIPPOCRATES item FERNELIUS pro auctarum febrium causa bilis putredinem accusant, quare hic in Patbolog. de febribus p. 6. sic scribit: *bilis putrescens in febre acrem malignamque qualitatem adipiscitur; eaque accessionis initio quasi turgens impetu fertur, affatimque in præcordiorum membranas irruit, iis sane argumentis, quæ de tussi sicca, de oscitatione, de suffocatione, de anxietate, de præcordiorum distensione, de dolore, de nausea, de vomitu & de albis tenuibusque urinis protuli.* Et certe bilis est humor, qui dum stagnat & subsistit, facile putrescit. Jam vero nihil magis ipsi naturæ nostræ microscomicæ adversum est, nihilque magis ejus vigorem imminuit, ejusque motus turbat ac pervertit, quam quod corruptum & putridum est: unde malignarum febrium originem in cachecticis, phlegmaticis, a bile copiosa, in primis viis corrupta, non sine ratione deducimus. Quinimo si putredo a bile in primis viis consistit, hæc miasma pestis, febrium malignarum, petechialium, variolarum, morbillorum dysenteriarum aliorumque contagiosorum morborum facile recipit, multiplicat & activum hoc reddit. Unde ea, quæ vomitu, purgatione colluviem ex primis viis evacuant, uti sunt acidula, linum, nitrum, spiritus vitrioli & nitri dulcis, elixir proprietatis cum acido egregie contagio morbisque malignis resistunt. Ulterius paroxysmorum in febribus intermittentibus novam originem bilis impura, de nova generata, facile suppeditat; hæc, si in sufficiente quantitate adest, novum procreat paroxysmum: unde patet ratio, quare in intermittentibus data evacuantia, præsertim quæ sine spasmis agunt, & tonum intestinorum non lædunt, uti sunt pilulæ amaræ, salia neutra in copia data, mercurius dulcis, item quæ bilem minus acrem corrigunt, ut nitrosa, & corruptionem ejus arcent, uti amara terrea, china chinæ, & tonum partium nervosarum, ne nimium ad spasmodicas contractiones

pronæ fiant, roborant, optime harum febrium causam ac radicem præscindant.

30. Tandem & hoc singularis considerationis phænomenon ponderandum venit; facile nimirum concipi potest, sub omni febrili æstu non modo bilem copiosam generari, sed maxime vitiosam ob humorum dyscrasiam sanguinisque circulum non recte sese habentem. Hæc bilis necessario in intestina fluit, & si non evacuatur, ibi subsistit & in venas lacteas ipsumque sanguinem transit; necessario ad majora incommoda occasionem præbet. Qua de causa in omnibus febribus alvus aperta admodum est salutaris, sive arte fiat sive natura; unde, si alvi iungitur hisce febribus adstrictio, videmus inde nasci purpuram, aphthas, inflammationes oris & faucium, varii generis exanthemata, quorum nulla alia est causa, quam quod humores, præsertim biliosi corrupti, sub præternaturali & febrili sanguinis commotione nati in sanguinem accedentes foras in partium extrema coniciantur. Notandum hoc loco est, quod purpura, quæ morbus maxime æstatis est, & corpora impura, qualia ut plurimum gravidarum sunt, & scorbutica infestat, & sæpe die septimo nono succedere solet, multis in acutis febribus ex humoribus biliosis primis in viis oberantibus potissimum nascatur. Unde omnia quæ acrimoniam temperant & leviter evacuant, a purpura præservant, & eam quoque tollunt, præsertim si diaphoretica leniora cum acidis nonnunquam debito modo ac methodo interponantur. Nam in puerperis ut plurimum ex neglecta lochiorum & primæ regionis evacuatione oritur purpura, quæ, si non rite tractatur, necat.

31. Ad alios etiam morbos devenimus, quorum origo commode a bilis vitio deducitur, & ex his est erysipelas, præsertim si alvus cohibita & transpirationis fuerit impedita; nihil enim magis bilem vitiat, eamque impuram & salibus causticis refertam reddit, quam solennis per superficiem corporis prohibita evacuatio. Quandoque igitur talis bilis caustica in primis viis existit, horro.



horrorem, anxietates & vomitus parit; postea in sanguinem recepta motu febrili, ut plurimum die terio, foras eicitur. Eodem modo dolores arthritici, podagrici, qui secundum veteres ex causa calida oriuntur, sustentantur potissimum primarum viarum vitio ex bile vitiosa affluente, quæ ad sanguinem delata dolorum illorum omnium causa est; dum sal illud causticum ad articulorum membranas præcipitatur. Et hæc est ratio, quare podagricorum insultus doloribus ventriculi, anxietatibus, nausea, appetitu prostrato ut plurimum oriuntur, unde tunc temporis, qui sine tumultu primas vias evacuare scit, simulque acrimoniam humorum temperare, is certe egregie vias hisce doloribus præscindit, eosque mitigat.

32. Illud quam maxime etiam attentione dignum est, hæmorrhagias, quæ sive consueto vel statuto tempore contingant, sive criticæ & symptomaticæ in morbis fiant, suum potissimum in primis viis habere principium. Ibi enim flatulentia percipiuntur, angustia, constrictiones, dolor gravativus pressorius in hypochondriis, in dorso, alvus est adstricta, partes extremæ frigent, & postea sanguinis impetus ad partem quandam sive ad caput sive ad pulmones sive anum sive uterum fertur. Optima autem præsidia, quæ nimium fluxum sedant & præservant, ea sunt, quæ alvum blande aperiunt, si simul tonum intestinorum respiciunt, & bilem temperatam balsamicam reddunt, uti sunt rhabarbarina, pilulæ Becherianæ, Marocostinæ, elixir nostrum amarum balsamicum correctum, salia volatilia oleosa repetita, sed pariori dosi data. Ad acredinem vero & volatilitatem bilis causticæ temperandam nitrosa & pulveres præcipitantes omne ferunt punctum.

33. Jam quæstio exsurgit, an non ex hisce circumstantiis commode quis argumentari possit? bilem vitiosam in primis viis accumulata, in dispositis corporibus occasionem & stimulum, illis spasms primarum viarum præcedenti.

bus, præbere hæmorrhagias. Et hoc loco illud notandum est, quod statæ ac consuetæ sanguinis excretiones, sicut & arthritici morbi, catarrhales oriuntur autumnali maxime tempore vel etiam vernali mense Martio, Octobri; cujus rei non alia causa inveniri potest, quam quod fibrarum tonus æquabilis ab aeris inæqualitate tunc pereat & sic æquilibrium fluidorum & solidorum, in quo sanitas versatur, pereat: item quod a transpiratione prohibita salia illa excrementitia activa, quæ per poros eiciuntur, maxime ad bilem transeant, ubi uniti ad intestina descendunt, multaque pariunt incommoda.

34. Ante omnia vero ex bilis vitio, acredine ac corrosivitate, ob admixtas plures stimulantibus heterogeneas & corrosivas partes, in ipsis intestinis graves defluxiones suscitantur. Nam diarrhœa, cholera, vomitiones enormes, ventris tormina & dysenteria inde nascuntur. Accusant hic veteres ut & recentiores bilem æruginosam, porraceam, prassinæ coloris, qui bilis color præternaturalis aperte monstrat crasin ac mixtionem bilis ab acido corrosivo ipsi admixto esse destructam: bilem enim ab acido viridem acquirere colorem certum est, & fæces virides in infantibus, quæ ubi adsunt, acidi ex lacte corrupti sufficientiam testantur; nam ab acido color perit & morbus inducitur, HIPPOCRATES lib. de natura hominis p. 282. jam dudum bilem viridem atro notavit calculo ita scribens: *viridis bilis iuxta hepatis manens, ubi super ebullit, humani corporis corruptio est & novus ac inutilis ejus inquilinus*. Testantur quoque observationes practico-anatomicæ viridem bilem memoratorum morborum causam esse; ita DIEMERBROECIUS in anat. p. 44. testatur: se in forti diarrhœa biliosa viridi mortuo folliculum felle viridissima bile repletum, ad ovi gallinæ magnitudinem intumuisse, deprehendisse. Idem Auctor. p. 115. scribit: in sectionibus cadaverum in nosocomio nostro mortuorum sæpe



bilem viridissimam, æruginosam & subnigricantem in ipso fellis folliculo demonstravimus: imo in filiola Dn. Ulych alvi fluxu æruginoso mortua, & post mortem coram plurimis medicis a me aperta folliculum felleum ad ovi gallinacei turgidum & æruginosa bile infarctum invenimus: quod ipsum etiam in aliis quibusdam infantibus simili diarrhœa extinctis observavimus, uti & in aliquibus, quibus cholera morbus vitæ finem imposuerat: a PECHLINO *exercitatione de purgantibus* p. 494. bilis hepatica sæpe viridis nigra & plumbea reperta est. Testamur quoque in nobili studio melancholico variolis mortuo, bilem in folliculo fellis spissam & nigram instar picis observasse, id quod etiam olim in maniaco dissecto vidi. Apud BONTIUM *de medicina Indorum* pag. 194. legitur, quod in puero asthmatico, dysenteria mortuo vesicula fellis humore atro infecta fuerit inventa: quæ nigredo non aliam agnoscit causam, quam copiosum acidum admixtum, quod mora ex stagnatione bilem reddit nigram. Patet jam ratio, quare dictis in morbis, inque eorum principio leniora emetica rhabarbarina item pulveres præcipientes nitrosi, lac, serum lactis, oleum amygdalarum dulcium, clysteres anodynici & emollientes ut & cremor hordei omnem impleant paginam: nam bilis acerrima & caustica reddita, instar veneni symptomata movet. Notabilis est *observatio* 36, quam insinuat BORRICHIVS in *Alt. Med. Hassn. Tom. III.* ubi juvenis symptomatibus vexatus fuit quasi a veneno adsumto; ventriculi nempe erosio ac acerrima bile sequuta est. Idem *Author* scribit: ipsa bilis, uti & alii humores; ita non raro corpus adficiunt, ventriculumque infestant, ut crederes venenum esse adsumtum, certe malignam qualitatem acquisiverunt, qua cruciatus incredibiles membranarum cæterisque partibus sensibilius imprimunt, & eas erodunt, miserumque in modum vellicant. Quod bilis tam corrosiva evadat, ut instar aquæ fortis ejecta in terram ebulliat vid. BORELLI *Observatio I. Cent. II.*

35. Ex hisce dictis & adductis clarissime apparere arbitror, bilem nostri corporis utilissimum esse humorem, & venenum quoque, si vitio laborat; adeo per bilem sanos esse homines & ægrotare: hinc in pathologia nec non in medendi methodo & indicationibus ante omnia ad hunc humorem ejusque statum respiciendum esse, utrum nimirum vel quantitate vel qualitate vel motu delinquat. Nam certe plurima remedia, quod præstant in morbis sanandis, id exserunt, ut bilem vel deficientem augeant, vel superfluum educant, vel vitiosam emendent & corrigant, motumque ejus ad intestina in statu legitimo conservent. Et enim pauca remedia agunt in sanguinem & humores, pleraque vim suam exserunt in primas vias, ibique vitiosos humores, inter quos principatum tenet bilis, quique mineram & causam occasionalem & materiale motuum morbosorum constituunt, proxima via emendant, quemadmodum id potissimum valet de emeticis, de laxantibus, absorbentibus, acidis, nitrosis, temperantibus, emollientibus, amaris, salibus fixis, martialibus roborantibus & id genus aliis.

## DISSERTATIO VIII.

### DE SALUBRITATE FEBRIUM.

#### §. I.

**P**ERMolestos & sæpe exitiales diversi generis morbos, quibus subinde affligi solent corpora, in pœnam generis humani a justissimo Deo esse datos, nemo facile inficiabitur; nihilominus infinitus Dei amor, sicuti nihil per se mali efficit vel tribuit mortalibus, sed semper sub specie acerbi & mali præsidium bonum ac remedium recondidit, quod luculentissime apparet in afflictionibus spiritualibus, quæ christianis ut plurimum medicinæ & salutis sunt; ita etiam mirabilem suam benignitatem in eo ostendit, quod morbosas corporis afflictiones, quibus



quibus nunquam non homines in hac vita impetuntur, sapientissime sapientissimo numero dirigat & convertat in corporis sanitatem & vindicationem ejus ab interitu. Tam mirabilis enim benigna & divini conditoris in rebus corporeis administrandis est œconomia, ut sub eo, quod nobis sensu & primo intuitu videtur noxium & perniciosum, nostra salus lateat, adeo, ut causam habeamus, propitium Numen non modo in prosperis, sed & in iis, quæ adversa statuit mens humana, celebrandi ac colaudandi. Illustri exemplorum numero ex arte medica depromptorum assertum hoc stabilire & confirmare possemus, si scopus institutæ scriptiois id permetteret; hoc saltem dicimus, quod febri-les sanguinis commotiones, quæ plurimis & chronicis & acuti, affectibus associantur, ejus sint naturæ ac indolis, ut profligandis & extinguendis morbificis causis inserviant, adeoque plus utiles & salutare, quam detrimento corpori sint humano. Et hoc est quod de præsentis sub divina gratia & assistentia instituimus pertractare.

2. Ante quam ulterius in confirmationem hujus nostræ assertionis descendamus, e re fore judico, ut ostendamus, autoritatibus perantiquis sententiam nostram non destitui. Ipse Hippocrates, gravissimus & sapientissimus scriptor toties in scriptis suis inculcat, febrem certis morbis, de quibus inferius fuisse agemus, supervenientem eos sanare. Ipse etiam Celsus disertis verbis Lib. II. C. VIII. scribit; ipsa febris, quod maxime mirum videri potest, sæpe præsidio est. Nam & præcordiorum dolores, si sunt sine inflammatione, sistit, in dolore succurrit, & distentionem nervorum rigoremque si post ea cœpit ex toto tollit, & ex difficultate urinæ morbum tenuioris intestini ortum, si urinam per calorem movet, levat. Deinceps febris a cordata antiquitate non inepte lucta motus & certamen naturæ adversus causam morbificam & vim morbi dicta fuit, quo indicare volebant, esse rem non noxiam, sed potius salutarem; nam

illud quod pugnat adversus hostem vitæ, qui causa morbifica est, non potest in se & sua natura esse perniciosum. Quibus ex rationibus permotus ipse Cl. Lindenius in *selectis Medicis* p. 148. non satis potest mirari, cum tot exempla huius apud Hippocratem extant, esse etiam hodie, qui Campanella id commentum autumant, & novitatis nomine damnant, ceu profectum ab homine non medico. Ipse enim I. VII. de sensu rerum c. II. nullum febrem esse morbum, sed remedium erga morbos contendit. Ejus sententiam quoque secutus est & brevibus composuit Joh. de Mey in commentario Philos. Cap. V. loco. V. Ex recentioribus autem Cl. Angelus Sydenhamius id agit potissimum in suis scriptis, ut febrem pro naturæ conamine & instrumento habeat, quo partes puræ ab impuris secernuntur, quo causa morbifica exterminatur & expellitur, Vid. *Præfationem & Sectionem I. Cap. IV.*

3. Ex quo intelligitur, optima ratione jam olim M. Hippocratem Lib. II. *Epid.* scripsisse, prudentis medici esse aliquando febres accendere. Denique quid magis confirmat nostram sententiam, quam firma illa & constans veterum in eo consensus, naturam esse optimum medicum, optime sanare & solvere morbos, eamque, ut Galenus exprimit, adversus morbificam causam impetu valido insurgere, & decretoria excretionemque vehementer moliri, & concoctione, tandemque vacuatione a lethalibus morbis ægrum liberare. Ille enim impetus, ille motus, illa lucta, qua ceu instrumento natura morborum causis medetur, quid aliud est quam febris? unde recte concluditur, hanc ipsam esse instrumentum, cujus beneficio natura corpus ab interitu, quem causa morbi molitur, vindicat, eamque expellendo & subigendo corpus sanitati restituit.

4. Equidem febris ab omnibus medicis tam priscis quam recentioribus semper habita fuit pro morbo, & ipse Hippocr. I. de flatibus Sect. III. p. 80. febrem communem morbum, qui aliorum mor-



morbis & præcipue inflammationis comes sit, appellat; neque dissentit ratio; Febris enim est motus sanguinis & humorum præter naturæ ordinem institutus, qui actiones corporis & mentis lædit & labefactat, imo qui mortem affert & exitio est. Nam pauci moriuntur nisi cum febre, attamen non impedit, quo minus idem diverso respectu possit esse morbus & simul etiam remedium tam suæ ipsius causæ quam aliorum morborum. Et hoc est, in quo admirari & celebrare debemus, ut in præfatione diximus, divini Numinis providentiam & benignitatem, qui machinam nostram tam affabre & tam concinno ordine construxit, ut viribus ac mediis suis se ipsum defendere non modo queat contra injurias ipsi interitum minitantes, sed & ut ipsi motus, seu effectus causæ morbificæ, ejus naturæ & genii sint, ut ipsi causæ tollendæ, cæteris paribus, sufficiant & adversus eam directi sint, adeoque effectus sui ipsius causam destruere possit & jugulare. Quo autem hæc saluberrima in arte medica materia recte intelligatur & in usum ægrotantium ex merito tractetur, opus est, ut paulo penitus breviter tamen strictimque naturam & essentiam febris, qua ratione a natura producat, investigemus, & deinde definiamus, quænam febres & in quibus morbis ac quo tempore & sub quibus circumstantiis salutarem & utilem effectum in medendo præstare queant.

5. Quam vulgaris morbus est febris, & qui ferme omnibus sese associat corporis humani effectibus, tantis difficultatibus & obscuritatibus involutam ejus cognitionem hætenus fuisse, nemo qui rerum medicarum gnarus & peritus est, poterit inficiari. Quot enim celebres scriptores existunt, tot ferme prostant de febre opiniones atque hypotheses. Nolumus longiores esse hisce in rebus recensendis, cum in plurimis tum in præcipuis opinionibus tradendis, operam locaverim in *annotationibus poterii, de febribus*. Hoc saltem loco illud attingemus, ex motu spirituum sanguinisque

circulo, sicuti vitæ & sanitatis ratio pendet, ita omnium affectuum internorum, imprimis febrium ortum ac causas ex eodem fonte recte peti & explicari debere, unde dicimus febrem esse motum musculorum præcipue autem cordis concitatiores cum inæquali sanguinis circulo, caloris & pulsus naturalis, nec non excretionum immutatione iunctum, certis temporibus remittentem vel intermittentem.

6. Est nempe nobis febris motus auctior & validior in systemate musculoso. Motus consensione medicorum perspicacissimorum in corpore nostro fit substantia tenuissima, fluidissima, quam alii spirituum nomine indigitare solent, alii principium vitale appellant, & originaliter existit in semine, reconditur in sanguine & ab externo fluido ambiente & spirituosus alimentis postea sustentatur. A veteribus natura dicitur, item anima purpurea, calidum innatum, omnisque motus tam intestini, quam circularis causa est, omniaque membra movet, & genuinum existit animæ in-sentiendo & ratiocinando instrumentum. Hoc vehementius, hoc celerius in nervis & fibris musculosis, quæ palestræ motuum sunt, movetur, sicuti liquidissime id fieri videmus sub spasmis cutis, aliarumque partium internarum, sub pulsu cordis aucto frequentiori maiori que calore. Rectissime enim cum *Helmontio* statuimus in *libro de febribus Cap. I.* quod calor ille febrilis non sit materiæ peccanti proprius sive ejus effectus, sed sit effectus spiritus seu principii impetum facientis in nobis, qui uti omnis caloris naturalis in statu sano, ita & febrilis immediata & primaria causa efficiens est: ubi tamen probe notandum, in eo nos ab ipso dissentire, quod causam febris materiales tantum dicat occasionalem, materialis physici influxus & concursus ad febrem expertem, sed tantum occasionem præbere atheno intelligentia prædito, qui non aliter ac obiecto iracundiæ extrinsecus suggesto, propria vi & thymosi sese accendat, & peregrinum hostem



hostem adoriatur atque expellere nitatur, sed potius non denegamus vim & potentiam agendi & movendis causæ morbificæ, quæ in principium vitale seu spiritus inordinate agendo, ex mechanica quadam necessitate suscitatur illum impetuosum, qui in corde, arteriis & musculis visitur, motum. Est enim motus ille morbosus effectus ex utriusque principii agentis & reagentis, tam principii morboosi activi, quam naturæ, seu principii moventis vitalis in corpore nostro. Quo sensu utique admitti potest, febrem & auctorem febrium esse ipsam naturam, seu archeum.

7. Ratio autem nostri instituti postulat, paulo penitus determinare, quo pacto materia febrilis in spiritus nervorum & membranarum agat, & qualis effectus sive reactio hanc operationem insequatur, ipsaque symptomata & pathemata febribus communia progignantur. Asserimus autem, omnem motum in corpore nostro, qui fit in fibris musculosis, activum esse systalticum seu contractorium, unde præternaturalis, vel in huius motus relaxatione vel intensione consistere debet: intensio solenni nomine spasmi venire solet, qui solito validior & diuturnior fibrarum musculosarum contractio est. Ejusmodi spasmus omnium fere affectionum præternaturalium & morbosarum commotionum prima & fundamentalis causa est, quæ plurimos & diversos post se trahit effectus, utpote vix morbus conspicitur, ubi non spasmi subsint & suam ludant tragediam. Eminentius id quoque contingit in febribus & caloris excessivi generatione, ubi spasmi circuli sanguinis inæqualis, inordinati & aucti pulsus aliorumque accidentium causa sunt. Quemadmodum enim, si tonus musculorum & pulsus cordis moderatus est, inque debita proportionem & temperamento consistit, tranquille & placide humores vitales circumvolvuntur, secernenda & superflua eiiciuntur & quæ servari debent, in vitæ ac sanitatis commodum retinentur: ita mox ad vitiatum tonum musculorum seu spasmus motumque cordis inordinatum to-

tus complexus & ordo motuum vitalium totaque œconomia secretionum & excretionum turbatur atque pervertitur.

8. Evidentia autem signa & effectus spasmodicæ fibrarum musculosarum & membranarum contractionis, quæ in intermittentium initio aperte, languidius & remissius in continuarum remissione visuntur, varia sunt, tam pro diversitate individuorum, quam ipsarum febrium. Potiorem tamen catalogum percensere, e re fore ducimus. Visitur quam maxime inter initia paroxysmi cutis, quæ exquisito sensu pollet & omnium consensione tactus organon est, summe contracta ubi pori laxiores contrahuntur, inque tubercula cutis, ut anserina solet, attollitur, vasa, quæ valde tumida & repleto sanguine erant, disparent, detumescunt, rubedo in livorem convertitur & turgescencia totius habitus corporis subsidet ac deprimitur, horripilatio, rigor, refrigeratio, præsertim in partibus extremis moleste afficiunt. Præterea cutis, quæ antea erat madida, evadit sicca & arida: sudor, qui ante aderat, mox supprimitur. Verum enim vero non subsistit hæc fibrarum & vasorum compressio & constrictio tantum in ambitu & cortice corporis, sed in interiora quoque porrigitur, qua de re testari potest copiosa sub hoc tempore, præsertim in lentis & continuis, urinæ limpidæ aquosæ emissio, alvi contumax adstrictio, flatuum retentio, nulla clysterum admissio, præcordiorum anxietas, nausea, dispositio ad vomitum, dolor ingens in medulla spinali & lumborum regione: quæ cuncta abunde designant, ventriculum & intestina, nec non ipsos renes & vasa hepatica, spasmus & constrictionem præternaturalem pati. Neque substantiam cordis, arteriarum & musculorum a tali spasmo, qui in spiritibus radicatus totum corpus consensione afficit, immunem esse docet pulsus iste parvus, frequens, durus, debilis, qui ab insufficiente & minus libero spirituum influxu oritur. Differunt hæc omnia, uti diximus gradu, differunt etiam tempore accessionis, in intermittentibus in principio



cipio videntur hæc symptomata, incontinuis in statu & etiam reliquo tempore sæpius intercurrent, nec tempus nec tenorem neque proportionem servant. Et certe nulla erit febris, ubi non talia pathemata attentus, diligens & peritus medicus intermixta esse annotabit. Perquam diligens autem harum rerum scrutator & observator fuit *Helmontius*, qui in *Lib. de febr. Cap. IX.* memoratu digna prodit sequentia. In quo sane pars, cui insidet materia febrilis primum se contrahit in rugas, quod sentitur facile in præcordiis. Parti vero oblesæ totum genus venosum collaborat, strictim se arctat, contractis fibris obliquis. Inde namque rarus, durus atque minutus pulsus, frigoris index atque opifex. Hanc enim corrugantem stricturam venarum quique febriens si in se animadvertat, facile dignoscet & penitus naturalem etiam bene valenti. Nam etsi scrotum laxum propendeat, statim tamen atque scoria humana ad sphincterem delabitur, corrugatur scrotum sua sponte. Naturale est itaque venis & partibus primario affectis sese in rugas contraxisse. Cum igitur venis passim associantur plerumque arteriæ, necesse est pariter has obliqua cum venis convulsione contrahi.

9. Sunt autem spasmi præcipua tam rigoris quam caloris febrilis causa. Hisce enim sanguinis & humorum circulus inæqualiter per corporis partes movetur & dispensatur, adeo, ut quædam partes sanguine turgeant, quædam exsanguæ sint, per quasdam celerius, per alias impeditius moveatur, unde quædam horrore & frigore tentantur, quædam fervent & incalescunt. Et hic sanguinis motus inæqualis a spasmo essentiam februm quam maxime absolvit. Nullus autem tam ex veteribus quam recentioribus rectius & tersius rem tetigit, quam ipse noster *Hippocrates* in *Libro de flatibus*. Locus autem, quo hæc tractantur, notabilis hic est: obstructo, inquit, in inferiori ventre in universum flatus percurrunt (per flatus hic spirituum irregulares motus, qui spasmos efficiunt, intelligit, ut ex antecedenti.

bus patet) & ad sanguine refertas corporis partes elapsi eas refrigerant, videlicet constrictione impediendo sanguinis affluxum. At refrigeratis his locis, in quibus fontes & radices sanguinis radicanter, uti sunt cor & hepar, per universum corpus horror penetrat. Universo autem sanguine perfrigerato, totum quoque corpus horror occupat. Hanc igitur ob causam primum horrores ante febrem oriuntur, & quo majori copia flatus irruerint, talis quoque rigor consequitur. A pluribus quidem & frigidioribus vehementior, a paucioribus vero minusque frigidis minus quoque vehemens. Cum horroribus autem corporis quoque tremores ad hunc modum contingunt. Sanguis enim præsentem horrorem metuens per totum corpus perreptat, & ad maxime calidas partes concurrit. Atque hi sunt ejus saltus. Desiliens autem ab extremis corporis partibus sanguine, & viscera & carnes contremiscunt. Aliæ enim corporis partes copioso sanguine refertæ, aliæ, exsanguæ sunt. Atque exsanguæ quidem ob frigus minime conquiescunt, sed concutiuntur, quod eas calor destituerit. Quæ vero sanguine replentur, ob sanguinis copiam contremiscunt & inflammationes excitant. Neque enim fieri potest, ut sanguinis copia conquiescat. Confirmat hanc sententiam *Libro 2. de morbis Sect. V. p. 15.* Sanguine in se coeunte & condensato dum venæ contrahuntur, corpus contrahunt & tremorem excitant, quod si modo minus in se coeat sanguis, hoc modo rigor appellatur, horror autem dicitur quod est debilissimum. At vero quod post rigorem necessario major aut minor febris prehendat, sic se res habet. Cum sanguis per quandam vim (id est per motum cordis & arteriarum auctiorem) incaluerit, rursusque in suam naturam abierit; nempe ex statu frigoris in calorem, quod pituitæ & bilis sanguini permixtum est, (motu vehementiori) simul incalescit, sanguisque se ipso multo calidior evadit. His igitur percalescentis post rigorem ad sanguinis cali-



caliditatem febrem supervenire necesse est. Hoc loco gravissimus auctor totum processum febris ejusque generationem ex principiis mechanicis & motuum legibus accurate describit, an vero a recentioribus melior harum rerum explicatio proficisci queat, merito dubitamus.

10. Neque *Erasistrati*, vetustissimi medici opinio de febrium generatione parum ab *Hippocratis* jam memorata sententia abluat. Ipse enim, notante *Celso* pag. 5. hanc fovet sententiam: videlicet si sanguis in eas venas, quæ spiritui accommodatæ sunt (id est arterias) transfunditur & inflammationem, quam græci *φλεγμονή* nominant, excitat, eaque inflammatio talem motum efficit, qualis in febre est. Et pag. 17. mentio fit rursus *Erasistrati*, qui transfuso in arterias sanguine febrem fieri dixit, idque nimis repleto corpore. Quibus diserte inæqualitas sanguineæ circulationis in omni febrili commotione indicatur. Nam rigor, qui ordinario fervorem febrilem antecedit, spasmus species est, quo venarum tubuli capillares contracti liberum sanguinis ex arteriis transitum & regressum ad cor, ceu fontem quadantenus impediunt, unde regurgitante eo ipso ad arterias & cordis sinistram sinum, ubi copia sua premens liberiores spirituum influxum invitat, pulsationes crescunt: quare eleganter noster *Hippocrates* hæc exprimit, dum libro de fluxibus l. c. scribit: sanguis vi pulsus dum calidus existit, per angustam viam (nempe arterias) transire celeriter nequit, quod multa remorentur, quæ impediunt & obstruunt, eamque ob causam pulsationes contingunt, & ad hunc modum febres fiunt, ac dolores.

11. Ex quibus adductis luculenter apparere arbitror, frigus quo in febribus, præsertim in partibus extremis percipitur, a deficiente sanguinis sufficientis influxu & ejus motu intestino languidiori dependere, corporis autem quæ sequitur incalescentiam auctiorem habere intestinum motum.

12. Cum autem febris essentia maxime radicetur in inæquali sanguinis mo-

tu & ex eo dependente frigore, horrore, calore, aliisque symptomatibus, operæ erit pretium, ut tradita jam refrigerationis genesi, caloris ortum ac causas scrutemur. Nolumus autem jam hic esse longiores in recensendis & refellendis aliorum circa hanc rem sententiis, sed placidum lectorem unice ad dissertationem de caloris naturalis & præternaturalis causis duobus abhinc annis habitam remittimus. Hoc loco saltem sententiam nostram, quam hætenus sustinimus & defendere semper parati sumus, ne alios ulterius offendat, explicationem reddere in animum induximus.

13. Est nempe solennis & non indigna accuratiori scrutinio medico quæstio, an a circulo sanguinis aucto ista vehementia caloris oriatur. Primus mihi hanc sententiam sustinuisse visus est *BORELLUS* in Tract. de motu animal. pag. 337. Scite inquit: propriissima affectio & character febris est pulsus & ad commotionem vehementem cordis & arteriarum consequitur incalescentia. Et hoc verum esse constat ex universali fere omnium consensu, atque evidenti ratione & experientia fundatur, quia videmus, quod posita vehementi cordis concussione & motione, paulo post subsequitur in toto corpore animalino nova quædam caliditas, quæ prius non aderat, ut patet in ira & vehementi commotione corporis, similiter ablata tali motione cordis, scilicet diminuta, contracta & tardius facta, subsequitur tepor, rigor & frigiditas, quæ prius non existerat per corpus animalis, ut contingit in frigore & in rigoribus quartanæ. Postea addit eod. loco p. 339. hæc verba: quod ex pulsatione vehemente & concitata musculi cordis, sanguis, qui continetur in qualibet pausa & quiete ejus repletur, effusus a vena cava impelli intra arterias usque ad extremas ejus capillares extremitates debeat eodem concitato motu, quo cor contrahitur, ut patet ex legibus circulationis sanguinis. Similiter evidentia sensus constat a vehemente & concitata circulatione sanguinis per totum corpus animalis excitari fervorem, caliditatemque



que de novo, quæ prius non existeret, cuius originem haudquaquam ex motu, ut motus est, nempe progressivus, peti debere censeo, sed potius ex ipsa sanguinis natura; continet enim sanguis spiritum seu oleum, seu potius igneas particulas sopitas, quæ si dissolvuntur a vinculis, quibus nectebantur, ut indolem sui motus exercere valeant, tunc caliditatem sensui ostendent.

14. Proxime itaque præfatus Autor calorem sanguinis nostri deducit a motu intestino partium tenuissimarum sulphurearum sanguinis adaucto. Nam consensu omnium philosophorum recentiorum calor nil nisi rapidissimus partium sulphurearum motus est: neque etiam dubitandum, intestinam hanc percalidam sanguinis partium commotionem augeri a circulari motu celeriori facto, quem non modo vehementia, sed & frequentia & plenitudo pulsus demonstrat. Pulsu enim frequenti, vehementi ac pleno præsentem; non potest non sanguis velociori motu per tubulos corporis cieri, sicque calor, sensu & experientia teste, augeri. Neque etiam dubium, quod non modo in statu sano, aucta vehementia & magnitudine pulsus ob corporis fortiolem motum animique commotionem, sanguinis circulus & cum eo calor increascit, sed & in statu læso imo ipsis in febribus, præsertim tertiana intermittente & continua, nec non ardente & synocha, maxime in statu eadem species pulsus circulationem celeriolem, nec non sanguinis lexinde ortam incalescentiam maiorem demonstret. Non tamen id universale est, neque ubicunque calor præternaturalis in sanguine, ibi etiam circulus sanguinis citatiolem esse mea assertio fuit, aut adhuc est. Profecto enim non solus auctior circulus seu motus progressivus sanguinis motus intestini calidi unica causa est, sed plures adesse posse, quæ sanguinis minimas partes in vehementem concitant motum verticosum, utut impeditior sit circulus, non levia momenta suadent. Notum enim est, non modo in malignis, sed & in compluribus febribus adesse calorem

consueto intensiorem seu præternaturalem, ubi pulsus non vehemens sive fortiter manum tangentis percutit, neque magnus, sed tantum celer seu frequens, parvus, imo debilis, qualis pulsus minime arguit sanguinis per cordis musculos transitum celeriolem. Deinceps ipsæ stases sanguinis inflammatoriæ in pulmonibus aliisque visceribus, quæ nunquam concomitatæ sunt interno anxio ardore, siti & calore, extremis partium refrigeratis, luculentissime testantur, non omnem calorem excessivum a motu progressivo auctiori sanguinis ortum suum habere. Et certe nihil magis in praxi notandum occurrit, quam quod intolerabilis & mire anxius ardor intra corpus conclusus maxime tunc temporis molestet, quando corporis extrema obstipata, contracta, arida & exsucca sunt: & ex adverso minus molestum esse illum ardorem, qui habitum corporis occupat, sive qui ad extrema vergit, utpote hic ipse liberiolem sanguinis circulum per habitum corporis, ille autem impeditiolem ejus motum per partes internas designat, ubi perpetuo ea notabilis differentia servanda est, quod sub interno calore semper majus adsit periculum, sub externo autem major sanationis spes adfulgeat.

15. Deinceps per ipsam quoque constat experientiam, ea omnia, quæ sanguinem fluxilem reddunt ejusque motum ac circulum ad partes extremas invitant, ut blandus subsequatur ardor, quod fit sub pulso pleno ac celeri, aucti circuli sanguinis teste, præsentissime depromere & extinguere permolestum corporis ardorem, adeo ut felix ille medicus sit, qui aliquot horas ante paroxysmum, conveniente adhibito medicamento corpus ad sudorem disponit, ita enim semper mitior paroxysmus succedere solet. Arbitramur ideo, vero esse consensaneum, sub calore intestino partium fluidarum corporis multa suscitari effluvia igneæ naturæ, hoc est in agitativissimo motu constituta, quæ, si libere avolare per corporis spiracula possunt, calori magnum pabulum subtrahunt. Hæc autem



autem si remanent, quod sit circulo diminuto & transpiratione impedita, necesse est, ut in sanguinem redeundo, motum calidum intestinum reduplicent & mirifice augeant. Deprehendimus enim calorem, qui extra corpus humanum excitatur, plus ex motu reflexo intestino partium agilium in se redeunte, quam ex motu progressivo proficisci. Manet itaque illud firmum & inconcussum, caloris essentiam conquirere in motu partium sulphurearum concitatissimo, cum autem sub omni progressivo motu auctiorem per impulsum & attrituram ad poros fibrasque partium solidarum vehementem fieri, minime tamen sequitur, ubi calor intenditur, ut semper id eveniat aucta progressionem, sed a retentione exhalationum calidarum & nova percussione in idem subiectum ille sæpe numero provenit, uti in gravioribus inflammationibus & hectico calore aperissime patet.

16. Verum enim vero, qui ex circulo sanguinis intensiori caloris febrilis genesis derivant, eo nituntur fundamento, quod pulsus celer, qui februm pathognomonicum signum & indivulsus comes esse solet, testimonium certissimum afferat motus progressivi sanguinis auctioris, magnaue sit differentia inter celerem & frequentem pulsum, a practico minime confundenda, quorum hic magis in statu secundum naturam, nec non ætate juvenili, motu corporis vel animi aucto, a vino assumpto, ut & in cordis palpitatione & asthma locum inveniat, adeoque non genuinum febris signum sit, licet pulsus celer nunquam a febre absit.

17. Promeruit hæc non noviter inventa assertio quodammodo accuratorem considerationem atque investigationem, idque non tam ideo ut de caloris febrilis genesis certiores evadamus, sed & ut pulsum natura exactius cognita, determinare possimus, quid de controversia diu inter eximios medicos agitata, an pulsus frequens magis quam celer sit nota essentialis commotionis febrilis, iudicandum sit. Suscepi id laboris libero

animo, sine ullo respectu quendam resutandi vel aliis molestiam creandi, & observata omni modestiæ, quam nunquam non profiteor in scriptis meis, lege. At vero præter omnem spem nostram, quod dolemus, olim longe alia intentione, quæ a nobis procul abfuit, excepta controversia fuit, uti rerum inter se collatio docebit.

18. Quapropter uti firmiter mihi animus perpetuo fuit & est, cum nullo ob rerum investigationem congregi in disputationem maxime contentiosam, sed tantum ipsas res sine ullo respectu, a quibus proficiscantur, libere ac placide tractare: ita etiam nemo mihi vitio vertet, si in materia controversia non ex merito responsum dederim, probe reputans, litibus ac jurgiis animos magis exulcerari, veritatem autem magis suppressi quam investigari; nihilominus in gratiam veritatis, ne mihi fiat injuria, brevibus, data hac occasione, mentem clarius explicare constitui, ut quivis planius intelligere possit, num consentanea veritati fuerit & sit mea sententia, nec ne?

19. Quæstio autem prima ventilata hæc est, an magna inter pulsum celerem & frequentem sit differentia, & an certo respectu unus idemque dici possit? Postremum jam olim asserui & clare deduxi in *dissertatione de pulsibus*, neque dissimulare possum, hunc laborem magis ex professo & clarioribus conceptibus tractatum fuisse in *dissertatione de pulsibus*, quam factum fuit in ea *de causis caloris*, ubi levissime saltem tetigi hoc argumentum. Attamen nemini hæc licentia, cum iniqua sit, tribuenda erit & concedenda, si quis posteriores labores, qui limatiores & accuratiores semper esse solent prioribus, cum iis, quæ ante non existitudo dicta sunt, conferendo, extrahat, & inde misceat quædam pro lubitu in refutationem alterius.

20. Sed ut ad rem deveniamus, ante quam solvamus quæstionem, supponenda quædam esse existimo (1) Convenit inter mechanicos, frequentiam non motum in se & sua natura ingredi, cum  
motus



motus possit fieri & absolvi, qui non sit frequens, id est qui non repetitur, sed potius omnis motus in se est vel celer vel tardus, id est qui breve vel longum tempus requirit, vel magnus vel parvus est, respectu molis, quæ moveatur, vel vehemens vel debilis respectu virium motricium (2) supponendum est, pulsus cordis & arteriarum esse motum continuum, videlicet sine ulla sensibili quiete vel mora diastolen arteriarum, quæ tangentis manu percipitur, systolen sequi, & systolen rursus diastolen; talismodi species motus est quoque pendulorum vibratio, cujus reciproca ab uno latere ad alterum motio continua est, & fit non interrupto certo quietis spatio. (3) Motuum singulorum celeritas, præsertim impulsus, ægrius nisi ex spatii æstimatione, quod mobile percurrit, inter se comparari & distingui potest. Ceterum hoc verum est, quod motus celerrimus cum motu valde tardo comparatus, in ipsam perceptionem etiam cadat, quod nunquam negavimus, sed hic difficultas hæret, quomodo celeritatem motuum vel pulsuum, inter se gradu non nimis remoto differentium velimus dijudicare, an id ex singulis ictibus, an potius ex numero repetito illud ipsum sit colligendum? Manifestissimum exemplum habemus in pendulo, in quo ratione gradus celeritatis differentes vibrationes, pro diversa fili, ex quo suspenditur, sumtione ægerrime a se invicem distinguere licet, nisi quis ex frequentia, id est ex numero vibrationum, per certam temporis mensuram, majori vel minori illud ipsum conjiciat.

21. Ex hisce præmissis liquide fluit, unum quidem pulsuum posse esse celerem, qui tamen non sit frequens, adeoque celeritatem & frequentiam esse res distinctissimas, quarum hæc numerum plurium motuum, illa autem unius motus intensiorem certo tempore indicat. Potest itaque celeritas esse sine frequentia, sed frequentia motuum ac pulsuum, qui sine ulla interjecta mora diversis rationibus fiunt, non potest esse sine celeritate singulorum pulsuum. Nam cum

motus ille sit continuus, impossibile est, ut ille numerus possit crescere, sive paucis tempore multi motus fieri, nisi quis motus sigillatim breviori temporis spatio absolvatur, id est celerior sit. Ex eo sequitur, nullum dari frequentem pulsuum, qui non sit celer, & frequentiam testari de celeritate, & raritatem de tarditate singulorum pulsuum, imo esse celeritatis affectionem frequentiam. Nunc quæstio oritur, si certent medici, quale quid maxime factum a *Silvio, Deussingio*, aliisque, num pulsus celer, an potius frequens sit essentialis febribus, sive, quod idem est, si quis dicat, non confundi debere a practicis pulsuum celerem & frequentem, eamque distinctionem in praxi habere insignem usum, quid sentiendum? Considerato nec precipitanter reposuimus, quæstionem esse de nihilo, nec habere usum distinctionem hanc in praxi, modo non confundatur vehementia pulsus cum celeritate, sed frequentem pulsuum esse celerem, sive unum eundemque esse pulsuum. Lapis autem offensionis hic exstitit, unum eundemque esse pulsuum celerem & frequentem; sed quis ex lectione *dissertationis de pulsibus* non clarissime videt, illud ipsum prædicatum non esse intelligendum hac ratione, ac si celeritas non distincta sit a frequentia, ipsa natura rei, ipso conceptu, sed tantum ratione effectus, ratione judicii medici, ratione cognitionis morborum, unum esse idemque, si quis dicat, pulsuum in ægrotante celerem esse, ac si dicat pulsuum frequentem esse. Hanc fuisse nostram sententiam & verba plane detorta esse in alienam prorsus significationem, quisquis, qui attente & sine præjudicio perleget dissertationem de pulsibus, statim judicare poterit. Neque sine ratione lectionem hujus dissertationis, quæ argumentum in praxi egregium & nunquam, ut arbitror, antea satis excussum tractat, rerum medicarum peritis commendare erubesco.

22. Sed ut propinquius ad rem ipsam accedamus, hoc imprimis restat discutendum, an pulsus celer, qui ex frequentia

recte



recte judicatur, indicet semper circulum sanguinis auctum? Res esset salva & omnis dubitationis expers, si ostendi posset, celeritatem pulsus involvere simul magnam copiam virium motricium, si ve supponere magnam vim, si ve fieri ex magna virtute systoles cordis. Secundo si semper celeritas includeret magnam molem mobilis sanguinis, sponte utique tunc sequeretur, si motus esset satis validus isque sæpius repetatur paucotempore, & simul promoveat ac impellat magnam quantitatem sanguinis, quod tunc longe velocior etiam fluxus & refluxus sanguinis procederet, quam qui esset sub pulsu tardiori debili & parvo. Verum enim vero, cum persæpe illud, quod movet celeriter, exiguæ molis si ve debilis efficacæ ad movendum sit, nec cum omni celeri pulsu arteriarum juncta semper sit plenitudo, magnitudo si ve repletio arteriarum, sed sæpiissime paucus sanguis impellatur in vasa, neque semper vehementia, quæ ex virium motricium quantitate nascitur, celeritati, qua tamen opus est, si sanguis debeat celerrime suum per vasa circulum absolvere, societur, ideo, ut opinor, recte concluditur, quod ubicunque & in quibuscunque subjectis ac febribus & quocunque tempore pulsus celeritas cum magnitudine & vehementia juncta est, ibi intensior & auctior sit sanguinis circulus & major quoque calor, minime autem sequitur, ut in iis febribus & morbis, ubi celeritas cum parvitate & debilitate sociatur, sicuti fit plerumque in malignis, in principio intermittentium & potissimum tunc temporis, quando natura in maximo discrimine versatur, ut, inquam, adsit ibi auctus sanguinis circulus: quare nec calor internus anxius, sitis cupiditas, ab eo est deducenda.

23. Ex hisce jam dictis probeque consideratis & intellectis quivis non potest non percipere, me celeritatem pulsum in febribus nunquam negasse, multo minus, cum statuerim, celerem & frequentem certo respectu pro uno haberi posse, animum habuisse refutandi alterius hy-

*Opusc. Patb.*

pothesin, cum meæ sententiæ e directio non sit contraria, sed in eo tantum versetur differentia, an ubicunque pulsus celer observatur, etiam velocior sanguinis circulus sit, omnisque corporis calor tantum ex progressivo motu derivari debeat. Et hoc est, quod adhuc ob argumenta non levis momenti negavi, donec hoc negotium clarius fuerit ab altera parte deductum.

24. Tractavimus hactenus causas horroris, rigoris ac frigoris, quæ nunquam non in febribus observantur & præcedere solent; explicata etiam est caloris indoles ac genesis, & demonstrata duplicis generis motuum in febre reciprocatio, quorum unus ex partibus externis vergit introrsum ad centrum, alter ex partibus internis ad circumferentiam corporis extrorsum; superest jam, ut paucis determinemus, an a causis mere physicis, an vero simul moralibus dependeant, & quem in finem vergant & destinati sine hi motus. Ut itaque primæ quæstioni satisfiat, statim monendum ducimus, animam in cogitando & ratiocinando plane incorpoream maximam potentiam habere in principium vitale corporis nostri, si ve spirituum motum, quem vel augent, vel imminuunt varieque determinant; quod nunquam sapiens, qui pathematum animi & imaginationum vires cognitas habet, & qua ratione motum & crasin partium fluidarum, nec non solidarum configurationem mutant, probe tenet, negavit, adeo ut etiam nullum dubium sit, ex causis mere intentionalibus moralibus febrilem quandam commotionem posse in corpore suscitari, sed hoc est maxime determinandum, an non ex mere physicis causis sine moralitate agentibus, si ve spontanea directione motus talismodi aucti febrilis ex causis mere physicis sæpiissime contingat febris. Primus qui causarum moralium intentionalium, quæ certum in finem tendunt, & tantum ex occasione certi obiecti suscipiuntur, ab agente interno si ve archeo in scenam produxit, *Helmontius* fuit, adeo ut causas physicas morborum in classem

H

mora-



moralium reducere nimium intempestive intenderit: videatur ejus *Liber de morborum ortu & de febribus*. Nos semper fuimus ea in sententia, ubi causæ notæ & explanationes per res sensibus obvias & physicas reperiuntur vel reperiri possunt, & ex corporum affectionibus phænomena accersi, in iis ad incognita & incorporea non est deveniendum vel properando. Etenim probe hic servandum est, antiquiores sollicite naturæ effectus ab animi operationibus distinxisse: nunquam enim legitur, animam esse morborum medicatricem, quod tamen dicitur de natura.

25. Natura antiquis ipsis motuum causa & principium est, cognitionis & perceptionis autem fons & principium anima ipsis dicitur, cum natura ab *Hippocrate* plane indocta & intelligentia expertis pronuncietur. Elegans locus hac de re exstat in *Coelio Aureliano* l. 1. de passionibus acutis, pag. 36. dum meminit Alcibiadis, qui animam cæterum sensuum salutavit, prætereaque dixit, omnia in corpore nostro fieri necessitate & nihil sine causa, & naturam nihil aliud esse, quam corpus vel ejus motum, & non solum prodesse naturam sed etiam nocere. Enim vero anima siue sit sensitiva siue simul rationalis, (quæ in hominibus principium directionum, & motuum voluntariorum in animantibus est,) nihil tamen percipere potest sine ideis, id est sine motibus ab objectis externis impressis, hi autem tantum variis sensoriis eum in finem constructis recipiuntur. Ubi itaque deficiunt sensoria varia, ibi quoque perceptio & directio motuum deficit, (nam tactus ad causarum materialium morbificarum indolem, figuram, motum, noxam & vires pernoscendas plane insufficiens est,) hinc facile etiam intelligitur, directionem in morbis specialem motuum indolis morbificæ causæ correspondentium ab anima suscipi nequaquam posse.

26. Verissimum quidem, naturam numeri, ordinis, temporis & locorum esse observantissimam, sicuti id in formatione, nutritione corporis, conformatione, sanatione morborum & excre-

tionibus conspicitur: at vero id non ex peculiari rerum, quibuscum agit, intelligentia & arbitrio pro lubitu motus hos vel illos instituendi eosque in hunc vel illum finem, cujus plane ignara est, dirigendi profuit, sed potius ordinatissimi hi certum in finem effectus unice ab artificio mechanico, & coordinatione corporum in se agentium & reagentium, sub certa mensura, gradu, proportionem, derivandi sunt, quod vel ex eo satis perspicue intelligi potest, cum hos ordinatos motus per meras actiones corporeas pro lubitu suspendere, augere ac immutare possumus. Præterea apertissimum exemplum habemus structuræ organicæ & ordinatissimæ in vegetabilibus, quorum magnum ordinem ac artificio præ se ferens fabrica non ab intelligente quadam facultate, sed a mere necessaria, non tamen ordinis experte motus efficacia dependet. Sed hæc uberius deducere, non pertinet ad præsentem institutionem. Hoc autem, quod dissimulare non possum, pro re maximi momenti, & quasi fundamenti loco in medicina recte tractanda habendum est, videlicet ne confundamus effectus morbosos, qui ex meris causis necessariis fluunt, cum iis, qui liberum & immateriale quoddam agendi principium junctum habent, sicuti id patet in animi affectibus, ubi inter hunc & morbum ingens intercedit differentia, dum morbus is proprie dicitur, ubi causæ agentes mere sunt corporeæ, affectus autem animi nuncupatur, ubi vitio laborat animus, utut effectum sæpe in corpore morbosum producat.

27. Ex hisce dictis concludimus, febrem non esse salutarem eam ob causam dicendam, quasi natura materiam interius intelligat noxiam, eamque pro diversa qualitate noxæ certa proportionem ac gradu motus per certa loca accerto tempore ex corporis sphaera amoliri nitatur. Concedi hoc potest de anima, certo objecto, quod extrinsecus obvenit, irascente, nequaquam autem commodè hoc applicari potest ad motus pure mechanicos: nam quemadmodum animiaffe-



Etus & morbus, ita etiam ira & febris differunt, non autem omnis febris immaterialem & idealem animæ actum vel perceptionem supponit. Non potest itaque commode dici febris res salutaris & utilis, bonum in finem excitata, cum natura, imò anima nostra sensitiva plane ignoret conditionem causarum morborum, viarum, locorum, & fines quoque rerum, quæ internæ existunt, nesciat. Est itaque nostra opinio febris, non motus in se salutaris dicendus, neque respectu principii sive causæ efficientis, neque respectu finis sive effectus, quia sæpenumero naturæ humanæ hostilis imò funestus esse solet, sed tantum quoniam effectum quandoque præstat mere ex accidenti salutarem. Meretur hoc ipsum illustrari exemplo, nempe constrictio firmior spasmodica tunicarum ventriculi & intestinorum ab emetico vel purgante producta non in se res bona & salutaris est, cum plane sit præternaturalis adeoque morbosa & gravissimorum sæpe symptomatum auctor, nihilominus, dum colluviem impuram, viscidam, corruptam ex iis locis extirpat, est & fit ratione hujus effectus res salutaris. Ita etiam porro spasmus partium internarum, qui hæmorrhagias spontaneas progignere solet, in se non res proficua est, quoniam sæpe lethales causat effusiones sanguinis, effectum autem hunc & quidem per accidens salutarem efficit, quando sanguis adest in copia, nec nimium evacuatur. Sic etiam res comparata est cum febre, quæ in se considerata non utilis vel salutaris dici meretur, utpote vel dimidiam mortaliū partem jugulat atque interficit, nihilominus effectū salubri per sæpe gaudet, dum perfectæ integritati ac sanitati corpus impurum morbosum restituit.

28. Operæ pretium autem est, ut paulo specialius determinemus, in quibus subiectis & quo modo ac ratione febris salutarem præbeat corpori medicinam. Primum autem omnium sciendum est, causam, quæ suscitāt febrilem in musculoso systemate commotionem, esse sæpissime non modo nimiam sanguinis

& humorum abundantiam, sed & impurarum & excrementitiarum partium viscidarum tam in primis viis quam in vasis collectionem, quæ duplex causa, cum a circulo sanguinis impedito, tum a colatoriorum & emunctoriorum infarctu atque obstructione proficisci solet, quemadmodum evenit id plerumque in omnibus ardentibus, synocha biliosa, tertiana continua, catarrhali & hujus generis aliis. Ad expellendam itaque talismodi corpori insidias fruentem causam armat se ipsa natura non ex libero quodam arbitrio, sed ex necessitate quadam physica, per actionem hostilis & peccantis materiæ stimulata, tam motu spasmodico partium extremarum & membranacearum, quam motu musculorum & præcipue cordis per majorem spirituum influxum aucto. Motu enim opus erat tam intestino calido, quam progressivo seu circulari intensiori ac fortiori, ut sub languidiori hoc duplici motu progenerati & copia & qualitate infesti humores e corpore ejiciantur, obstructionibus prius solutis, præparatisque & dispositis ad id humoribus. Scite enim & non sine magna ratione veteres morbi sanationem per naturam fieri scripserunt primo *πεπασµὸς* id est maturatione & coctione, dein *διὰ ὁρσε* hoc est discussione & rarefactione &, tertio *λύσις* hoc est solutione & excretionem, vid. HOLLERIUS in *scholiis ad Apbor. 39, Hippocr. p. 181.*

29. Per coctionem autem & maturationem intellexerunt pathologicam, quæ est adaptatio materiæ excrementitiæ ad excernendum, sicuti coctio physiologica est adaptatio materiæ ad nutriendum. Cum enim crudi, rudes & partim immobiles & secretoriorum poris minus correspondentes humores morbofi sint, præparandi hi prius sunt ad exitum, nempe materia viscida incidenda, abstergenda, crassa fluxilis reddenda, intemperati & acres humores temperandi & corrigendi sunt, quod maturationis & coctionis vocabulo designavit sapiens antiquitas, quæ non cruda, sed cocta tam natura quam arte



e corpore expellenda esse ingeniose suadebat.

30. Quoniam autem excretio peccantis materiæ minus commode fieri potest, nisi viæ prius sint liberæ & emunctoria aperta, hinc obstructions dissolvendæ ac stagnantes & hærentes in vasculis capillaribus & excretoriis fixi humores resolvendi sunt ac colliquandi. Quibus effectis commode postea succedit quantitate peccantis materiæ excretio.

31. Hi sunt præcipui modi ac rationes, hic est processus solennis, hic ordo, quo utitur natura in sanando morbo, seu auferenda morbifica causa e corpore. Id autem omne exsequitur unico instrumento, motu.

32. Motus autem sanguinis duplex est, alter intestinus partium sulphurearum calidus, alter progressivus seu circularis. Utroque opus est, ut illud, quod noxium & perniciosum in corpore est, præparetur ad exitum & postea ejiciatur. Certe non solus sufficit motus sanguinis circularis, ut ut intensior & auctior sit, nisi simul comitem habeat intestinum auctum, sive incrementum caloris. Et tamen si non negari possit, quod calor nimis excessivus in febribus damnum afferat corpori, nihilominus, uti motu progressivo aucto, sic etiam auctiori intestino calido eget natura ad expugnandam causam febrilem. Quid enim felicius humorum glutinositatem & viscositatem dissolvit quam calor? quid ad obstructions a crassa amurca inductas referendas, ad emunctoria obstructa expedienda, opem spondet promptiorem, quam calidus & fluidus sanguis? quid exsuperantem sanguinis & humorum copiam citius imminuit, immobile & crassum fluidum reddit, quam calor? unde non sine magna ratione veteres calorem febrilem utilem judicabant ad concoquendam, id est incidendam, attenuandam & excretioni paratam reddendam materiam peccantem. Et quod calor moderatus in se consideratus res sit corpori maxime proficua & salutaris vel ex eo satis superque apparet, quod calidioris temperiei homines, juvenes etiam, & qui motu

corpus exercent & calidis potibus utuntur, rarius passionibus chronicis & viscerum obstructionibus obnoxii sint. Et hæc quoque est ratio, cur omnes intermittentes febres etiam ipsæ quartanæ, teste Hippocrate, si æstate invadunt, longe breviores sint, facilioremque sanationem admittant, quam si autumnii vel hiemis soboles sint: illæ enim sponte sæpe mense Junio, quando aer est fervidissimus, cessare solent, quin imo, quo major in paroxysmis febrilibus percipitur calor, eo citius febris solvitur, & contra languidus & lentus fixam morbi sedem ac radicem arguit. Equidem ad infringendam hanc sententiam reponi potest, quod tales effectus non tam calori, quam circulo sanguinis aucto, cujus individuus comes sit calor, adscribenda veniant. Verum enim vero, ut ut circulatio sanguinis intensior non fiat sine incremento caloris, nihilominus tamen, uti superius dictum, non omnis calor causam in corpore agnoscit circulum auctum; siquidem sæpissime sub pulsu languido & frequenti extrema frigent interiora ardent cum linguæ siccitate, nigredine & inexplibili siti. Deinceps motus intestinus uti natura plane diversus est a progressivo, ita etiam diverso gaudet ad vitam effectum, neque, si sola circulatio & excretio inutilium partium absolveret vitale negotium in animantibus, opus esset certa temperie, mixtione ac moderatione elementorum sanguinis & maxime sulphuris (quod intestini motus fundamentum est) ad conservandam vitam & sanitatem, quod tamen statuere absonum est.

33. Quapropter non inepte dictum, fuit ab antiquitate, vitam consistere in calore, item calore naturam pugnare adversus causam morbificam, & nullum reperiri animal, ubi non calidum quoddam substantiale in sanguine & ejus succis lateat; utpote sine motu intestino calido nulla generatio, nulla vita, nullus motus vitalis perfici potest. Neque hoc loco sequitur, nullum esse calorem, qui non ad sensum tactus sit perceptibilis. Nam hominis sensus non



non solus est iudex & norma caloris. Motus, qui est intestinus calidus, dici potest partim respectu frigoris, partim ratione effectus, præsertim rarefactorii, ut adeo ad infringendam hanc sententiam frivola sit ista oppositio, quod pisces sine calore vivere possint. Calore autem opus est in animantibus, ut spiritus ascensio humorum hoc ipso promoveatur, humores fluxiles servantur, & omnes pori patuli & aperti maneant, tam nutritionis quam necessariarum excretionum ergo. Qua de causa **GALLENUS** *de usu part. lib. XIV. cap VI.* calorem non inconcinne appellat naturæ primum instrumentum. Eadem ratione natura in expugnandis morbis optimum in finem utitur calore fortiori, sicuti id patet in febribus. Hoc ipso enim non modo subigitur & attenuatur vitiosa materia, sed & ad excernendum idonea redditur. Enimvero non negari hoc loco potest, magnum intensum fervorem multum præpedire evacuationes & maxime per sudorem, adeoque hoc respectu plus nocere quam prodesse; nihilominus si rem diligentius examinamus, natura non sola evacuatione sanat morbos, sed potius sola sæpius dissolutione & rarefactione humorum sine ulla excretionem materiæ morbum tollit, imo prius materiam, si excernenda est, ad excretionem disponit, coquit, vias aperit, quod commode præstatur calore, utpote non tam in evacuatione quam in correctione causæ morbificæ noxiæ consistit cura. Unde nostra opinio non tam admodum fallitur, qui sibi persuadent, illud ipsum, quod statu morbi peracto circa declinationem diebus criticis excernitur, & per emunctoria corporis excluditur, pro causa morbifica habendum esse: de hoc quidem non dubitandum, quod evacuationes, legitimo tempore & debita quantitate in febribus succedentes testentur de convalescentiæ statu & optimum signum victricis naturæ præbeant, quoniam omnia jam esse pacata & tranquilla in corpore, circulum sanguinis jam rursus liberum & æquabilem seu secundum naturam esse resti-

tutum, spasmodicas partium contractiones cessare designant, unde liberiores sunt evacuationes, & quidem materiæ non modo morbificæ ad exitum dispositæ, sed & aliorum excrementitiorum humorum, qui sub irregulari ista febrili commotione humorum in corpore generati fuerunt; quocirca utique proficua sunt, & ideo non sistendæ vel cohibendæ, tunc dictæ criticæ evacuationes. Probe enim tenendum est, causas morbificas agere potissimum spasmo, sub spasmo autem turbari circulum sanguinis, æque ac debitum excretionis negotium. Quapropter si evacuationes rite procedunt, bonum hoc præbet medico indicium, causam morbificam esse expugnatam, motus morbosos jam esse sedatos & ad naturalem statum jam rursus universa tendere. Nam simulac incipiunt evacuationes debitæ sub restituto sanguinis circulo, quales sunt criticæ, non autem symptomatice, protinus etiam morbi vis remissa conspicitur. Ex quibus allatis liquido patebit mens nostra circa ea, quæ olim diximus in *dissertationis de causis caloris præfatione*, & omnis bonus & æquus lector ac censor judicabit utrum mea asserta adhuc inconcussa permanserint ac firmo stent talo, vel an in contrarium allatis argumentis confutata fuerint?

34. Dicimus itaque, febrem esse salutarem corporis nostri medicinam, quod in hac ipsa motu calido intestino nec non impulsu sanguinis aucto & celeriori ac vehementiori per omnis generis tubulos facto, cruditates viscidæ attenuentur, dissolvantur, obstructiones glandularum referentur, stagnantes humores in ordinem redigantur, corrupti & quantitate peccantes evacuentur, nimiumque excessivum humidum discutiatur, adeo ut febris sæpius egregia medicina corporis sit depuratoria & evacuatoria. Meretur autem perutile hoc argumentum, ut non modo firmis autoritatibus, sed & experientiæ irrefragabili fide corroboretur. Unde primo omnium magni nostri **HIPPOCRATIS**



CRATIS placita atque dicta circa hanc materiam evolvere & circumspicere animus est. Ipse vero *l. V. apb. 70.* scribit: Qui quartana corripuntur, non admodum convulsionibus tentantur, si vero tentantur, superveniente quartana liberantur. Ex nullis siquidem febribus nulla magis saluti hominibus est, quam tertiana & quartana, quod etiam vulgo notum est: hæ si recte percurrunt tempora, neque nimis diu perseverant, nec in ætate plane decrepita & viribus consumtis fiunt, sanguinem egregie depurant & obstructions circa mesenterii venas potenter tollunt nec non humores concretos, congelatos, crassos & viscidos, qui variorum spasmodum causæ sunt, resolvendo auferunt, & nervos præhumidos exsiccant, nimis resolutos ac laxos firmant & roborant, unde vulgi persuasio, quod quartanæ magnum robur ingenerent corpori, ita ut is, qui tertiana vel quartana fuerit correptus, intra aliquot annos degat liber & immunis ab omnibus morbis. Spectat huc etiam *apborismus 26. sect. II.* qui hic est: *febrem convulsioni accedere satius est, quam convulsionem febre.* Probe hic attendendum, quod convulsio a repletionem, id est copia humorum, non a qualitate materiæ acris & causticæ orta esse debeat, quoniam motus tam intestinus, quam progressivus densam illam, viscidam & compactam materiam, quæ nervis & cerebro insidet & in primis viis continetur, attenuat & discutit. Pulchre autem hic notat HOLLERIUS *in scholiis in apborism. eundem*, quod non quævis febris convulsionem solvat, sed moderata nec nimis debilis, nec nimis vehemens maligna, quæ vires exsolvit. Mirabile autem ista est, quod gravissimus noster *Autor l. VI. in Epid. Tom. VII.* scribit: quartanam a melancholia, epilepsia, lepra liberare & scabiem etiam abigere. Alunt nempe hi sævissimi morbi ferme eandem causam cum quartana, & oriuntur ex sanguinis viscidum & impurum stasi circa abdominis viscera, nec non lienis, hepatis & pancreatis infarctu ac induratione, cum vero motus febrilis in quartana probe

administratus, obstructions pertinaces & veteres motu dissolvat, fit, ut radicibus evulsis isti gravissimi morbi ceu effectus tollantur. Memorabile hoc loco est, quod circa sanationem scabiei & circa quartanam refert LANGIUS *epist. 16. l. I. p. 20.* dum inquit: Vidi plus centies, scabiem & per aliarum febrium & præcipue quartanæ crisin exortam sponte exolescere, citra omne medicamentorum subsidium. Quod autem ad epilepsiam attinet, magnus HIPPOCRATES alio loco, nempe *l. V. Epid. port. 21.* scribit: *a quartana correpti magno morbo, id est comitali non rapiuntur, quod si vero ante capiuntur, quartana succedente liberantur.* Hoc assertum discrete confirmatur *apbor. XX. Sect. V.* qui hic est: *Qui febris quartanæ dominatu tenentur, haud facile convulsionem infestantur; quod si ante laboraverint, superveniente quartana morbo illo defunguntur.*

35. Neque adeo difficile est rationem hujus experientiae invenire. Minime enim obscurum est, sed unanimis fere practitorum sententia, chronicam epilepsiam in obstructionibus & inde resultantibus impuritatibus partim viscidis radicari, quas natura per spasmus universalem, qui principaliter in meningibus cerebri oriundus per totius corporis musculos penetrat, & epilepsia dicitur, excutere nititur. Tales autem obstructions, nec non humores viscidos, qui liberum sanguinis circulum per vasa capitis impediunt, resolvit, discutit & foras ejicit calor ac horror quartanæ. Certe enim valido talismodi fibrarum motu, impetuque sanguinis majore, qualis sub febrilibus paroxysmis conspicitur, plus efficitur in removendis obstructionibus & excutendis humoribus stagnantibus, quam alia medicina præstantissima, sive sit sudorifera, sive aperiendi & evacuandi facultate celebris. Quod autem illi, qui quartana prius detenti fuerunt, non facile incidant in epilepsiam, ex eodem fonte fluit, quoniam quartana, legitime administrata liberat corpus, solvendo obstructions ab iis causis, quæ epilepticum



lepticum morbum inducere potentes sunt.

36. Præterea etiam leviorē apoplexiam febris discutit, quorsum spectat *apbor. V. l. V. Hippocr.* qui est: *si quis ebrius repente obmutescat, convulsus moritur, nisi febris incidens eum corripiat.* In ebrietate a copia vini præsertim generosi assumpta corpore minus perspirabili contingere potest, ut plus iusto caput repleatur sanguine copioso, qui arterias & venas plexus choroidæ nimium distendendo, spirituum meatus intercipit. Accedens autem motus sanguinis in febre celerior obstructa in cerebro vasa aperit, nec non materiam stagnantem in ejus poris, sive aquosa sive viscida sit, potenter discutit.

37. Tandem etiam magnus noster Hippocrates febrem ceu peculiare remedium ad hypochondriorum vitium tollendum æstimat, dum *l. VI. apb. 40.* scribit. *Quibus ad hypochondria dolor est sine inflammatione, sed vel ab obstructione, vel a spiritu flatulento, vel ab intemperie inæquali frigida, iis febris superveniens dolorem solvit.* Perpetuum hoc est apud Hippocratem, quod quicunque morbi ab obstructionibus & viscida amurca, nec non viscerum infarctu proveniunt, commode solvantur febre, quoniam motus in febre tam intestinus quam progressivus major attenuat, incidit & resolvit materiam immobilem, eamque fixam & stagnantem ad evacuationem disponit ac præparat. Vidi sæpius in praxi, quod pathemata hysterica & spasmi in scæminis etiam vetulis post emansionem mensium abdominis climata pervagantes suscitati ab ipsa natura febre efficaci calore & horrore stipata, fuerint sublati. Et si rem paulo accuratius pensitamus, isti insultus spasmodici & febiles, qui hypochondriaci perquam familiares sunt, præsertim autumnali & hyemali tempore, egregie inserviunt, fordidibus excrementitiis in massa sanguinis & humorum coacervatis per emunctoria e corporis sphaera eliminandis.

38. Quod autem febris salutare sit naturæ, quo se liberat & vindicat a præsentis periculo, commodum instru-

mentum, vel ex eo clarissime evincitur, quod magna colluvies in corporibus collecta feri puri, sive salibus excrementitiis biliosis acribustincti, quæ non potest non esse magno oneri naturæ, commode motu naturæ valido febrili, in musculofo genere concitato, per convenientia & peculiaria emunctoria proscribi soleat, sicuti id manifesto videmus in febribus catarrhalibus, rheumaticis, arthriticis, nec non erysipellate, variolis, morbillis & purpura, ubi nunquam non febrilis quædam commotio & hanc subsequens critica & salutaris evacuatio subsequitur. Denique nihil magis contingit, quam quod sanguinis stagnationem vel extravasationem subsequatur febris, quæ dici solet inflammatoria, quam secundum nostram sententiam, non præmeditate & destinate ex quodam arbitrio libero anima suscitatur, ad humorem ibi stagnantem & corruptioni proximum submovendum, sed mechanicum potius & necessarium hunc esse effectum asserimus, dum ipsa materia peccans & quantitate & qualitate hostili irritante & premente, ad motionem exorbitantem principium illud, quod in membranis & musculis est, movens stimulat, qui motus postea auctus utut præternaturalis egregie, modo recte a medico attemperetur, inservit discussioni & resolutioni sanguinis eccentrici. Posset hoc prænobile argumentum, quod in totam praxin sese diffundit, fusius tractari, si permetteret id instituti ac temporis ratio. Hoc tamen ex dictis sufficienter perspicuum esse arbitror, recte dictum esse a nostro Hippocrate aliisque sapientissimis veteribus, naturam esse optimam morborum medicatricem, nempe per motum intentum & auctiorem, qui est febrilis. Patet quoque, quam verissime scripserit *Asclepiades*, notante *Celso* in *C. IV. l. III. de diversis curationum generibus*, se ipsa febre præcipue uti in morbis ad remedium. Et idem hoc repetit *Sydenhamus*, dum in operibus suis febrem naturæ instrumentum, quod partes impuras a puris secernit, appellat.



39. Ex dicta hac doctrina sequentia perutilia profluunt in praxin medicam. (1) cum febris tam utilem præstet corpori effectum, probe animadvertant medici, ne statim ipso in limine suppressere ac cohibere quærant insultus febriles, quod in continuis & acutis febribus, nempe variolis, morbillis, erysipelate, podagra, præsentissimum periculum, imo ipsam mortem inducere solet, in intermittentibus vero tales citius suppressæ febres, ipsa attestante experientia, in gravissimas viscerum obstructions, & inde resultantes lentas febres, hæcticam, hydropem, nec non convulsivas spasmodicas affectiones cum maximo ægrotantium damno desinunt. Tota nempe medentis prudentia in eo mihi versari videtur, ut probe discat discernere motus naturæ febriles, qui bonum effectum præstare possint, & salutare ac critici habendi sunt ab illis, qui perniciosi, symptomatice ac noxii sunt. Illos utique non immediate sistere, sed potius, si languent, promovere, si nimii sunt, moderari debet. Nunquam autem plenarie sistere vel nimium etiam intendere eos debet, sed illa intentio ejus principalis & optima sit, ut, si potest, causam morificam, quæ suscitatur hos calidos motus, aggrediatur eamque remove ac imminuere quærat. Imprudenter itaque illi faciunt, qui china chinæ, quæ divinum, si recte usurpetur, remedium est, item opiatum, neque minus vi styptica præditum abutuntur in intermittentium curatione. Peccant utique in eo medici, qui rem plane perniciosam febrem judicantes, cum tamen sit effectus bonæ causæ, eam mox suppressere laborant, nec melius agunt, quam illi qui evacuationem sanguinis per uterum vel hæmorrhoides mox adstringentibus cohibent, unde non nisi pessima sequi solent symptomata. Nunquam itaque medicus suppressere intendat febrem, sed tantum animum advertere debet ad causam profligandam, & quando hanc non potest commode tollere, moderanda est febris, quæ preparationi & expulsiōi causæ morificæ etiam dicata est.

40. Secundo: ex præfata doctrina sequitur, omnia remedia & alimenta, quæ nimium refrigerant, humores coagulant, viscositate, aciditate, nec non anodyna virtute sanguinis motum retardant, non modo inutilia, sed potius noxia esse ad febres tollendas; potius eo respicere debet medicus in cura, ut humores fluxiles reddat, & circulum sanguinis per omnia evacuatoria promoveat: unde recte HELMONTIUS *l. de febribus c. IX.* diaphoretica sola esse febrium appropriata atque specifica remedia pronunciat. Neque alium in finem, vel venæsectiones vel evacuationes aut alterationes varii generis in febrium curationibus conducunt, quam quod tantum liberam circulationem & transpirationem adjuvent. Quod si enim hoc verum est, quod plerumque febres ex transpiratione impedita & circulo sanguinis imminuto oriantur, necesse est, ut non nisi circulo & transpiratione adaucta restitui debeant. Patet quoque porro ex prædicta doctrina, quod medicamenta tunc temporis commodissime propinentur, quando natura ipsa est in motu. Ita enim facilius natura, arte adjuta exoptatos præstat effectus. Insignis hanc in rem locus memorandus est ipsius HELMONTII, qui *l. de febr. c. IX.* sequentia habet: si ipso die accessus & hora opportuna propinantur remedia sæpe unica vice multas febres tollunt. Est ista nempe opportunitas in spatio horulæ ante paroxysmum, quantum scilicet exigit actuatō medicaminis & stomacho vacuo. Nam fideatur diebus quietis intermittētiū, vel dudum ab incepto paroxysmo, dum medicamen non præsentit naturam sibi auxiliantem, tam ad actuandum sive animandum, quam ad expellendam materiam occasionalem febris incassum propinatur. Imo tunc angit medicamen magis, quam juvat, quatenus naturam, dum quiescere mallet, ad proscriptionem stimulat.

41. Deinceps addiscimus ex deducta doctrina, malum esse signum, si gravis causa vel obstructio præsens est, lenta tamen seu levior febris adsit, sive si febrilis



febrilis motus non respondeat causæ; unde recte dictum ab HIPPOCR. *Apb. IV. l. 40.* Nunquam bonum est, si modo caleseat modo frigescat corpus, hoc enim diuturnitatem morbi indicat. Patet quoque ratio, quare in debilitatis corporibus & ubi motus ad extra non satis sunt liberi nullæ genuinæ evacuationes, sed metastases & apostases difficilis laboris succedant. Observamus & illud in praxi, quod istæ febres longe peioris & malignioris naturæ sint, quæ non calore, pulsu, & siti se exerunt, quam si hæc excessivo utut in gradu adsint; nec semel in praxi annotavimus, si lento gradu incedentibus febribus superveniat calida febris cum horrore, optimum esse recuperandæ sanitatis signum.

42. Ex hisce jam allatis tandem concludimus cum ipso HIPPOCR. *l. II. Epidem. Prudentis medici esse, aliquando febres accendere.* Nam uti inquit *l. XVII. Epid.* Quicquid natura facit sponte, id medicus facit arte, suadet autem talis febris excitationem manifesto *apbor. XXI. l. V.* dum dicit: *in tetano ulceris experte, juvene bene habito, atate media, frigida quam copiosa profusio calorem nativum revocat, hujusmodi autem hæc nempe tetanum calor solvit.* Confirmat hoc curationis genus *l. III. de morbis* his verbis: *Aquam frigidam plurimam superfundito, & post ea vestimenta tenuia, pura & calida super integito, ignem autem tunc non adhibeto, hoc auxilium & ad tetanum & ad opisthotonum adhibeto.* Nempe aqua frigida quando superfunditur corpori juvenili in media æstate, poris & fibris constrictis rigor ac horror fit, & repellitur sanguis ad interiora sicque sollicitans cordis musculos excitat motus vehementiores, qui valde proficui sunt ad tollendas chronicorum morborum causas. Semper enim & necessario, uti loquitur HIPPOCRATES *l. II. de morbis Sect. V. p. 15.* post rigorem major vel minor febris supervenit. Nolumus ejusmodi curationis genus copiosius reprehendere. Illud saltem dicimus, quod longe tutius sit medicamentis validiori-

bus, quæ motum injungunt sanguini & humoribus, causas morborum chronicorum remove. Et hinc luculentissime patet ratio, quare decens usus decoctorum lignorum, thermarum acidularum, salivantium, sudoriferorum, diaphoreticorum, in chronicis & radicatis passionibus expurgandis, tanta vi tantaque efficacia polleat.

43. Cæterum clarissimum est per experientiam, nec non plures hinc inde consignatæ observationes practicæ testantur, vehementi iræ affectu, quandoque gravissimas & chronicas passionis fuisse sublatas; cujus rei ratio non aliunde accersenda est, quam quod in ira non secus ac in febre sanguis & humores cum quodam impetu moveantur, luculenter id ostendente pulsu vehemente, celeri corporis incalescentia & respiratione citatiori. Meretur in hujus rei confirmationem adduci egregius locus ex VALERIO ex *obs. Med. IV. lib. II.* qui ita scribit: memini, inquit, & fide sancta asserere possum, quartana affectum Jacobum Bannum, virum probitate insignem, in vehementem iram meo consilio a suis accensum, curatum extemplo fuisse, cum nullis antea medicamentis cessisset morbus; & porro scribit: ego mirum quid vidi in consobрино meo Joh. Sobiratio & testari plena fidem possum; hic cum Avenione convulsus plures annos constitisset, ita, ut contractis poplitibus ingredi non valeret, repentina ira eaque vehementi percitus, in famulum quem plagis cedere nitebatur, irruendo ita corpus exagitavit, ut confestim, distentis crurum nervis ac poplitibus emollitis, sine ullo doloris sensu, incedere & rectus stare posset, quum incurvo corpore annos plus minus sex constitisset: dein per omnem vitam sanus evasit, ut quem non operosa medentium manus, non accurata medicorum diligentia, non ulla medicamentorum genera curare potuerant, sola ira, naturam exagitans, persanavit, ut in hoc nostro cive Arelatenfi evenisse, scimus, qui a resolutione alterius partis immedicabili, terroris ac iræ potentia, animam vehementer moventibus,

curatus



curatus miraculo fuit. Præterea plenariam paralytici restitutionem ex sola iracundia. PAULINI in fascic. observ. ad Acad. Nat. Curios. Dec. II. A. VI. annexo.

### DISSERTATIO IX.

## DE SITU ERECTO IN MORBIS PERICULOSIS VALDE NOXIO.

### §. I.

**C**UM de testimoniis & observationibus medicorum hac de re colligendis sollicitus essem, vix unumprehendere mihi licuit, qui paucissimis verbis annotaverit situs erecti in morbis periculosis noxam. Videtur tamen eam jam attendisse Senex Hippocrates, qui, sicut in colligendis & consignandis aliis ad veritates medicopracticæ spectantibus circumstantiis diligentissimus fuit & accuratissimus, maximamque reliquit copiam rerum fusius indagandarum, ab ipso aphoristice tantum propositarum: ita etiam hac de materia egregium & notatu dignum, brevem licet, reliquit locum in prænotionibus: Ceterum, inquit, erectum sedere velle malum est in acutis, pessimum autem in peripneumoniciis pulmone inflammato. Quem locum ab auctoribus quibusdam, cum de signis morborum acutorum prognosticis funestis atque lethaliibus agunt, allegatum quidem, nequaquam autem vel propriis observationibus confirmatum, vel solidis illustratum rationibus reperio. Ita videlicet SENNERTUS Institut. Lib. III. Part. III. C. V. inter signa prognostica ab actionibus læsis desumenda recenset quoque signa a decubitu ægrorum, magis vel minus naturali ac consueto, depromi solita, eaque auctoritate Hippocratis prognostica confirmat, & cum illis citatum quoque locum allegat, sed citra ullam illius explicationem.

2. Ita etiam CELSUS Lib. II. de medicina Cap. IV. ubi de malis ægrotantium signis agit: Gravis, inquit, morbis periculosa est, ubi supinus æger jacet porre-

ctis manibus & cruribus: ubi residere vult in ipso acuti morbi impetu, præcipueque pulmonibus laborantibus. Ex hisce vero locis id tantummodo patet, citatos quidem auctores Hippocratis auctoritatem, ex parte etiam propria forsan experientia edoctos, situm ægrotantium erectum in morbis acutis tanquam malum atque funestæ prognoseos signum agnovisse, & quod pessimi eventus prælagium secum ferat: sed minus manifestum est, num situm erectum mali ejusmodi eventus pessimorumque symptomatum causam agnoverint. Id quod etiam suspicari licet de perspicacissimo ceteroquin BAGLIVO, qui ea, quæ a modo citatis auctoribus generatim ad morbos acutos applicata fuere, ad pleuritidem solam restringit, Cap. de pleuritide dicens: Si cum mala respiratione æger erectus sedere velit in lecto, nec in lecto decumbere potest, quia sibi suffocari videtur: lethale id esse vidi in pluribus. Erectum igitur sedere velle in morbis acutis pulmonum, perniciosum ac ferme lethale.

3. Cum igitur adducta loca medicorum ad prognosin formandam præcipue respiciant, neque sufficiant ad veritatem historicam asserti hujus stabilendam, dum situm erectum in morbis periculosis, eorumque statu ac vigore valde perniciosum, pessimorumque symptomatum causam esse affirmo, atque hujus rei rationem investigare annitor; necessarium erit, ut ipsas observationes easque selectiores inferam, & fundamenti loco præmittam, ut postmodum rationes & causas repentinæ catastrophes, sæpenumero occurrentis, rite possim enodare. Prima autem observatio virum sistit L, & quod excurrit annorum, superiore anno, quo febres petechiales multos in urbe infestabant, correptum eadem febre ex ipso contagio oborta. Placide & moderate succedebant omnia usque ad diem septimum; vires non adeo erant prostratæ, mens semper constabat, neque deficiebat penitus somnus, neque urina erat sine sedimento, pulsum vero aderat debi-

litas



litas cum celeritate quadam juncta. Circa septimum diem ipsæ maculæ in corpore conspiciebantur, alvus per totum morbi decursum bis, vel semel minimum, singulis diebus aperiebatur: ad hanc itaque deponendam æger surrexit e lecto, & paulo diutius versatus est in sella perforata, bene tamen munitus tegumentis. Conquestus hinc fuit de animi defectione atque debilitate virium; hinc depositus fuit in lectum; extrema, manus nempe & pedes, refrigerabant, & inhorrescebat quoque cutis. Ab hoc tempore pessime se habuit: maculæ enim vix conspiciebantur, & erant lividiore. Secuta est prostratio virium, de spirandi angustia conquerebatur & de pressione circa pectus; vix capiebat somnum, & delira ac male cohærentia interdum sermoni intermiscebat; pulsus etiam valde parvus & contractus deprehendebatur, & omnia erant mutata in pejus, nonoque die e vita decessit.

4. Altera historia idem confirmans juvenem sistit viginti & aliquot annorum, constitutionis obesioris & spongiosioris corporis, variolarum morbo laborantem, qui morbus cum gravi dolore dorsi & capitis ac quodam delirio secundo statim die superveniente invadebat. Circa diem quartum, cessantibus omnibus his symptomatibus, variolæ prodibant copiosissimæ, quæ nullo periculoso symptomate stipatæ erant usque ad nonum diem, nisi quod de summo incendio & dolore manuum fuerit conquestus, ubi ingens conspiciebatur pustularum suppuratio. Ob dolorem itaque, ardorem atque anxietatem petiit ab adstantibus, ut vellent ipsum dimittere e lecto, ac prope lectum ad dimidium horæ sedebat in sella probe tectus, ut ne minimum aeris frigidi accessum percipere potuerit. Postea vero simul & semel ob debilitatem & virium defectionem petiit, ut in lectum rursus descenderet, a quo tempore facies, quæ antea erat valde turgida & rubicunda, cœpit detumescere, salivæ fluxus etiam, qui antea copiosus erat,

imminui. Nox subsequens plane erat insomnis, respirationis erat magna angustia atque difficultas, pulsus plane erat mutatus, debilis & inæqualis: sæpe stimulabatur ad urinam edendam, sed parum secedebat; loquebatur male cohærentia, & ex improvise correptus convulsionibus moriebatur.

5. Tertius casus fere idem nos docebit occasione studiosi e generosa familia nati, annorum vix viginti. Hic absque gravioribus symptomatibus variolas experiebatur; siquidem statotempore circa quartum diem erumpebant pustulæ, quæ ad suppurationem placide quoque perveniebant. Noctes non erant plane insomnes; erat vero tenerioris constitutionis, & de debilitate & lassitudine conquerebatur per totum morbi decursum. Pulsus erat languidus cum aliquali frequentia junctus, alvus paulo magis adstricta: die octavo inflammationem quandam, sed leviolem in faucibus passus est. Medicus ad aperendam alvum, quæ jam per sex dies clausa erat, præscripsit clysterem emollientem salino stimulo non adeo tamen forti, armatum, a quo infuso dejectiones habuit; sed cum tertia vice paulo diutius extra lectum versaretur in alvo dejicienda occupatus, tota ejus facies erat livida, & conquerebatur de animi & virium collapsu subito, & vomendi quasi conatu mox deducebatur in lectum, & pedes, qui paululum erant refrigerati, calidis integumentis operiti fuerunt; non ita multo post præter omnium opinionem graves accedebant convulsionem, quibus intra decem horas, postquam surrexit e lecto, periit.

6. Neque minus mihi adhuc alii, quos & ipse expertus sum & plures practici mecum communicarunt, notunt casus, quibus situm erectum in ægris, purpura rubra laborantibus, non minus funestum deprehendi. Inter quos quam maxime notabilis est ille, quem novi de puerpera, de cetero robusta & optimæ constitutionis, annorum XXX. cui primiparæ lochia placide & sufficienter quidem fluebant, sed febris su-

perve-



perveniebat continua, exacerbationes tempore vespertino & per noctem fervans, cum anxietate præcordiorum, fudore satis copioso, atque urinæ pariori excretionem. Succedebat post aliquot dies purpura rubra, quæ, exhibitis licet diapnoicis privativis ac lenioribus, sed adhibito ab adstantibus præpostero regimine nimis calido ac positive diaphoretico, copiosissime efflorescebat, ita ut totum corpus instar crustæ osideret, omnesque extremitates occuparet. Ægra de cetero notabilem virium defectum non patiebatur, nec delira erat, quamvis a somno expergiscens aliquando non adeo promte sui conscia esset. Medicus die a puerperio undecimo mane illam visitans, reperiebat erecte sedentem in lecto, & quidem dorso justo minus lectulis oblecto, nec tamen plane illis destituta. Sermonem faciebat ægra cum medico, & distincte prægressæ noctis symptomata referebat, ac insuper maritum præ mœrore ægrotantem ipsius curæ commendabat. Purpura ubique locorum non modo erat conspicua, sed etiam in pectore ruberrima, ut nihil circa ejus efflorescentiam desiderari posset; pulsus erat frequens, plenus & satis æqualis; urina sedimentum monstrabat pallide roseum, nec adeo paucum. Cum autem per dimidiam circiter horam in hoc situ permansisset, præter omnium adstantium opinionem in momento delirare incipiebat, & mox lipothymica evadebat; quapropter medicum, qui vix ad ædes suas reversus erat, revocarunt; hic rediens mox adspiciebat purpuram, eamque per universum corpus rubram, nec ullo modo recedentem animadvertibat, excepta regione præcordiali, in qua ad volæ manus majoris magnitudinem omnem ruborem amiserat & alba apparuerat, oculi caligine erant obducti, & intra horæ quadrantem ægra expiravit. Id quod repetitis vicibus observare licuit in ægris purpura correptis, & quidem semper cum notabili illo phænomeno, ut, purpura in toto corpore manente rubra, portio ejus in scrobiculo cordis & regione præcordiali albesceret, mortemque; subitanam comitem haberet.

7. Primus vero omnium hanc maximi momenti in praxi medica observationem annotavi, ejusque mentionem feci in *dissertatione* Anno 1699. habita, quæ *historiam febris malignæ epidemica petechialis Halæ grassantis* sistit, §. XI. hisce verbis: *Observatum sæpius a nobis fuit, non modo in hac grassante febre, sed etiam in aliis malignis, quod, si ægrotantes diutius in erecto corpus teneant situ, sive surgendo sive in lecto sedendo, morbi vehementia mirifice mox adaugeatur & increseat, ut etiam mors interdum brevi fuerit subsecuta. Sentiant ægrotantes a tali situ ingentem mox debilitatem, animi deliquium, extremorum frigus, anxietates circa præcordia; quin imo macula in cute, quæ erant conspicua, mox sese abscondunt cum maximo, quod sequitur, periculo.* Verum enim vero non tantum in morbis acutis & periculi plenis, sed & in chronicis quibusdam exitium minantibus valde perniciosus observatur situs corporis erectus, atque capitis maxime diuturnior in linea recta elevatio. Plura observavi hydrope consummato vel phthisi cum febre hectica ægrotantium & valde debilitatorum exempla, qui, cum paulo diutius extra lectum in sella capite erecto se detinuissent, non modo summam & extremam, mox experti sunt debilitatem, animique defectionem, sed & interdum non ita multo post placide expirarunt. Sed hæc sufficiant pro veritate hujus rei historica declaranda, cum ex adductis casibus & observationibus satis clare appareat, quam noxium & infestum sit in morbis acutis, æque ac in longioribus ac diuturnis passionibus, præsertim ægrotantibus vi morbi valde debilitatis, in situ erecto corpus diutius tenere, adeo, ut, quod valde mirandum, ipsa mors sæpius subsequatur. Ordo jam postulat, ut pro confirmanda phænomeni hujus veritate etiam veras, genuinas atque solidas rationes & causas adducamus, ex quibus clare & evidenter appareat, erectum corporis situm tantam posse habere vim atque potentiam, ut etiam funestos dictis in morbis, & sub

com-



commemoratis circumstantiis, corpori effectus possit inferre.

8. Cum vero omnes veritates in rebus medicis theoreticæ e sanguinis circulo, qui universæ medicinæ rationalis principium est ac fundamentum, deduci, atque derivari debeant; videbimus, num etiam inde hujus peculiaris & plane mirabilis phænomeni causas veras & adæquatas deducere possimus. Primo itaque morborum acutorum natura explicanda erit, ut qualem mutationem in vigore suo sanguini, qui vitæ ac virium vera & materialis causa est, inferant, appareat; deinde quoque adiciendum erit, qua ratione corporis & capitis situs erectus viribus debilitandis, imo circulo sanguinis libero & æquabili turbando & destruendo, atque funestis symptomatibus arcessendis, quadret atque accommodatus sit.

9. Per morbos acutos, in quibus minus convenit diutius erecte sedere vel e lecto surgere, intelligimus eos, quorum natura & essentia in motibus tam solidarum quam fluidarum partium inordinatis & valde auctis continetur; quorum in numero maxime sunt febres, & quidem eæ, quæ omni intermissione vacant, ubi continua, per totum tempus morbi, adest motuum acceleratio & vehementia tam eorum, qui in corde & arteriis, quam qui in ipso sanguine & humoribus fortiter motu progressivo & intestino agitis, conspiciuntur. Quam infesta vero vitæ sit hæc motuum inordinatio & quantam vim habeat, omnes functiones, quæ secundum naturam fiunt, invertendi & destruendi, id non modo experientia fere quotidiana, sed & ratio satis evidenter declarat. Quid enim solennius est, & frequentius in praxi observatur, quam quod, qui febribus acutis, sive maligni sive benigni moris sint, paulo diutius detinetur, præsertim si illæ ad ægritudinem vel vigorem devenerint, in summam prolabantur virium debilitatem, ut omnes corporis functiones valde labefactæ appareant: tum neque sensibus internis neque externis mens recte fruitur,

quod male cohærentes sermones ex phantasia corrupta indicant. Ad sunt præterea continuæ vigiliæ, cum corporis inquietudine summaque anxietate junctæ, appetitus constans est prostratio, corpus valde emaciatum & consumtum videtur, omnis generis excretiones non recte se habent, urina mutata est, os plane aridum & exsuccum siti continua premitur, alvus constipata, vires penitus vacillant, pulsus arteriarum sunt minores, debiles, inæquales & accelerati.

10. Horum graviorum symptomatum in hisce febribus non alia reddi potest ratio quam motuum, qui in partibus solidis ac fluidis celebrantur, nimis adaucta vehementia, qua humores, qui vitam & vires tuentur, & functionibus secundum naturam præfunt, plane in crasi, mixtione & textura sua immutantur, corrumpuntur & destruuntur. Quandoquidem hæc sufficienter in physiologicis adstructa & demonstrata veritas hic quoque adduci & applicari meretur, quod nempe, si massa sanguinis & humorum debita ratione quantitatis & temperaturæ proportionem gaudeat, & æquabilis, libero ac moderato partium solidarum, præsertim cordis & arteriarum, pulsu, atque impulsu, per compagem corporis partium mere tubulosam & vasculosam circumferatur, tunc non modo vita & vires sibi consent, sed & omnes functiones rite sese habent. Nam vires, vitæ & sanitatis natura motuum atque sanguinis & humorum temperie unice continentur & conservantur: siquidem, quæ temperata sunt, omnia vitam & vires tueri, certa & constanti observatione comperimus. Catholicum aeris mobilissimum fluidum, sine quo nullum subsistere potest animal, nec nimis frigidum, nec nimis calidum aut humidum, sed purum & temperatum, vitæ ac viribus maxime favet & patrocinator. Omnia ex solidis & liquidis quæ assumuntur, quo magis ad blandam & amicam accedunt temperaturam, eo aptiora sunt magisque convenientia ad corporis nutritionem.



tritionem, ad sustentandas vires, omnesque animi & corporis functiones perficiendas; cum e contrario omnia, quæ intemperata sunt, ut nimis spirituosæ, calidæ, acidæ, pinguiæ, acridæ, falsæ, viscidæ & tenaciæ, sanitatem & vires admodum lædant & ad morbos disponant. Insuper, quam benigna & amica naturæ corporis animantium sit iusta & laudabilis sanguis & humorum temperies, vel ex eo clare apparere arbitror, quod benignissima parens natura, ineffabili illa & sapientissima machinæ animantium structura tot organa secretoria & emunctoria, & inter ea plurima & amplissimi usus viscera constituerit, quorum officii ratio vix ulla alia est, quam ut primo intimæ variarum tam solidarum, quam fluidarum, quæ sanguinem constituunt, partium mixtioni & fluiditati inserviant; deinde ut partes intemperatas ac superfluas nominatim falsas, acres, sulphureas, viscidas, aqueas, separent ac discernat, easque tanquam plane inutiles & noxias e corpore ejiciant atque proscribant, ut intemperata sanguinis & humorum massa permaneat.

II. Jam vero explicanda erit ratio, cur sanguinis iusta temperies & quantitas ad sustinendam vitam corporisque integritatem tantam energiam obtineat. Notum alias est, vitæ & sanitatis naturam libero & æquabili sanguinis & humorum progressu, & per vasorum systema circulatione contineri, eo quod hoc præsentem omnes & singulæ in corpore nostro, quæ sunt, functiones recte & secundum ordinem sese habeant. At vero solidorum motus, qui fluida regunt & moderantur, non aliam originem atque causam agnoscunt, quam ipsa fluida, sanguinem nempe atque in eo contentam subtilissimam, & nobilissimam, aerætheream substantiam. Equidem qui, nec corporum nec motuum naturam ac vires intelligunt, aut spiritum a corpore discernere norunt, neque, quales potentia motrices & mechanicæ insint diversæ corporum structuræ, ex-

perimentis satis edocti sunt, nihil corporeum in movendis solidis animantium partibus admittere volunt, sed potius ad plane ignota, & quæ nec definiri nec explicari possunt nomina, quæ pro veris motuum causis venditant, confugiunt, uti sunt innatum calidum, archeus, natura, sensus naturæ, vel natura sensu & ratione prædita, quæ percipiens eorum, quæ amica vel hostilia corpori sunt, pro horum æstimatione varie in conservationem corporis motus dirigat. Verum enim vero non negamus rem clarissimam, ad certas nempe perceptiones & cogitationes certos & determinatos quoque in quibusdam partibus enasci motus. Ecquis vero facultatis ratiocinandi gnarus inde concludere audebit, ergo perceptiones sunt causa efficiens horum motuum; ergo omnes motus, qui etiam præter voluntatem fiunt, a perceptionibus istis & operationibus animæ dependent: & porro, ergo omnes isti motus a nulla alia causa, quam ab hac dicta proficiuntur? Cui enim nisi hospiti in physicis & medicis ignotum erit, operationes, quæ animæ tribuuntur, nempe perceptiones, inclinationes varias, ingenii quoque vigorem & vires, & sic dictos animi affectus, a sanguinis & humorum temperie, a circulo & motu libero maxima ex parte dependere. Deinde quotidiana constat experientia, ad aeris, ad alimentorum mutationem, & pro diversis rebus noxiis & alienis, imo venenatis, vel etiam fatalibus, motus tam solidorum quam fluidorum pro lubitu accelerari, retardari, immutari, & actiones partium corporis labefactari posse. Itaque non opus est, ut causas manifestas sensui & rationi obvias relinquendo ad entia plane ignota, & quorum natura & actio in corpus nostrum ne ullo quidem solido argumento demonstrari potest, in allegandis motuum vitalium causis confugiamus. Nostra sententia hæc est: cor partium moventium in corpore animantium princeps, tubuli

arte:



arteriosi, & omnes canales, qui fluida veheunt, structura mechanico-geometrica gaudent, quæ in motum constrictionis & dilatationis, sive fistoles & diastoles ab ipso sanguine in vasis contento, & a fluido ejus tenuissimo, quod in cerebro secretum per nervos & nervosas membranas vehitur, animatur, & vigorem recipit. Etenim fluidorum ea est natura, ut eorum partes intestino semper gaudeant motu, adeo, ut quo tenuiora sint, eo majori virtute & potentia movendi, resistendi & expandendi instructa sint, ut videmus in aere, æthere & igne. Fluida itaque corporis nostri agunt in solidas partes, easque peculiari modo ad modum constructas movent, & solida motu agitata agunt rursus in fluida, easque inpellunt & propellunt, & hac actione mutua solidorum in fluida, & fluidorum in solida, circulus sanguinis & humorum vitalis absolvitur. Causa enim motuum, qui celebrantur in corpore humano, vitalium ipse sanguis est, mobilissima & subtilissima aereo-æthereo elastica substantia refertus, quæ una cum subtilissima & purissima lymphâ, in cerebri vasculoso cortice secreta, per tubulos medullares, & nervorum meatus ac poros, in membranas non modo nerveas, sed & musculosas influit, inque iis sensationis ac motus systaltici omnisque toni ac roboris, quo partes instructæ sunt, causa & auctor existit. Neque enim ulla pars corporis nostri est, si sensu gaudet, si motu ac robore pollet, quæ non influxu sanguinis arteriosi & fluidi nervei opus habeat, atque adeo vasis sanguineis & nerveis membranis instructa sit; quorum tam necessarius est usus, ut ligato nervo vel arteria partis cujusdam, protinus ejus sensus, motus quoque & nutritio auferatur. Motus cordis, qui præcipua & princeps curculationis sanguinis ipsiusque vitæ causa est, identidem non modo ab affluxu sanguinis copiosi, sed ab influxu fluidi, quod nervi vehunt, dependet. Quare si vel fluidum subtilissimum in cerebro deficit, vel per

animi affectus ejus motus turbatur & invertitur, aut nervi ad cortendentes in animantibus præscinduntur; statim machina illa cordis impulsoria quiescit, omnique motu destituitur, & corpus vita privatur.

12. Ad motum itaque cordis, arteriarum, omniumque partium activum & systalticum, quo sanguinis & humorum progressio & circuitus perficitur, necessario liquidi cujusdam, ex cerebro & nervis provenientis, purissimi & mobilissimi sufficientem influxum desiderari, rem extra omnem dubitationem positam esse existimo: unde si vel liquidum hoc inquinatum, vel impurum est, vel insufficiens, aut plane deficit, non mirum est & cordis motum cessare, & ab eo dependentem vitam quoque tolli. Hisce suppositis, ad clariorem observationum, quas supra adduximus, explicationem jam paulo facilius & felicius pervenire licet. Propositum nempe est in ipsis observationibus practicis, in morbis periculosis & maxime acutis, uti sunt febres continuæ, præsertim exanthematicæ, inque earum statu, situm corporis erectum periculi plenissimum esse, adeo, ut etiam inopinatam mortem accerere possit. Si itaque rationem hujus peculiaris eventus inquirere paulo accuratius velimus, primo omnium necesse est, ut quid febrium accuratarum natura & quid erectus situs in earum vigore ad tantum vitæ periculum conferre possit investigemus.

13. Jam vero perquam notum esse omnibus, qui febrilis caloris indolem atque effectum penitus perspectum habent, arbitror: nihil magis benignam & blandam sanguinis humorumque vitalium temperiem ac mixtionem destruere, invertere, & dulces ac insipidos fluores in falsos, sulphureos, nimis calidos, excrementitios humores convertere posse, ut plane inepti fiant ad omnes motus & functiones in corpore præstandas, quam nimium & præcalidum in febre particularum sanguinis motum intestinum. Accedit, quod sub nimio & præcalido æstu ciborum appetentia penitus prostrata



strata sit, & nulli boni & laudabiles, nutritioni & vitalibus motibus præstandis idonei succi in eorum locum, qui sub febrili ardore deperditi fuerunt substitui possint. Denique neque illud prætermittendum est, acutas illas, easque exanthematicas atque malignas febres a materia sæpius valde virulenta, & quæ putridæ, fermentiscibilis indolis est, excitari, a qua longe facilius succorum vitalium naturalis & naturæ amica *œmæ* atque crasis destruitur. Jam vero inversa & destructa sanguinis boni, qui utique & motuum vitalium thesaurus & fundamentum est, in morbis acutis textura, non mirum est, vires motrices vacillare ac deficere, cordis & articularum motum languidiorem fieri, circulumque sanguinis segniorem, & robur cordis omniumque partium deficere, quod maxime in statu & vigore harum febrium conspicitur, sub quo etiam ob virium motricium defectum, & propter stasim & stagnationem sanguinis in partibus principalioribus, cerebro, pulmonibus, ventriculo, & subsequenter inflammationem sphacelofam ordinariæ ægrotantes moriuntur: utpote in principio febris, ubi non tam diu æstus massam sanguinis deturbavit, non tanta virium defectio, quam in statu, in quo jam per septem dies & ultra vehementia febris continuavit, observatur. Videmus itaque in vigore febrium massam sanguinis, ex qua fluidum nerveum, & omne illud, quod partes musculosas in motum excitat & animat, materiam & ortum suum trahit, plane corruptam, & depravatam esse, ut non mirum sit, vires, motus, & omnes actiones, quæ vitam sustinent, multum periclitari, motumque etiam cordis, a quo sanguis pellitur ad caput, valde imbecillem fieri.

14. Ex hisce itaque, quæ a nobis jam dicta & adducta sunt, facile liquet, perpendicularem corporis situm in eo statu, ubi cordis motus valde exiguus & contractus est, admodum perniciosum & periculi plenum esse, eo quod semper & perpetuo sub tali corporis positura ascensus corporis gravis ad perpendiculum

difficilis sit, multo vero magis, ubi vi impellens & movens cordis impar est sanguini ad caput & cerebrum protrudendo. Igitur exinde jam liquido constat, si cerebrum sanguine destituitur, ex quo prodit fluidum illud, viribus motricibus ad solidas corporis humanæ partes regendas & movendas instructum, si porro etiam ipse sanguis in acutis iis, quæ malignis febribus plane corruptus & depravatus est, cessare penitus fluidi nervei, quod quasi, secundum Verulamium, rota suprema est, quæ omnes corporis nostri partes circumagit, secretionem, & inde animi defectionem atque syncopen fieri, vel minimum circulationem sanguinis longe debiliorem reddi; transpirationem quoque & excretionem inde imminui. Quam exitiosa verò in acutis febribus sit inertia motuum vitalium, & debilior sanguinis circuitus, vel plane ejus interceptio, exinde indicare licet, quia motus sanguinis ad cutem, quæ præcipuum corporis emunctorium est, & quo sordes in febribus excrementitiæ ejici & morbus solvi solet, inde turbatur, & valde imminuitur; unde videmus post situm corporis erectum paulo longiorem in febribus externum habitum corporis pallefcere, constringi, collabi, refrigerescere quoque, cutisque poros ac meatus occludi, quod cum ita contingat, non modo excretionis noxiæ materiæ, quæ per cutis peripheriam fieri adhuc debebat, impeditur, & materia e corpore eliminanda intra illud detinetur, sed &, quæ jam factæ erant, invertuntur. Hinc enim fit, ut petechiales maculæ vel plane dispareant ac retrocedant, vel livescant & colorem cœruleum contrahant. In purpura, quæ rubra erat, totus ille ambitus rubicundus simul & semel pallefcit, purpura ipsa albescit, aut sub constrictione cutis paulo fortiore repente evanescit; morbilli cito disparent cum totius ambitus externi corporis pallore ac refrigeratione; variolis idem evenit, dum pustularum ambitus, alias rubicundus & floridus pallefcit, aut livescit, pustularum incrementum sufflaminatur, earumque

suppu-



Suppuratio impeditur, aut materia suppurata retropellitur, ut pustularum superficies vel concidat foveasque formet, vel indurescat, corneamque duritiem repræsentet.

15. Sordes itaque excrementitiæ e corpore ejiciendæ, sed hoc modo retropulsæ, humoribus iterum permiscetur, atque non modo motum intestinum corruptorium ac dissolutorium illis inducendo mixtionis dissolutionem funestam minantur, sed etiam cum humoribus ad partes interiores nobilissimas, præcipue nervosas, delatæ, hic loci motus spasticos producant, qui promptissime in spasmos universaliores ac convulsiones degenerant, sub quibus ejusmodi ægrotantes ordinariæ & ut plurimum moriuntur. Hæc itaque cum ita se habeant, luculenter satis inde patere arbitror, quare tam noxius deprehendatur situs corporis erectus, in morbis periculi plenis, & præcipue in febribus exanthematicis; & quam necessarium consequenter sit medico practico, ut hanc quoque notatu dignissimam observationem in praxi probe attendat, damnaque, que ex hac corporis positura in ejusmodi ægrotantes redundare possunt, tempestivo consilio avertere studeat. Dissuadendus igitur omnino est situs corporis erectus, atque sedulo monendi ægrotantes, qui velejusmodi morbo acuto, prout sunt febres continuæ, præsertim exanthematicæ, laborant, vel etiam quorum vires ex diuturniori quodam & chronico affectu, uti sunt phthisis & hæctica, valde jam debilitatæ & prostratæ apparent, ne in horum affectuum statu & vigore lectum atque decubitus in eo deferant, ac vel in lecto vel in sella quadam erecti per aliquod tempus sedere, inque hoc situ diutius commorari cupiant; caveat sibi quoque medicus, ne hoc tempore clysteribus, præsertim stimulo salino fortiori munitis, multo minus aliis purgantibus fortioribus, alvum nimis sollicitet, atque hinc crebrioribus dejectionibus ægro occasionem præbeat e lecto surgendi, ac in erecto situ diutius permanendi, multo potius, si alvus jam per se, absque ulla stimu-

Opusc. Path.

latione, fluida existat, eam sub decubitu deponendam suadeat. Denique si forte aliquando ex improvviso in ejusmodi morborum statu ægrotum in situ erecto deprehendat, consultum erit, analeptici aut confortantibus eidem succurrere, viribusque valde labefactatis ac debilitatis aliquatenus reficiendis ac restaurandis operam dare, ut adeo ex omni parte dicta funesta symptomata, quæ diuturniorem in situ erecto commorationem consequi solent, quantum fieri potest, præcaveantur & avertantur, ægrorumque salutis & sanitati restituendæ omni modo prospiciatur.

## DISSERTATIO X.

### DE CRISIUM NATURA EJUSQUE EXPLICATIONE RATIONALI.

#### §. I.

**P**rimus, & qui omnium optime, scitu non minus utilia quam necessaria de crisis & diebus criticis eorumque effectu in febribus prodidit, ipse est Hippocrates, quem plures postea & inter hos Galenus ejusque affectu secuti quidem sunt, tantum autem abest, ut hanc doctrinam longe utilissimam experimentis ac observationibus auxerint, ut potius in nonnullis eam pervertendo deturpaverint. Placet itaque ipsum fontem, a quo utilia hæc in artem medicam promanarunt, Hippocratem nimirum adire, & scientiam de crisis inde haurire, eamque & experientia & ratiociniis stabilire, ut dein facillimum sit, superflua nec non defectus ac erroneos conceptus, circa hanc materiam occurrentes, clarius intueri. Primum vero perquam dignum est observatione, vocabulum crises *πρήσις* esse, & varie tam a veteribus, quam recentioribus accipi. Alii enim sæpissime pro ipsa noxiorum in corpore excretionem ut HIPPOCRATES sumunt, qui lib. de arte corrupti ossis excretionem crisin appellat. Alii ut GALENUS *Comment. in aph. 13. sect. XI.* crisin pro secretionem humorum noxiorum



rum facta in febris accipiunt: Hesychio enim & Suida notate auctore LANGIO *lib. 1. epist. 37.* το κρι'νεν sequestrare & veluti per cribrum aliquid excernere de- notat. Alii denique non raro pro ipso motu critico & maxima actionum in corpore perturbatione, sive, ut loqui- amant, certamine naturæ cum morbo sumunt, ubi terminus a quo status mor- bi, terminus ad quem salus & mors est. GALENUS *sect. 2. apb. 13.* *crisin* vocat, subitam ac repentinam in febre mutatio- nem ad salutem vel mortem, sive in melius vel deterius. Vulgus vero medi- corum sæpenumero *crisin* cum die vel tempore critico confundit.

2. Quoniam vero HIPPOCRATES primus est, qui de diebus criticis & cri- sibus facit mentionem, non inconsultum erit, hic allegare, quo sensu ipse hoc vocabulo fuerit usus. Testantur autem ejus præclara monumenta, *criseos* vo- cabulum ab ipso communiter fuisse acce- ptum, de judicio nimirum, quod for- mat & formare debet ex morbi circum- stantiis & subjecti natura, de morbi even- tu sive fausto sive infasto, unde crisis bona vel mala, fida vel infida exsurgit. Et *lib. de adfection. §. 8.* ita scribit: *judicare in morbis est, cum morbi augeantur aut minuantur, aut in alium morbum transeunt aut desinunt.* Dehinc familia- rissime hac voce denotat morbi solutio- nem, hinc clare de *præcept. sect. 12. tom. III.* ait: Κρίσις ἐστὶν ἀπολύσις νόσου, crisis est morbi exolutio. Passim quoque in scriptis Hippocratis hæc formulæ lectori occurrunt; hic morbus vel hic æger die septimo vel decimo quarto perfecte ju- dicatus est, i. e. morbus solutus & æger convaluit.

3. Ut autem verum & evidentem de crisi morborum acutorum conceptum no- bis formare queamus; res ipsa poscere vi- detur, ut omnia *criseos* requisita recen- seamus. Primo itaque tantum locum habet, & dicitur de morbis acutis & speciatim febribus continuis: νόσος enim chronicis magis adfectionibus competit. Dein crisis certis tantum morbi diebus instituenda est, inter quos solennes sunt

a morbi initio septimi & semi-septimi, reliqui dies parum vel nihil ad *crisin* fa- ciunt. Denique hisce diebus de transi- tu morbi ad salutem, mortem, vel alium morbum medicus judicat. Tandem *cris- in* decretoriis diebus ex certis signis medicus instituit, inter quæ non mo- do urina & excretiones, sed & ipse pullus & vires ægri attendi debent. Et hæc sunt, quæ, mea sententia, legiti- mum de crisi medica in morbis acutis absolvunt conceptum; quidve prudens antiquitas per eam intellectum velit, designant. Quanta itaque hæc elegan- tissima doctrina in praxi se commendet, facile colligere licet: quid enim præ- stantius? quam quod, natura providen- tissima sic dirigente, statim ac certi dies a medico observandi sint, in quibus præcipue ad id, quod presens, præte- ritum, quodve futurum est, respicien- dum, & ex his de morbo judicium est instituendum.

4. Primum vero ex HIPPOCRATIS, quæ nobis reliquit, scriptis perspicua loca adducemus, quæ clare demonstrabunt, quibus diebus crises fiant in febribus. Pri- mus esto, qui exstat de diebus *judicato- riis §. 9.* *judicantur, inquit, febres quar- to die, septimo undecimo, decimo quar- to, decimo septimo, & vigesimo primo; ex his autem acutis quadam etiam trige- sima, deinde quadragesima, postea sexa- gesima.* In *lib. aphorism. sect. II. apb. 23.* & 24. hæc habet: *acuti morbi in qua- tuordecim diebus judicantur, septimæ quar- ta index est, alterius hebdomadæ octa- va principium est; considerata vero un- decima est; hæc enim quarta est secundæ hebdomadæ. Consideranda rursus decima septima; ipsa enim est quarta quidem a decima quarta, septima vero ab undeci- ma.* Idem auctor *lib. de prænot. §. 20.* hæc notabilia protulit: *placidissimæ febres & signis securissimis nitentes, quarto die desinunt aut prius. Malignissimæ vero & signis horrendissimis oborientes, quarto die aut prius occidunt. Primus igitur ipsarum insultus sic desinit; secundus autem ad se- ptimum producit, sextus ad vigesimum.* In *lib. III. de præag. 7. & 8.* morbos

adver-



advertere a prima die oportet, atque singulos dierum quaterniones observare; sic enim baud obscure scies, quo se conversurus sit morbus. Febres ardentes epidemicæ judicabantur bono ordine in septem ac decem diebus; it. lib. de septimestri partu § 6. hæc profert; dies maxime insignes in pluribus sunt primi & septimi, multum potentes in morbis & multum in foetibus; nam plurimi abortus in his diebus fiunt; & §. 8. hæc habet: medicum, qui agrotorum salutem recte conjectare velit, animadvertere quidem oportet & contemplari omnes dies; ex paribus vero decimum quartum, vigesimum octavum & quadragesimum secundum, hic enim terminus ponitur. Contemplari autem oportet per ternarios ac quaternarios.

5. HIPPOCRATIS igitur sententia est, ut ex superioribus adductis clarum sit, acutas & continuas febres solvi & terminari debere septenis diebus, si horum morborum salutaris sit solutio. Ea vero solutio per evacuationes, aut per sudorem, aut per urinam, alvum, sanguinem, sputum fit, sufficientes, & quidem criticis dictis diebus, hinc etiam criticæ vocari solent; excretiones hæ, si aliis diebus contingunt, minus salutare habentur, sed symptomaticæ esse solent. Egregia sunt, quæ circa hanc rem in medium adfert HIPPOCRATES §. 37. sect. IV. sudores febricitanti si incaperint, boni sunt tertia die & quinta & septima & nona & undecima & decima quarta & decima septima & vigesima prima, & vigesima septima & trigesima prima & trigesima quarta; hi enim sudores morbos judicant: qui vero non sic fiunt, dolorem significant, longitudinem morbi & recidivas. Consentientem hac in re habet GALENUM, qui de diebus judicat. qui sudores manant diebus indicantibus non criticis, laborem significant & diuturnitatem morbi, nam judicatoria non judicantia aut sunt funesta, aut certe sinistri judicii. Idem in eodem libro scribit: in duodecimo & decimo sexto die nullum judicatum vidit, in sexto judicantur agri cum difficilibus sym-

ptomatibus & periculo non mediocri imperfecte & obscure i. e. excretiones tum temporis sunt periculosæ. Illum vero HIPPOCRATES sudorem maxime judicat salutarem, qui febrem in diebus judicatoriis solvit, uti scribit lib. de Coac. §. 4. & eum malum, qui cum febre in acuto morbo consistit. Quocum etiam consentit aphorism. 65. sect. VI. febricitanti sudor oboriens febre non remittente malum; moram enim trahit morbus, & multam humiditatem significat.

6. Salutarem vero futuram crisin & morbi solutionem critico die secundum HIPPOCRATEM designant urinæ probe coctæ i. e. quæ tenues nec albæ nec copiosæ fiunt, sed saturatæ sunt, consistentiam habent & sedimentum deponunt. Notabilis hac de re locus in HIPPOC. lib. 1. epidem. sect. 11. §. 56. exstat: cruda & incocta, inquit, & in malos abscessus conversa in febribus aut judicationis sublationem, aut dolores, aut diuturnitatem, aut mortem, aut eorundem recidivas significant It. sect. IV. apb. 71. quibus septima die morbi judicantur, bis nebulam habet urina, quarta die rubram & alia secundum rationem: it. apb. 72, quibus urina pellucida, albæ, malæ, maxime autem in phrenitis apparent. De signis bonæ criseos ex urina memorabilia etiam notavit in Coac. §. 5. in principio urina in febre albam habens & levem subsidentiam, firmatim celerem dimissionem significat; subrubra & subrubram subsidentiam & levem habens, si ante septimum diem prodeat, septimo die liberat: post septimum vero tardius aut omnino post tempus aliquod diuturnius. Et quæ in quarto die nubeculam subrubram habet, septimo liberat, si reliqua juxta rationem habeat. Caterum tenuis & biliosa & vix tenuem & exiguum subsidentiam habens, & quæ ad melius ac deterius mutatur, diuturna est. Hac autem diutius consequens, aut temporis diuturnitate circa judicationem trabente, periculo non vacat: aquosa vero & alba perpetuo in diuturnis morbis difficulter judicat & secuta non est. Lib. III. epidem. sect. 11. ager quartus secundo die surdus cum urinis



albis tenuibus & pellucidis, quinto die mortuus est; & sect. III. ager quartus, scribit, cum urinis tenuibus & albis, quarto die moritur pbreniticus.

7. Fit etiam solutio februm quandoque per sanguinis eruptiones vel etiam per alvinam excretionem die critico; qua de re apud HIPPOCRATEM eximius locus est lib. I. epidem. §. 115. In febribus ardentibus populariter grassantibus, quibus bene large sanguis per nares erupit, per hoc maxime servabantur, & nullum novi, qui in hac constitutione mortuus esset, si recte sanguis profluxisset; in Philisto enim & Epaminone ac Sileno quarta ac quinta die parum de naribus stillavit & moriebatur. Sanguis autem plurimis erupit maxime adolescentibus & in vigore constitutis, & talium plerumque perierunt, quibus sanguis non erupit: senioribus vero ad morbum regium res devenit, aut alvi ipsis turbata sunt, aut dysenterici facti.

8. Acuti pectoris adfectus, ut est peripneumonia cum febre per sudorem æque ac sputum vires suas demittunt. Gravissimus auctor noster lib. de diebus judicat. de febre pleuritica hæc habet: judicatur morbus septima die, longissimus decima quarta. De peripneumonia ibidem scribit: symptomata patitur ager minimum diebus quatuordecim ad summam viginti uno, & tussit hoc tempore vehementer, & una cum tussi purgatur, primum quidem saliva multa ac spumosa, septima vero & octava die, ubi febris in vigore fuerit & humida sit peripneumonia, crassior minus, non. Nona vero & decima cum virore pallida ac subcruenta; duodecima autem usque ad decimam quartam multa & purulenta. Atque hoc in his contingit, quorum natura & corporis adfectiones humida sunt & morbus fortis est. Quorum vero & natura et morbi constitutio sicca est, in his minus.

9. Considerata hætenus februm solutione, quæ diebus criticis variarum excretionum beneficio fieri solet, jam res & ordo quoque postulat, ut de imperfectis crisi- & solutionibus, quæ fiunt per abscessiones, sive, ut

Hippocratico vocabulo utamur, apostasies & decubitus in aliis presertim extremis partibus quædam dicamus. Hos inter abscessus merito numeranda sunt erysipelata, bubones, dolores arthritici, & tumores, maculæ, postulæ boni & mali moris, purpura, variolæ, & hujus generis plura exanthemata; hæc ipsa secernit etiam natura statim diebus, & sæpe magno cum emolumento, nempe cum febris & symptomatum mitigatione, utut non sufficiente & plenaria. Quod ad erysipelas attinet, notum est, quod hoc ipsum vehementer febre invadat, quæ tumore apparente in cute postea solvitur; & quod HIPPOCRATES ipsum erysipelas inter abscessus judicatorios referat ex lib. II. epid. sect. III. §. 59. luculenter apparet, dum ait: quæcumque sine signo judicationis judicatori disparent, male indicata sunt, velut erysipelas ancillæ Polymarchæ. Deinceps criticis februm solutionibus etiam artuum, genuum ac coxendicorum dolores ac tumores subjungit de judicationibus & Coac. I. Ita lib. III. epid. sect. I. agrotus tertius die vigesimo coxa dextra dolore non quidem perfecte judicabatur. Denique inter abscessus, sive quæ sub cute abscedunt, recenset tubercula & putrescentia, & quæ suppurantur, pustulas quoque, uti videre est ex loco, qui existat lib. II. epid. §. 45. nullum dubium, quod hic etiam morbilli & variolæ subintelligantur. Inter abscessus merito quoque tubercula sive tumores circa aures refero, in quos tandem febres resolvuntur, id quod ab auctore nostro, qui sect. I. lib. I. epid. §. 10. tubercula, inquit, circa aurem alteram multis erant, plurimis ex utrisque citra febrem erecte obambulantibus, quibusdam vero etiam parum incalescebant. Fiebant autem hæc adolescentibus, juvenibus in vigore constitutis & ex his plurimis, qui circa palæstram exercebantur. Notabilissimus vero locus est de iis, in quæ febris abscedit, in lib. de victu acut. §. 35. dum loquitur de febris ardentis certo genere & addit: si non sanguis ex naribus fluxerit, aut abscessus circa collum fiat aut crurum dolor & sputa



*sputa crassa spuerit, aut coxæ dolor aut pudendi livor, non iudicatur, & testis intensus iudicatorium signum est.* Nec minus carbunculus pestilentialis inter abscessus recenseri meretur, qua de re *lib. VIII. epid. §. 55. legi potest.*

10. Desumimus hactenus doctrinam & historiam de crisi- & diebus criticis ex ipso Hippocrate, qui primus eam nobis detexit ac revelavit, hunc presso pede insecutus est *Galenus* fidelissimus Hippocratis imitator, qui in omnibus fere hanc doctrinam confirmat, & dierum criticorum præsertim septimi naturam ac potentiam salutarem mirifice extollit, sextum vero infidum & suspectum pronunciat, & hunc tyranno, illum regi assimilat, quoniam ille levat, hic semper discrimen affert & cum difficillimis symptomatibus & imperfecte & sinistre iudicat, de qua relegatur *lib. I. de diebus decretoriis.* Illud vero singulare habet *Galenus*, quod nonum diem etiam inter criticos salutes referat, unde *loc. cit.* proponit, se conspexisse per experientiam æstate quadam plus quam trecentos homines acute ægro- tantes universos vel septimo vel nono die crisin habuisse. Porro notabile est, cum scribit, se neminem perire vidisse, qui præcedentibus coctionibus crisin habuerit. vid. *lib. III. de crisi- bus cap. 3.* & quod nunquam crisis sit, nisi magna perturbatio præcedat & subito ac vehementissime natura a morbo irritetur; unde semper in statu eam fieri pronunciat semperque præcedentem diem & noctem gravio- rem esse dicit, nec ullum a morbo liberari, nisi ubi aliqua evacuatio ef- fatu digna aut abscessus aliquis contige- rit: hinc crisin nominavit, quando mor- bus per excretionem vel abscessum fini- tur. Cæterum ipse *GALENUS lib. de diebus decretoriis*, principes criticos vo- cat septimum, decimum quartum, vi- gesimum, in quibus plures sanari, quam mori declarat. Secundum dierum cri- ticorum ordinem vocat contemplabiles indices internuncios, quod in hisce cri- ticos futuræ in septimo die signa elu-

Opusc. Patb.

ceant, si nempe excrementa fuerint co- cta, & hi dies sunt semi-septimi i. e. dies inter septimum & tertium, reliquos dies inter indices & vere criticos dixit interca- lares vel etiam provocatorios, quod natu- ram ad excernendum prorritent, & ejus- modi sunt in prima septimana tertius & quintus, reliqui dicuntur vacui, quia nec decernunt, nec indicant, nec provocant. Medicinales vero, quia illis diebus ægris mederi, iisque cathartica citra pericu- lum exhibere potest medicus; & hoc apertis verbis *divinus senex lib. IV. de morbis* expressit: *quicumque, inquit, fe- bre continua correpti cathartico diebus par- tibus usi sunt, hi nimium purgati sunt nun- quam: at qui diebus imparibus catharti- co sunt usi, nimium sunt purgati & mul- ti perierunt. Dies hos quidam criticos ar- tificiales vocant, quod arte medica iudi- cent, i. e. solvant. vid. Laurent. p. 110. de crisi- bus.*

11. Postquam itaque tam ex *Hippocra- tis* quam *Galenus* præclaris monumentis ea, quæ de morborum acutorum crisi- bus & diebus criticis utilia & necessa- ria tradiderunt, delibavimus; antequam de iis nostrum iudicium interponamus, & eorum, quæ veritati & experientiæ conveniunt, rationes aptas reddamus, utile erit, ut eos auctores & illorum argumenta, qui hanc doctrinam in du- bium vocarunt, producamus atque con- sideremus. Primus ex veteribus fuit *Asclepiades*: hic teste *CÆLIO AU- RELIANO lib. I. cap. 14.* statuit: non esse in passionibus statos dies, quos cri- smos appellant, etenim non certo aut legitimo tempore ægritudines solvi. Huic vetustissimo auctori assentitur quo- que *CELSUS*, qui *lib. III. c. IV.* diler- te scribit: *est de diebus dubitatio, quo- niam antiqui potissimum impares seque- bantur, eosque tanquam dum de agris ju- dicaretur ægritudo nominabant. Id Ascle- piades ut vanum repudiavit, neque in ul- lo die, quia par imparve esset, bis vel majus vel minus periculum esse dixit; in- terdum enim peiores dies pares sunt. Non nunquam etiam in ipso morbo dierum ratio*



mutatur fiuntque graviores, qui remiffiores effe confueverunt; verum in his quidem antiquos tunc celebres admodum Pythagorici numeri fefellerunt; dum hic quicumque medicus non numerare dies debeat, fed ipfas accessiones intueri. Inter recentiores HELMONTIUS qui *lib. de tempore* §. 53. crifes in praxi fedulo perstringens; notavit, inquit, quod nusquam fit crisis, ubi medicus artis suæ gnarus morbum ante crisis expectationem sustulit. Etenim ut natura ordinariis gaudet motibus, iisque adfuetæ est & unitate virtutis motricis gubernatur lubens: ita quando totum morbi negotium suis tantum incumbit humeris, statas ipsa ciet crifes, quas alioqui medelæ anticipat bonitas pravitæque retardat vel perdit. Sic nempe dies crifeos decimus quartus in quadragesimum prolatus est. Boni ergo & fidelis medici est crifes negligere, præstaretque ægros medente caruisse, quotquot per crifin evadunt, multo magis, quarum crifis tardior est. Idem de febrib. cap. 2. §. 8. verus ergo medicus ante crifin morbum superare debet, sin secus egerit, medicæ artis auxilio nihil penitus adscribi poterit. Si enim crisis, infert Cl. LANGIUS *Miscell. quæst. 4. in morborum curationibus expectanda medicina, profecto supervacaneum seu inutile magisterium erit; quia totum medendi negotium naturæ quasi unica, non vero arti, nec ejus profecto hac ratione committitur*. Ejusdem sententiæ est Faber, qui *panchymag. tom. III. medico incumbere docet, ut morbo ante crifin & sine crifi medeatur*. Accedit huic Comes de Flisco qui in *lib. de fato* aperte profitetur, in praxi numerum hunc dierum non semper observari, & sæpius aliis etiam diebus crifes fieri.

12. Sunt præterea alii, qui quidem existentiam ac ulum dierum criticorum in dubium vocant, observationem tamen hanc in Græcia saltem, non vero in nostris regionibus locum invenire existimant. Ita Cl. WALDSCHMID. in *fundament. med. de crifi* dicit: notandum venit nos non admodum curiosos esse debere in rimandis causis criticarum mutationum, cum in nostris regionibus

bus & hoc nostro tempore tales crifes non amplius fiant; hinc etiam prædictiones nostræ in morbis acutis non adeo certæ sunt nec indubitata fidei, prout apud Hippocratem inveniuntur; ubi alia phaenomena nobis raro vel nunquam conspicienda apparere. Et Eichstad. *pad. astron. sect. III. p. 372. in nostræ Germaniæ regionibus & præsertim sub nostro polo & in solo nostro rarius crifes perfecte ad salutem eveniunt*. It HOLLERIUS in *aphor. Hippocr. in frigidis & borealibus regionibus rarius expectantur critica exactæ evacuationes*. Causam quod spectat, cur in nostro climate tam raro observentur exquisitæ crifes, diebus criticis evenientes, non nulli in ipsam regionum temperiem rejiciunt vid. WEDEL in *dissert. de diebus criticis*. Neque ab hac sententia dissentire videtur BAGLIVUS p. 140. in *prax. medica* qui fatetur in Græcia perfecte succedere crifes in acutis morbis, non vero ita in nostris septentrionalibus regionibus. Id quod adscribendum putat aeris puritati & tenuitati illius regionis, ut & adjacentis orientis valde elastici; cum noster aer aqueis & crassis impuritatibus fœdatus, humores quoque corporis magis impuros nunquam non faciat, ut ad debitum crifeos sive despumationis officium nunquam possint pervenire.

13. Restat jam, ut causas effectuum mirabilium dierum criticorum in acutis secundum veterum maxime sententiam & mentem adducamus. Plurimi vero in eo conveniunt; motuum criticorum causam efficientem non aliam esse, quam naturam corporis, animam sive principium motuum in corpore nostro, quod regit & totam machinam gubernat, quod tollit morbos, quod ut *lib. VI. epid. sect. V. exstat*, a nemine informatum est, nec quicquam didicit, ea tamen, qua decet, quæ fieri & ubi fieri debent, efficit, quod cum morbo committitur, nec extremum certamen detrectat, magno impetu insurgens, noxium a bonis secernit, per debitas vias debito & convenienti tempore bonum & necessarium in finem, & tales efficit commo.



commotiones & tali proportionem ac gradu, qui præfenti materiæ morbificæ quadrat, idque ex fe & fua natura libere, non coacte ex caufis externis neceffariis ceu res incorporea, quæ a rebus corporeis nec affici nec alterari potest. Nonnulli ceu cauffam remotiorem naturam adjuvantem aſtralem influxum præcipue lunæ adjiunt, prout nimirum hæc planetas ſalutares vel infaſtas adſpiciens ſigna zodiaci ingreditur.

14. Poſtquam igitur ex veterum ſcriptis criticorum dierum & criſium hiſtoriam variasque deorum effectibus deduximus ſententias, proximum nunc eſt, ut & noſtram ſententiam, quidve veriſalſique hic doctrinæ inſit, exponamus, & an dies critici, & quare tam eximium uſum, ut veteres voluerunt, in praxi medica habeant, doceamus. Quoniam vero ad veritatem in rebus phyſicis & medicis indagandam ſemper eminet experientia, quæ omnis veritatis, quæ in facto conſiſtit, & ratiocinationis medicæ primum fulcrum ac fundamentum eſt, quare etiam in hac materia ea primum nobis conſulenda eſt. Qua de cauſa, quæ nos, omni auctoritatis præjudicio exuto, circa ſolutionem febrium, præſertim certis ac ſtatibus diebus attente obſervavimus, candidè proponenda ſtatuimus. Primo experientia indubitata certum eſt, ephemeras febres viginti quatuor horis, ſynocham quarto vel ſeptimo die cedere plerumque per ſudorem vel hæmorrhagiam. Pleuritis ſeu peripneumonia levior & mitior ſit circa diem quartum, per tuſſim ejecta materia cruenta, circa ſeptimum plerumque ſolvitur ſudore & liberiori expectoratione; gravior vero extenditur ad decimum interdum quartum diem, & ſi ulterius procedit, in empyema mutatur. Ventriculi eryſipeleas, quod febre indicatur leiptyria, per ſuperiora vel inferiora evacuatione, ſudore quoque vel quarto vel ſeptimo die dimittit. Febris inflammatoria hepatis ſeptimo, undecimo vel decimo quarto die partim ſudore partim etiam alvi profluviò exſolvitur, ſi pars

nempe concava hepatis fuerit inflammata. Coniunguntur inflammationibus internis viſcerum narium ſtillicidia, quandoque ſalubria, ſed rarius vel plane non perfecte morbum ſolventia. Tertianæ ſimplices ſeptenis circuitibus ſpontè ſua ſæpiſſime recedunt. vid. *lib. de judic. §. 4.* Ardeſtes febres bilioſæ ſeptimo plerumque aut die decimo quarto ſudore & alvo liberiori ſolvuntur. vid. HIPPOCRAT. *l. c. de judic. §. 4.* Petechiales ſeptimo, undecimo, decimo quarto, nonnunquam etiam, licet rarius, vigefimo primo demum virulentiam ſuam exuunt. Peſtis quarto, ſeptimo vel undecimo die, ſi ſervatur æger, truculentiam relinquit, & uno verbo pleræque febres continuæ ſeptimo, undecimo, decimo quarto die ordinariè finiunt. Et febres malignæ & peſtilentiales plus alvina excretionè, quam ſudore finiuntur, uti ego ſæpe & GALENUS *lib. de atra bile cap. IV. it.* GERHARDUS *Columba in lib. de febr. peſtilent.* mirifice excretionis alvinæ effectus in harum febrium ſolutione commendat, ubi ſcribit pag. 231. *quod in illa conſtitutione peſtilenti fere omnes, quibus alvus copioſe ejecit, licet cum ſignis cruditatis fuerit, tandem liberatos fuiſſe. Procedente enim, pergit, alvi ſuore in dies coctionis ſigna ſuperveniebant, morbus evadebat clementior, & tandem alvi ſuore perſeſverante, fideliter & integri ægri judicabantur.*

15. Quod attinet ad febres earumque commotiones, quæ quidem non penitus ſolvuntur, ſed mitiores tamen fiunt, apoſtaſi ſeu decubitu noxiæ materiæ in partibus corporis facto, hæ temporis ratione ſic ſe habent. Eryſipelas cum febre vehementiſſima invadit, ſed die ſemiſeptimo, i. e. inter tertium & quartum diem propulſa materia ad ambitum corporis plane quieſcit. Variolæ, morbilli adoriuntur corpora cum vehementibus ſymptomatibus intenſaque febre; hæc vero die ſemiſeptimo, propulſata cauſtica acri materia ad corporis corticem, mitior non modo ſit, ſed ſimul acerbiffima ſymptomata conquieſcere



scere solent. Febres purpuratæ, acri pernicioso humore ad corporis ambitum relegato, circa quartum diem omnem acerbiter symptomatum deponunt. Petechiæ quarto vel septimo die cum levamine quodam semper prodeunt. Febres arthriticæ, si vehementes sunt, mox mitescunt, ad artus acri caustico humore delato. Febres biliosæ die septimo vel nono vel undecimo vel decimo quarto, ictero superveniente, ad apyrexiam perveniunt; hinc recte HIPPOCR. *de judic. §. 10. desinente febre ardente, si accedat morbus regius, non solet amplius exsudare, neque usquam alibi abscessum facere, sed sanus fit.* Bona etiam & salutaris apostasis est tumor in meatu auditorio, & ex eo proveniens surditas, quæ in Hungarica febre, & acutis cum cephalalgia & delirio junctis, si die critico supervenit & constans est, plerumque faustissimum convalescentiæ signum prebet, id quod jam olim suo tempore etiam notavit HIPPOCRATES *sect. II. apb. 60.* Ratio hujus peculiaris observationis in promptu est; naturæ enim robustæ indicium est, quando ad partes extremas ignobiliores & emunctoria, quales hic sunt glandulæ meatus auditorii, humorem sine dubio viscidum sulphureum propellit; unde clare poterit intelligi propositio HIPPOCRATIS *lib. de judic. §. 11. quibus in febribus aures obsurderunt, his non soluta febre insanire necesse est. Solvit autem sanguis e naribus erumpens aut alvus biliosa egerens, aut dysenteria arrodens, aut coxarum aut genuum dolor.*

16. Tandem nec hoc præterire possumus, quod in nostris regionibus valde familiares in febribus acutis sint metastases, ubi natura imbecillior facta non sanguinem vel humorem peccantem e corpore foras expellit, sed ad partes internas sub temporibus criticis & extra ea amandat. Sunt vero hæ metastases omnes fere exitiosæ; nam ex stagnatione, quæ exitiosorum symptomatum, & præcipue lethalitatis fons ac causa existit, nascuntur, fiuntque sic phreniti-

des, convulsiones, tendinum subsultationes, quæ a sanguine copioso in vasis cerebri stagnante originem suam petunt. In pectore etiam inflammationes & suffocationes a congesto ibi sanguine finem vitæ faciunt: simili modo in faucibus, œsophago ejusque orificio a stasi sanguinis ortæ inflammationes anginosæ, aphthæ cum oris ardore & siti inexplibili, deglutiendi difficultas plerumque lethum prænunciant. HIPPOCRATES *sect. IV. apb. 50.* in febre continua difficultatem spirandi cum delirio lethale signum æstimat. *It. apb. 52.* involuntariam lacrymarum emissionem, difficilem quoque deglutationem dictis in febribus lethalem febris notam perhibet. Ea enim jam stagnantem & extra circulum constitutum in dictis sanguinem indicant.

17. Denique circa solutionem febrium, ipsa vera & firma assentiente experientia, salutarem sequentia merentur observationem I. In cujusvis febris salutari dimissione & solutione circa diem criticum vel in ipso vacuatio notabilis sive per sudorem sive per alvum semper fere contingit, eaque satis liberalis, ut quandoque per aliquot dies duret, & præsentem hac, imo sub hac & post illam pulsus fieri solet sedatior, vires crescunt, animus vigorem acquirit, erectior fit, somnus evadit quietus, & calor membra desinit. II. Quandoque largæ evacuationes vel extra dies criticos vel in illis contingunt; vehementia vero morbi & symptomatum non decrescit, sed potius in eodem statu permanet vel increscit, tunc pessimum indicium est. III. Observatio constans & frequens est: sicuti fausta solutio morbi & symptomatum hæc est, quæ fit diebus criticis cum levatione & evacuatione, ita omnes evacuationes, quæ hisce temporibus non instituuntur, ut ut primum corpus levare videantur, non sunt tutæ, sed suspectæ; inde HIPPOCRATES *sect. V. lib. II. epidem.* perpetuo ea damnat, quæ levant diebus non criticis. IV. Observatur, si variolæ morbilli, petechiæ, purpuraceæ maculæ



culæ mox primo vel secundo die insul-  
tus prorumpunt, eas esse notæ pessimæ.  
V. Urinæ copiosæ tenues nullo febris  
continuae tempore salutare observantur.  
VI. Ante exanthematum propulsionem,  
& sic dictas abscessiones a partibus inte-  
rioribus ad exteriora, fere semper ma-  
ior vehementia & symptomatum exacer-  
batio motuumque turbatio contingere  
solet; unde canon HIPPOCRATIS  
*apb. 13. sect. II. verissimus est; quod ante*  
*crisin nox præcedens gravior, post eam vero*  
*quietior sit.* hoc ipsum vero non perpe-  
tuo verum est de perfecta & plenaria  
febris solutione: hinc morbi solutionem  
non posse fieri sine præcedente exacer-  
batione morbi & symptomatum, & na-  
turæ perturbatione majori, non constans  
regula est. VII. Quanquam in febre  
continua acuta nunquam plenaria sym-  
ptomatum sit intermissio; locum tamen  
quædam habet remissio, quam nova po-  
stea symptomatum exacerbatio & incre-  
mentum sequitur, & hanc sæpe horri-  
pilatio cum rigore quodam præcedere  
solet; sub qua tam apostases quam me-  
tastases sunt metuendæ. VIII. In genere  
illud tenendum est, quod principium  
numerationis in criticorum dierum com-  
putatione, non a lassitudine, decubi-  
tu, vel mala ægri dispositione sit facien-  
dum, sed a motu febrili, qui ex horro-  
re, pulsus mutatione, dum nempe fre-  
quentior fieri incipit, cognoscitur, qui  
celeritatem singulorum pulsuum, quæ  
februm signum constituit pathognomo-  
nicum, manifestat; uti hoc ipsum fu-  
sus & accuratius in *dissertatione de pul-*  
*suum theoria & praxi it. de salubritate*  
*februm* ostendi. IX. Quamvis qua-  
ternarius & septenarius dierum semper  
majoris considerationis sint, quam re-  
liqui; nihilo tamen minus non semper  
in hisce locis Hippocratis & Galeni res-  
pondet observatio, e.g. quod quartus  
indcet septimum, undecimus decimum  
quartum, sed quandoque signa coctio-  
nis in urina non semper in hisce, sed  
in aliis demum fiunt atque visuntur;  
oportet potius in omnibus diebus ægri  
statum, vires atque excretiones con-

templari. X. Febres ardentes biliosæ,  
it. inflammatoriæ cum vehementia sym-  
ptomatum stipatæ, in subiectis præfer-  
tim sensibilibus, crises justo tempore  
semper habent perfectiores, quam mali-  
gnæ putridæ in subiectis impuris, caco-  
chymicis, debilibus ortæ, quarum intra  
quatuordecim dies terminus quidem est,  
sed non tam accurata tempora & dies  
servant criticos.

18. Verum enim vero non tantum  
diebus criticis solvuntur morbi, sed in  
hisce etiam sæpius exacerbantur & ægro-  
tantes non raro pereunt; unde est ob-  
servatio, & septimo, undecimo & deci-  
mo quarto die inflammatoriis, vario-  
lis, petechiis aliisque epidemicis acutis  
febris multos interiisse: nihilo secius  
tamen plures nono, quam septimo die  
moriuntur, plures imparibus diebus quam  
paribus. Copiosæ evacuationes per sudo-  
rem, urinæ tenues & copiosæ cum  
pulsu parvo, debili, frequenti & deliriis  
mortem prænunciant. Notavimus, su-  
biecta quo calidiora & sensibilia sunt,  
quo calidius clima & quo morbi vis vehe-  
mentior, eo citius morbum vel in me-  
lius vel in pejus solvi; tardius vero  
procedere crises in subiectis languidio-  
ribus, phlegmaticis, in frigidis & palu-  
dosis regionibus, sub minori morbi vehe-  
mentia, victu pleno, crasso & carneo;  
in tali statu recidivæ etiam familiares  
& in alios morbos facilius est transitus.

19. Porro & illud notabile, quod,  
uti bene monet Hippocrates lib. II. epid.  
§. 20. in quietis & constantibus tempo-  
ribus & annis tempesta præbentibus,  
boni status & iudicatu facillimos fieri  
morbos; in inconstantibus vero incon-  
stantes & qui difficulter judicantur.  
Hæc ita intelligenda sunt, quando  
anni naturalem suam constitutionem  
ac temperiem bene servant, & tem-  
pestates non extraordinariæ & præter-  
naturales contingunt, tunc & vegeta-  
bilia & animantium corpora bene sunt  
disposita; sique morbi in ejusmodi tem-  
poribus contingunt, ordinariam suam  
indolem, morem ac genium servant:  
unde etiam consuetis symptomatibus sti-  
pantur



pantur & legitime fua tempora percurrunt, folennibus quoque criticis diebus folvuntur; fi vero anni tempora a naturali fua indole defleunt & plane contrariam ac alienam adfumunt, unumque in aliud tranfmutatur, æftas autumnofimilis, hiemstepida, vel æftatis naturam referens, cœlumque diu nebuloſum ac humidum, ventis deſtitutum permanet; tunc & irregularem & plane inordinariam craſin ac temperiem fluores animantium accipiunt; inde peiores, inſuetis ſymptomatibus ſtipati, naſcuntur morbi, qui difficillime iudicantur, quoniam ſecundum ordinariam naturæ legem & curſum non procedunt. Et huius ratio in promptu eſt; aer enim, ipſius Hippocratis effato, eſt dominus & auctor maximus eorum, quæ in corpore noſtro fiunt, is elasticitate ſua robur & tonum non modo ſolidis, ſed & ſpirituafcentiam & expaſivam vim fluidis partibus elargitur: unde ſanguinis & humorum circulum & ab eo neceſſarias & integritatem corporis conſervantes excretiones diſpenſat atque moderatur. Neque dubitari poteſt in regionibus calidioribus, inque aere tenuiori & humores eſſe fluxiliores & mobiliore, & corpora ad tranſpirationem magis apta; hinc crifeſ & criticas acutorum ſolutiones plus in iis obſervari, quam in regionibus humidioribus, & ubi aer elatere deſtitutus non limpidus, ſed peregrinæ indolis effluviis eſt imbutus. Hac enim ratione non modo crifeſ retardatur nec ita ſenſibiliter fit, ſed & ordinarii naturæ motus certis temporibus adſtriſti multum turbantur; unde non ſine ratione nonnulli magni viri vel de crifeſ in noſtris regionibus dubitare, vel eas non tam accuratas eſſe, quam in Græcia pronunciare auſi fuerunt, inter quos nominandus eſt Caſparus HOFFMANNUS, qui in *Inſtitut. med.* p. 620. crifeſ apud nos eſſe rariffimas exiſtimat. Neque Baglivus in *prax. med.* diffitetur, in Græcia, ubi aer purior, regulares ejusmodi criticos motus plus habere locum, quam Italia. Verum enim ſedula & aſſidua obſervatio docet,

utique etiam in noſtris regionibus eas dari, ſed profeſſo inter anni tempora, regiones, victum, ægrotantium naturas & inter ægrorum tractationem a medico differentiam attendi debere; ſiquidem hæc omnia mirum, quantum limitant, & ordinarios naturæ in morbis motus modificant. Quare & Galenus optime monet in *lib. de dieb. decret.* quod diem crifeos cognituro agnoſcenda ſit ætas, natura, anni tempus, locus & pulſuum cognitio.

20. Conſentiunt in eo omnes fere medici ſaniores, quod præpoſtera medendi methodo vel errore in diæta commiſſo crifeſ vel anticipari vel poſtponi vel imminui queant: ita præclare diſſerit SENNERTUS de diebus criticis in *inſtitut. lib. III. part. III. cap. 2.* Si æger aliquem notatu dignum errorem commiſerit, non levis eſt ſuſpicio, eam crifeſ, quæ bono critico die e. g. ſextimo futura eſt, vel anticipato tempore citius, vel motu retardato tardius ut ſexto vel oſtavo die eventuram Clarius vero id exprimit Proſper MARTIANUS *comment. in lib. de morbis ſect. II. p. 174. continuo*, inquit, medicamentorum refrigerantium uſu (propter febrim) incrassatis humoribus corporibusque densatis spontanea evacuationes ſæpe prohibentur, ut hac non levis ſit cauſſa, cur noſtris temporibus tam raro ſiant crifeſ, quæ antiquis erant frequentiffimæ. Præclara quoque ſunt, quæ hac de re Cl. BAGLIVUS in *praxi med.* p. 254. ſcribit: mirari deſinant præctici, ſi bodie nec frequentes nec perfectæ ſuccedant crifeſ, uti olim in Græcia; ſiquidem illi Græcarum legum ignari vel obtrectatores a principio morbi ad declinationem uſque purgantibus, diaphoreticis, ptbebotomis, ſpirituofis aliisque imprudenter & intempeſtive exhibitis medicamentis agrotantem fere conſiciunt; ideo impoſſibile eſt, ut humores per tam diverſas medicamentorum ſeditiones diſtracti, ad critica deſpumationis negotium ſtato tempore diſponantur, ſed aſſiduis conſuſionibus agitati, loco crifeos perfectæ in metaſtaſes præternaturales deſinant, atque hac de cauſſa nec crifeos, nec dierum criticorum, nec aliorum demum naturæ motuum



motuum regulas ab antiquis traditas in febribus observabimus. Quapropter idem auctor non sine experientia refert: in rusticis, & qui medicorum opera non utuntur, manifesto documento hujusmodi crises sive despumationes peccantis materiae, per sudorem, alvi fluxus, urinam, aliasque naturae vias perfici, & motu prorsus ordinato fieri.

21. Cum itaque satis abundeque non modo auctoritatem probatissimorum in arte nostra virorum & recentiorum, sed & experientia indubitata veritatis magistra, doctrina de crisis & diebus criticis stabilita ac fundata sit, uti supra deduximus, restat adhuc, ut in horum natura mirabilium effectuum causas perscrutemur. Recte quidem Galenus in lib. de dieb. decret. fatetur, desumptam hanc doctrinam tantum esse ex experientia non vero ex ratione, & captum inquisitio accurata causarum hujus mirandae in natura operationis superare videtur; nihilo tamen minus, aliorum repudiatis opinionibus, eo annitamur, ut, quae vero proxima videntur, aptis ratiociniis explicemus atque proponamus. Exordiamur a veteribus, qui unanimi fere consensu causam crisis & dierum criticorum efficientem naturam esse existimabant, quam omnium actionum in corpore principium credebant, quae singulari agendi scientia praedita, certo tempore, ordine, gradu, proportionem mediisque utatur pro causae morificae diversitate motusque convenientes causae & obiecto ad certum finem instituat, nempe conservationem corporis certo tempore, & certis mediis sive organis eos dirigat. Quapropter agens illud, quod tanta prudentia movet ac regit omnesque motus tam in statu sano, quam morbofo justis ac convenientibus mediis perficit, esse reale, liberum, incorporeum scientia agendi praeditum existimant; maxime vero ex ejus effectu, nempe motu essentiam ejus incorpoream judicant. Nam motum putant in se & citra actum in corpore, vel dum in corpore fit, aut in corpus agit, non posse dici aut intelligi aliquid corporei, sed

ab essentia corporis sit separatum, & numquam cum corpore existat necessario, corpusque sine illo possit subsistere, adeoque ad corporeitatis formam, sicuti quantitas, magnitudo, figura non faciat. Hinc spirituale quid hujus motus causam esse, praesertim ordinati & regularis in corpore, colligunt; maxime quod nec alterationes humorum materiales, nec aeris varius status vel diæta, vel medicamenta motus naturae ordinatos minimum alterare aut invertere possint: ex eo vero spirituales ejus imprimis vim aestimant, quod solis phantasmatibus & fictionibus mentis perversio ordinis ac directionis horum motuum possit perfici. Hanc itaque naturam temporis etiam esse observantissimam credunt, i.e. certo ac determinato tempore actiones suas instituere, informando, perficiendo, sanando, homine conservando, causis morborum corrigendis, expellendis, justo cum tempore per congrua emunctoria praesenti materiae quadrantia e.g. humores viscidos & biliosos per alvum, tenues acres per corporis habitum, falsos & serum superfluum per renes, exundantem sanguinem per vasorum oscula, bilem volatilem acrem per vomitum expurgat. Dehinc naturam hanc liberrime in perficiendis notabilioribus & solemnioribus effectibus semper septenarium numerum dierum, mensium & annorum seligere adfirmant. Et haec veterum fuit sententia communissima, quae revera nihil aliud infert, quam quod mirabiles illi & ordinati effectus causam habeant similem, a qua illi proficiantur, quænam autem illa sit? cujus naturae sit? an scientia & rerum notitia sit instructa? an vero citra notitiam & cognitionem hi effectus ab ordine sive artificio & necessario ac physico causarum agentium hæc profluant? de hoc merito est quaestio.

22. Nullum dubium est, ordinem in quibuscunque rebus observatum, semper causam ipso ordine priorem supponere, hujus nempe ordinis auctorem, uti v.g. horologii causa artifex est; illud vero urgendum est, num effectus ordinati proximi



proxime ab ipso ordine sive mechanismo in natura posito, sive an a causa prima sive ordinis auctore, scientia & notitia imbuto, proxime sint derivandi? exemplo manifesto est horologium, ubi quod index accurate monstret horas, non proxime ab artifice, sed ab ordine & artificio deduci debet, quod causa proxima & immediata hujus effectus est; ita etiam illud ad corpus nostrum applicare licet, in quo ordinatissimos effectus in nutritione, augmento, perfectione corporis, in excretionibus, motu sanguinis, & morborum curatione videmus. Merito hinc quaestio est, an hi a Deo ordinis primo & perfectissimo auctore, sive a causa subalterna anima, an vero potius ex ordine, structura, & mechanismo corporis proxime sint deducendi? Nos in ea sumus sententia, si in rebus & medicis effectus proxime ex causis corporeis mechanicis, in sensus incurrentibus possunt demonstrari, non opus esse, ad causas primo obscuras & plane incognitas, spiritum, animam vel ad eorum sympathiam, antipathiam, terrorem, furorem, errores sive ad morales intentiones ac directiones refuge-re. Dein sentimus, quamvis omnes effectus, qui fiunt in natura, a priori & ad sensum & captum hominum clarissime ostendi nequeant, quomodo nempe fiant mechanice ob humani intellectus circumscriptos limites; ex eo tamen minime sequitur, non fieri eos a mechanica, sed a causa spirituali. Urgemus hoc maxime & instantissime, ut medicus & physicus causas semper proximas & physicas scrutetur; hæ enim scientiam pariunt & demonstrationem; non vero ad spirituales, metaphysicas, incognitas ac plane inutiles est confugiendum.

23. Nemo quidem sanæ mentis negare poterit, in corpore nostro artificiosissime constructo, principium etiam in habitare, cujus natura & operatio a motu & corpore plane est separata; uti est perceptio, cogitatio, directio motuum, voluntas, quæ sine corpore subsistere possunt, & cum ejus motu non habent convenientiam. Constanter vero negamus

& pernegamus, motum sive potius principium, a quo motus sive localis, sive intestinus in corporibus fit & dependet, non ad essentiam corporis spectare; siquidem non potest corpus sine operatione & operationis principio concipi; creatura enim mere passiva, quæ non principio agendi instructa est, non ens reale physicum, sed rationis est. Nunquam itaque corpus subsistit & existit, nec concipi potest sine principio interno motus innato, quod causa est virium & potentialium motricium, quas in alia corpora exercet. Ubique igitur corpus est, seu substantia extensa, ibi præsens est motus, nîsus, pressio, actio unius corporis in alterum; & ubi machina sive corpus organicum, ibi motus ad certum scopum ordinatus est. Nostrum corpus machina est artificiosissima, quæ ex decenti & concinna partium impetum facientium, fluidarum & solidarum dispositione actiones edit, id quod in conservatione corporis per digestionem, mixtiones & excretionem motus progressivos intestinos nutritionemque satis conspicitur. Hos vero motus non immediate anima in fibris motricibus perficit; sed hæc tantummodo certas motuum species in organis percipit, intelligit, distinguit, comparat, inque voluntati subjectis, partibus motis imperat. Maxime omnium vero illud magnum commercium notari meretur, quod Deus in homine inter animam & motus corporis constituit; utpote illa non quidem motus præstat immediate in corpore; modificare tamen eos & turbare existit idonea. Luculentum exemplum præbent animi adfectus & gravidarum phantasmata quæ quantam potentiam in sanguinis & humorum motum habeant, notissimum est. Contra etiam motus fluidorum operationes animæ, mores videlicet, passionem, mirifice disponunt, sicuti id ex diversa temperamentorum, ætatum, populorum, victus natura clarissime potest demonstrari. Quapropter nec dubitari debet, motus in corpore longe distinctos esse ab actionibus animæ, & sanguinem & fluida non se passive



habere, ita, ut ab anima regantur, sed potius hæc fluida actionem suam exe-  
runt in animam. Et ut paucis me expe-  
diam, quid clarius & manifestius? quam  
quod ab aere, potu, victu morbi fiant,  
vita confervetur, destruatur, sanitasque  
restituatur. Quid certius? quam quod  
structura partium solidarum in ætatibus,  
temperamentis, dispositione hæreditaria  
differens ad hos vel illos morbos dispo-  
nat; cum tamen hæc omnia nullum  
plane respectum vel communionem cum  
anima habeant; ut hæc igitur passive  
se habeant est necesse.

24. Cæterum quod in quibusdam acti-  
bus, & quidem præcipuis solemniori-  
busque justum tempus observetur, hoc  
inprimis mechanisimi præsentiam & ne-  
cessitatem arguit; ordo enim exquisitus  
& accuratus in actionibus videtur, ubi  
mechanismus fundamentum est. In ma-  
crocosmo id videmus, ubi notabiles  
sunt reciprocationes mari, flati venti &  
pluvie quibusdam in locis, temporum  
& tempestatum revolutiones, plantarum  
progerminatio; fecundatio, fructifica-  
tio, quæ singula certo tempore fiunt,  
certumque tempus requirunt. Elegit ve-  
ro hujus universi sapientissimus condi-  
tor liberrime, præsertim in microcosmo  
numerum septenarium, in quo multi  
solennes & mirandi sane effectus pro-  
ducuntur, qua de re in *dissertatione de*  
*annis climactericis* fusius egimus.

25. Appellavit veneranda antiquitas  
hunc numerum perfectum, plenum, fa-  
crum masculum, ob magnos, qui in illo  
fiunt, effectus, id quod satis infinitam  
artificis sapientiam, in natura nostra mi-  
crocosmica positam, prædicat. Non ve-  
ro existimandum est, in ipso hoc nu-  
mero hanc hæreere potentiam, quod  
nonnullis veterum placuit; sed ita res  
est concipienda: ad certos in rebus cor-  
poreis effectus producendos certa & spe-  
cifica proportio causæ agentis sive actio-  
num requiritur; jam vero omnes actio-  
nes physice nil nisi motus sunt, ideo-  
que certa proportio, certus numerus mo-  
tum ad certum effectum est necessa-  
rius: mensura enim & numerus motuum

constituit tempus, & tempus nil est,  
nisi certus motuum numerus; hinc certe  
actiones certum requirunt tempus. Et ut  
hoc ad nostrum institutum accommode-  
mus v. g. ut in inflammationibus certæ  
proportio stagnantis sanguinis in vasis  
dissolvatur, eluatur, certa potentia & nu-  
merus motuum est necessarius, quibus  
sanguis ex corde & arteriis ad partem  
adfectam impulsus, eam ab obstructione  
liberat: sic autem Deus nostram effinxit  
machinam, ut ad hoc negotium perfi-  
ciendum septem dies, & in his, qui fi-  
unt, sanguinis circuitus impendantur,  
hinc septimo die acutæ & inflammato-  
riæ febres ordinario solvuntur. Vario-  
larum, morbillorum, petechiarum, pur-  
puræ materiam esse acrem causticam,  
tot molestæ irritationes, in genere ner-  
voso & membranoso factæ, satis super-  
que testantur: hæc vero ut contemperetur  
mixtione aliarum partium ex sanguine,  
& sic ad secretionem ad habitum corpo-  
ris idonea reddatur, certum tempus re-  
quiritur, quod trium & quatuor die-  
rum spatio absolvitur; quo elapso mox  
peccans materia interna deserit & ad  
exteriora progreditur. Miasma in peste  
& contagiosis febribus summæ & pene-  
trantissimæ putredinis materia est, quæ  
sanguini commixta vel similem in to-  
tum introducit motum putredinosum,  
& sic lethaliter corpoream destruit mix-  
tionem, vel ipsa correctæ e corpore eli-  
minanda est, quod quidem ut fiat, ju-  
stum requiritur tempus, sive sufficiens  
motus ad corrigendam & nocentissimam  
materiam evacuandam. Eodem modo,  
quando ex stagnantis humoris putredine  
in viscere febris oritur, similiter cer-  
tus appulsi sanguinis putredinem eluens  
& abstergens motus est necessarius, qui  
certis numero pulsationibus cordis &  
arteriarum, quales nempe & quot fiunt  
septimo vel undecimo die, perfici de-  
bet. Plures ardentes ex bile acri cau-  
stica oriuntur, ad quam temperandam,  
corrigendam, & ut veteres loqueban-  
tur, ad ejus coctionem & maturatio-  
nem idem tempus requiritur. Hanc  
Deus, ut *Plinius* ait in *Histor. natural.*  
morbis



morbis pofuit legem, ut quaternario & feptenario numero finiantur.

26. Quod vero hoc definito tempore facta morbiolutio, non ab anima feu natura tanquam principio incorporeo intelligente, fed a mechanifmo proveniat, vel exinde colligere eft, quod crifes tales vel anticipent vel pofponant, irregulares fiant, fi victu æger peccet, fi perversa medicina morbus tractetur, & fi cauffa morbi fit iniqua ac infolentior: quapropter etiam pro annorum diverfitate, tempeftatum, regionum, ac fubiectorum variant. *Riverius in institut.* fcribit, motum & difpofitionem in cauffa efle, ut crifis nunc citius, nunc tardius, nunc diebus intercalaribus accidat, prout humorum benignorum vel malignorum celerior eft coctio. Quapropter fi cauffa morbi non adeo maligna eft, feu motus ordinarii non turbantur, aut perversa diæta vel medicina finiftra pervertuntur, fi corpora bene perfpirabilia, nec adeo impura funt, fi aer purus, ferenus, elasticus eft, tunc crifes iufto tempore & ordine procedunt.

27. Quæftio jam non fine ratione nafcitur, cur crifes plenæ & perfectæ diebus maxime criticis fiant, & quod crifes bonæ fint, quæ cum remiffione fymptomatum & evacuationibus fiunt: nam, ut *Galenus* habet, nulla crifis bona fit, nifi effatu digna præcefferit evacuatio. Explicatur nempe id hoc modo: naturam feptenarii numeri obfervantiffimam ex tempore omnibus viribus contra morbi cauffam infurgere, quam emollire & foras pellere ftudet, quoniam corporis noftri confervatio & duratio per excretorios actus maxime fufinetur, & fic a putredine feu morte defenditur. Ad quæ respondemus, animam quidem cognitione efle præditam, fed non naturam, quæ medetur morbis, & nullius rei confcia, ex neceffitate tantum agenda agit; hinc etiam ea nec cauffam morbi intelligit, nec ob id certamen, luctam aut febrem instituit, fed hæc omnia ex pura mechanica ratione pendere arbitror, dum folæ cauffæ externæ e. g. balnea poros claudencia, liquores heterogenei infusi

in venas diftentione & punctione membranarum, febriles fpasmos excitare poffunt. Dein non negandum eft, quando vita pro integritate structuræ aut mixtionis fumitur, excretionem hanc confervari; quoniam vero vita magis actum fignificat i. e. fanguinis & fluidorum circularem motum, qui etiam proximum corporis cum anima vinculum eft, non vero integritas mixtionis, nec non omnium actionum in corporibus animantium, ipfarum etiam excretionum fons eft, quæ mixtionem integram & structuram fervant; facile patet, non excretionibus tantum vitæ fufinendæ cauffas efle attendendas, neque ex fuppreffis excretionibus morbos tantum nafci, nec iis reftitutis eos fanari. Ecquid enim manifeflius eft, quam fanguinis effufione nec non per polypos, ligaturas, coagulationes, fanguinis circuli interceptione, vel motuum per venenaurbatione, falva manente textura ac mixtione partium, vitam auferri? Quapropter non omnes, quæ morbum pariunt, cauffæ ita comparatæ funt, ut putredinem tantum indicent, & excerni debeant vel poffint; fed læpiffime qualitas exiguæ materiæ nocentiffima, quæ correctionem & præparationem ad excretionem indicat, vitæ maximas fruit infidias, læpe etiam non tam expellenda, quam materia peccans eft resolvenda.

28. Et fane magni erroris imprudentiæ coargui poffet natura, quod in febribus tam vehementes motus, resolutionis & excretionis ergo, faciat; cum notum fit excretionem nec non lectionem non melius atque feliciter fuccedere, quam fi non nimii & effrænes, fed moderatiores paullo fint fluidorum motus. Sententia itaque noftra eft; excretionibus, quæ fiunt, diebus criticis folvuntur, non cauffam efle foluti, quam potius victi jam morbi fignum; dum nempe natura quieta reddita, & definentibus in fibris irregularibus & fpafmicis motibus, jam liberior ad emundatoria corporis fanguinis & humorum etiam impuritate, quæ in morbo gignitur, non carentium appulfus & fecretio fit expe-



fit expeditior. Nam si copiosissimæ etiam excretiones extra criticos dies & in ipsis, sine dolorum levamine & virium augmento, fiunt, nullius tamen sunt efficaciam, adeo, ut etiam cum largis excretionibus mors interdum eveniat, manifesto documento, non excretionem esse, quæ morbum levat. Qua de re omnes evacuationes, quæ non in & cum morbi decremento fiunt, symptomatice vocantur: criticæ vero, quæ ex virium augmento & naturæ roboræ & vigore oriuntur.

29. Excretiones per urinam copiosæ, nec non urinæ tenues aquosæ, sudores quoque largi sine alleviatione symptomatum nunquam tutæ sunt, veterum ac recentiorum auctoritate & experientia id satis monstrante; testantur enim morbi materiam nondum esse subactam, alias symptomata quiescerent, sed mixturam sanguinis ejusque vinculum cum sero destrui, fluidas & aquosas partes a crassioribus separari; unde etiam copiosæ tenues urinæ, probe id olim annotante Hippocrate, delirium præsagiunt; sanguis enim crassior factus, subtracto sero & præsertim sub impulsu arteriarum languidiori, facile in meningum vasculis stagnat, & phrenitidem ingenerat. Quandocunque vero abscessiones v. g. variolæ, morbilli, petechiæ, citius, quam ordinatum tempus postulat, mox primis diebus erumpunt, infaustum omen est, siquidem materiam copiosam & non bene coctam & temperatam denotat,

30. Docent jam adducta hætenus, in diebus criticis non esse causas solutionis morbi, sed potius effectus superactæ jam causæ morbificæ. Manifestum habemus exemplum in paroxysmis intermittentiis, ubi sudores, qui in paroxysmis fiunt, nihil juvant; quando vero cunque in declinatione contingunt, utilitatem præstant non quod materiam formalem febris ejiciant, sed quod testentur de motibus irregularibus & spasmodicis febrilibus jam cessantibus. Nihilominus & multas excrementitias sordes, quæ in ipso morbo progna-

tæ sunt, secum evehunt. Quinimo observamus in omni graviore dolore, non prolici sudorem, simulac vero ille liberè fluit, indicium sublatis doloris est, toni fibrarum relaxati & circuli sanguinis liberioris reddit.

31. Ex jam dictis & expositis clare apparet, utique observationem criseos criticorum dierum fundamentum in natura habere & usum in praxi medica; sicut enim nihil fit & producitur sine tempore, sed omnis effectus certo tempore eget, ita, ut causa morbifica corrigatur & ad evacuationem præparetur, certum requiritur tempus. Nam sicut ad generationem causæ morbificæ definitum tempus est necessarium, sic & ejus correctio & propulsio e corpore simili modo certo temporis spatio conficitur. Contingunt vero hæc alternationes, correctiones, & materię morbificæ immutationes septimo, semi-septimo undecimo, decimo quarto die secundum naturæ cursum ordinarium. Quicumque itaque medicus contra hunc ordinem agit, i. e. qui ante tempus, quod natura requirit ad morbi materiam subigendam, cum impetu & vi agit, & morbum expugnare studet, is & præpostere & temere agit, & errat.

2) Quando materia coquenda & temperanda est, & expulsionem moliuntur, eumque in finem volatilibus. sudoriferis, venæsectione medici utuntur; hi contra naturæ legem peccant, & non leve damnum inferunt: naturæ enim lex medico quoque lex est. 3) In diebus criticis & circa hoc præstat a fortiter evacuantibus abstinere, ne forsitan in alia inconvenientia loca a congruis emunctoriis excernendi humores deriventur. 4) Si natura in expulsionem inbecillis est, prudenter juvanda; evacuationes enim, si fiunt a naturæ robore & victo jam morbo, utiles sunt; dum corpus a multis excretionibus noxiis, quæ ipso tempore febrili tam in vasis, quam intestinorum tubulis progeneratæ fuerunt, liberant, alioquin non bene succedentes evacuationes recidivas facile inducunt. 5) Evacuantiæ & moventiæ juxta



juxta HIPPOCRATIS canonem *sect. II. apb. 25.* mox in principio febris obtinent locum, si materia turgat, i. e. si sanguis copiosus & vasa, primæque viæ impuris sordibus scatent; quales depletiones naturæ mirifice succurrunt, & impedimenta curæ malique fomenta tollunt. 6) Quando vero prudens medicus ob materiæ malignitatem, motus naturæ irregulares, periculosas, metastases observat, tunc nullo temporis respectu habito sanguinem resolvere, ad alia loca derivare, & ejus stagnationem per providam laxationem, venæ sectionem, diaphoresin, externa discutientia, quandoque per sectionem sub lingua vel narium scarificationem impedire debet. Hic enim crisin expectare, cum mortem signa certissimam significant, esset velaniæ; unde sæpius vidimus, alvum stimulantia innoxia, ut & salina nitrosa cum auro fulminante mixta, cum circumspeditione data inexpectatos tali in casu faustissimos successus edere. Sed hæc de crisibus adduxisse sufficiant.

## DECADIS II.

### DISSERTATIO I.

#### DE CERTO ET RATIONALI MORTIS IN MORBIS PRÆSAGIO.

##### §. I.

**T**Ria potissimum sunt, quæ medicum, si officio suo recte defungi velit, commendant, eumque perfectum & omnibus fere numeris absolutum reddunt. Primum, ut ex accurate notatis observationibus veras morborum, quibus humanum genus affligitur, origines & causas evolvat atque indaget, ut morborum primordiis mature opportunis auxiliis, ne in actum erumpant, occurrere possit, vel etiam, ut hisce cognitis salubria dare possit præcepta, ne homines in morbos tam facile incidant. Alterum est, ut morbos ratione genii sui, & pro differenti corporum ægotantium

natura, probe cognoscat, & ad eos tollendos apta auxilia & remediorum genera inveniat. Tertium est, ut prudens de morbi eventu, vel etiam de medicamentorum operatione atque effectu judicium proferre sciat. Quamvis autem hoc postremum non directe ad finem artis obtinendum pertineat: non tamen est dubium, quin non parum ad artis certitudinem, & existimationem medici conferat. Quamobrem præclare statim in principio *Prænotionum HIPPOCRATES*, artis prognosticæ facile princeps, hunc in modum disserit: *Medicum prænotionem adhibere optimum esse mihi videtur. prænotans enim & prædicans apud agrotos & præsentia & præterita & futura, & quæ ipsi agroti delinquunt exponens, fidem utique fecerit, quod agrotorum res magis cognoscat. Quare audebunt homines se ipsos medico committere.* Hisce addenda etiam sunt, quæ *Libr. II. prædictor. Sect. III.* prodidit, dum ait: *in prædictionibus medici illius probe memores esse debent. quod si cui successerit prædictio, is apud agrotum intelligentia præditum in admiratione fuerit. Si vero quis aberrarit, supra hoc, quod odio habetur, fortasse etiam insanire videbitur.* At vero, quam excellens & divina fere hæc prælagendi in morbis scientia est, tam difficilis, tam infida, incerta & dubia ea deprehenditur, adeo, ut non immerito judicium de morborum eventu formandum in difficillimis sit, id quod inter alia optima rerum magistra docet experientia, dum medicorum etiam peritissimi sæpius in prædicendo morbi eventum mirum falluntur, adeo, ut subinde ægrum, de cujus salute securi fuerunt, interire videamus. Neque hoc diffitetur ipse *Hippocrates*, dum omnes prædictiones in morbis acutis ratione salutis & mortis incertas pronuntiat. Atque etiam, ob difficultatem hujus scientiæ, inter conjecturales artem medicam viri sapientissimi, & inter eos maxime medici, repone non dubitarunt, & vulgus incertitudine harum prædictionum non modo artem nostram incertam judicat, sed & medicos inde contemnit.



2. Fatendum quidem est, vix ullam medicinæ partem tam incertam & dubiam esse, vel tantis laborare difficultatibus, quam judicatoriam, quæ a Græcis *πρωτοβασίλη* vocatur; ego tamen non plane despero, fore, ut in scientiæ formam etiam hæc ipsa redigi & certis regulis universalibus sive axiomatibus, imo definitionibus firmari possit, si modo, quæ necessaria sunt ad hanc obtinendam, recta præsidia & media adhibeamus. Ante vero, quam hæc ipsa indigitemus & nobilissimam hanc materiam paulo penitus excutiamus, non alienum erit exponere primum causas, quæ impederunt, quo minus ad scientiam hæc ars pervenire potuerit. Inter has itaque primo loco observationum defectum ponere licet; nam sicut accuratè conscriptæ & complete observationes, & morborum historiarum primum & verum artis nostræ constituunt fundamentum, ex quibus discere & depromere licet, quid in rerum natura fiat, quinam effectus in hoc vel illo morbo producantur, & quæ mutationes in corporibus ab his vel illis rebus humanis contingant: ita etiam perfectæ & plenæ observationes nobis circumstantias, materiam, atque occasionem rectè judicandi subministrant. Ex his igitur omnibus probe collatis medicus, judicandi non modo facultate, sed & principiis artis veris mechanicis & anatomicis instructus, non modo præteritorum & præsentium, sed & futurorum causas adæquatas & veras inquirat & inveniat, ex quibus postea ingens periculum morbi, vel mortem ipsam, aut etiam salutem & convalescentiam optime prædicere poterit. Cum vero veteres non ex integris morborum historiis & observationibus, sed ex paucis tantum circumstantiis suas regulas prognosticas, quarum maxime copia in *Hippocratis* & aliorum, qui ejus vestigia sequuntur, monumentis reperitur, deduxerint, non mirum est, eas rarius reipondere, sed potius fallere. Deinceps, quia veteres vera medicina rationali carebant, cum neque vitæ, neque morborum aut mortis, in quo posita sit,

naturam atque causam intelligerent, & structuræ corporis humani atque ex eapendentium motuum ignarissimi essent, non poterant etiam ex observationibus, licet plenissimis, veras causas ac notas & signa futuri eventus, ratione salutis & mortis, multo minus operationis diversæ remediorum, exinde convenienti modo ac ratione elicere. Ex quo utique sequitur, veteres, uti ceteras, ita etiam hanc medicinæ partem mere empirice tractasse; quod ita explicandum mihi videtur: si quis e.g. febre acuta laboravit & sub his vel illis symptomatibus mortuus est, idque aliquot vicibus observavit, statim inde formarunt regulam, hæc symptomata esse mortis indicia. Quoniam autem hæc ipsa pro diversitate subjectorum, morborum, regionum, temporum etiam morbi mirifice variant, hinc innumerabilia fere, apud veteres præsertim, consignata sunt præcepta, quæ tamen rarius respondent, adeo, ut etiam princeps hujus artis magister qui fuit HIPPOCRATES, ob incertitudinem ejus, tandem exclamare non veritus fuerit: *prædictiones in acutis ratione salutis & mortis admodum sunt incertæ*.

3. Ut igitur nobilissima hæc de morbis divinandi scientia majorem lucem & incrementum accipiat, & cum tempore inter scientias locum inveniat; in morbi processu vel historia omnes fere ponderandæ sunt circumstantiæ. Neque enim sufficit morbum vel etiam ejus causas nosse, sed maxime omnium notitia corporis ægrotantis accurata scitu est necessaria. Multum enim refert scire ad rectè judicandum, quæ ætas ægrotantis, quæ vires, quis viscerum status, qualis sanguinis & humorum sit constitutio, quis corporis habitus, quæ vitæ ratio præcesserit, quod anni tempus, firmum an imbecille sit corpus, genus nervosum an ad motum anomalias & ad spasmos proclive sit, nec ne. Deinde etiam oportet scire quænam morbi sint tempora, in quibus hæc vel illa pathemata aut affectiones incidunt. Præterea inquirendum est, qua metodo quis cu-



ratus fuerit, an error ab ægrotante vel medico commissus. Ex hisce probe cognitis demum iudicium formandum est, quænam signa vel symptomata sub his vel illis circumstantiis, in hoc vel illo subjecto salutarem vel funestum habeant eventum. Accidit enim sæpiissime, ut certum symptoma ejusdem morbi in hoc corpore lethale, in altero minime lethale sit. Ita sæpius videmus, infirmos, in quorum numero sunt senes, & qui morbo præcedente, veletiam inedia aut animi diuturno affectu fracti sunt, si dolore ex calculo vel etiam colico corripiuntur, sub levissimis sæpe symptomatibus, quæ nihil periculi habere videntur, & quæ impune robusti ferunt, fatis cedere. Idem quoque observare licet in acutis passionibus, ubi sæpe, qui graciliores sunt corpore, & partes exquisitius sentientes habent, in acuta febre gravissimis anxietatibus, doloribus, vigiliis cum delirio etiam junctis & vehementi siti, torquentur, & tamen evadunt; quum ex adverso, qui spongiosioris sunt habitus corporis, qui viribus fracti sunt, ex eadem febre decumbentes, non adeo de incommodis quibusdam, neque de ullo dolore, aut siti, aut vehementi æstu conquesti, levi accedente externa corporis refrigeratione & delirio, in statu morbi moriantur. Deinceps quod attinet ad morborum tempora, utique horum consideratio multum confert, magnamque vim habet ad phænomena in morbis dijudicanda. Ita notum est, epilepsiam sæpiissime, præsertim in ætate infantili, variolarum initiis sine ullo periculo & noxa accedere: cum tamen hic affectus in vigore morbi funestum certissime declararet eventum. In eodem variolarum morbo inter initia phrenitis sæpius in juvenili corpore observatur omni vacans periculo. Quod si vero circa nonum vel undecimum diem infestat, in propinquo mortem esse significat. Atque ideo probe omnia sunt in prognosi lecernenda, distinguenda, ponderanda. Quare sapientissimum est monitum illud HIPPOCRATIS, quod extat *Libr. Pra-*

## 1. De certo &amp; rationali

*dictor. II. § 3. consulo, ut medici quam prudentissime agant, tum in reliqua arte, tum in hujusmodi prædictionibus.* Nam certe medicus nulla re turpius, quam ejusmodi vanis & temerariis vaticiniis, vocularum hominum incurrit, vel apud vulgus in contentionem adducitur, præsertim, si quis ceu moribundus deseritur a medicis & postea convalescit, vel si spes frustratur & moritur quidam, de quo medicus plane fuit antea securus. Novi medicos, qui juramento confirmant, ægros non morituros, qui tamen elapsis aliquot horis extincti fuerunt.

4. Igitur ego sum hac in sententia, utut prognosticandi ars valde difficilis sit; maxime omnium tamen esse laborandum medico, ut certa aliqua signa & notas futuræ mortis cognoscat, id quod etiam obtineri posse non despero. Nam illud negari nullo modo potest, omnes eventus, sive ad salutem, seu mortem spectent, a certis & adæquatis & proportionatis causis proficisci, neque sine iis fieri posse. Quod si itaque causas, cur homo per morbum mori necessario debeat, probe noscat, earumque causarum indicia, quibus se manifestare debent, in ægrotante probe observet; nullum est dubium, quin ex eorum præsentia futurum eventum prævidere possit. Simili ratione si quis probe sciat medicus, quo modo, quo tempore, quibus viis aut excretionibus morbus solvatur, & homo ad sanitatem perveniat, utique ex iis præsentibus confidenter, nec sine certa ratione, salutem futuram conjicere poterit. Hisce positis jam statim præeximium illud monitum adjungere licet, quam perverse ii agant medici, qui antequam satis certas futuræ salutis vel mortis habeant, vel habere possint notas, nimis temere & inconsiderate statim inter initia vel progressu morbi iudicium de ejus eventu interponunt. Nam, si ullum quid, certe hoc fallit, a morbi nempe principio ad ejus finem non esse firmum iudicium ferendum. Sæpe enim lenissime morbus incipit & mitissime videtur procedere, sed si ad statum pervenit, brevi omnia in pejus ruunt.

5. Illud



5. Illud verò, antequam ulterius progrediamur, sciendum est, minime hanc mentem esse nostram, ac si medicus, ineunte vel progrediente morbo, ejus eventum ratione salutis & mortis prænoscere possit, quod vulgus putat, & subinde judicium a medico hac de re postulat; sed hoc urgemus & intellectum volumus, dari certas notas atque indicia, quibus tum in acutis, tum in chronicis passionibus funestum eventum prævidere & declarare possimus, ut vero hoc præstemus, expectanda esse illa tempora, quibus hæc indicia se prodant. Deinde quoque aliud est, morbum, num multum habeat periculi, declarare, aliud est, mortem sequuturam prædicere. Illud quidem ex ægrotantis natura & viribus morbiq; genio vel in principio statim conjicere licet; hoc vero non certo prænuntiare possumus, nisi vera mortis indicia præsto sint. Quænam vero sint illa, de quibus certi & securi esse possimus, futuræ mortis in quovis magno & dubiæ spei morbo indicia, illud nobis jam excutiendum est. Priusquam vero illud adgrediamur, non alienum, sed maxime e re erit, mortis theoriam, ejusque veras causas paulo accuratius evolvere, quo postea eo melius ratio eorum, quæ dicturi sumus, appareat.

6. Veteres uti solidis ratiociniis in re medica prorsus destituti erant, ita certe inanis esset labor, si quis ex eorum monumentis discere vellet, in quonam mortis natura atque essentia posita sit. Nam illi nihil aliud adferunt, quam quod vita in calidi innati, & humidi radicalis temperamento, mors vero in extinctione horum consistat. Verum cum hæc nihil nisi obscurum conceptum in mente humana relinquant, certe nihil circa præsens negotium solidi exinde vel demonstrari vel inveniri potest. Postquam vero nostris temporibus per rerum naturæ studium ac contemplationem, neque minus per solertissimam corporis humani, beneficio anatomes, structuræ indagationem, disciplinæ medicæ maxima lux accessit, & nobilissimum, imo divinum illud circulationis sangui-

nis inventum manifestatum fuit, vitæ & mortis rationem non amplius in obscuro esse positam clarissime intelligitur. Nam quemadmodum perenni & libero sanguinis & humorum circuitu corpus, putredini alias in se & suæ natura valde obnoxium, ab omni corruptione vindicatur & integrum durat, omnesque actiones tam naturales, quam animales salvæ permanent, robur quoque tam animo, quam corpori præsto est: ita circulo illo penitus destructo, non modo omnes & animi & corporis vires perire, eorumque functiones omnes cessare, & corpus protinus in putredinem ruere animadvertimus. Ex quo intelligitur, mortem tunc adesse, & recte pronuntiari de corpore, si fluidorum progeffivus ille & in circulum abiens motus ita extinctus est, ut nulla arte vel ratione amplius revocari possit. Sicuti vero ille fluidorum circuitus a cordis, arteriarum & omnium canalium, qui fibris nerveis motricibus instructi sunt, motu, impulsu, & tono dependet; ita etiam mortis causa non aliunde, quam a cordis & arteriarum pulsu, neque minus a thoracis motu sive respiratione penitus destructa derivanda est. Quomodo vero ille motus in morbis ex toto intercipiatur, illud jam venit explicandum.

7. Quemadmodum itaque morborum propria sedes, ita etiam mortis causa non rectius, quam ab arte anatomica, sive accurata inspectione corporum morte extinctorum, petenda est. Jam vero, si corpora, morbo quocunque etiam extincta, anatomico cultro subjicimus, statim evidentes mortis causæ & sensibus, intellectui sese manifestant. Nam si ve quis ex morbo acuto sive ex chronico fuerit mortuus, semper partis cujusdam corruptio quædam putredinosa, cum ingenti fœtore juncta, in conspectum venit. Vel enim semper & ubique in nobiliori quadam parte interna, sive in ventriculo & intestinis, sive intra cerebrum ejusque membranas sive in hepate, utero, renibus, liene, aut pulmonibus, corruptio quædam putrida &



sphacelosa offenditur, quæ naribus vix tolerabilis est, & hæc ipsa vel ex sanguinis stasi sive inflammatione, quæ mortem in acutis ingenerat, vel ex stagnatione aut extravasatione sanguinis & humorum in præcipuis cavitatibus, capite videlicet, thorace aut abdomine, enata deprehenditur; quod ultimum maxime fit in morbis chronicis, ubi viscera, præsertim in thorace abdomine, aut pure, aut sero extravasato corrupta conspiciuntur. Numquam enim dissectio corporum fit ex gravi quodam capitis morbo, v. g. apoplexia, epilepsia, lethargo defunctorum, ubi non vel stasi sanguinis inflammatoriam & sphacelosam in meningibus videre licet. Idem animadvertimus, si quis ex gravissimo pectoris morbo diem suum obiit. Nam in pleuritide profunda & peripneumonia tota pulmonum vasculosa compages sanguine corrupto infarcta & obstructa est. Si quis ex phthisi perit, pulmo ex purulentis tuberculis obsecessus, vel ejus major pars pure corrupta & exesa deprehenditur. In convulsivo asthma ordinario ingens collectio aquarum in thorace finem vitæ facit, inque catarro, qui subito jugulat, suffocativo in pulmonum bronchiis vel feri vel sanguinis collectio, aeris liberum egressum & ingressum impediens, reperitur. Si quis vero mortis causas in morbis chronicis, qui sedem & domicilium in abdomine suum fixum habent, perscrutari velit, is semper in cachexia & hydrope induratum vel corruptum hepar, & omentum cum magna extravasatione feri inveniet. In morbo sic dicto nigro Hippocratis, valde funesto lien ut plurimum magnus, infarctus, & corruptus, neque minus extravasatio sanguinis in ventriculi atque intestini ilei cavitate conspicitur. In passione iliaca pene mortifera, in atrocissima colica, cholera, dysenteria, cardialgia lethali inflammata, sphacelosa, & erosa cum summo foetore ventriculi ac intestinorum partes invenire licet. Quem atrox ex calculo in urethra firmiter hærentere, dolor interficit, is inflammatum maxime ven-

triculum habet, viis quoque & ductibus urinalibus, ipsisque renibus male affectis & corruptis. In morbis uteri, qui feminas necant, ipse vel inflammatus, vel exulceratus, aut sphacelatus, vel extravasato sero corruptus sese conspectui offert.

8. Quod attinet ad passiones acutas, inter quas principem locum habent febres, quæ plures mortalium in flore ætatis e medio tollunt, & vitæ humanæ inimicissimæ sunt: ex profecto nulla alia ratione homines perimunt, quam partium internarum, præsertim internarum; ventriculi imprimis, intestinorum, meningum inflammatione in sphacelum desinente, hæc enim nusquam non in febre enectis reperitur. Neque alia ratione venena, cujuscunque etiam generis sint, quam sphacelosa inflammatione, quæ primas maxime vias infestat, interficiunt, quæ etiam mox dissectione facta sensus incurrit, adeo, ut hæc veneni adsumti certissimum inter alia præbeat indicium. Ubi vermes vitam tollunt, intestina identidem erosa & inflammata oculis sese offerunt. Ex quibus satis clare apparere arbitror, nunquam mortem facile contingere, nisi hæc ipsa a putredine & corruptione partis cujusdam internæ proficiscatur, ita prorsus, ut putredo vitæ inimicissima & mortifera recte dici possit. Nam sicut vitales sanguinis motus penitus extinctos totius corporis putredo certissime sequitur: ita illa ipsa etiam est plerumque adæquata, vera, ac fere perpetua mortis causa, quæ vel externas partes, quod rarius, adgreditur, vel internas, quod frequentissime fit, partes obsidet: atque adeo vere adfirmare possumus, vix unum ex mille hominibus sine sphacelo mori. Jure autem hic excipimus eos, qui violenta morte pereunt, vel qui ex polypo, orificia vasorum claudente, subito extinguuntur. In ceteris vero omnibus, si post mortem aperiuntur, corporibus foetida putredo, nares molestissime feriens percipitur.

9. Verum enim vero quamvis mortis causas evidentiores semper deprehendere liceat in defunctis & dissectis corpori-



corporibus; sapienter tamen hoc loco monendum esse ducimus, ne ipsas mortis causas cum morborum causis confundamus, quod sæpissime contingere animadvertimus. Nam pluribus medicis id in more positum esse video, ut, si quis ex periculoso decedat morbo, corpus aperiendum esse suadeant, & quando postea internæ partes sphacelatæ & corruptæ sese sistunt, hæc omnia adstantibus monstrant, & proponunt, non potuisse ob tantam læsionis vehementiam ægrum ullo modo servari, cum tamen manifestis causas mortis cum causis morbi hac ratione confundant; siquidem illud maxime in quæstionem venire debet, annon illæ, quæ mortem produxerunt, causæ convenientibus atque in tempore adhibitis auxiliis potuissent averti; qua ratione errores suos, si quos forsitan commiserunt, satis callide & astute apud ignaros tegere & occultare sciunt. Quum itaque mortis ratio sive natura in præsentanea & putrida corruptione sita sit, sapienter hinc inferre licet, si quis servare velit ægrum, omni modo & cura laborandum esse medico, ut opportunis auxiliis & remediis corruptionem sphacelosam, quæ nunquam non a stasi & stagnatione humorum proficiscitur, præcaveat atque avertat, omniaque ea evitet, quæ ullo modo ad putredinem promovendam aliquid conferre possint.

10. Sed ut propius scopum nostrum attingamus, qui in eo vertitur, ut ex indiciis & signis quibusdam futuram hanc corruptionem advertamus & prænuntiemus, evolvendæ utique sunt causæ, per quas corruptio hæc mortifera intus gignatur. Uti enim in rerum natura nullus effectus fit sine suis certis & proportionatis causis; ita etiam pro certo adfirmare licet, certas dari hujus corruptionis in morbis causas, ex quibus præsentibus ratio prognoseos recte demum deducenda est. Prius vero, quam meditatio nostra ad explicationem harum causarum descendat, paucis saltem placet exponere, cur putredo vitæ humanæ tam inimica sit, ut etiam levior & non adeo magna sphacelatio,

in parte ventriculi vel intestinis existens subita morte hominem perimat. Id itaque hac ratione fieri nobis videtur: vitalis ille motus & circuitus sanguinis, a quo omnium functionum corporis integritas pendet, solidorum impulsu, robore & potentia motrice eorumque viribus sustentatur; hic autem non, ut quidam sentiunt, ab ente quodam materiæ experte, sed potius a subtilissimo, quod in sanguine & nervis est, fluido, ejusque influxu in has partes dependet, quod vel hoc unicum experimentum satis luculenter confirmat, dum nervo vel arteria, quæ ad partem abit, ligata vel præcisa, omnis motus, sensus & nutritio ejus petit. Deinde quod robur & vires partium a materiali quodam principio proveniant, vel illud documento sufficienti esse potest, quod inedia non modo vires pereant, sed & quod, congruis datis alimentis, vires consumptæ mox recuperentur. Jam vero in tota rerum natura nihil tam perniciosius reperitur, quod tam cito vires & robur adimat corpori, quam putredo, uti videmus in sphacelo, in cancro exulcerato, qui brevi tempore & vires & vitam adimunt. Ecquis itaque negare ausit, intus conceptam putredinem, præsertim si sese diffundat & incrementum sumat, intime tetrum suum vaporem in partes maxime nervosas, & motrices fibras dispergere, qui, cum tota sua natura fluido illi, quod motus regit solidorum, adversus sit, illudque corrumpat, & quasi extinguat motus systoles & diastoles, tonumque & motum fibrarum penitus auferat?

11. Duplex igitur datur in morbis iter ad mortem: alterum est nimis subitum & præceps, idque fit per vehementes partium nervosarum constrictiones, quæ vel ex inflammationibus oriuntur, vel inflammatorias stases subinde novas in morbi vigore ingenerant, ad sphacelum & mortem tendentes, quod maxime contingit in febribus & passionibus acutis; alterum est paulo lentius & successive fit ex viscerum corruptione, humorum stagnatione & extravasatione,



idque præcipue in morbis sic dictis chronicis obtinet. Quod attinet ad generationem mortis in morbis acutis sive febribus, illa plerumque evenit per spasmos vehementes, qui inflammationem ventriculi vel intestinorum, aut membrarum cerebri & mortiferam corruptionem post se trahunt. Est enim spasmus naturæ humanæ & vitæ semper & ubique infensissimus, eo quod humorum & sanguinis motum a circumferentia & ambitu corporis ad interiora convertit & dirigit, & saluberrimas excretiones, quæ vitæ & sanitati patrocinantur, impedit & cohibet. Præterea spasmodum ea est potentia, ut liberum & æqualem sanguinis circuitum, in quo sanitatis ratio posita est, impendant, eumque inæqualem reddendo nimias congestiones sanguinis in nobilioribus partibus, præsertim in capite, corde, ventriculo & intestinis efficiant, quæ si non superantur a natura per commodam discissionem & resolutionem, corruptio & mors certissime sequuntur. Nam in omni motu sic dicto naturæ, sive febre, duplicis generis motus junctus occurrit, & probe attendi & a se invicem secerni debet: alter est valde perniciosus, qui fit a circumferentia ad centrum, & hic est spasticus, semper morbosus, qui ad destructionem naturæ & motuum vitalium tendit, & frigore, rigore, horrore & pulsu parvo, debili, atque anxietate sese manifestat; alter est valde salutarius, qui spasmum subsequitur & huic contrarius est, atque a centro ad circumferentiam dirigitur, sive ab interioribus ad exteriora vergit, & calore ac pulsu celeriori & validiori sese manifestat, & hic quasi interna naturæ medicina est, corpus ab omni destructione vindicans, cujus beneficio exitiales illæ spasticæ partium stricturæ resolvuntur, laxantur, atque inflammatoriæ stases discutiuntur, tubulique excretorii antea clausi & constricti felicissime aperiuntur. Hic est ille motus, quo veteres naturam medicatricem indigitarunt, cujus ministerio morbi vincuntur, homo convalescit & mortis peri-

culo eripitur: hic etiam est, sub quo nemo moritur, quod potius fit sub spasmō, qui ipsi est contrarius. Quicumque itaque ex medicis horum motuum sibi oppositorum, unius quidem salutaris, alterius vero perniciosi, genium, potentiam, effectus & mutuas eorum actiones & relationes probe novit atque cognoscit, is magna cum ratione & prudentia in morbis agere, sapienter pericula prædicere, & faustos eventus prænuntiare optime valet, is quoque veterum phræseologias medicas, v.g. febrem esse naturæ pugnam cum morbo, & convalescentiam fieri, si morbus naturam superet, perquam facile intelliget. Nam si spasmi, inflammationes, congestiones ac stases sanguinis, in se mortales, a motu calido, resolutorio, febrili, certo interposito tempore, non digeruntur ac discutiuntur, sed illæ superiores sunt, tunc utique succumbit natura, & ægrum mori oportet. Cum vero dentur certa indicia, quibus & victoria naturæ super morbum, & morbi super naturam prævideri & judicari possit; liquido apparet, artem illam prælagendi, quæ *πρὸ γυναικῶν* a græcis dicitur, certis utique niti fundamentis.

12. Visum itaque nobis est, effectus & indicia illa spasmodum lethiferorum non facile fallacia in acutis hoc loco breviter strictimque exponere, quæ si circa dies sic dictos criticos, corpore a morbo debili reddito, apparent, nec evanescent, aut incrementa sumunt, certus de sinistro morbi eventu poterit esse medicus. Neque vero exitiales hi spasmi tantum in una parte, sed in pluribus sese manifestant. Igitur si rigor cum frigore circa morbi vigorem observatur, vel sæpius recurrit, si corpus non æqualiter molle, sed durum, calidum & asperum, & exanthemata a spasmo cutis retrocedunt vel minuuntur, si exteriora horrent & frigent, si fonticuli vel ulcera præsentia nihil amplius humoris emittunt, indicia certe hæc sunt, quæ nihil boni portendunt, sed potius summum mortis periculum minantur: quia propter cutis spasmos sanguinis & humorum motus versus interiora pessimas in-

flam-



inflammatorias congestiones facile suscitatur, & impedit, quo minus morbida materia perspiratione e corpore possit expelli. Pergunt plerumque spasmi in acutis morbis etiam ad alia excretoria, vias nempe urinarias, alvinas, quarum constrictione efficiunt, ut urina tenuis & aquosa reddatur, & alvus plane dura, tensa & occlusa sit. In quibusdam ob urgentem spasmum frequens mejendi & desidendi est desiderium.

13. At vero gravius imminet periculum, & spasticæ illæ contractiones interiores & nobiliores, quæ motibus vitalibus vacant, partes infestant. Nam pulsus parvus, contractus, celer & durus, item inæqualis & intermittens non aliunde, quam a spastica & convulsiva strictura nervorum, qui in cordis fibras & tunicas arteriarum desinunt, proficiscitur, & semper in statu morbi plurimum periculi ostendit. Ejusdem pessimæ notæ respiratio crebra, anxiosa & difficilis est, si in critica tempora incidit; nam sicut, sapientissimo Hippocratis effato in *Prognosticis*, facile spirare magni momenti est ad salutem in omnibus morbis, ita spiratio crebra & ægra in acutis nihil boni unquam ostendit. Si nervos præcordiales feralis exercet spasmus, summæ anxietates, inquietudo & jactatio corporis, crebraque lecti & situs mutatio contingunt. Si idem spasmus œsophagi & ventriculi membranas nerveo-musculares occupat, ad vomendum conatus, regurgitatio potionis, item seri limpidi ex faucibus non infrequens extrusio, difficultas in deglutendo atque inexhausta sitis cum oris & linguæ ariditate se produnt, sique in consensum duodenum rapitur, flavo colore corpus maximeque facies tingitur. Ubi vero profundior spasmus totum genus nervosum graviter concutit atque convellit, ad ultima jam ventum esse, indicio sunt nares acutæ, collapsa tempora, frigida languidaque aures, oculi concavi, cutis circa frontem dura & intenta, color niger aut perpallidus, quibus facies Hippocratica, certa mortis index describitur. Deinde nervorum distentionis, quæ semper in acutis terri-

bilis, juxta aph. VI. sect. IV. indicia sunt, ubi æger supinus cubat, eique genua contracta sunt, ubi deorsum ad pedes subinde delabatur, ubi brachia & pedes nudat & inæqualiter dispergit, ungues digitique pallidi sunt, sique manibus floccos legit, simbrasque diducit, vel in adjuncto pariete, si qua minuta eminent, carpit. His quoque adjungi debet subsultus tendinum, quæ omnia si apparent, in propinquo mortem esse denunciant.

14. Quamvis vero plurimæ ex acutis internam quandam partis inflammationem pro causa agnoscant, atque ob id periculo non careant: sæpius tamen in ipso vigore & vehementia morbi inflammationes novæ & quidem in ventriculo, vel in membranis cerebri supervenire consueverunt, quæ nunquam non valde terribiles sunt & mortis prænunciæ. Atque hæc inflammationes, vel separatæ, vel simul junctæ, non modo in malignis, petechialibus, contagio infectis ac castrensibus febribus, sed & in aliis acutis, synochis, ardentibus, purpureis, variolis, morbillis circa septimum, nonum, vel undecimum diem supervenientes, certissime hominem perimunt. Cognoscitur vero inflammatio ventriculi ex eo, si magnus æstus & quasi incendii sensus, cum acuto dolore circa præcordia est, & locus circumscriptus tactu durus, extrema inalgescunt, summaque anxietas & inquietudo jungitur, sique omne, quicquid vel medicamenti, vel potionis assumitur, vel protinus vomitu ejicitur, vel retentum summam creat molestiam, augetque anxietatem. Quandoque tanta est inflammatio, ut per œsophagum ad ipsas fauces transeat, quæ ardentibus dolorificis postulis obsidentur, & viscido putrido muco continuo obducuntur, quæ omnia futuræ mortis præfagia sunt. Altera inflammatio, quæ sæpius huic jam dictæ jungitur, & brevi ante mortem accedit, adhuc periculosior, membranarum cerebri est, quam Græci phrenitin vocant, quæ plerumque assiduam & pertinacem vigiliam, capitisque vehementem dolorem sequitur. Eam prænunciare so-



lent præcedens rigor, urinæ copiosæ & tennes, aurium tinnitus, fortis pulsatio in capite, paucæ sanguinis ex naribus stillæ. Ejus vero præsentia his signis innotescit: rubicundi, flammei, & truces sunt oculi, alienatio est mentis, verba sine sensu & ordine proferuntur, interrogati omnia aliena respondent, lacrymæ sæpe effunduntur involuntariæ, dentibus strident, & nulla amplius humidi est appetentia. Convulsio, si phrenitidem sequitur, haud dubia significatio mortis est. Hæ sunt principales afflictiones, quæ homines in acutis jugulant. Hoc mortis genus per vehementes inflammationes & spasmos maxime subeunt temperamenti sic dicti sanguinei, cholericæ, vel sanguineo cholericæ, ætate juvenes & viri, teneriori sensu præditi, ad iram proclives, habitu corporis macilenti & constricti, & qui victui valde spirituosio indulserunt.

15. Aliud genus mortis obeunt etiam in acutis & continuis febribus, qui repleti & spongiosi sunt habitus corporis, phlegmatici, & qui vires vel per morbos, in ediam aut diuturnam tristitiam, vel sanguinis profusiones vires exhauserunt. Nam hi non tam per vehementes spasmos, & gravia ac dolorifica pathemata e medio tolluntur, quam potius ex motuum imbecillitate atque defectu partiumque atonia, roboreque & viribus dejectis vitam fiunt. Atque in ejusmodi casibus stagnationes ac stases humorum ac sanguinis in putridam corruptionem statim in principio inclinant. Et hi morbi, quia lenibus incedunt symptomatibus, sæpissime fallunt medicorum spem, eorumque præfagia eludunt; unde etiam ob non tam evidentem, sed magis occultam perniciem difficilis sunt judicii, & malignis annumerari solent. Cognoscuntur vero his indiciis: cum levi frigore & horrore oriuntur, sed summa statim inter initia virium est prostratio, pulsus languidus & frequens simulque contractus, in situ erecto facilis est animi defectio, urina tenuis & sine sedimento,

nullus somnus, ad eum tamen perpetua inclinatio, quem etiam major virium prostratio, & mentis alienatio sequitur, de nullo dolore, siti vel magna molestia conqueruntur, nihilominus valde inquieti sunt, jactantur; sique extrema algescunt, & pulsus incipit deficere, neque in carpo manuum amplius percipitur, mortis in vicinia ægros esse positos rectissime colligitur. Quamvis vero & hi homines non sine inflammatione ventriculi & membranarum cerebri moriantur; ea tamen non tam gravibus spasmis & symptomatibus juncta est, sed facilis ad corruptionem est transitus.

16. Cum vero omnes inflammationes demum in necrosin, sive sphacelolam corruptionem terminari soleant, non alienum videtur & hic subjungere quædam notas, quibus transitus inflammationis in sphacelum significetur. Sunt vero hæc sequentes: internus quidam frigoris sensus percipitur, & dolor ante acutus & acerbus circa caput vel inferiores partes subito desinit, & mens antea delira ad se quodammodo redit, virium vero defectus major fit, pulsusque ex toto deficit, vel valde inæqualis, angustus & intermittens est, & alvus antea fortiter clausa se aperit, vel præter voluntatem fluit, vultus sedus ac pallens apparet, tempora, cervicæ & pectus gelido sudore madent, extremæ corporis partes refrigerant, pulsus plane deficere cœpit, borborygmi ac sonitus in ventre oriuntur, & liquida immissa quando descendunt, sonum emittunt, tamquam cavo & profundiori vasi immitterentur. Hæc omnia mortem præforibus esse manifesto demonstrant, quia ob sphacelum, vires sumentem, summa partium atonia & extremus virium lapsus adest. Si quando sanguine nimium redundantes subito ex sphacelo interno vita decedunt, aliquot post mortem elapsis horis horrendum in modum venter intumescit, & magnæ vesicæ oriuntur, & facies plumbea ac viridis fit, intolerabilis fœtor adest, atque ex ore sæpius & naribus male olens cuor stillat.



17. Est adhuc aliud mortis genus, quod, qui ex gravibus pectoris vitiis ægrotant, subire debent, idque est suffocatio, qua pereunt & anginosi & peripneumoniaci, catarrho suffocativo laborantes, & quos asthma convulsivum & thoracis hydrops jugulat. Hi morbi non modo omnis aeris ingressum & egressum in pulmones liberum intercipiunt, sed & sanguinis per pulmonum vasa circuitum ex uno ventriculo ad alterum tollunt. Nam angina, quæ musculos laryngis internos occupat, & Græcis cynanche dicitur, ubi neque in cervice, neque in faucibus quicquam vel tumoris, vel ruboris conspicitur, simul tamen summi doloris tormentum & vehemens febris est, citissime per suffocationem necatur, tum profecto, ut verbis utar LOMMII lib. II. Medic. Observ. oculi vertuntur & rubent & veluti iis, qui strangulantur, prominent, vox impedita nihil significat, & qualis catulorum est, tenuis editur, os apertum hiat frigidi aeris cupidum, ex eoque spumans saliva movetur, lingua exeritur, potui datus liquor per nares remeat, ipse æger totus inquietus est, crebro & cubili exilit, tandem vero strangulatus atque syncope oppressus perit. Ita etiam præfocatione occidit peripneumonia, nam si nihil plane expuitur, sed magna adest & anxiosa spirandi difficultas atque angustia, inquietudo, sputum intus in pectore strepit, pulsus inæqualis & intermittens fit, & alvus infirmis jam viribus funditur, & quod tussi rejicitur, spumofum modo cruentum, modo flavum est, & simul continua vigilia urget & phrenitis sequitur, frigidique aeris hauriendi cupiditas maxima est, æger lubenter supinus & erectus cubat, nam in nares reclinatus encari præfocatione videtur, quinto vel etiam septimo die ad summum certa mors sequitur.

18. Qui asthmate sic dicto convulsivo moriuntur, hos identidem suffocatio perimit, quod vitium nascitur plerumque ab hydropse thoracis, subito per ruptas hydatides orto, quando nimirum ingentes inundationes aquarum pondere suo

diaphragmatis motum & liberam pulmonum expansionem impediunt, ut nec aer ingredi, nec sanguis opportune eos transire possit. Oritur etiam hoc malum, quando tunica bronchiorum glandulosa interior, multis & magnis glandulis obfita, ita angustatur, ut nec spiritum in pulmonibus contentum elidi, vel novum recipi patiatur. Sæpe etiam spasmus convulsivus tam fortiter bronchia convellit & coarctat, ut strangulatione ægri misere intereant. In omnibus hisce vitiis summa anxietas atque inquietudo, tremulaque adest spiratio, pulsus inordinatus & inæqualis, & sibilus ac strepitus in pectore percipitur, nec uno in loco conquirere possunt, & nil, nisi spumofum quidpiam aut cruentum e pectore extunditur; extremis tandem corporis partibus inalgescantibus syncope & suffocatione pereunt. Idem fit in catarrho sic dicto suffocativo, qui maxime senes, imbecillos atque infantes perimit, & plerumque a paralyfinervorum pneumoniacorum nascitur. In hoc vitio identidem spiritus cum summa difficultate, angustia & anxietate trahitur, & bronchia humore a sanguine secedente replentur, & quia nihil sputi excernitur, aer admissus magnum strepitum ac sonum edit, donec tandem ex aeris defectu æger suffocetur. Præter hæc jam dicta certa adhuc mortis indicia sunt, pulsus intermittens, parvus & ex toto desinens, quod sæpe aliquot horas ante mortem fit. Sæpissime etiam turbatio supervenit cum extremorum frigore. In phthysicis, ubi magna in pulmone cavitas exesa ingentem purulenti humoris copiam recipit, si ob imbecillitatem virium non ejicitur, sed expectoratio cessat, mors brevi sequitur.

20. Expositis iis morbis eorumque lethilibus signis, qui suffocatione necant, proximum erit, ut quosdam adhuc acutos, qui & inflammatione & vehementioribus spasmodis hominem e medio tollunt, persequamur, & quibus signis futura mors prævideri & prædicti possit, exponamus. Febris cum purpura alba, quæ lymphæ valde vappescentis & corruptæ



soboles est, si in fine adsociatur aliis acutis febribus, item variolis, morbillis, vel etiam in puerperio post lochia suppressa accedit, nunquam expers est periculi, necat autem ut plurimum per inflammationem interiorum partium, præsertim ventriculi & intestinorum. Funestum indicium est, si æstus præcordiorum summamque anxietatem inter-nus frigoris sensus cum pulsu parvo, debili, inæquali excipiat, purpura dispareat, animi defectio, mens turbata, & spiratio difficilis sit. Variolæ si statim primis diebus cum gravi dolore lumborum & delirio invadunt, & mox secundo die exanthemata in cute apparent aspera instar purpuræ cum maculis, & die quinto & sexto post plenam eruptionem pulsus non sedatior fit, sed in eadem celeritate permanet, & totum corpus pustulis oblitum est; raro in juvenili ætate evasisse quenkum scio. Ardentissimus vero circa nonum diem ex exulceratione manuum dolor omnia statim, quæ spem salutis facere videntur, sæpe immutat: nam vehementissimus ille & æstuosus dolor, universum genus nervosum spasmis afficiens, summas parit anxietates, ja-stationes corporis, pustularum subsidentiam: postea respiratio difficilis, mentis turbatio, convulsio & pulsus parvus languidus supervenientes brevi interficiunt.

21. Quicumque veneno validissimo emetico, aut purgante sumto moriuntur, hos identidem inflammatio sphacelosa e medio tollit: dissectorum anatome id testante. Mortis vero futuræ prælagia sunt, si ardores internos & summas anxietates pulsus valde parvus & inæqualis, vel plane deficiens sequitur, cum sudore frigido, delirio & convulsione, quam a medicamento purgante concitatam ipse HIPPOCRATES *sect. VII. aphor. 25.* & multis aliis in locis, mortiferam pronuntiat. Qui ex dolore a calculo vita decedunt, in iis plerumque inflammatio lethalis ventriculi & meningum supervenit. Nam si vomitum & acutissimum dolorem febris sequitur cum magna anxietate, & siti vehementi, & postea singultus & delirium cum extremorum fri-

gore accedit, non diu superstes æger erit: in cholera, si acuti dolores & torsiones incidunt, & supra infraque magno impetu humores præsertim virides prorumpunt, & ingens afficit bibendi cupiditas, & facies flavescit, pallida fit, pulsusque parvus atque concisus est, non sine periculo morbus est. Si vero pulsus quoque totus concidit, & crura contrahuntur, frigidæque sudationes fiunt, anima-que deficit, inflammationem in space-lum transisse non leve indicium est. Dysenteria si post alium morbum homine jam infirmo oritur, raro æger servatur: facilis enim est tunc transitus inflammationis in sphacelum. Pessimum adeoque sphaceli indicium est, si tormina acuta subito cessant, & æger refrigeratur, summaque adest virium prostratio. Singultus, cardialgia, præcordiorum æstus atque anxietas summa ut plurimum præcedunt, & pernicialem ventriculi inflammationem indicant. In passione iliaca, ubi acutissimi sunt dolores cum contumaci alvi constrictione & vomitu assiduo, etiam male olente, si singultus, delirium, gelidus sudor, extremorum frigus, nervorum distentio accedit, ea omnia certissimæ mortis nuncia sunt, id quod jam dudum observavit HIPPOCRATES *sect. VII. aphor. 10.* dum ait: *ab ileo vomitus, singultus, convulsio aut delirium malum.* Eodem modo etiam atrocissima & convulsiva colica necat. Tam acerbus sæpenumero dolor in intestino recto a stagnante sanguine hæmorrhoidali urget atque affligit, ut non modo inflammatio, sed & lethalis space-latio hoc intestinum occupet, sub qua excrementa propter intestini putredinem foetidissima prodeunt, pulsus frequens & debilis cum summa sequitur virium prostratione, & ipse sphacelus sæpius ad partes externas atque scrotum serpit, animi defectio tandem, & brevi post mors ipsa succedunt.

22. Plures in partu, vel post eum, itemque in puerperio mori foeminas notissimum est: quare etiam de funestis mortis indiciis ac prælagiis quædam dicenda sunt. Si mulier vel propter pravum situm



fitum infantis, præsertim grandioris, continuis spasmodis, doloribus ac laboribus per aliquot dies assiduis atque ardoribus simul junctis internis vehementibus, quos pulsuum celeritas ostendit, valde defatigata est; accidit sæpius, ut in partu, vel etiam post eum, repente dejectis viribus, in animi forte deliquium vel affectum apoplexiæ similem, propter pulsus præsentiam, incidant, & nulla arte, vel ope vires & vitam recipere possint. Mortis indicium est, si affectus ad aliquot horas perdurat, neque penetrantissima medicina, qualis est spiritus salis ammoniaci cum calce viva paratus & oleo rutæ essentificatus, in nares intrusa, excitari possunt. Si facies ipso in paroxysmo colorata manet, indicium est, sanguinem, ex vehementioribus spasmodis nimio impetu ad cerebrum delatum, hoc malum apoplectico per omnia simile produxisse, & plerumque post obitum ex ore & naribus serum sanguineum foetidum effluit. Si parturientes, foetu adhuc in utero mortuo, exspirant, sæpius ille post mortem obijam nimis relaxatas vias & internam fermentativum motum foras ex utero propellitur. Quæ in puerperio e vita discedunt scæminæ, ac ut plurimum, repleto impuro sanguine, qui post partum ex utero salutariter per aliquot dies prodire solet, graves dolores antea patiuntur, quos si non excipit effusio lochialis sanguinis, sed fluxus magis stipatur, uteri plerumque inflammatio, & febris sequitur valde exitiosa. Illa incendium ab inferioribus locis usque ad cordis regionem vergens manifestat: sique magna anxietas, virium prostratio, inquietudo & omnis appetitus dejectio jungitur, postea sensus internus frigoris cum horrore accedit, ac pulsus frequens, parvus ac debilis jungitur, & visus incipit obfuscare; in propinquo mortem ex sphacelo esse hæc significant. Plurimæ ex puerperis integra mente mori solent, nam hæc antea turbata paucis sæpe ante mortem horis ad se revertitur, ut imperitiores rem penitus in vado esse sibi persuadeant; sed ex pulsu moribundo pruden-

tiores proximi exitii indicium desumunt. Si quando ob nimiam sanguinis post partum & in puerperio profusionem lentus cum pulsu frequenti & debili calor assidue urget, neque etiam post somnum manescedatur, & juncta est plenaria inappetentia, viriumque delectio, circa exitum puerperii, i. e. sexta septimana, syncoptica mors plerumque succedit.

23. Cancro exulcerato nemo facile servatur propter summam corruptionem, quam sanies nigra, tenuis, odore abominabilis testatur; lenta est febris & vires indies decrescunt, somnus anxius, laboriosus vel nullus, donec tandem animi defectio & mors sequatur. Accidit interdum, ut inflammatione in exterioribus partibus consistentes, cujus generis sunt erysipelata, podagra, chiragra, retrocedant, atque ad interiora pellantur, ac cito hominem rapiant. Neque vero id aliter fit, quam inflammatione & sphacelatione ventriculi, aut intestinorum. Major perniciēs est, si in peste carbunculi vel bubones retrocedunt vel non satis prodeunt: nam tunc in certo vitæ periculo homo versatur: horrore enim homo concutitur, summe anxius & inquietus fit, æstus cum exterioribus algescentibus regionem ventriculi, occupat, ad vomendum est cupiditas, vel etiam singultus accidit, postea sub mentis turbatione & syncope homo exspirat. Si quis ex nimia sanguinis profusione, quale quid contingere potest felici abortu, in hæmoptysi, in cruento vomitu, vel morbo nigro *Hippocratis*, aut gravi hæmorrhagia in febribus, moritur, is quidem ex animi defectione ipsaque syncope vitam amittit; sed tamen notabile est, quod plerumque vehemens sitis, inclinatio ad vomitum, & pulsus cum debilitate, frequentia, & artuum dissentione præcedat, indicio, sanguinem in partibus interioribus, ventriculo, capite subsistentem movere adhuc quosdam spasmos; nam sitis ex spastica strictura tunicæ glandulosæ œsophagi ut plurimum oritur. Morbi, quibus infantes pereunt, sunt ut plurimum spasmodici & convulsivi, inflammationem & sphacelum præ-

fertim



sertim ventriculi, intestinorum, aut capitis, post se trahentes; nam ex acutis doloribus facile in epilepsiam & convulsiones, febres atque asthmata incidunt. Si epilepticus paroxysmus unus alterum consequitur, & alvus antea fortiter clausa sponte jam dimittit excrementa valde foetida & nigra, vox clangosa & singultuosa fit, totumque corpus ardet, in propinquo exitium esse judicare licet.

24. Restat jam, ut mortis præsagia in quibusdam etiam morbis chronicis exponamus. Hos inter vero eminent maxime hydrops, cachexia, scorbutus, marasmus, hectica, phthisis ac tabes. Qui hisce decumbunt, lente transeunt ad mortem, propter lentius procedentem viscerum ex humorum stagnatione aut extravasatione corruptionem, quæ, quoniam nulla arte averti potest, certe mortem ingenerat. Indicia vero viscerum corruptorum in inferiori ventre, adeoque mortis secuturæ, sunt appetitus in totum prostratus cum eorum etiam aversatione, quibus sani valde delectati fuerunt. Deinde lenta febris, si incrementa sumit, & celerior pulsus evadit: qui nunquam non corruptionem internam indicat. Denique summa virium cum respiratione difficili prostratio, somnus valde laboriosus & plus debilitans, quam reficiens. Hæc si diutius adfligunt & nullis remediis mitescunt, certo mortem prælagiunt, maxime si corpora sunt senilia, vel ex morbo præcedente in ejusmodi chronicam passionem delapsa. Hæ sunt quædam communes & exitiales chronicorum notæ: non alienum vero erit, quasdam in certis morbis specialiores adjicere. Itaque quod attinet ad phthisin, pessima & mortem indicantia signa sunt, si totum corpus tabe consumtum est, si assidua atque hectica febris urget, facie rubicunda, si profluit alvus, sudor colliquativus est, sique pedes intumescunt si sputum supprimitur, pallidi ungues, oculi concavi, & nares acutæ fiunt. Si ex asthmate diuturno cordisque palpitatione, vel ex induratione hepatis post quartanam hydrops sequitur, non facile ser-

vari posse hominem certo pronuciari potest; sique urina pauca, turbida, rubra redditur, omne est valde perniciosum; sique superiora gracilescunt, & facies insimul flavescit, prælagire mortem aliquot menses antequam accedat haud dubiose licet, quæ etiam certissime sequitur, febre aucta & respiratione difficiliore reddita. Quicumque sæpius, & maxime ex motu corporis & animi vehementiori, fortem & contumacem palpitationem cordis sentiunt, & postea asthma convulsivum, vel hæmoptysin, aut hydropem incurrunt, iis diu ante mortale periculum prælagiri potest, multoque magis, si quandoque animo delinquant. Nam horum omnium causa polyposa in cordis vasis concretio est, quæ nulla medicina tolli potest, & tandem hos morbos, concursantibus aliis causis, funestos ingenerat; sique subito & sine causa manifesta & frequenter incidit animi deliquium, identidem causa ejusmodi polypus est, & mortem, si frequenter incidit, repertinam inferre solet. Quisquis enim sæpe multumque sine evidenti occasione animo deficit, hunc recte Hippocrates innuit subito mori consuevisse.

25. Si hepar corruptio sphacelosa & mortalis occupat, tum fastidium adest cibi, maximeque carnis, frequens & multa est sitis, febris, virium dejectio, singultus, & vomitu subinde extunditur serum vel flava bilis & corpus sensim contabescit: quibus in casibus post mortem jecur plane sphacelosum, nigrum observavi. Ventriculi exulceratio longum etiam & lethalem morbum producit, & cognoscitur, si summa anxietas & vomitus cibum adsumtum excipit, quæ vitia, dato medicamento quodam acrisalino aut spiritioso, augeantur, corpus contabescit, pulsus semper celer est, extrema partium rigent & quandoque horrent, fonticuli clauduntur, & somnus parvus & laboriosus fit. Hi tertio vel quarto mense demum moriuntur, & diu ante mortem prædicere possumus. In cachexia, si totum corpus fit tumidum, inflatum, pallidum, si ciborum adest fasti-



fastidium, & crebrior male olens vomitus urget, & pauca per alvum feruntur, urina cruda & pauca, respiratio difficilis, & totum corpus male olet; postea si frequens pulsus accedit & respiratio difficilis, mortem aliquot mensibus prænuntiare licebit, quæ eo certius sequitur, quo ægrotus majora errata in diætâ, in nimio potu commisit, vel mœstitia animi diuturna fuit fatigatus.

26. His jam expositis e re esse duco, quædam adhuc eximia ac salutaria præcepta & monita ad prognosin instituendam subungere, quæ inter maxime eminet illud, quod probe morbi spasmodici chronici a passionibus acutis distingui debeant. Nam sæpissime in hypochondriacis & hysteriis ejusmodi pathemata occurrunt, quæ in acutis passionibus lethalem effectum denunciant, in illis vero minus periculi alunt. Quid enim frequentius est, quam quod sub paroxysmis maximas anxietates spirandique angustias cum extremorum frigore, urina aquosa, patiantur, pulsu existente parvo, debili, sæpiusque animi vehemens deliquium accedat? quæ tamen omnia brevi expirant, & sine periculo transeunt. Deinde probe morborum tempora sunt discernenda; nam ex iis omnibus signis, quæ modo attulimus, funestis, si quædam vel etiam plura sub initio & primis morbi diebus apparent, inconsiderate certe agerent, qui statim mortem præforibus esse exinde judicare vellent. Aliud vero est, si viribus a nimio calore, vigilia assidua, inappetentia, anxietate, dolore per plures dies fractis & exhaustis funesti ejusmodi spasmi, & ab iis oriunda symptomata, prodeant, maximeque iis temporibus, ubi morbus alias salutariter solvi solet, quod ordinario fit circa dies impares, septimum, nonum, & undecimum. Postea magna semper est habenda ratio corporum, quæ ægrotant, & maxime æstimandum, utrum ex imbecillibus, an robustis sint; nam illa semper magis periclitantur, quam quæ constitutionis robustioris & validioris sunt. Imbecillibus vero ratione ætatis senes & infantes, ratione corporis

structuræ, qui spongiosi, repleti, multisque & exilibus vasis instructi sunt, annumeramus, neque minus, qui a parentibus debilibus ac morbosis procreati sunt, it. qui præcedente morbo diuturno, vel immodicis sanguinis profusionibus ac diuturna inedia, vel animi affectu, mœstitia & cura, inquieta medicatione vires amiserunt. Referimus huc etiam puerperas, & qui ex vitiosa diætâ vitæque regimine & excretionibus suppressis ingentem impurorum humorum copiam intra vasa sibi contraxerunt. Nam in iis omnibus invalidis corporibus facile dolorum vel inflammationum ad mortiferum sphacelum transitus est. Postremo etiam illud addiciendum puto, ut probe semper attendamus, num a causis quibusdam nocentibus, externis, per iram, terrorem, corporis refrigerationem, aut cibum perniciosum, vel per medicamentum vehemens & virulentæ indolis ea, quæ apparent symptomata, suscitata fuerint. Quæ omnia ita etiam sunt comparata, ut in morbis in se periculosiss & corporibus invalidis in mortalem perniciem ægros conicere, mortemque, accelerare possint. Si tamen in morbo minus periculoso, & corpore robusto, pernicialia ejusmodi adsunt symptomata, non statim penitus sunt extimescenda. Postremo plurimum etiam refert ad prognosin feliciter instituendam, principia morbi invadentis probe expendere. Nam omnis morbus, qui statim in principio vires tollit, pulsu valde frequenti existente, nihil boni portendit; eo quod & infirmiores vires, & succorum impuritatem, & prævam dyscrasiam sanguinis, clarius manifestet. Sed hæc de nobilissima hac materia dixisse sufficiant.

## DISSERTATIO II.

### DE DUODENO MULTORUM MALORUM CAUSSA.

#### §. I.

**D**Icturi de duodeno, idque mille malorum sedem adferturi, necessarium omnino



omnino arbitramur, ut, priusquam altius in ejus explicationem descendamus, paucis præmoneamus, in præsentī dissertatione minime id nobis esse propositum, ut hujus sententiæ autores nos profiteamur, quippe falso nobis hanc gloriam vindicaturi. Debetur hæc potius immortalis memoriæ medico Sylvio, qui ante aliquot lustra totam medendi scientiam truncam ac debilem, adhuc principio quippe firmo stabilique destitutam, in ampliorem decorem reposuit, & omnem fere curandi rationem hoc fundamento confirmavit. Is itaque fuit qui primus omnium hanc viam vidit, viamque longius omnino persecutus est, & triumviratu humorum, bile, pituita, succoque pancreatico corpus regi professus, ac ex eorum temperie mixtioneque & clementi effervescencia non digestionis modo, sed ipsam quoque vitæ atque sanitatis rationem deduxit. Sicut e contrario ex horum etiam intemperie, & nimia eorundem abundantia vel defectu omnes omnium morborum causas, imo sanandi rationem nasci contendebat. Quæ cum ipse, latius uberiusque in sua praxi persecutus sit, & speciatim *lib. praxeos p. 174.* persequatur, supervacuum nobis videtur, prolixius eadem enumerare.

2. Fuit itaque hæc *Sylvii* sententia, quæ, ut lucem adspexit, ingenti excepta est ad plausum, primum quod nihil obscurum, imaginarium, & nihil de veterum somniis retinebat, deinde quod ex ipsa rerum natura, velut ex fonte deducta, claro exploratoque insisteret fundamento. Eadem tamen, posteaquam altius examinari cœpit, quam prius consecuta erat laudem, magna ex parte destituit, illius nævos anatomia & physica denu-dantibus. Nempe enim minus latere poterat iis, qui hisce in studiis versati erant, impetu magis, quam diligenti ratione eo adactum fuisse *Sylvium*, ut *effervescencia succorum*, uti loquitur, in duodeno adfirmaret. Quam opinionem ut argumentis tueretur, bilem pure alcalinam omnino adferebat, quod quam falsum sit, vel ex eo liquet, quod ad-fuso etiam validissimo acido, quale est

spiritus vitrioli, illa non effervescat, in flavam potius ac mucilaginosam offam coalescens. Quod idem ex eo colligere licet, quod, ubi spiritum nitri, qui æque vehemens acidum est, adjeceris, identidem coaguletur, & viridi adsum-to colore, quam lenissime commoveatur. Neque minus errasse videtur, quod suc-cum pancreaticum, seu acidum adleve-raverit, cum anatomicis constet experi-mentis, hunc, quodcumque etiam alcali adfundas, nullo modo cum eo efferve-scere, nedum cum bile conflictari. Imo exciso pancreate vitam spiritumque incolumen manere animantibus, *CL. BRUN-NERUS* in *libello erudito de pancreato* demonstravit, quo unico experimento non mediocriter hæc *SYLVII* opinio ad-fligitur.

3. In eo vero magnum errorem admi-sit, quod ex hoc triumviratu vitæ sani-tatisque rationem explicaverit, & ex eo-dem universam medicinam tam theoriam quam praxin quasi a capite arcessiverit. Neque enim potentem satis esse hanc sententiam, plura testantur, quæ cum ad explicationem, rerum naturæ & ad ipsum remediorum usum pertineat, mi-nus tamen ex hoc principio derivari pos-sunt. Ut enim taceam de iis morbis, qui in certas ætates temperamenta fami-lias & tempestates incidunt, satis super-que constat, ex rabidi canis morfu, ex putrido miasmate pestis, dysenterix luis veneræ, imo ex sola animi perturbatio-ne gravia oriri mala, quæ sine prævia humorum corruptione ægrotantem con-ficiunt. Porro experientia confirmatum est, ex sanguinis abundantia, ejusque extra vasa secessione, item ex viscerum vitio & ægrotare plures & iisdem inter-cipi, cum manifesto argumento, gravi-ter eum erraturum, qui in his morbis triumviratum culpæ accusaret. Quæ qui-dem omnia eo fine a nobis dicta sunt, ut adpareat, hanc *SYLVII* sententiam utilem alioquin, explicandæ toti medi-cinæ nunquam sufficere. Quanquam au-tem neque universalis sit, neque expli-cata satis: non contemnenda tamen ob-servatio est, sed suam etiam utilitatem eamque



eamque amplam pollicetur, modo curam adhibeas, ne *Sylvium* secutus, nimium ejus fines extendas. In quo uti ille Vir erravit, ita tamen illius sententia probatur, & ita nos idemdem probamus, quod plurimi ex chronicis malis in duodeno existant, ibidemque generentur. Et hoc quidem est, quod in præsentī dissertatione meditatur, hanc *Sylvii* sententiam, quæ fere exolevit, revocaturi & saniore eam sensu explicaturi. Natura nempe mortalium hoc quoque nomine parva & sinistra est, ut novas dictorum sententias, quæ aliquid utilitatis habent, minus recte intueantur, quippe primo cum impetu ad eas ruentes, mox, ubi effectus non responderit, easdem destituentes: adeo, uti in ceteris rebus mortalium, ita hic est arduum omnino, modum tenere. Quod idem fatum *Sylvii* sententia sustinuit, quæ ubi primum in lucem prodiit, avidissime excepta fuit, mox ubi non in omnibus respondit, (neque enim respondere poterat) eodem consensu destituta ac repudiata fuit; cum tamen revera, multum veritatis suo loco & pretio æstimandæ in medendi methodo hac in hypothesi occultetur. Nos itaque jam in eo occupati erimus, ut hypothesin a *Sylvio* primo propositam nostro vero tempore partim neglectam, partim suppressam vindicemus, & quasi ex tenebris in lucem revocemus.

4. Est vero hæc nostra sententia firma ac stabilis primum tenuium intestinorum, quod duodeni nomine venit, ab usu & officio reliquorum intestinorum plane esse remotum atque distinctum, adeoque singularem considerationem mereri. Provida namque natura non contenta ventriculum superiorem & majorem condidisse, sed ipsi quoque adjecit ventriculum minorem, & quemadmodum in primo & majori ingestorum magis rudis & simplex fit solutio: ita in secundo & minori fit magis intimior, & chymus plus elaboratur, miscetur, & attenuatur. Sicuti vero hujus intestini usus maximi est æstimandus, ita ex adverso, si vitio laborat, si muneris sui obliviscitur, sedes ac diversorium & fomes fit multorum

magnorumque morborum. Ut vero hujus affirmationis veritas magis constet clariorque ea fiat, placeat jam ex ipsis anatomicis paulo subtilius & diligentius duodeni structuram ac fabricam, & ex hac ipsum usum ejus æstimare.

5. Nobis nempe, uti antea dictum, duodenum videtur parvus ac succenturiatus ventriculus, & magna digestionis alimentorum officina. Primum vero ventriculi requisitum est, ut gaudeat flexura sive curvatura & habeat fundum, in quo paulo diutius ingesta hæreant ac commorentur. In eo vero anatomici ferme omnes consentiunt, quod duodenum ab orificio ventriculi dextro incipiens insignem versus spinam repræsentet flexuram. *RIOLANUS in Encbirid. anatomic. Patholog.* duodenum ad spinam complicari dicit. Idem sentit *BLANCKARD in Anatom. p. 410.* duodenum, inquit, a pyloro versus spinam sub ventriculo excurrit, fere circa mesenterii centrum, deinde lumborum vertebrae per ligamenta membranosa jungitur, atque sic ulterius ob brevitatē, nulla circumgyratione facta, circa renem sinistram, ubi jejuni anfractus incipiunt, terminum consequitur. Eodem modo *HORNIUS in Microcos. duodenum,* inquit, a ventriculo incipit & facto deorsum parvo flexu recta fertur spinam versus, cujus vertebrae lumbaribus transversim incumbit fere circa mesenterii centrum. Et *MUNYKS Lib. de re anatomic. p. 36.* hæc habet: tenuium intestinorum primum a duodecim digitorum mensura duodenum veteribus transversim incumbit: ductum admittit biliarium, atque pancreaticum; habetque sibi annexam latiore pancreatis extremitatem. Ubi circumvolvitur, intestinum jejunum appellatur. *VESALIUS in Anat. p. 379* de duodeno hæc proposuit: ex humiliori orificio ventriculi, quod e sua elatiori & dextro ipsius lateri proxima consistit sede, principium intestinorum exoritur, illive orificio, ubi id crassiori sua substantia introrsum protuberat, continuatur, ut simul atque e ventriculo prodit in posteriora reortum sub sede ventriculi posteriore secundum dorsi dextrum latus recta deorsum proficiscatur, in nullos omnino anfractus revolutum.



volutum. Errant itaque plures ex anatomicis, qui duodeni terminum ibi constituunt, ubi ductus biliaris, vel pancreatici in homine orificium in duodeno prostat. Rectius vero ibi finis est ponendus, ubi flexura duodeni definit & in anfractus incipit convolvi. Unde rectissime VERHEYEN in *Anatom.* p. 41. scribit: *duodenum ob orificio ventriculi dextro initium habens, versus spinam reflectitur, atque in latere sinistro, ubi anfractus incipiunt, terminatur.* Et optime quoque HORNIUS in *Opuscul. Anatomicis*: *duodeni finis ubi sit non satis est determinatum apud Auctores. Nam qui 12. digitorum longitudinem, a qua nomen habet, in eo reperiri volunt, non ad insertionem pori biliaris respicere debent, sed potius terminum ejus in sinistris querere, ubi jam in gyros volvi incipit intestinum.* Et HIGMORUS in *Anatom.* p. 27. finem quoque duodeni statuit, ubi hoc in gyros incipit convolvi.

6. Alterum requisitum ventriculi est, ut ejus cavitas sit ampla & capax, jam vero utut capacitas duodeni longe minor sit ea, quæ in ventriculo deprehenditur; nihilominus multum reliqua intestina amplitudine superat. Unde VESALIUS in *Anatom.* p. 379. verissime scribit: *Duodeni pars sub ventriculi fundo, ad dorsum proxime adligata, inter dissecandum capacior, ampliorque reliqui intestini ductu occurrit.* VESLINGIUS quoque laxitate & amplitudine insigni præditi assertit. Quod etiam DIEMERBROEK adfirmat p. 153. dum ait: *quotidiana anatomica observatio ostendit, hoc intestinum non nunquam laxitate & amplitudine insigni præditi reperiri.* Vehementer itaque errant illi Anatomici, ex quorum censu est Bartholinus, Baubinus & Blankardus, qui existimant, duodenum reliquis tenuibus crassius quidem esse, sed angustius. Deinceps quod duodenum gaudet munere ventriculi vel ex eo innoscit, quod ejus textura, præsertim interna eadem sit cum ventriculo. Habet hic tunicam glandulosam ac villosam, ex qua continuo sudat atque distillat succus solvens fermentescibilis: eadem

tunica visitur vel potius continuatur in duodeno. Hæc non separat liquidum ex intestinis, nam nullæ sunt viæ vel ductus patentes, sed potius secernit succum a sanguine similis indolis cum menstruo sic dicto ventriculi. Illud vero maxime memorabile, quod duodenum, præter tunicam glandulosam crustaceam, innumeris parvis glandulis instructum sit, quæ, separata tunica villosa, in nervæ positæ sunt, & visui occurrunt. De hisce WEPFERUS in *Hist. cicut. aquatic.* p. 190. ita scribit: *in duodeno plurimas insignes glandulas ultra palmi latitudinem a pyloro divisim sparsas inveni, quæ, detracta tunica fibrosa, quasi conglomeratæ apparent, dimidiati seminis cannabini magnitudine, quæ aqua macerata mucum stillabant copiose etiam octavo adhuc post mortem die.* Harum glandularum inventor celebratur Clarissimus BRUNNERUS vid. *Misc. Natur. Curios. Dec. II. ann. 5. p. 464.* Glandularum harum officium sine dubio non aliud est, quam ut lympham menstrualementem secernant atque in cavum duodeni infundant. Ulterius ventriculi requisitum præcipuum ac palmarium est, intimam dissolutionem ingestis præstare, eorumque nexum ac mixtionem solvere, & hæc solutio maxime viget in hujus fundo, ubi diutius hæere solent contenta. Gaudet eo quoque privilegio & prærogativa, imo majori, noster ventriculus præ superiori: hic enim accipit tantum fermentalem succum ex tunica glandulosa ac villosa, ille vero præter hanc tunicam & glandulas speciales, obtinuit peculiare quosdam insignes ductus, qui largo flumine fluida solventia magnæ activitatis infundunt. Influit nempe succus biliosus parciore quidem quantitate ex cystide, majori vero ex hepate & ejus ductibus biliaris, manifesto indicio, quod tanti succi copia & usum præstet egregium. Simili ratione ex magnitudinis eximia pancreatica glandula emergens ductus lymphæ solventis fermentescibilis ingentem quantitatem advehit: quod etiam de magno & singulari ejus usu testimonium esse potest. Perquam vero dignum notatu est, quod

hi duo



hi duo ductus in homine ambo concurrant & horum orificia in papillam definant, quæ directo fundo flexuræ duodeni superposita, quod sæpius in anatomia annotare mihi licuit, ut ex superiori loco sic guttatim in substratam chyli massam descendentes, mirabilis virtutis menstruum illud microcosmicum universale, vere balsamicum constituent, quod ex bile, quæ fluidum alcalino-sulphureum est, ac succo pancreatico tenuissimæ ac spirituosæ indolis compositum est.

7. In ventriculo tantum fieri solet ingestorum dissolutio, nulla vero separatio vel secessio fluidi ad sanguinem, unde omnium consensu ventriculus lacteis vasis est destitutus. Simili modo in duodeno nullæ viæ vel venæ lacteæ observantur, nihil itaque separatur, quod fit in aliis intestinis, præsertim in jejunio, & eum quoque in finem mesenterium non pertingit ad duodenum, cui alias cetera tenuia adhærent, & quod fulcrum non modo solet esse vasorum lacteorum, sed & liberio rem transitum ipsis præbet, potius duodeni interstitium occupat inferior & eminentior pars pancreatis cum mesenterii centro, quod vertebriis firmiter alligatum. Centrum vero mesenterii dicitur, ubi ex aortæ trunco arteria in mesenterium fertur, ubi etiam plexus insignis nervosus ex spinali medulla ad mesenterium ac intestina prolabitur, nec non ex trunco venæ portæ ramus dexter ad mesenterium abscedit.

8. Hæc omnia adducta clarissime evincunt, jure meritoque duodenum quod dicitur, in classem magis eorum, quæ ventriculi nomine gaudent, referendum esse, quam in numerum intestinorum, quæ magis vacant secretioni, quam digestioni. Et certe non leve occurrit dubium, an non in duodeno ceu ventriculo succenturiato, plus vigeat digestionis negotium, quam in ipso primario, ubi cruda modo & rudis saltem solutio videtur operari: in nostro vero fit magis intimior, ciborum massa hic magis elaboratur, rectificatur, major partium attenuatio, & major spirituscentia locum invenit. In ventriculo succus tantum lym-

phaticus cum reliquiis ciborum acidulis præsens est; in nostro vero præter hunc succum affluit adhuc alius penetrantis & activæ naturæ, qui longe excellentius, tenax viscidum pingue, quod est in ciborum massa, diducit, dissolvit, & se intime cum ingestis miscet, quod vel ex solo flavo excrementorum colore abunde apparet. Hoc vero consideratione maxime dignum est, nullum dari ex animantibus, quod destitutum sit hac intestini flexura, sive quod non gaudeat parvo illo & succenturiato ventriculo. Nullum quoque datur animal, ubi non succus biliosus in vasto hepatis viscere genitus, in magna copia affundatur duodeno, perspicuo argumento, naturam prudentissimam maxime omnium occupatam esse, ut hanc essentialem corporis partem, & ad vitam ac sanitatem tuendam summe necessariam recte construeret ac efformaret. Unde facilimum est judicatu quantus usus sit hujus prænobilis partis, quantumque eadem ad universam corporis œconomiam tuendam conferat. Et quemadmodum usus amplissimus & longe maximus est illius; ita etiam si vitium vel defectus in illud incidit, si intemperie menstruales succi laborant, si debitus tonus hujus extremæ partis læsus vel destructus fuerit; magna inde turbatio in universa corporis œconomia; & ingens malorum proventus exsurgit. Præsentis igitur instituti maxime omnium erit, inquirere, quomodo in hoc intestino, ceu parvo ventriculo, plurimæ causæ morbificæ, si præter naturam est adfectum, elaborentur & progenerentur. Et in eo laudandi quoque mihi *Helmontius* & *Sylvius* videntur, qui urgent maxime in scriptis suis, scaturiginem plurimorum morborum ibi ponendam ac quærendam esse.

9. Diximus in superioribus, omne principium morborum materiale, quod causæ morbificæ nomine venit, non in humoribus, qui jugi intra vasa feruntur circulo, locandum esse, utpote humores nunquam nocent debito motu pro-voluti: nam hac ratione, non modo a corruptione alieni manent, sed &



nullam partem lacerare vel lædere sufficienter possunt. Quapropter ut humor a naturali sua indole deficiat, ut alienus fiat & corrumpatur, ut denique corporis partem lædat atque offendat, opus est quiete, opus stasi ac stagnatione. Jam vero nulla pars in universo corpore nobis videtur aptior ad stagnationem, ad corruptionem fovendam, atque consequenter ad generationem causarum morborum, quam ea pars, quæ flexuram habet, quæ ventris nomine venit, in qua propter flexuram diu hære ac subsistere possunt humores, in quam classem jam præter ventriculum etiam referendum est duodenum. Solent enim humores maxime corrumpi & a natura blanda ac amica in inimicam nocentemque primo sola stagnatione, deinde aliarum heterogenearum rerum mixtione degenerare.

10. Alienam plane indolem & virulentam naturam mora induunt humores, ita etiam bilis, si quies ipsi concessa est, maxime effertur. Inde jam olim atro carbone notata fuit ab HIPPOCRAT. de Natur. human. p. 282. qui ita sentit: *viridis bilis juxta hepar manens ubi superbullit, humani corporis corruptio est, ac noxius atque inutilis corporis humani inquinatus*. Non aliud hoc loco intelligitur, quam quod bilis, ex stagnatione in duodeno ductibus biliaris corrupta, corpori nostro sit nocentissima. Similis locus hac de re extat lib. de Medic. veter. p. 34. qui hic est: *cum amaritudo quædam diffusa fuerit, quam bilem flavam adpellare solemus, quales statim anxietates & æstus & impotentia occupant; verum ubi liberati fuerimus ab illa & repurgati, aut sponte, aut per medicamentum, si modo tempestive quid ipsorum fiat, manifesto & a doloribus, & a calore liberamur. Quod autem tempore eodem elevata fuerit, & cruda est meraca ac intemperata, nulla arte neque dolores neque febres sedaveris. Et quos quidem acuta acrisque ac æruginosa bilis affligit, eos mox rabies & morsus viscerum ac pectoris corripit desperatio. Non sedantur autem hæc, priusquam eadem expurgetur & prosternatur, &*

*aliis permisceatur*. Qui elegantissimus locus abunde declarat, quam graves affectus corruptam bilem soleant consequi.

11. Primum vero sermonem facere placet de bilis præternaturali stagnatione, ad quam non modo bilis segnities & defectus partium salino sulphurearum in illa, sed & tonus & motus peristalticus hujus intestini labefactatus plurimum contribuit. Deficiente enim hoc motu peristaltico bilis, quæ continuo effluit, ingenti in copia accumulata & congesta in hac parte, mirifice intestinum distendit, qua de re notari meretur locus ex DIEMERBROECK p. 53. in *Anatom. : quotidiana*, inquit, *anatomica sectiones docent, hoc intestinum nonnunquam amplitudine insigni præditum reperiri, atque tunc majori a succis fermentaceis acrioribus vitiosis in illum delabentibus, binque validis inductis fermentaceis effervescentiis, a quibus non solum ipsum valde distenditur; verum etiam molesti rugitus, magni dolores, lacerationes, summaque anxietates in viventibus oriuntur*. Ita *Miscell. Natur. Curios. Dec. II. ann. 2. p. 186.* observant, in cachectico vesicam biliariam hepatis annexam, bile plane vacuum; intestinum vero duodenum, humore bilioso repletum adeoque dilatatum fuisse, ut quasi bursam referret, qua humoris libra ad minimum contineri potuisset, cum enim sectione præpropera aperiretur, plus quam dimidium humoris crassioris e flavo nigricantis effusum, & nihilominus in ipso superfuisse 12. amplius cochlearia. Sæpissime accidit, bilem in duodeno plus justo accumulari & ipsa stagnatione & distensione multa pathemata excitare, videlicet dum intestinum vehementer distenditur, non modo tunica, quæ exquisito sensu pollent, affliguntur, sed & rami plexus mesenterici tenduntur, nec non, vasis sanguineis compressis, congestio sanguinis fit circa truncum venæ portæ & initium arteriæ meseraicæ: sequitur hinc fixus in lumborum prima vertebra dolor, præcordiorum anxietas, appetitus dejectio, somni & virium defectus, alvi que adstrictio. Observavimus



vimus sæpius, ejusmodi pathemata in corporibus imbecillioribus, in feminis, quibus menses defecerant, hypochondriacis, in intermittentibus præpostere suppressis, in diætæ aberratione, præsertim post iracundiam. Et tali in casu parum efficiunt stomachica carminativa, absorbentia, laxantia, multo minus anodyna, quæ potius noxiosissima observantur; sed optimo consilio, emetico cum cautelis administrato, oportet primam regionem a succis biliosis stagnantibus deplere. Dum hæc scribimus, occurrit nobis casus viri in hac civitate honestissimi, qui paulo imbecillioris naturæ, per vitam sedentariam & continuos labores, quos ratione officii laudatissime administrat, ingentem humorum impurorum copiam circa primas vias colligere solet. Is, si ventriculus plus justo alimentis difficilioris solutionis aggravatur, premitur anxietatibus, circa præcordia angustis, phlogosi, dolore circa scrobiculum cordis & circa latus dextrum; cibos porro respuit, corpus lassatur, somnus parvus, & flavo foedoque colore tingitur cutis, & hæc symptomata sæpius recurrunt. Rhabbarbarina cum abstersivis salibus & aperientibus mixta, non inutilem locarunt operam, sed paulo tardius curam confecerunt, quæ plerumque ad tres septimanas extendebatur. Hæc ante paucos dies a nobilissimo ægroto mihi expositas, me fallere non poterant, quin reprobe pensitata atque examinata, judicarem, stagnationem biliosorum humorum in duodeno maxime in causa ac culpa esse. Unde lenissimum emeticum ad faburram horum humorum expediendam porrigebam. Æger, qui præcedente nocte integra vehementissimis cruciabatur symptomatibus sine omni somno, altero mane sumit emeticum ex gr. i tartari emetici soluti in aqua menthæ: mox quatuor vomitibus mensura imo ultra bilis crassæ, obscuro flavæ viscidæ in vas stanneum rejicitur, quos vomitus subsequantur quatuor alvi dejectiones peracta operatione simul & semel cessant symptomata, appetitus cum somno redit,

anxietates omnes remittunt, & cum morbo redit in gratiam. Quæ unica morbi historia nos edocet, quam insigni efficacia sit emeticum, si mali causa delitescit in primis viis.

12. Deinceps bilis in duodeno stagnatio alvi excitat tarditatem; meretur enim notari, quod, si motus peristaltici defectio sit in primo intestino, reliqua etiam una patiantur, ut traditor fiat contentorum progressio. Accedit quod bilis, seu stimulus intestinorum, retenta, difficiliorum contentorum progressum per intestinorum anfractus efficiat. Confirmat hoc ipsum inter alia observatio, quæ extat in *Miscell. N. Cur. loco citato*. Præterea in duodeno subsistens cum liquore pancreatico atque ingestorum mucosus flatus excitat, qui lumborum dolores atque anxietates movent, & nephriticam colicam imitantur. Elegans hanc in rem est *Observatio 57. PECHLINI* qui inquit: *obliquus assurgens tenuium illa pars lienem versus acutiusque inde reflexa vel situs ingenio efficit, ut diutius ibi hæreat, quicquid justo viscosius allabatur, sive pituita sit, seu lympba pancreatica, sive bilis, seu denique flatus*. Periclitatur autem quam maxime hic locus in foeminis, ut quæ asotica horæorumque fructuum ingluvie cruditatibus fermentationibusque flatulentis copiosam ministrant materiam, in illa inprimis corporum per balenatios, imo & ferreos thoraces strictura. Equidem cum succi importunius effervescentes spatium requirant solito majus, in quo libere se expandere possunt, accidit, ut compresso illo hypocondriorum angulo, quem dilatari oportebat, & succi & flatus ibi hæreant & fixa sede novis corruptelis & fermentationibus viam aperiant. Eodem modo distensio duodeni a flatibus producere solet fixum dolorem chronicum in lumbis, id quod suo tempore jam notavit Sylvius; qui dolorem, lumbos quasi perterebrantem, in eo loco fieri existimat, ubi confluxus bilis & succi pancreatici existit. Notum est febrilium insultuum initia plerumque fieri cum dolore fixo lumborum, eo in loco,



ubi centrum mesenterii vertebris alligatum est, cui validis & firmis membranis cohæret quoque duodenum, unde non mirum, violenta harum membranarum, exquisitissimi sensus expansione facta, vicinos nervorum plexus ad spasmos sollicitari. Porro stagnant tam solida quam liquida in ventriculo & duodeno, si spasmodice hoc intestinum constringitur, quo fit, ut omnis transitus ad reliqua intestina præcludatur. Experientia quotidiana constat, alimentum tam solida quam liquida ante triduum assumpta magna in quantitate ejici, imo ebrios sæpius post duodecim horas miram liquiditatem reddere: qua de re eximium locum habet HELMONTIUS *Lib. de febr. cap. X. Si pylorus, inquit, nimia errat strictura, potus ibidem nonnunquam toto triduo perseverat, atque tandem plus unico vomitu rejicitur, quam per biduum sit assumptum.* Hæ spasmodicæ constrictiones efficiunt, ut non modo humores corrupti, sed & flatus subsistant in hypochondriacis & hysteriis: unde in febrilibus insultibus anxietates, inquietudines, oppressiones spiritus, dolores circa scrobiculum cordis, circa lumbos, nausea vomitusque exoriantur. Et hæc strictura duodeni icterum sæpissime efficit, dum nempe crispatura & fortiori contractione tunicarum duodeni ductus cholodochus, qui itinere obliquo ferme digiti minoris longitudine transit, coarctatur vel comprimitur, ut sic minus descendere bilis ad duodenum possit: unde restagnans bilis tam in ductibus biliaris, quam in cystide, non modo dolores & spasmos efficit, sed & per vasa lymphatica in sanguinem rediens secum illum flavumque colorem externo corporis cortici adspargat.

13. Sunt plures alii effectus, qui ex intemperie & corruptela bilis & succorum confluentium in duodeno præparantur; uti sunt febres præsertim intermittentes omnes, imprimis tertianæ continuæ, lentæ, ardentes, cholericæ, variolæ, morbilli, diarrhææ, dysentericæ, cardialgiæ, tussis graviores chronicæ, arthritides, dolores vagi & hujus generis

plura. Corrumpuntur vero humores in hoc loco non tantum stagnatione, sed & commixtione cum aliis succis excrementitiis impuris, qui ad bilem redundant & succos ibi hærentes, vel ex ventriculo, vel ex massa sint sanguinea. Ex ventriculo sæpe acidi, pontici, corrosivi ex alimentis ejus naturæ vel ex diuturna majora ibi geniti humores ad duodenum transeunt, cum bile miscentur & ibi moram trahentes biliosum balsamicum humorem mirum in modum deiciunt atque deturpant. Bilis vero admixtione ejusmodi acidi non tantum coagulatur, & corrosiva evadit, sed colore etiam suo mutato, æruginosum ac viridem habitum induit. Talis in duodeno existens, rosione & vellicatione in vicinis partibus tam ventriculo, quam intestinis sensibilibus graves dolores, tormina, spasmodicas crispaturas in infantibus facillime convulsiones & epilepsiam suscitatur. Malum itaque signum est, si in hisce excrementa descendunt viridi colore tincta, quæ sæpius tam corrosiva sunt, ut lintamina inde exesa atterantur. Ab eadem bile æruginosa stagnante tussis stomachales chronicæ & ferinæ, non modo in infantibus, sed etiam adultioribus oriuntur. Eædemque sæpe intermittentibus & hypochondriacæ affectioni se associant, quo in casu omnia dulcia, peccoralia plus damni quam emolumenti afferunt; & talis tussis, tam de die quam de nocte subinde recurrens, certas periodos servare solet. Infringitur enim quodammodo acidum corrosivum, alimentorum succo adfluente, quo minus graviter subjectas partes vellicare possit. At ubi hic succus recedit, in reliqua membra diductus, relinquitur corrosivum, quod, priore impetu resumato, tenerrimas membranas duodeni flatibus distentas corripit, quæ dein in consensum trahunt diaphragma, plexus mesentericos stomachales, pneumonicos & sic violenta fit tussis, quandoque cum vomitu & suffocationis metu, propter sequestrationem & affluxum feri visceri in bronchia pulmonum.

Tales



Tales ferinas tusses brevi tempore felicissime solo pulvere ex lap. cancror. composito curavi, adjecto oleo anisi, pro dosi drachmam unam binis de die vicibus offerendo. Infantibus hoc adflictis malo leniora emetica, it. infusa rhabarbarina cum manna colluviem istam viscido biliosam detrahendo insignes ferunt suppetias.

14. Talis caustica bilis in flatus resoluta sæpe in remotis partibus atrocissima producit symptomata. Notabilis est *Observatio River. Cent. 2. obs. 8.* Dolor acerbis singulis noctibus affligebat post primum somnum, incipiebat in latere sinistro, & ad anteriorem partem thoracis & posteriorem ad latus sinistrum & scapulas extendebatur, tanta vehementia, ut subito excitatus in nulla decubitus forma consistere posset. Perseverabant isti dolores usque ad matutinum tempus & tunc temporis quiescebant, tota die non amplius apparentes. Optime judicat Riverius, causam esse flatus, qui ex illuvie pravorum crudorumque humorum in primis viis, ob pravam victus rationem congestorum, a calore intensiori facto in somno oriuntur. Sæpius notavimus in plethoricis, & qui avidius comedunt, quod certis horis in somno post factam digestionem expergiscantur, magna cum anxietate, angustia circa præcordia, & quasi metu suffocationis, quibus venæ sectio, emetica & abstinencia a cœna præsentissimam opem attulerunt. Quandoque etiam effectus pravorum istorum succorum in duodeno primisque intestinis stagnantium usque ad caput se exerunt, & cephalalgias, vertiginem, torporem omnium sensuum, imo apoplecticos insultus ibi machinantur. Vomitus bilis, quæ instar aquæ fortis ebulliebat, fuisse causam hemicranie *Borell. Cen. 2. obs. 1.* testatur. Laborabat quidam tertiana & gravi capitis dolore pungente ac lancinante, dimidiam capitis partem occupante, vomitorio sumto eiecit libram unam bilis porraceæ, & rursus pari quantitate, sequenti accessione reddita omni capitis dolore liberatus fuit

*Opusc. Patb.*

*vid. River. Cent. 1. obs. 27.* Nuper generosus Vir hic locorum post sanguinis destractionem liberalius per aliquot dies vino semet invitare cœpit, adsumtis etiam subinde ostreis aliisque, quæ difficilius concoquantur. Inde languere primum cœpit, mox paulatim senescente appetitu, ipse super mensam, cui conviva adhibitus fuerat, subito summo præcordiorum æstu corripitur. Sequitur vehemens frigus torporque & animi defectio, omnibus insuper sensibus velut extinctis. Injecto clystere alvus sexies deijcitur, & inde parum allevatus post paucos dies lectum reliquit, mox eodem adfectu, quamvis mitiore, in convivio oppressus, & ciborum fastidio & virium languore eidem adhuc adhærentibus. Tandem deprehensa mali causa, lene obtuli emeticum; quod ubi adsumsit, ingentem viscidæ materiæ viridisque bilis per superiora & inferiora rejecit, exhausto inde mali fonte, præsentis periculo exemptus est. Neque dubium est, quin omnia hæc symptomata a bile porracea, ventriculi officia irritante, orta fuerint.

15. Vertigo quoque, æque molesta passio in hoc duodeno domicilium sedemque sibi constituit. Et inde est, quod jejuno ventriculo cum nausea orisque amaritie hic adfectus corripiat, sicuti idem contra, adsumtis cibis, mitigatur. Ex vitio etiam stomachi epilepsiam adnotavit Galenus, non sine conjectura, bilis in duodeno nostro velut in cubili delitescens. Memorabilis quoque morbus est, quem ex eadem causa profectum ante aliquot annos habui, qui sic est. Comes quidam ex Saxonia, turbato statu perterritus, huc concesserat. Is in consilium me vocans conqueri cœpit adfectu gravissimo, quo per annum fere laboraverat. Ipse alioquin plethorico-cacochymicus erat, quem habitum ex diuturno mœrore, victus vitio, vitæque sedentaria sibi contraxerat. Itaque hic singulis fere noctibus circa horam tertiam & quartam acerbissimis doloribus excruciabatur, qui circa umbilicum primum emicabant, mox

L 3

hanc



hanc regionem emensi ad dorsum, novissime ad ipsa præcordia inclinabantur, ita constricto ægro, ut jam jam strangulandus extrema meditaretur. Accedebat summa anxietas, sensuum torpor, sæpe etiam epilepticæ contractiones, & hæc symptomata, ubi alvus adstrictior erat, omnia intendebantur. Clysteribus carminativis & clementer laxantibus, imo emetico subventum ægro fuit, quæ remedia mirifice levarunt illum, quamvis ipsum malum, quod nimis altis radicibus infederat, non expugnare potuerint.

16. Apoplexiam porro sæpe in ventriculo & duodeno generari, præter frequentes observationes Helmontius testatur, solerter hanc illius mali latebram subodoratus. Aperte enim scribit in libro, in quo morborum sedem in anima sensitiva ponit, recentem apoplexiam sæpius vomitu rebusque aromaticis se curasse. Quod idem tamen confirmat. *Cl. Wedelius in pathologia dogmatica, q. 135.* clarissime testatus, tegularium Jenensem, qui in apoplexiam inciderat, adhibito remedio, plenissime fuisse restitutum. Nempe crebra experientia loquitur, quod qui sanguinis alioquin abundantia laborant, circa æquinotia tempore plenilunii & hiemali, ex iracundia vel intemperantia, apoplectico insultu opprimantur, adfectum sæpe præcurrente vomitu, sæpe eundem concomitante, qui tamen tetro atroque colore tinctus adparet.

17. Ex hac colluvie humorum, qui in ventriculo ac duodeno accumulatifedent, alia quoque ac graviora mala descendunt. Inter quæ primo loco ponimus lentas febres, quæ ex intermittentibus, sæpe etiam ex acutis generantur. Nempe ubi illæ nimis festinanter, nec expurgatis ante primis viis adstringentibus, ex quorum censu china chinæ est, sistuntur, tunc colluvies sordida, intra ventriculum detenta, facile gravioribus malis præbet occasionem. Quod idem tamen accidere potest, si post acutum atque diuturnum morbum avidus cibi assumuntur, quibus digerendis, cum ven-

triculo morbi vehementia debilitatus minus sufficiat, non potest aliter fieri, quam ut materia novo morbo præparetur. Ex horum numero, uti diximus, sunt febres lentæ, quæ hisce signis adpropinquant: vexat corpus calor lentus cum pulsu celeri & frequenti, adest lassitudo languorque virium, sudor nocturnus, & corporis macies. Ubi igitur originem hujus mali recte cognovimus, facile videmus, minus convenire in hoc adfectu refrigerantia, quæ adeo non juvant, ut potius perniciem ægrotis adferant. Tentanda potius cura est salibus abstersivis & lenioribus emeticis, laxantibus & amaris medicamentis, quæ in hoc malo unicum præsidium ægrotis pollicentur.

18. Hactenus quidem dictum a nobis, quomodo bilis per stagnationem, admixtoque eidem acido vitiata graves multosque morbos excitare possit, jam instituti ratione adacti de eo solliciti erimus, ut quæramus, quomodo naturalis ejus constitutio ac crasis ab aliis admixtis partibus retexi ac corrumpi possit. Itaque omnino recte statuimus, maxime id fieri a suppressione aliarum excretionum & præsertim transpirationis. Jam primum satis constat, quam salutaris, quam necessaria vitæ sanitæque sit hæc per cutem evacuatio, quippe quæ universi corporis ac sanguinis emunctorium recte appellatur. Per hujus nempe poros omnia expirant, atque exhalant, quæ superflua & inimica naturæ a vitali sanguinis circulo velut purgamenta rejiciuntur. In hoc censu est principium salino-sulphureum, subtile aereo-aqueum, quod ubi intra corpus retinetur, fontem nostræ vitæ, sanguinem nempe facile inficit, atque corrumpit. Inde est, quod hac expiratione interclusa, plures gravissimique morbi prodeant, maxime omnium febres cujuscunque generis, & quæ cum exanthematibus criticis conjunctæ sunt.

19. Rationem vero hujus rei ut reddamus in genere adnotandum est, ab inhibitis excretionibus humores corporis nostri maxime lædi, idque in primis accidere ab intercepta transpiratione. Ubi enim



enim acerrimæ fordēs exitum non inveniunt, occlusis poris, in corpus inclinatæ ad lympham atque bilem redeunt, quæ inde alienam plane naturam fortitur. Atque hæc corrupta hoc modo, ubi in intestina delabitur, ibique non mature eliminatur; sed subsistit & stagnat, ipsa mora deterior adhuc reddita, immutata magis ichesi illius, seminarium existit morborum, præsertim febrium. Unde non sine ratione judicamus, in duodeno periodicorum morborum, maxime febrium, semina delitescere, hac in re merito *Clarissimo Medicorum pari Sylvio Helmontio* quejaccedentes. Quorum ille passim in scriptis suis hoc argumentum tractat, duodenum ceu sedem multis morbis assignans, hic autem *l. de feb. c. 17.* diserte hæc ipso veritatis stylo consignavit. *febris, inquit, habet virus, quod circa pylorum & paulo infra hunc hospitatur. Et cap. X. n. 3. hæc scribit: nidus febrium est in primis officinis, extenditur scilicet a pyloro ad duodenum.* Consentit huic sententiæ magnus, Galliæ medicus FERNELIUS, qui *lib. 6. c. 7.* nidum intermittentium circa stomachum, duodenum & pancreas adserit. Harum igitur febrium sedes recte in duodeno constituitur, siquidem ex corrupta lymphâ & bile velut in officina hic adornantur. Præcedit plerumque transpiratio suppressa, plethora, robur ventriculi ac intestinorum ex intemperantia debilitatum, quibus rebus corruptio hæc maxime adjuvatur. Si enim transpiratio non respondet, bilis sordibus commixta vitium capit, eademque si tonus ventriculi segetescit, intra intestina detinetur, deficiente natura ad eam excernendam. At ubi subsistit & corrumpitur, non in hac solum regione tyrannidem exercet, sed ad sanguinem delata novam malorum scenam pandit, membranaceas nerveasque corporis partes variis spasmodicis doloribusque affligendo.

20. Diximus supra, intermittentium, præsertim tertianæ, sedem in ventriculo & duodeno esse, id quod & ipsa symptomata confirmant, quæ hos adfectus eosque incipientes comitantur. Princi-

pio enim harum passionum status duritiesque abdominis, dolor dorsi fixus, nausea, præcordiorum anxietas & inquietudo exercent. Mox remittente frigore, accedit vomitus, color faciei flavescit, corpus calore exæstuat, siti nullo liquore restinguenda ora exuruntur, urina fertur flammea, & quod a purgantibus per alvum dejicitur, flavissimum colorem repræsentat. Junguntur sæpius biliosi vomitus, interdum etiam viscerum, & ab adsumta china chinæ, præsertim in iis corporibus, in quibus duodenum bilis abundantia turget, alvus sæpissime biliosa descendit. Cujus rei hæc omnino ratio est, quod hoc remedio tonus intestinorum languescens alioqui restitutus motum identidem peristalticum augeat, fordes, quo pollet, robore expellentem. Nonnunquam icterus se adlociat, bile ad sanguinem, a quo salutari modo antea rejecta fuit, redeunte. Magna hæc omnino symptomata intermittentibus, majora utique tamen eadem sunt in tertianis continuis, & gravius utroque malo in ardentibus, quas causonas Græci vocant, intenduntur. In causa enim bilis acerrimæ copia infesto stimulo membra exagitat, & inde est, quod omnia, quæ bilis acrimoniam eluunt, quæ ejus stimulos obtundunt, quæ primarum viarum fordes abstergunt, hisce morbis unico adjumento sint. Ejusmodi sunt leniora emetica, nitrosa salina & absorbentia, quæ in ejusmodi morborum cura merito suo celebrantur.

21. Et hæc quidem remedia in omni ejusmodi passione avide amplectenda sunt, minus tamen sufficiunt, si pertinacius intermittentes insistant exemplo quartanæ. Hic enim pertinacia mali remediis non cedens altius radices jam egisse, & in ipsis visceribus resedisse adfectum indicat: siquidem manifestum inde est, hepar, pancreas & lienem obstructione laborantes succum tam biliosum quam pancreaticum continuo rivulo intestina subeuntem, corrumpere, fomitem mali inde subministrantem. Itaque ubi ejusmodi casus incidit, non



fatis est, dictis remediis ægrotantem tractare, sed validiora adhibere oportet, quem incensum referenda aperientia fortiora, salia, & quæ ex rhabarbaro, ex marte mercurioque dulci constant medicamenta. Neque tamen removen- da interim sunt emetica, quæ sæpius etiam in ipsa viscera, sordes in iisdem detentas expellendo penetrant. Laudem proinde invenit pulvis Riverii felicissi- mi practici, qui, cum & per alvum & vomitum vim suam exerat, hisce morbis egregie opitulatur, quippe hoc vel cen- ties quartanam sustulisse passim in ob- servationibus suis, quas ideo legendas commendamus, attestatur. Eandem cu- ram desiderant febres intermittentes, quæ circa tertium subinde diem exasperantur, quippe & hæ idemtidem ex bile acri corruptaque nascuntur. THON- NERO *lib. 1. obs. 1. p. 10.* id ipsum comprobante.

22. Contemplati igitur febrium natu- ram ac ingenium, ad eos morbos acce- dimus, qui per exanthemata sese manife- stant. Placet vero primam nominare purpuram, morbi genus quod aliis re- gionibus parum notum, longe lateque in hisce terris dominatur. Idque aliis maxime morbis, iisque jam fere incli- natis jungitur, non aliam ob causam, quam quod exsiccatis per febrilem fer- vorem intestinis, alvo idemtidem exare- scente, materia corrupta biliosa in pri- mis viis minus corrigatur, quæ tandem magis corrupta nec per medicamenta re- jecta cum sanguine miscetur, & hocce malum molitur. Eam, quam proposui- mus, causam vel illud etiam confirmat, quod purpura sæpe accidere soleat, si diu- tius alvus adstricta fuerit, neque clyste- ribus, neque mollioribus laxantibus exso- luta: eadem quoque infantes sæpe inva- dit cum vomitu, diarrhœa, febris, tussi, & dentitione difficili. Adest præter hæc mala immodica sitis, præcordiorumque anxietas, & vigilæ. Nascitur etiam hoc malum, ubi venæ sectio, cui alioquin ad- suevit aliquis, per tempus fuit intermis- sam, & finitur maxime purgatione, ideo- que sedulo in hoc adfectu providendum,

ut alvus semper respondeat. Sunt, qui hoc malo correpti largum de nocte su- dorem fundunt; sunt, qui matutino tem- pore id patiuntur; dantur etiam, qui singulis annis chronica purpura laborant, cum non obscuro indicio vitii in hepate & bile desidentis. Juvat itaque in ejus- modi casu, per vomitoria & laxantia elementiora inire curationem, quippe quæ medicamenta optimam locant ope- ram, siquidem & hoc malum a bile acri stagnante sæpe proficiscitur. Simili mo- do perpetuos sudores cum pruritu cura- tos fuisse, solertissimus vir P. BOREL- LUS *cent. 2. obs. 36.* adnotat, adhibito nempe vomitorio & abstinentia a vino.

23. Ipsa porro arthritis & podagra in hoc cronicorum morborum stabulo desi- dere videntur. Adoritur nempe hic ad- fectus hypochondriacos & debilioris na- turæ homines, qui velut hereditate qua- dam laxam mollemque membranarum texturam acceperunt. Hi itaque maxi- me proclives ad hoc malum sunt, præ- fertim verno & autumnali tempore, quia hisce tempestatibus propter aeris inæqualitatem varietatemque transpira- tio maxime læditur, salibus inde tarta- reis, quibus ejusmodi corpora scatent, se- gnus per urinam procedentibus. Unde hæc, exitu ipsis intercluso, ad humorem biliosum & salivalem pancreaticum con- fluunt, primam regionem variis malis di- vexando. Talia sunt flatus, præcordio- rum dolor, alvi segnities, dolor circa lumbos oberrans, febrili motu simul con- comitante. Quod vero in primis viis cau- sa mali lateat, vel exinde adparet quod leniore sæpe emetico sub adventum mali dato, adfectus si non supprimatur, certe mirifice adlevetur. Eleganter hanc in rem diligentissimus Hippocratis Com- mentator MARTIANUS in *arthriticis*, inquit, *doloribus, ob acorem in ventricu- lo peccantem, a doloribus correptos me- mini, qui ab iisdem liberati vel levati fuerunt, ubi acida evomissent.* Quod idemtidem comprobat Sylvius, aperte scribens, hanc curam per vomitionem utilissimam arthritidi, multisque ean- dem a se confirmatam experimentis. Imo eadem



eadem ratione non paroxysmum tantum imminuentem sublatum, sed & novi impetus semina extincta fuisse, idem eodem loco scriptum reliquit vid. p. 786. Adsentitur huic HILDANUS *centur. 6. obs. 84.* Vomitorium principio podagræ datum omnem dolorem absumere legimus. Ipse quoque in notis ad Poterium observavi, in principio exhibitum vomitorium impetum arthritidis retudisse, idemque altero die repetitum similem effectum præstitisse. ALPINUS in *Medicina Ægyptiorum* p. 110. observat, multos se vidisse, qui cum a podagra calculique doloribus excruciatii fuissent, crebro usu vomitorii egregie adjuti fuerint.

24. Solent etiam ab iracundia multa atque graviora mala oriri, non alia de causa, quam quod bili copiose in duodenum ex ductibus biliariis effusa, genus nervosum membranasque graviter afficiat, multa inde mala excitando. Si enim nimium redundat bilis, neque per alvum, neque per vomitum rejecta, multas anxietates, oris amaritiem, nauseam vomendique conatum & alia mala creat. Profunt igitur in hoc adfectu absorbentia, rhabarbarina, leniora laxantia, & emetica, spirituosos salibus volatilibus infusisque calidis diligenter evitatis.

25. Erysipelas, variolæ, hæmorrhagiæ, aphtæ, diarrhœæ, adfectus hypochondriaci & hysterici, febres malignæ petechiales eandem sedem agnoscunt, duodenum nempe, siquidem in hoc ex bile lymphæque putridæ stagnatione oriuntur. Unde & illud fuit in praxin, primæ regionis rationem maxime esse habendam. Quod argumentum cum latius uberiusque sim complexus in *dissertatione de bile medicina & veneno corporis*, nos brevitati consulturi, ampliori explicationi superfedemus, ad illam dissertationem lectorem remittentes.

26. Quod praxin & viam medendi attinet morborum, qui in duodeno & prima regione sedem fixerunt, facile ex dictis apparet, emetica diligenter præparata & prudenter exhibita hisce morbis unice auxiliari. Emetica sunt generosa & valida remedia, quorum virtus fere omni-

bus reliquis medicamentis præferenda. Et si medicus solidi quid præstare potest, certe emeticis id efficere valet. Sæpe enim unico remedio magnus tollitur in principio morbus, & qui emeticis non utitur, nec iis recte uti novit, ille nostra quidem sententia veræ praxeos ignarus est. Opus est vero emeticis, si ventriculus & duodenum impuris humoribus scatent, ut statim in limine materia peccans ejiciatur. Perniciosum enim est, per tam longum intestinorum canalem & per inferiora evehere, cum ad sanguinis massam facilius pertransire possit. Et quod maximum est, purgantia pleraque materiam, in ventriculo & duodeno stagnantem non aggrediuntur, nec commovent, nec promovent; sed in hisce partibus parum operationis exercent magis intestina tenuia excitando. Ratio ex ipsis anatomicis potest peti: gaudet, uti notum est, ventriculus & duodenum crusta glandulosa, sub qua minus penetrare purgantium spicula possunt & nerveam pungere, utpote quæ fixioris & minus vehementis sunt indolis; melius autem ipsam emetica stimulant, quæ sunt penetrantioris & agilioris ingenii. Præferimus tamen semper liquida solidis, utpote quæ non in una parte ventriculi hærent, sed ubique æqualiter sese diffundunt, & propter virtutem suam facilius & majori cum euphoria operantur. Secundo commendamus in morbis, qui duodeno & intestinis insident ea omnia, quæ tonum roborant, motum peristalticum conservant, tonum labefactatum adaugent, & sic alvum solutiorum præstant. Hujus generis sunt salia deterfiva v.g. arcanum duplicatum, terra foliata tartari, it. medicamenta amara cum temperatis gummatibus & resinis mixta, rhabarbarina, succinata, myrrhata, aloetica. Qui enim curare morbos chronicos, & eos, qui in primis viis fiunt, avertere tentat, hic ante omnia motum peristalticum respicere debet, quo salvo, quod patet ex alvi debito officio, cetera facilius subiguntur. Deinceps ad morbos in duodeno subortos, eliminandos maximi facimus absorbentia



bentia & præcipitantia, quæ acorem atque acrimoniam infringunt: horum usus certe maximus in medicina. Si fuerit bilis nimis calida, acris, volatilis; nitro-la acidula præsentissima sunt remedia, quæ eam corrigunt atque emendant. Eadem si iners, si nimis viscida est, elixiriis amar-  
is balsamicis restitui debet.

27. Ultimo sciendum est, iis in mor-  
bis, quorum causa delitescit in prima  
regione, quæ impuris multis humoribus  
repleta est, minus quadrare sudorifera,  
calidiora, & salia volatilia, utpote hæc  
ipsa non tantum materiam peccantem  
magis attenuant, sed & in massam san-  
guinis & humorum nocentissime infe-  
runt; cum tamen potius per superiora  
& inferiora eliminanda sit. Placet mihi  
locus SYLVII *prax. med. p. 445. quan-*  
*docunque prima regio scatet impuris humo-*  
*ribus, sudorifera non sunt adhibenda, quia*  
*sudor non excitatur nisi sanguine commoto*  
*universo, qui tunc quoque solito fit fluidi-*  
*or, unde cum ipso, quaquaversum faci-*  
*lius & citius & abundantius feruntur,*  
*quæ vis sanguini admixta.* Peccatur hac in  
re toto die, dum ante evacuationem pri-  
marum viarum calida propinantur, præ-  
fertim sudorifera cum regimine. Deni-  
que improbamus & illud, quod prima  
regione impuris humoribus repleta, mul-  
ti anodyna adhibeant, cum tamen in tali  
casu illa sint perniciosissima. Nam mate-  
riam nocentem in centro tenent, quæ  
tamen erat evacuanda; tertio illud ma-  
xime tenendum, quod, si materia pec-  
cans in primis viis latens, jam ad mas-  
sam sanguineam atque ad ipsum habi-  
tum corporis transit, sicuti in erysipe-  
late, variolis, arthritide accidit, tunc  
caute adhibenda emetica, quæ materiam  
a peripheria ad centrum trahendo graves  
affectus, convulsiones & gravia sympto-  
mata excitare possunt. Ideo hisce tunc  
abstinendum est, & abstersivis leniori-  
bus vel etiam clysteribus utendum, il-  
lis potius in initio morbi & extraparo-  
xysmum locum habentibus.

### DISSERTATIO III.

#### DE IGNORATA UTERI STRU- CTURA MULTORUM IN ME- DICINA ERRORUM FONTE.

##### §. I.

**I**N perquisitiore structuræ uteri inda-  
gine, primo utique loco commemo-  
randa est notabilis, immo mirabilis illa  
fibrarum musculosarum, nec non vaso-  
rum, e quibus uterina compages contex-  
ta, vis, seu potentia elastica, quæ in  
eo potissimum consistit, quod ejus fibræ  
& vasa incredibilem in modum disten-  
di & explicari, iterumque contrahi &  
sponte ad pristinum statum redire pos-  
sint. Patet id quam maxime in utero  
gerentibus, dum a foetu, nonnunquam  
gemino, cum magna secundinarum &  
liquidorum mole in uteri cavo conclu-  
so, mirum in modum officina hæc attol-  
litur & ampliatur, exclusis autem sub  
partu contentis, subsidet rursus ac ita  
coarctatur, ut vix centesima ratione mo-  
lis & magnitudinis pars remaneat. Et  
quamvis plures adhuc in animantium  
corporibus sunt solidæ partes, quæ non-  
nunquam a vi interioris urgente mirifice  
distenduntur, & cessante eadem, iterum  
se se contrahendo, pristinum spatium &  
naturalem molem recipiunt, quemadmo-  
dum in cute & scroto hydropico tumore  
distentis, item in ventriculo & intesti-  
nis flatibus turgidis subinde observare li-  
cet; longe tamen major magisque con-  
spicua tam dilatandi, quam corrugandi  
& contrahendi in utero humano est po-  
tentia. Accedit vero & illud, omnem-  
que fere captum exsuperat, quod licet  
uterus, qui extra graviditatis statum, fi-  
gura & magnitudine vix pyrum æquat,  
in tam eximiam molem excrescat, hac  
tamen ampliatione non tenuior redda-  
tur, aut crassities tunicarum in incredi-  
bili ista expansione minuatur, sed po-  
tius eadem maneat.

2. Deinceps nulla in universo corpo-  
re pars tam numerosa vasorum copia est  
instructa, quam uterus. Ex his enim  
primæ



Primæ sunt arteriæ & venæ spermaticæ, quæ ovaria contingunt, ac in fundum uteri copiosissimis ramificationibus feruntur, ibique terminantur, quod vel clare ex eo patet, quia flatu in spermatica hæc vasa immisso, ipse uteri fundus elevatur. Post spermaticas conspicui admodum sunt rami arteriæ & venæ hypogastricæ, qui ad partem mediam & inferiorem uteri, nec non vaginam excurrunt, ad quam etiam, maxime ubi recto connectitur, rami venarum hæmorrhoidalium externarum pertingunt, quæ cum ramis hæmorrhoidalium internarum per anastomosis junguntur. Et quod maxime notandum, hæc largissime per uteri corpus disseminata sanguifera vasa, non solum mirum, tortuoso ac serpentino quasi flexu, iter legunt & quaquaversum discurrunt, sed etiam in virginibus, sterilibus & foetum non gestantibus exilia minorisque amplitudinis; conceptu facto, in gravidis ita diducuntur & tam in longitudinem, quam maxime latitudinem explicantur, ut minimi etiam vasorum ramuli talem nanciscantur capacitatem, quæ majorem stilum admittat.

3. Præter vasorum confertam in utero congeriem & flexuosum implexumque eorundem progressum, notatu etiam admodum dignus est concursus, tam singularis, ut nullibi tanta tamque frequens canaliculorum e diversis locis huc tendentium, tam arteriosorum, quam venosorum, anastomosis, qua invicem committuntur, reperiat. Inflatissimis spermaticis, attolluntur quoque hypogastricæ, & vice versa: pariter hæmorrhoidales externæ flatu distentæ, diducunt quoque internas, ac vicissim hæc illas: quin spermaticæ dextri & sinistri lateris conspectius mutuum ostendunt nexum. Id vero peculiare sibi servat exquisita illa vasorum uteri connexio, quod in plurimas cavernulas sive cellulas mutuo communicantes diversæ magnitudinis canalium alvei desinant, & cellulas ovalis figuræ efforment, quæ substantiam ipsius uteri spongiosam & fungosam reddunt, ac in gravidis mire ampliantur; quo fit, ut uterus præsertim prægnans,

transversim sectus, ampla & innumera ferme foramina exhibeat. Hac sinuosa & cavernosa vasorum commissura efficitur, non solum ut ipse uterus in prægnantibus a sanguine contento mirifice dilatetur, ejusque compages tensa antea & stricta, laxior ac mollior reddatur, sed etiam ut orificia extremitatum vasculosarum, quæ in cavo oblique sub membrana uteri hiant, & per quæ aer canali cuidam insufflatus in ipsam cavitatem haud difficulter transmittitur, magis diducantur, sicque perforata vasculosæ chorii membranæ filamenta, nutrimentum ex iis haurire & ad foetum traducere possint.

4. Neque etiam in anatomica hac fabricæ uteri, ac potissimum vasorum ejus, consideratione omittendum, quod non modo hypogastricæ venæ, quæ sanguinem revehant, dimidie majorem capacitatem obtineant, quam arteriæ hypogastricæ, verum etiam quod venæ sic dictæ spermaticæ, non recto, sed anfractuoso admodum & in orbem quasi recurvo ductu porrigantur, ita prorsus, ut si easdem extricare, earumque longitudinem supputare luberet, aliquot ulnas æquarent, & arteriarum spermaticarum prolixitatem vel ter superarent. Quæ quidem omnia luculentum præbent indicium, tarde utique ac segniter per venas has succedere sanguinis cursum; præsertim quum eadem valvulis destituantur, quarum ministerio in aliis corporis partibus impeditior sanguinis regressus ad cor eximie promovetur & adjuvatur. Denique de uteri fabrica id quoque singulare & notatu dignum, quod omni penitus careat pinguedine, qua aliæ partes internæ largiter abducuntur; eam procul dubio ob causam, ne membrana adiposis vasculis instructa, liberiori laterum expansioni & contractioni obset.

5. Ex peculiari igitur hac vasorum ac funiculorum musculosorum, e quibus uteri corpus coagmentatum est, textura, & mira potentia elastica, qua vasa adeo a sanguine contento, vel ipse etiam uterus a foetu, ampliantur, & propria virtute, sublata distensionis causa, iterum ad prio-



ad priorem statum & magnitudinem redeunt, nec non ex difficili sanguinis per venas uterinas progressu, plura utique alias difficilioris solutionis & indaginis phænomena, circa statum, vel naturalem, vel præternaturalem, foeminis solennem, occurrentia, clarius explicari; immo compluribus in pathologicis æque ac therapeuticis erroribus, hujus scientiæ ope detectis, certior & expeditior malis ex uteri vitio pullulantibus medendi via inveniri potest atque ostendi.

6. Et ut a maxime solenni initium capiamus, inter omnes constat, quod singulis mensibus in foeminis a pubertatis ad consistentis usq; ætatis periodum, excretio sinceris sanguinis, ex apertis uterinis vasculis, sive per uterum, sive vaginam, dispersis, eaque saluberrima, secundum ordinarium naturæ cursum succedat; hac autem vel penitus subsistente, vel parcius aut male ad calculum contingente, difficiles valde & graves suboriri morbos, ut medici in omnibus, quibus muliebris sexus affligitur, morbosis insultibus, critici hujus fluxus merito rationem habere debeant curatissimam. Jam vero in evolvendis menstruæ hujus evacuationis causis, insignis inter medicos viget dissensus, dum alii specificum quoddam fermentum; alii determinatum quendam, nescio quem, principii intelligentis sensum, & quod molestum est, expellendi conatum; alii denique proximum efficacem astrorum ac potissimum lunæ influxum pro causa venditare non erubescunt. Plures etiam sunt, qui sanguinis abundantiam hunc fluxum suscitare contendunt: quod vicissim alii pernegant, eo quod per venæ sectionem, quæ plethoræ generationem impedit, minime excretio hæc penitus possit arceri ac cohiberi.

7. Quicumque autem mechanicam uteri, quoad vasa & fibras structuram curatius paullo considerat, is facili negotio, periodici hujus fluxus veras causas immo effectus a sapientissimi opificis providentia dependentes perspiciet. Nam quia uterus ob ingentem

vasorum, quibus oblitus est, copiam; eorumque sinuosum ac tortuosum ductum, nec non ob facilem & stupendam fere, quæ in ejus compagem incidit, distensionem, commodum sanguinis mole exundantis præbet diverticulum; hinc si liquor ille vitalis in foeminis, quæ nunquam non plethoræ ingenerandæ quam maxime aptæ sunt, lapsu temporis sensim in canalium uterinorum alveis accumulatur, & per venas difficilius debito gradu ac justa proportionem regreditur, fit, ut vasculosæ sinuositates eodem repleantur ac infarciantur, donec eorum extremitates, quæ oblique hiant, in uterum, nimium distentæ, apertæ tandem sincerum cruorem in cavum vel vaginam uteri effundant. Expulsa vero sanguinis superflui sufficienti copia, oscula iterum collabuntur, vasa coarctantur, & diminuta plethora, reliqui sanguinis circuitus liberior non modo per uterum, sed per universum etiam corpus redditur, sicque ob exquisitam omnium in machina animaliratione circuli sanguinis sympathiam, salutaris ad integritatis tutelam subsequitur effectus.

8. Quum itaque sanguinis redundantia, præcipua sit menstruæ, quam foeminæ experiuntur, evacuationis, quæ in salutem corporis cedit, causa, luculenter profecto patet, quod non leviter in artis exercitio ii medentium hallucinentur, qui, ubi ob morbos prægressos, aut nimias in aliis locis factas hæmorrhagicas evacuationes, purpureus latex exhaustus est, eamque ob causam menses substituerunt, vel parcius exsolvantur, fortioribus pellentibus & emmenagogis fluxum sanguinis proritare nituntur; quum potius laborandum esset, ut superata valetudine, appetentia & digestio restitueretur, & alimentis eupeptis ac euchymis, quæ bonum & temperatum chylum ingignunt, depressa erigeretur sanguificatio, sponte utique, hac reparata, utero ad officium redeunte.

9. Quum vero porro uteri fabrica ratione texturæ, ratione virtutis expansivæ &

con-



contractilis, ratione quoque exilitatis & amplitudinis vasorum, non in omnibus una sit eademque, sed quoad ætatem, hæreditariam & nativam partium solidarum constructionem, vitæ quoque genus & victus multum variant: medici omnino est, in dijudicandis & curandis ex uteri vitio morbis, ipsius dispositionem & naturam probe scrutari, & cognita eadem, postea accommodata præsidia opponere. Nihil certe in praxi medica solennius est, quam si tributum lunare a virginibus, vel tenerioribus foeminis male ad calcula solvitur, sanguinis missionem suadere, eaque admissa, medicamenta menses pellentia, & quidem quæ vehementiorem turgescientiam & commotionem in sanguine suscitant, præscribere; a quorum tamen usu in longe deteriore statum subinde conjiciuntur miseræ, dum urgenti jam chlorosi subinde convulsiones & artuum distensiones, vel lentæ febres, graves cephalalgæ, aliæque passiones associantur. Quod quidem ob nullam aliam rationem fieri arbitramur, quam quod deficiens, vel parvus menstrui fluxus successus sæpissime a tensa fibrarum uteri strictura vasorumque nimia exilitate, ut ab allabente sanguine ægrius distendantur, ortum trahat. Id enim multiplici observatione in artis exercitio compertum habemus, virgines juniores & tenellas, acetariorum abusu, nec non frigido aere liberius paulo ad inferiora admissio, dum sæpe nudis ferme natibus, frigido solo insident; difficulter sanabilem & gravibus symptomatibus stipatam mensum anomaliam sibi contraxisse.

10. Proinde si hæc subest causa frustra utique, quin cum damno, propinantur pellentia, quippe coarctatis & obseratis viis & in celerem motum ac ebullitionem coacto sanguine, major adhuc obstructio, gravior infarctus sanguinisque ad partes nerveas nobiliores regurgitatio, spasmorum & convulsionum sæpe procreatrix, subsequitur. Neque venæ sectio in pede, quæ alias ad levanda symptomata admodum proficua, multum confert, sed sæpius ob majorem, quem proxi-

tat ad uterum, appulsus, obstipationem obfirmat, & quo minus e vasculorum extremis cruor effluere possit, efficit. Unicum potius auxilium in fotibus & balneis tepidis emollientibus, strictas fibras laxantibus repositum, eumque in finem laudatissima est virtus balnei ex sola aqua pluviali, levissima & purissima parati, vel si naturale expetis, omnium accommodatissimum balneum ex aquis thermalibus Tœplicensibus, sulphuratis dictis, tempestive admissum. Interne vero, rejectis omnibus calidis, acrioribus, balsamicis, optimum in potu thermarum erit præsidium; vel si occasio soterios fontes adeundi non suppetit, commendationem quam maxime merentur salia neutra incidentia, aperientia & blande urinæ & alvi fluxum simul elicientia, cum sufficienti liquido sumta. Quorum census in primis subeunt borra, sal Sedlicense, terra soliata tartari, solutio oculorum canceri, arcanum duplicatum; in biliosis nitri spectata est efficacia: sin vero acido oblectæ sunt primæ viæ, liquor salis tartari, in quo non nihil massæ pillularum balsamicarum solutum opem fert exoptatissimam.

11. Quemadmodum vero mensum defectus, vel eorum imminutus fluxus ex arteriolarum uteri potissimum angustia, compressione & strictura proficiscitur; ita immodica sanguinis e genitalibus effusio, a vasorum & sinuum, quos eadem in uteri substantia efformant, nimia amplitudine, relaxatione, tono deiecto & impeditiore inde facto sanguinis per venas ad cor reditu, ortum trahit. Neque enim ulla pars corporis hepate excepto est, ubi tam difficilis cursus & regressus ad fontem observatur, quam in ipso utero, id quod non tantum ob perpendicularem hujus partis respectu cordis situm contingit, verum etiam maxime, quod vasa inprimis venosa, uti jamjam meminimus, complicata quasi mirum tortuoso reptatu per ejus compagem discurrunt. Quumque præterea tam propter extensionem uteri a foetu, quam venarum & spermaticarum & hypogastricarum anfractuosum ductum, expeditus sanguinis reflui cursus admodum retardetur: facile jam patet



patet ratio, cur diameter venarum uterinarum, duplo amplitudine arterias superet, ut prona adeo inde elici possit consequentia, quadruplo maiorem quantitatem sanguinis venis uteri quam arteriis contineri. Quod si itaque venosi, quibus uteri compages referta est, sinus, plus justo a cruore crasso stagnante distenduntur; obice hoc posito, sanguis per arterias validius appulsus, præcluso in venas transitu, copia sua & impetu vasculorum orificia nimium distenta, tandem divellit, ut dehiscant, & contentus humor largiter effluat.

12. Ex hoc jam facile intelligi poterit, quare virgines rarius nimium mensium fluxum, feminæ vero, quæ pepererunt, item quæ foetum gestant, haud raro enormem uteri hæmorrhagiam patiantur, quæ etiam sæpissime in gravidis vera abortus causa est. Perquam enim notum est, non facile abortivam foetus exclusionem incidere, nisi præcedente largo & impetuoso sanguinis profluvio. Scilicet quandocunque in gravidis vasa uteri venosa a copiosi sanguinis affluxu, ultra modum distenduntur, & sanguis in cellulis hærens grumescit & coagulatur, non modo arteriarum orificia, sed etiam ipsi sinus nimium infarcti, aperti, accedente simul convulsivo uteri & partium vicinarum motu, sine quo non facile abortus contingit, sanguinem cum impetu eructant, uterus flaccescit, placenta ab ejus filamentis & vasorum hiatibus secedit, ac demum foetus secundo vel tertio ab hæmorrhagia die subsequitur exclusio.

13. Et hinc est, quod gravidæ, si ultimis gestationis mensibus natura abortum cum enormi hæmorrhagia molitur, summum sæpius vitæ discrimen incurrant, quod etiam non raro accidit, si maturi jam foetus exclusionem præcedit largius sanguinis profluvium. Funestis enim quamplurimis exemplis confirmat experientia, & matrem & infantem graviter inde periclitari, quinimo nisi embryo e claustris prodeat, utrosque propter incompefcibilem ac lethalem hæmorrhagiam perire. Quamdiu enim infans partui maturus, vel immaturus adhuc

embryo, in uteri loculamento detinetur, is non modo cum suis vasis admodum est distentus, sed & canalium orificia ab impetuosiori sanguinis eo appulsu latius adaperita, largiorem sanguinis copiam fundunt & cruor perpetim manat: contra vero enixo foetu, licet hiantia, ob avulsam, qua antea obducebantur, secundinam, vasorum ora, sanguinem subinde copiose effundant; cessante tamen matricis expansione, diductæ antea aperturæ, simul concidunt, oscula angustiora fiunt, iisdemque coeuntibus tandem ac clausis sanguinis effluxus sistitur. Quare si ejusmodi in casu matrem servare, & funestum vitalis liquoris profluvium compescere animus est, nihil certe consilii superest, quam ut foetus mortuus aut chirurgico ministerio promte extrahatur, aut abortus medica arte tempestive procuretur: id quod etiam pluribus BOHNIUS in *dissertatione de abortu salubri* confirmat.

14. Quamvis autem paulo vehementior animi affectus, inque primis terror, vel impensior sanguinis a motu fortiori, a balneo nimis calido, aut assumpto pharmaco purgante, emetico, sudorifero, aut sic dicto emmenagogo, commotio & rarefactio, frequentes abortionis causæ sint, attamen nisi vasa uteri nimium a sanguine copioso laxata, distenta, infarcta, & matrix ad spastico-convulsivas motiones concipiendas valde prona existat, nullus facile metus erit abortus. Quapropter etiam erroribus, tam vulgi, quam plurimorum medicorum, is quoque annumerandus, quo autumant, dari certa & indubitata efficaciæ abortiva pharmaca; quum tamen experientia prorsus refragetur, qua constat, a prægnantibus meretricibus largas venæsectiones, medicamina purgantia, emetica & menses pellentia, validiora etiam, sæpe sine ullo effectu, ad expellendum foetum adhiberi, at vicissim, si matrix ad conceptum præmature exturbandum disposita, accedente levi tantummodo causa, istum protinus sequi. Et profecto singulare divinæ providentiæ atque sapientiæ documentum hoc præbet, quod in omni rerum universitate non absoluta  
ejus



eiusmodi, quæ semper abortum provocandi potentia pollent, reperiantur; media: ea quod si essent, innumera utique in tanta hominum scelestorum multitudine patrarentur homicidia.

15. Nihil vero frequentius, quam ut quæ abortum jam perpessæ, sunt, levi de causa, eodem tempore recurrente, in eum rursus incidant. Pariter experientia compertum est, plerumque insignes sanguinolentas instar ovi gallinacei massas, una cum copioso cruore, ante abortivam exclusionem ex utero gravidarum elidi, luculento argumento, a præcedente abortu robur & elaterem uteri ejusque vasorum valde fuisse debilitatum, ut non tam cito in pristinum statum redire potuerit. Nam uteri ad tam frequentem abortum dispositio, unice in nimia relaxatione & dilatatione vasorum quærenda est, quæ ut tollatur, vasorumque tonus reparetur, nisi cito prudens medicus primis diebus vel hebdomadibus post abortum aut legitimum partum, blandis videlicet laxantibus & temperatis balsamicis ac roborantibus, aliquoties reiteratis, aut congrua diæta, vel, si sanguinis copia urget, tempestiva ejusdem primis statim, si conceperunt, mensibus e vena secta imminutione, laboret, difficulter sane hæc vitiosa uteri constitutio tollitur ac emendatur. Plerumque enim, quod probe notandum, nimia quoad vasa & vires sanguinis redundantia, cui maxime omnium, quæ spongiosioris habitus corporis sunt, quæ segnioris sunt alvi & in otio degunt, feminæ patent, causam omnino materiale præmaturæ expulsionis subministrat. Quapropter si non sapienti & quasi provido naturæ consilio primis imprægnationis mensibus sanguis, quod frequenter accidit, consueto tempore ex regione uteri profluat, vel ob inappetentiam, nauseam, ventriculi subversionem, & præcordiorum anxietates, tanquam symptomata in principio valde familiaria, parciore fiat ciborum assumptio, vel nisi pro differenti exundantis sanguinis ratione, venæ sectio plus vel minus reiteranda instituatur, ipsaque alvus

congruis remediis solvatur, raro foetus ad maturitatem pertingit, & ad legitimum usque partus terminum in utero conservatur.

16. Accedit alius non minoris momenti & communis ferme in praxi vulgari & minus rationali medica eorum error, qui nimiam sanguinis menstrualis, vel etiam lochialis in puerperis aut abortientibus, per uterum profusionem, vel per crebrius in manu institutas venæ sectiones, vel per liberalius exhibita refrigerantia, positiva adstringentia aut opiata & narcotica, imprudenter ingenti cum ægrotantium damno cohibere tentant. Hac enim perversa ratione medendi & remediis incongruis, naturale robur, tonus, & elater non modo uteri, sed & solidorum universi corporis valde minuitur, & major atonia inducitur, ut malum vel non sanetur, vel gravius fiat. Quin potius, quod quidem forsitan pluribus *παράδοξον* videbitur, qui non cum, & ex ratione in medendo agere suescunt; confirmatius asserimus: eandem methodum eademque fere remedia, quibus menses imminutos & suppressos revocamus, ad eosdem quoque nimium & supra modum fluentes compescendos, & ad naturalem statum traducendos, esse utilissima. Multiplici sane experientia confirmatum habemus, decenti usu thermarum, acidularum, balneorum ex herbis nervinis, vel etiam emollientibus concinnatorum, clysterum uterinorum, nec non medicamentorum ex marte paratorum pilularum sic dictarum balsamicarum, Becherianarum, vel ad earum imitationem paratarum, aut pediluviorum, item salia deterfivi nitrosi, mensium & nimium, & imminutum fluxum felicissime fuisse sanatum. Nam in utroque malo dejectus uteri tonus est, vasa cruore distenta, circulus sanguinis per uterinos canales non liber & expeditus, sed infarctus, obstructione & stagnatione interceptus, quibus tollendis vel corrigendis, prædicta utique remedia admodum sunt idonea.

17. Sed pergimus ad aliud vitium uteri, quod ex eadem, quam memoravimus, matri-



matricis strictura, derivandum. Videlicet tortuosus implicatusque innumerorum in uteri compage vasorum est reptatus, lentus sanguinis admodumque difficilis per eadem cursus; eaque propter non mirandum, tot & tam variis diversæ figuræ, magnitudinis & structuræ excrescentiis, tam carneis, quam fungosis, ex prava nutritione oriundis, obnoxiam esse hanc præ aliis partem, quæ vel externam ejus superficiem, vel internam cavitatem, cervicem, aut etiam vaginam obsident, & nonnunquam adeo auge-sunt, ut graviditatem mentiantur. Crebrius etiam quam ullibi massæ fibrosæ sanguinolentæ, nec non ex membranis coagmentatæ polyposæ concretiones, in canalium uterinorum alveis gignuntur, quæ deinde vel enormi uteri hæmorrhagiæ, quam abortio sequitur, vel sterilitati causam suppeditant. Communi nomine progenita ejusmodi in utero concrementa dicunt molas; quarum quidem plures oppido sunt species, a cl. LAM-SWERDE in molas nutritionis & generationis distributæ; ne tamen, quod facile fit, confundantur, earundem discrimen paullo clarius hoc loco exponere non erit incongruum.

18. Ac primo quidem secundina, cum tenello unius, vel etiam duorum mensium foetu, per abortum exclusa, ab ignaris pro mala habetur, quia coagmentatum ex carne frustrum refert. Deinde, ut ut rarius, massæ globosæ, in ipso utero enatæ, & quæ haud raro graviditatis suspicionem faciunt, ac sæpe in vita functis reperiuntur, vel etiam aucto peculiariter uteri motu & constrictione eliduntur. Porro nonnunquam accidit, ut perpeffo abortu, vel superato etiam legitimo partu, aliquot mensibus post, a feminis, quæ gravidæ judicabantur, massæ solidæ carneæ, variæ magnitudinis & figuræ ejiciantur, quæ dum deforme corpus, & animalculi cujusdam, ut talpæ, muris majoris, aut alius speciem repræsentant, a superstitiosa plebe incantamento tribuuntur, ac molæ esse perhibentur, quin a plurimis medicorum pro præternaturali conceptu, ex semine im-

becilli ac morbofo prognato, venditantur. Hæ sæpius per annum & longius in utero gestantur, & propter varia pathemata gravidis solennia, veri embryonis conjecturam cient, ac quandoque decimo demum vel undecimo mense extruduntur. Sed firmo utique fundamento cl. RUYSCHII nititur sententia, qui in *observat. anatomico-chirurg. XXIIIX. & LIIIX* perhibet: uterina hæc concrementa, ex relictis post foetum exclusum secundinæ frustulis, cum uteri vasis firmiter connexis, generari, quæ sanguinis appulsu nutrita, incrementum accipiunt, & lapsu temporis duriora & compactiora facta, pro varia uteri compressione diversas quoque figuras nanciscuntur. Sæpe enim fit, ut secundinæ prodeant dilaceratæ, quare non inconsultum est, ipsas post partum probe inspicere & examinare, an integræ, vel divulsæ sint; quandoquidem si portio quædam remaneat, gravibus pathematibus objicitur femina, eaque propter tum maxime laborandum est, quo restitans frustum cito expellatur, quod nos sæpius aut convenienti clystere, aut pilulis balsamicis, felicissime præstitisse recordamur. Frequentioris tandem observationis sunt ex sanguine & fibris membranosis coagmentatæ massæ, a nonnullis polypi dictæ, quæ in diductis ac dilatatis uteri gravidi vasis prognatæ, & demum fortiori matricis ac vicinarum partium nisu foras propulsæ, crebrius abortum causant, eundemque vel antecedunt, vel comitantur, vel subsequuntur.

19. Cognito sic malorum discrimine, perspecta quoque earum origine, facilius nunc curiosam istam quæstionem, a pluribus acius agitatam, dirimere licet: num scilicet virgines molam gestare possint? Nam haud difficulter quisque intel- liget, eas molas, sive massas carneas, quæ ex relictæ secundinæ parte aucta originem sortiuntur, in iis, quæ virginitatem illasam servarunt, neutiquam succrescere posse. Neque etiam frustra ista fibrosi & coagulati sanguinis, quæ molæ vel polypi censentur, in virgineo utero, cujus vasa valde exilia & angusta sunt, sed



sed in gravidis potissimum generantur, & in parturientibus solenniter observantur. Minime vero insuetum aut impossibile est, fungosa corpora, tam in exteriori superficie, quam etiam in ipsa cavitate matricis virginum, perpeffa videlicet prius externa quadam violentia, ut lapsu ex alto in abdomen, posse produci; quemadmodum constat fide BARTHOLINI *cent. I. hist. 97.* item HORSTII *de morbis mulier. libr. IV. obs. 39.* Pariter id quoque non negandum videtur, sed rationi utique, nec non experientiae admodum congruum est, conjugatas, vel etiam viduas, provectioris ætatis, quinquagenariis majores, sanguineas & εὐσπυρνας, subsistente dudum jam menstrua sanguinis per uterum purgatione, carneas & sanguinolentas moleculas, pugno interdum æquales, molliores aut duriores, cum enormi sanguinis fluxu edere posse, ejusmodi exemplum prodidit MARCELLUS DONATUS *lib. IV. cap. 25. pag. 451.* IOH. RHODIUS *cent. III. cap. 53.* nec non RODERICUS a CASTRO de anu septuagenaria.

20. Ob difficiliorem & valde tardum sanguinis per uteri vasa, & maxime permatica, quæ in varios cincinnos, ampinos vitium æmulantes, contortos implicatosque divaricantur, regressum, & hinc longissimum ad vitalem cordis contem iter, fit quoque, ut in utero & connexis ipsi partibus, tubis nempe & ovariiis, copiosæ interdum feri inundationes & tumores aquosi exoriantur. Nunquam enim citius & promptius fluida & aquosa pars a sanguine fecedit, quam ubi lentior minusque expeditus ejus per viscera transitus est, quemadmodum id clare patet in hepate; & ob hanc causam etiam non facile numerosiora, quam in hepate ac uteri substantia & adjacentibus ei partibus, vasa lymphatica reperies, quæ a largiori decubitu & affluxu lymphæ distenta, magnas in vesicas, quæ hydatides Græcis dicuntur, explicantur, quibus demum disruptis, nonnunquam subito hydrocystis gignitur, & mira feri quantitas effusa cavitatem abdominis occupat.

*Opus. Patb.*

Ita permultas hydatides in uteri confinis post partum difficilem reperit SALMUTHUS *cent. I. obs. 38.* & in hysterica scemina gravida dissecta PECHLINUS *obs. 19.* In cornubus ac tubis uteri ingentem aquæ copiam nonnunquam colligi, fidem facit TULPIUS, *observat. lib. IV. obs. 45.* exemplo feminæ, quæ in utroque uteri cornu, novem circiter aquæ purisque libras, inclusas innumeris vesicis, gestavit. Plura ejusmodi exempla vide apud SCHENCKIUM *lib. III. obs. 6. 7.* & ROLFINCKIUM *de organ. genital. cap. 20.* nec non SYDENHAM *de hydrop.* Eandem quoque in rem apprime facit HARDERII observatio, perhibentis: in scemina rustica repertum esse non solum ovarium sinistrum aquæ subalsæ & feculentis libris duabus oppletum; sed etiam annexam eidem tubam Fallopianam notabili hydatide obsessam. Et nosmetipsi ante viginti annos ex gravi in hypogastricam regionem lapsu, annotavimus in quadragenaria subortam ibi intumescientiam, cum dolore tensivo, quam aquæ limpidæ largum profluvium cum sanguine menstruo primum prodians, excepit, quod postea cessante etiam sanguinis stillicidio, per anni dimidium continuavit, ita ut quotidie minimum libra una efflueret, donec ægra, incassum adhibitis variis medicaminum generibus, tabe lentaque febre penitus confecta, obdormisceret.

21. Neque etiam adeo insolens, sed aliquoties a nobis observatum est, sub ingravidatione simul occultari hydropem; & hinc fit, ut sæpius medici in dijudicatione fallantur. Vidimus vero ejusmodi feminas gravidas, hydrope simul laborantes, post partum copiosioris feri effluxu servatas, alias autem humore scilicet in cavum abdominis jam effuso interiisse. Inprimis memoratu dignum est, quod PLATERUS *lib. III. observat. pap. 620.* prodidit de muliere quadam, quæ quoties uterum gessit, toties detenta fuit ascite. Quinimmo ipse sæpius per Dei gratiam feliciter sanitati reddidi feminas, ex cachexia, inordinata vitæ ratione & mensium defectu contracta,

M

tracta,



tracta, intumescantiam universi corporis prolapsas, & summa spirandi angustia, somnolentia, viriumque defectione afflictas, quibus ab usu pilularum balsamicarum nostræ compositionis & salis aperitivi, non tam per alvum, quam per uterum, & catameniorum tempore, & etiam extra illud, larga aquarum quantitas diu secessit, qua exsoluta, sensim paulatimque gravia pathemata, a longo tempore ægras excruciantia, conquieverunt. Et hanc ob causam quoque in ea versamur sententia, hydropicos tumores in feminis plus ex uteri, quam hepatis vitio subnasci & facilius quoque abigi ac persanari, quam ubi hepar simul affectum est, eo quod liberior & apertus sero stagnanti per uteri ostia patet exitus.

22. Hisce jam expositis, facilius nunc erit perspicere rationem, quare virgines æque ac conjugatæ, tam frequenti, & tam diuturno molestissimo feri variæ consistentiæ variique coloris, ex utero & ejus vagina profluvio, divexentur. Nam quia tonus & motus uteri, qui æquabili fibrarum ejus crispatura & remissione continetur, tam facile læditur debilitatur & dejicitur, prætereaque tardus admodum per circumflexa & in serpentinos ductus porrecta uterina vasa sanguinis & humorum cursus, lentior quoque sanguinis per venas valvulis destitutas regressus est; perfacile utique, non solum infarctus & stagnationes sanguinis ac feri in matrice oboriuntur; sed ipse etiam serosus & lymphaticus humor segniori progressu lentescens, tandem exitum sibi parat, ac per passim in utero & vagina obvia orificia effunditur. Communis quidem plurimorum auctorum est sententia: ex lacunis GRAAFII, sive foveis circa urethram conspicuis, & parvisibi consistentibus, glandulis humorem hunc excerni; at in his lacunis, nullum, quod setam admittat, foramen facile reperire licet, sed potius ad utrumque latus orificii & per totam vaginæ substantiam lacunæ apparent plures, quæ quam facile setæ ad digiti dimidium aditum concedunt, earumque ductus pressi liquorem semini haud dissimilem plorant.

Vid. HEISTERI *Compendium anatom.* pag. 81. & 82.

23. Verum enim vero, utut relaxatæ hæ glandulæ stillare possint humorem paullo copiosorem; tamen neutiquam hæ ipsæ unicam & genuinam fluoris albi sedem constituunt; sed longe plures dantur meatus, e quibus materia fluoris albi, nec non liquoris serosi impuri, in puerperis cum & post lochiorum fluxum manentis, ortum trahit. Et licet RUY-SCHIIUS glandulas in utero unquam visas esse, aut demonstrari posse neget, nullum tamen dubium est, quin ex istis ostiis, quæ sub mensium fluxu sanguinem fundunt, serum etiam exitum moliri possit. Perquam enim notatu digna est, cel. FANTONI *anat. C. II. pag. 186.* observatio, qua fidem facit, quod flatus per venas uteri in cavum matricis & vaginæ, ac vicissim ex hoc in venas adigi possit atque transmitti. Deinde etiam teste GRAAFIO & HORNIO, pori & foraminula in cervice uteri conspiciuntur. Nec prætereunda sunt, quæ VERHEYEN in *Anatomia C. H. cap. 33. cf. tabul. XVII. fig. 2. 3.* prodidit, quod scilicet in utero, in aqua macerato, & per aliquod temporis spatium in blando calore detento, in interiori non modo vaginæ superficie, plurima corpuscula globosa, & alibi quidem racematim ipsi inhærentia, alibi vero per eam disseminata, sed in inferiori quoque parte cavitatis uteri similia corpuscula videntur, eademque pro glandulis, seroso pituitosi humoris secretioni inservientibus non immerito habenda esse existimet.

24. Quam leve autem hoc malum primo intuitu videatur, ut tantum pro coryza habeatur, tam contumax est, tam ægre admittit curationem, ipsosque medicos torquet atque fatigat; quod quidem nostro judicio hanc potissimum ob rationem fieri arbitramur, quia plerique medentur, causam tantummodo a depravata sanguificatione, depressa sanguinis spiritualcentia ac prædominio feri deducunt, & reparando remisso uteri tono, ac promovendo expedito per hoc viscus sanguinis progressu mi-



nus intenti, nonnisi remediis anticepticis & serum educantibus, purgantibus, contra illud pugnant, omissis roborantibus summopere necessariis. Nos potius ad debellandum refractarium hunc affectum quam maxime commendamus usum pilularum balsamicarum, quæ ad imitationem Beccheri, ex amaris extractis, gummatibus balsamicis temperatis, refracta dosi extracti aloes & ellebori nigri, concinnatæ sunt; præsertim si cum martiali medicamento propinentur. Suademus quoque ut loco potus ordinarii bibant ægræ decoctum ex ligno lentisci, radice salsaparillæ, rasura santali citrini & rubri, passulis minoribus, cornu cervi, & semine fœniculi paratum. Opus tamen etiam est, ut exterius vel suffitus balsamici, ex mastiche, succino, olibano, tacamahaca, & cinnabari artificiali mane & vespere admittantur, vel etiam in ipsum uterum mediante siphone spargatur aqua sic dicta arquebusade, aut liquamen, ex radice aristolochiæ, herba artemisiæ, matricariæ, agrimonix, argentinæ, myrrha, mastiche, foliis myrthi, floribus rosarum rubrarum, cum vino rubro decoctis, quippe quod, non solum in uterum injectum, sed etiam frequentius regioni pubis cum linteis applicatum, admodum proficuum est. Hisce vero omnibus præferenda omnino sunt balnea illa nativa, quæ ob martiale, quo dotata sunt, elementum, roborandi facultate pollent, ut sunt maxime aquæ Lauchstadienses, præsertim si in illis herbæ nervinæ, uterum efficaciter roborantes, cujus generis sunt melissa, mentha, origanum, serpillum, horminum, chamomilla Romana, majorana, bulliant: quandoquidem hæc post balsamicorum utum & corpus expurgatum, iterato usurpata, non modo in hoc affectu, sed & in aliis ex uteri vitio provenientius, effectum præstant longe saluberrimum, eo præstabiliorem ac certiolem, si interius simul aquæ temperatæ minerales potentur.

25 Sed sicuti hætenus exposita uteri vitia, potissimum ejus atoniæ & laxi-

tati ortum debent: ita certe plura etiam sunt mala, quæ ex nimia & spastica ejusdem strictura originem trahunt. Id enim matrix cum omnibus partibus, quæ eandem cum ipsa structuram, ex fibris scilicet musculosis & nerveis, obtinent, commune servat, ut subinde stringatur & spasmo corripiatur, quin nonnunquam convulsivo plane motu agitetur. Ut vero maxime omnium in orificio uteri interno, quod sensu exquisitiori præditum, motuum remissio, sic etiam intensus nimis ac præternaturalis rigor animadvertitur, utpote quod, ex fibris magis nerveis, spirali ductu connexis, contextum est. Nam interdum nimia ejus constrictio reddit difficilem & laboriosum partum, quæ nisi balneis, unguentis vel fotibus emollientibus prius tollatur, fœtui exitus penitus præcluditur. Deinde admissio improvide ad inferiora, maximeque uteri confinia, in fluxu lochiali veletiam mensium frigore, eundem illico non sine periculo sisti, indubiæ experientiæ est. Idem effectus incidit a terrore, cujus uti magna vis in constringendis, præsertim externarum partium fibris & tubulis est; ita maxime illa observatur in uteri nervoso-musculosa substantia ejusque partibus, & frequentissimam abortionis, vel etiam nimii, aut suppressi menstrui, vel lochialis fluxus, causam suggerit. Emetica porro, purgantia acriora, & omnis generis venena, magnam quoque utero mutationem inducunt, & spasmo in uterina compage suscitantia, in sensibilibus facile ad abortum disponunt.

26. Neque præterea dubium est, quin non modo ad fœtum & secundinam, sed etiam ad molas & massas coagulati cruoris, ex sinu uteri exturbandas, opus sit intensiori uteri systaltico, seu constrictorio motu ac robore, ita nempe, ut fundo uteri arctius stricto accorugato, collum ejus & vagina dilatetur. Ubi itaque in parturientibus ex virium defectu hæc intensio motus & toni constrictorii vigor deficit, ibi utique analeptica, inter quæ eminet cina-



momum & ejus oleum, aut aqua spirituo-  
sa, & alia quoque roborantia, ut essentia  
fuccini, myrrhæ, balsamum nostrum vi-  
tæ, spiritus oleosus Sylvii, bexoardicus  
Bulffi, vel pellentia, ut borra apprimere ex  
usu sunt, quinimo commendantur eum  
in finem a multis medentum vomito-  
ria, quo iisdem fibræ ad motum auctio-  
rem excitulentur. Contra vero quan-  
do spasmus & convulsivo motu, qui sæ-  
pe ante partum vel in ipso infelicissime  
situm fœtus naturalem invertit; ante par-  
tum, vel in ipso concutitur uterus, &  
omnia æstu ac calore fervent, improvide  
admodum & cum damno a medicis ejus-  
modi spirituoſa ingeruntur, quia exclu-  
sionem magis impediunt, & febrem vel  
delirium puerperis accerſunt: quin po-  
tius præstantissima est antispasmodico-  
rum & sedativorum virtus, quæ mo-  
tum impetus placant atque componunt,  
& quorum numero sunt crocus, casto-  
reum, fel anguillæ, pulvis, viperarum,  
secundinæ humanæ, lumbricorum, mas-  
sa pilularum Wildegansii, anthera li-  
litorum alborum, aqua florum tilia, sambuci,  
acaciæ, liliorum alborum, pri-  
mulæ veris, aliaque id genus plura. Ju-  
vat quoque in tali casu in sanguine ple-  
nis imminente partu venam secare, &  
quidem in brachio, ne compressis a re-  
dundante cruore in infimo ventre ner-  
vis, motus tam in utero, quam muscu-  
lis ad fœtus expulsionem, facientibus,  
cohibeatur ac impediatur. Eadem ferme  
medendi ratio ineunda, si in doloribus  
a nimia strictione, quam dolores abdo-  
minis in puerperis indicant, fluxus lo-  
chiorum non sine summa perniciæ reti-  
netur. Hoc enim si contigerit, nullo  
modo pellentibus, sed potius motus se-  
dantibus profluvium eliciendum, eoque  
nomine merito utique ETTMULLE-  
RUS ex opio præparata in docte &  
præctice conscripta dissertatione *de vi opii  
diaphoretica* commendat. Si vero ob con-  
strictoriam uterinæ fibrarum vim re-  
missam ac deficientem, impurus & fla-  
gnans sanguis, post partum ex utero non  
rite expurgatur, præter interna excer-  
nendi humoris effluxum cuncta, spe-

ata certe est efficacia clysterum ex her-  
bis uterinis, abrotano scilicet, pulegio,  
roremarino, artemisia, melissa, flori-  
bus cheiri concinnatorum, adjecto non-  
nihil massæ pilularum balsamicarum.

17. Viget itaque in uteri compage  
motus & constrictorius & relaxatorius,  
quem si quis appellare velit peristalti-  
cum, is, meo quidem judicio, non  
errabit. Dum enim una pars corruga-  
tur, altera explicatur, quo reciproco  
motu quam optime omne præternatura-  
le in utero contentum excutitur. Cer-  
te quod mulieres de flatibus ex utero  
prorumpentibus sæpius conquerantur,  
indicio est, tenacem humorem, qui ca-  
lore in vapores resolvitur, in uteri si-  
nu hæere, & adhuc in ejus substan-  
tia motum succedere. Deinceps hunc  
alternantem uteri motum, nonnun-  
quam haud secus quam in ventriculo  
sub vomitu fit, inventi, ex eo patet,  
quod sanguis menstruus vel etiam lo-  
chiorum, per vaginam fluere solitus,  
quandoque pertubas Fallopias in ab-  
dominis cavitatem lethali eventu ur-  
geatur ac effundatur; quale exemplum  
consignavit RUYSCHIUS in *observat.  
anatomico-chirurg. obs. 84. 85.* Accedit, &  
perquam notatu dignum illud est, quod  
stricto arctius uteri fundo, & relaxa-  
ta nimis inferiori ejus cum vagina par-  
te, matrix ipsa ita contorqueri ac sub-  
verti possit, ut sæpius obstetrices deci-  
pantur, & conjecturam capiant, resta-  
re adhuc in sinu fœtum, qua de re  
RUYSCHIUS *l. c. obs. 93.* legi mere-  
tur. Quinimo præternaturali & inver-  
so uteri ab exterioribus ad interiora  
motui, mea quidem sententia, tribu-  
enda utique sunt gravia illa & fune-  
sta symptomata, quæ puerperas sæpe  
exercent, ut febres, dolores acuti,  
convulsiones, deliria, lethales apople-  
xiæ, exanthemata purpurea, rubra  
& alba, eo quod cuncta hæc sangui-  
ni corrupto per uterum expurgando,  
ad interiora represso, & passim in par-  
tibus stagnanti, ortum debent.

28. Dignus certe est, qui notetur lo-  
cus HIPPOCRATIS, graphice satis  
mala



mala hæc ex intercepto libero sanguinis per uterum transitu, delineans, & ita habens: *refluens sanguis ab utero & Premens septum transversum, retracto utero, præfocationem, in caput irruens, insaniam, epilepsiam, catochos, apoplexiam, accipiens thoracem, tussiculares affectus, irruens in cor, palpitationes & tremores cordis, nonnunquam syncope, in nervos denique facit stuporem, immobilitatem & resolutionem.* Atrocia enim illa pathemata, quæ hysterica vulgo dicta, gravius sæpe feminas exercent & cum symptomatibus mali sic dicti hypochondriaci spasmodico-flatulenti admodum conveniunt; potissimum uteri vitio debentur; quandoquidem magnus omnino utero cum præcipuis corporis partibus intercedit consensus, qui non tam a nervorum communione & mutua conspiratione vitiosorum in nervosis partibus motuum, quam potius a vasorum sanguiferorum systemate, & turbato in eodem sanguinis itinere est accersendus. Nam quemadmodum in hypochondriacis, quando sanguis per hepatis viscus ægrius transiens, ad eas partes, ad quas venæ portæ rami pertingunt, præsertim nervosas, ventriculum & intestina redundat pressione & distensione spasmoscum gravissimis symptomatibus suscitatur. ita etiam idem contingit in feminis, quando per uteri compagem non libere fertur sanguis, sed stagnans tardius progreditur, & ad corporis penetralia, ventriculum & maxime intestina, thoracem, & caput regurgitat, ubi pro diversitate partium, vehementer lædit earum functiones & varia, eaque satis atrocia symptomata inducit. Quapropter medici periti & sagaciores, in omnibus, quæ femininum sexum affligunt, malis, maxime ad uterum & mensium successum, nec non qualis motus & cursus sanguinis per matricis vasa sit, respicere & eo potissimum curandi rationem dirigere debent; quum contra illi, quod communiter fere fieri assolet, perversa incedant via, qui ad tollenda hæc pathemata varia præscribunt remedia, negligendo causam & originem. unde ea proveniunt.

*Opusc. Patb.*

29. Restat adhuc ut de consensu uteri cum intestino recto & vasis hæmorrhoidalibus quædam addamus. Ac primo quidem in consideratione sympathiæ uteri cum hæmorrhoidalibus venis, notandus utique est anatomicus error, etiam illis communis, qui hæmorrhagias & hæmorrhoidale negotium ubique crepant, dum autumant, internas hæmorrhoides, quæ venæ portæ propagines sunt, ramos spargere ad ipsum uterum, & maxime ad vaginam; quum tamen autopsia anatomica, uti cl. SALTZMANNUS in dissertat. de vena portæ dilucide monstravit, falsam esse hanc assertionem doceat, & testatum faciat, hæmorrhoidales tantum externas ad matricem & vaginam copiosos dimittere surculos, cum internis per mutuam anastomasin connexos. Interim cognito hoc vasorum nexu, in proclivi est rationem reddere, quare in feminis, quæ sanguine abundant, is non modo per uterum, sed etiam quandoque per ani venas exitum affectet, eodemque præcluso, a stagnante cruore non tantum tubercula, cœcæ hæmorrhoides dicta, oriuntur, verum etiam plura incommoda, dolores scilicet pressorii fixi in osse sacro, aliaque symptomata, iis familiaria, qui suppresso hæmorrhoidum fluxu laborant, molestissima succedant. Deinde id quoque experientia comperitum est, in feminis annosioribus, quæ non amplius menstruam patiuntur purgationem, sæpenumero, si non venarum sedis stillicidium; conatum tamen & nimum ad illud variis malis, suppressa hac evacuatione, solennibus stipatum, suboriri. Eidem quoque vasorum connectioni tribuendum, quod frequentissime primis statim a partu diebus nodosæ protuberantiæ vasorum hæmorrhoidalium in ano ardentem dolorem excitantes prodeant, quæ omni procul dubio a nisu & pressione fortiori, quam parturientes sustinent, copiosius sanguinem ad uterum & ejus vasa urgente, originem trahunt.

30. Quod vero ad vaginæ consensum cum intestino recto attinet, is quidem clarius ex eo patescit, quod membranæ



utriusque tam acute connexæ ac plane concretæ sint, ut vix provida ac suspensa manu sine dilaceratione divelli possint ac separari. Et hinc utique ratio ducenda, quare tenesmus, qui dysenterix laborantibus solenne est symptoma, facile vaginam ad prolapsum disponat, quin ipsum abortum proritet. Hinc porro est, quod suppositoria acriora, præsertim ex validioribus purgantibus parata, ad abortum provocandum multum valeant, nec non quod molarum vel sanguinis grumescentis ex utero exclusionem, imo ad revocandum suppressum mensium & lochiorum fluxum, clysteres ex uterinis, nervinis ac lenius stimulantibus concinnati, desideratissimam præstent opem.

31. Coronidis loco quasdam cautelas & regulas egregii in praxi usus subnectere lubet.

I. Nihil majorem usum præstat in gravidis easque ab incursum magnorum morborum munit, ac foetum sanum vegetumque reddit, quam venæ sectio in sanguine plenis, aliquoties circa tertium, septimum & nonum mensem repetita.

II. Error est, venæ sectionem in pede gravidis esse perniciosam, eo quod abortum proritet.

III. Utiliter sæpe sanguis mittitur, si dolores dorsi urgent, si pathemata hysterica, vel etiam dolores ischiatici affligunt.

IV. Venæ sectio in lochiorum fluxu suppresso, restitente etiam in corporis penetralibus purpura, præstolans mortis periculum sæpe abigit.

V. Mensium & suppressorum ut & imminutorum causa sæpius est plethora, quæ sanguinis missione tollitur, ita, ut admissa ea, mox arteriæ validius pulsant, & sanguis liberius per uterum feratur.

VI. Quando febris sive continua, sive intermittens, gravidam vel puerperam corripit, sanguinis missio nunquam noxia, sed sæpius summe necessaria est.

VII. Primis statim a puerperio diebus pilulas balsamicas exhibere convenit, quarum usu & lochialis fluxus promovetur, & multæ impuræ sordes tempore gra-

viditatis collectæ, per alvi secessum exturbantur.

VIII. Passulata, mannata, rhabarbarina & tartarea, in gravidis magis locum inveniunt, quam alia laxantia.

IX. Ad tollendam sterilitatem, unica hæc est indicatio: ut tonus utero reddatur, & sanguinis motus per matricem cum mensium fluxu in ordinem redigatur.

X. Morbi fere omnes ex uteri vitio, si mitigandi vel sanandi, venæ sectionem, pilulas balsamicas leniter laxantes, balnea, tam nativa, quam artificialia, martialia recte præparata, lenia antispasmodica, carminativa, nec non usum temperatarum mineralium aquarum exigunt.

XI. Cortex chinæ, accomodis aliis, inprimis pulveri florum chamomillæ, nuptus, prudenter in febre intermittente & congruo tempore exhibitus, etiam gravidis non nocet, sed summo præsidio est.

XII. Refractarii morbi ex utero frequenter postulant externa, suffitus, injectiones, clysteres uterinos, fots, epithemata, balnea, quo ad partem affectam virtus medicamentosa eo citius pertingere possit.

XIII. Gravidis & puerperis exquisita diæta, victus vitæque ratio servanda.

XIV. Frigus & internam refrigerationem, medicamina purgantia, & omnia acida adstrictiva, nimios quoque cibos, omni studio, quæ uterum gerunt, vel partu defunctæ, evitent. Uti vero quies corporis puerperis amica, ita gravidis eadem inimica, & corpus subinde moderate exercere præstat.

#### DISSERTATIO IV.

#### DE MORBIS CERTIS REGIONIBUS ET POPULIS PROPRIIS.

##### §. I.

**A** Ureum certe monitum est magni illius HIPPOCRATIS, quod merito omnibus, qui praxi medicæ operantur,



tur, curæ cordique esse debet & in principio libri de aere, aquis & locis his verbis exstat: quicumque artem medicam integre assequi velit primum quidem temporum anni rationem habere debet, quantum potentia quodlibet eorum valeat; dein ventorum, qui in unaquaque regione sunt indigenæ; postea aquarum facultates cognoscere debet; deinde urbium situs & natura aquarum nota sit. Porro considerata terra ipsa nudane sit & æstuosa vel alta & frigida. Hominum insuper diata perquirenda, quæ maxime capiantur, an bibuli sint & lucrones & otio dediti, aut exercitiis variis utentes & tolerantes laborum, ciborumque plus appetentes, quam poculorum; ex his enim singula sunt investiganda. Nam qui hæc omnia probe, quantum fieri potest, cognoverit, aut horum plurima, cum non latere possunt, cum in urbem etiam sibi ignotam venerit, neque morbi regioni peculiaris & patrii, neque communis regionis natura, quacunque tandem ea fuerit, ut non possit in cognoscendis dubius hæere aut errare, sicubi ad morborum medicationem adhibeatur. Morbi videlicet sunt duplicis generis, quibus maxima pars hominum perit, alterum est epidemiorum, qui ex communi aeris vitio & tempestatum mutationibus trahunt originem, certisque temporibus grassantur & magnas edunt strages: alterum genus est endemiorum, qui certis populis & regionibus familiares sunt, vitæ generis, victui, aeri, exhalationibus, aquæ, vino, cerevisiis certis locis peculiaribus, adscribendi. Hæc duo morborum genera in eo conveniunt, quod in unoquoque plures simul eodem morbo corripiantur; differunt vero, quod epidemici a mutatione tempestatum, ventorum potentia, & siderum influxu fiant, adeoque ad certum tantum tempus durent; endemii vero a causa patria, indigena, fixa nempe oriuntur, unde etiam per complures annos iidem fixi perseverant. Placet in præsentia de endemiis morbis materiam pertractare, ubi non modo eos morbos, qui in Europa, sed & reliquis orbis terrarum partibus familiares sunt eo, quo fieri potest, compendio recenserebo.

2. Endemios morbos cuique regioni proprios exposituri initium merito capimus a nobilissima mundi, quam inhabitamus, parte Europa. Primum vero montes & excelsa loca examinabimus. ubi in considerationem merito strumofus colli tumor venit, montanis nonnullis populis frequentissimus. Oritur hic ipse non, ut vulgaris est sententia, ex nivalibus aquis, quæ alibi etiam sunt, sed potius ex aquarum potu, quæ per calcarios montes transeunt atque rudes sunt, graves, & copiosam calcariam terram intus recondunt, quare certi fontes dantur strumosi, ex quibus haustæ aquæ strumam colli producant. Huic malo vero imprimis sunt obnoxii Helveti, Rhæti, Vallesenses, MUNSTERUS in cosmograph. lib. 3. scribit: in Helvetia Vallesia adeo strumosi sunt homines, ut struma pondus sermonem impediat, ac femina lactantes illas post tergum perinde ac saccum rejiciant, ut infantibus potum appetentibus sint impedimento; quod & cl. WAGNERUS in bist. nat. Helvet. p. 141. confirmat. Apud Rhætos in vicis Zicers vis Trimmis & Sonders aquæ quoque reperiuntur, quarum potu monstrosi tumoribus seu strumis incolarum colla deformantur, & his gignendis aptissimæ sunt, sive potentur, sive, cibis coquendis adhibeantur. Nec id tantum illic natis incolis vernaculum vitium est, sed etiam advenis, qui si collo etiam anserino graciliore advenerint, & aliquot annos de his aquis potaverint, guttura eos velut taurorum colla, quibus palaria dependent, referre videbis. Ab his igitur homines maxime deturpantur, loquelæ etiam ipsi vitium infertur, ita, ut risum spectatoribus ac auditoribus movere soleant; verum infimæ sortis homines apud Rhætos vitium hoc naturæ decorum ducentes, cæteros struma carentes, colla anserina per sarcasum appellant. In pago Flach, Tigurinæ ditionis, fons reperitur, cujus aquæ potæ strumas colli producere solent, hinc vulgo strumarum fons, appellatur. Verum non tantum Alpium, sed & Pyræ-



neorum montium accolis hic effectus accidit. Præterea Corinthiæ Syriæque accolis, teste ORTELIO *ad tab. 92.* familiaris est, item sudetum accolis in tractus Schmiedebergensis pago Steinfelfen vid. BECMANN *in bistor. geograph. n. 356.* apud quos tamen malum hoc fere desit, dum fontibus quibusdam, quos causam ejus senserunt, nunc abstinant. In urbibus quibusdam Hercyniæ metallicis, videlicet Wildemann & Andreasberg nulla fere observatur mulier, quæ non ex strumoso gutture laboret, utuntur nempe aquis metallicis crudis, stillatitium lapidem secum ferentibus. In Transylvaniæ urbe, dicta Cronstadt, strumæ ex potu aquarum sunt frequentissimæ. Confert multum ad generationem hujus mali aer frigidus in montuosis regionibus penetrantissimus, qui succos, in glandulis cuti substratis, circa arteriam asperam facile incrassat, eorumque liberum impedit transitum, unde tubuli, vascula, & pori succo viscoso infarcti tam grandem sistunt tumorem. Feminae vero magis sunt obnoxiae strumis quam viri, quia ordinario, præsertim si gravidæ existant, vel in puerperio laborent, vasa & fibræ circa mammas & colla extendantur. Observatur & simile quid post ipsum conceptum, dum vasa circa collum ampliora fiunt, unde veteres novæ nuptæ exploraturi virginitatem thalamum ingressuræ collum filo metiebantur. Catullus in nuptiis Pelei:

Non illam nutrix orienti luci revisens  
Hesterno collum potuit circumdare filo.

3. Ad Galliam jam nos conferimus & quidem Narbonensem, hujus incolis perquam familiare est hydrocele & sarcocoele. Fiunt hi tumores, quando sanguis per venas spermaticas tardius recurrit, ibique stagnat, unde vel serum a sanguine separatur, & fit in scroto testiumque membranis decubitus, vel ex succo viscido seri carnosæ & fungosæ fit excrementa, unde melancholicis, senibus, & vitæ sedentariæ deditis quandoque hic effectus accidit. Cur Narbonenses huic malo obnoxii, nunc ca-

staneorum usus immodicus causa esse videtur, quarum in hac regione maximus est proventus; quorum alimentorum frequenti usu lymphæ & sanguis crassus fit, qui postea per venas tennes, quales spermaticæ sunt, situs perpendicularis tardissime circulatur. Cæterum Galliæ populis febres tam intermittentes quam continuæ, malignæ putridæ, & lentæ hecticæ familiares & plerumque feræ sunt. Multum quoque ad hos morbos contribuit cibus eorum valde humidus & carniū copiosus esus, nec non fructuum autumnalium liberalior ingurgitatio, victus salis expers, aquæ potus parciorque vini usus: quibus rebus sanguis valde tenuis redditur, multæ serositates accumulatur, quæ si in corporibus spongiosis, robore fibrarum destitutis, & sub aere austrino non sufficienter purgantur, ibi stagnant & ad febres, ulcera, & phthisin disponunt. Præterea lumbrici immanis magnitudinis huncce populum adoriuntur, & non modo infantes sed & adultos vexant, quorum causa victus est præhumidus, ciborum nutrientium copia atque aquarum potus.

4. Nunc quoque de Anglorum morbis vernaculis dicemus. Multa certe morborum genera præsertim autumnali tempore hujus insulæ incolas invadunt; maxime vero hanc nationem Londinum inhabitantes gravedines, raucedines, tussis, fluores albi apud scæminas, dysenterix, malignæ febres, variolæ familiariter affligunt. Hisce malis ingenerandis haud parum atmosphæra humidis vaporibus maris repleta ut & cælum nubilum confert; ex omnibus autem nil magis ipsis ferale est, quam tabes pulmonalis, & totius corporis fœda & miserabilis corruptio, cui consumptionis nomen imposuere, quo malo tertia fere pars hominum Londiniæ medio tollitur. Languent vires, respiratio est difficilis, tussis continua, & in dissectis cadaveribus pulmones, tuberculis scirrhis repleti, observantur. Hujus mali generationi multum velificatur aer densus & fumo lithanthracum refertus, qui



qui in ore tēerrimas nerveo-membranaceas pulmonum vesiculas receptus corrugat, constringit, ut facile ibi copiosus & viscidus sanguis hærere possit. Laborant vero hoc vitio, item pulmonum inflammatione nobiles magis, divitiisque innutriti, quam e plebe homines; idque ea de causa, quia illi in otio altissimo & omnium rerum abundantia affluentes genio suo indulgent, carnes gratissimi saporis ac succi edunt, & vina e Canariensibus insulis advecta dulcia bibunt, unde regendo sanguini copioso, & secernendis inde excrementis, natura præsertim in spongiosiore, imbecilliore corpore non sufficit; sanguis vero abundans viscidus & impurus in molli & vasculoso pulmonum viscere facillime decumbit & stagnat, modoque dicta mala progignit. Phthiseos enim & Anglicorum morborum causa a repletionem imprimis fluit, tanto magis quanto minor sanguinis mittendi Anglis cura est. Præter talem pulmonalem alius adhuc morbus ipsis est patrius, rachitis dictus, in occidentalibus maxime Angliæ locis solemnis. Puerilem nempe ætatem invadit, adeo, ut in illis annis constituti macrocephali fiant, cum laxa compage membrorum, turgido abdomine, prominentibus oculis, imbecilli corpore; corpora porro sunt spongiosa atque incurvantur. Causa hujus maxime in systematis nervosi & membranosi imbecillitate, flacciditate, spirituum defectu & in succi nutritii distributione inæquali hæret. Hinc etiam rachitis dicitur, quasi spinæ dorsalis affectio, propterea quod præcipuam ibi sedem mali fixam esse existimant.

5. Progredimur nunc ad Italiam spectaturi ibi morbos patrios. Neapoli præter luem, quæ pro morbo non putatur, nisi per gummata sese exserat, morbi endemii sunt roseolæ sive maculæ rubræ mox visibiles, mox invisibiles. Scorbutus alias in Italia non visitur, quia hic morbus impuræ salisæque lymphæ est progenies. Bartholinus cent. V. ep. 49. has maculas ædibus & victui adscribit, illis quidem celsioribus & a sole minus illu-

stratis, huic vero ob carnem bubulam, suillam, & brassicam, quam avide incolæ ingurgitant. Venetiis hæmorrhoidali fluxu & hinc pendentibus incommotis, cœcis dolentibus varicibus, varicis, ficibus frequentius vexantur, inde sanguisugæ quam maxime in usu sunt, adeo, ut non raro ani fistulas sibi contrahant. Causa merito vinorum Italianorum liberaliori potationi adscribitur; & in genere illud tenendum est, earum regionum incolas, ubi vina maxime dulcia lætius proveniunt, hæmorrhoidibus fluentibus magis esse expositos, quam qui in terris vino sterilibus habitant, & in quibus aquæ vel cerevisiæ bibuntur. Sanguinem enim ejusmodi vina gignunt, eumque in orgasmum seu turgescientiam facile conjiciunt: unde ob distentas nimium valorum tunicas per totius abdominis viscera tardior fit sanguinis progressio, & hinc ad venas sedis regurgitatio, per quas ordinario longus & perpendicularis ille ascensus difficilis est. Romanis febris semi tertiana valde cognata est, notate id etiam suo jam tempore GALENUS lib. 1. de morb. vulg. comm. 2. qui summa con gloria Romæ vixit prope forum Agrippæ, qua nunc itur ad Pantheon. Docta de hac febre sunt verba FONTANI in schol. ad Dodon. de semitertiana: per banc febrem, inquit, laditur ventriculus & imprimis ejus partes nervosæ & bepar, ideo jure meritoque inter mortiferos morbos numeratur. Hæc sæpe degenerat in hecticam & hydropem propter obstructions magnas ut Cous noster Epidem. 3. §. 1. observat. In hanc febrem proclives sunt ecclesiastici nobiles aulici, juvenes, & qui desidem vitam luxuriosamque agunt, & cœlo calido fruuntur, ideoque frequentes sunt in Æthiopia. Victus omnis delicatus & lautus in otiosis hominibus sanguinis gignit abundantiam, a qua multæ eæque graviores, propter viscerum infarctus obstructionsque, passionis oriuntur. Asclepiades apud Cal. Aurelianum lib. 2. c. 10. febres una cum mentis & corporis oppressione, nec non lethargicas contingere solitas refert.

Aquæ



Aquæ enim Romano in agro parum etiam salubres sunt præter eas, quas per aquæ ductus Mæcenæ deduxit in urbem. Accedit quod ipsa Roma æstivo tempore salubritate cœli minus gaudeat, idque eo inprimis, quia urbs super antiquæ rudera Romæ exstructa est: illa autem multas cavernas comprehendunt, ubi antiquis Romanis non sine ingentibus sumtibus cloacæ fuerunt ædificatæ; si Tybris igitur sese effundit, aqua hæc cavernas intrat, ut ideo propter vapores aer minus salutaris esse possit. Serpentes quoque magno in numero in hinc inveniuntur cavernis, dein & tota Roma silice non est strata, sed adeo pulverulenta diebus canicularibus est, ut propter pulverem & muscas, quæ procul dubio ex cavernis prodeunt, in publicum prodire non liceat.

6. Hetruriæ incolis valde familiaris epilepsia est, ideoque recens natis infantibus inurunt caput, uti tradit BALTHASAR *de Vias in sylva regia*: qui mos etiam veteribus Tusciæ & Lybiæ populis jam olim fuit usitatus, teste *Mercuriali lib. 2. var. lect. c. 2.* Arabes quoque medici hodierno tempore gravissimos & fere incurabiles capitis morbos, ut apoplexiam, hemicraniam, lethargum, omnibus aliis irritis, ferro candente tractant, quo in hoc vel illo capitis loco, non sine præstantissimo effectu, inustiones faciunt. Apuliæ incolæ, Baglivo teste, ardentissimis febribus, pleuritidi, aliisque morbis inflammatoriis sunt obnoxii. Multum contribuit sanguinis copia, quæ ex victu lauto gignitur; incredibilis enim ibi est telluris ubertas, & carniū cuiuslibet generis copia, qua nulli Italiæ parti est inferior. Vina ibi omnia nigra, flagrantia ac potentia sunt, tantaque caloris in illis regionibus est vehementia, ut plurimos in summam impatientiam dementiamque sæpe actos videas. Specialis etiam Apuliæ morbus est morsus tarantulæ, qui æstivo, & præsertim eo tempore est noxiosissimus, quo hæ bestiolæ coeunt. Sequuntur hunc adfectum angor cordis, aponia, pulsuum oppressio, extremorum nigredo, frigidus,

sudor, quæ omnia symptomata ex truculenta nervosarum partium constrictione oriuntur; nam venenum tarantulæ in activissimæ ac perniciosissimæ motionis instar ignis materia consistit, quæ intime penetrando, motiones hinc inde in genere nervoso spasmodicas violentas excitat. Quam optime hac dē scripsit BAGLIVUS in *dissert. de tarantula*.

7. Transeamus jam ad Hispaniam, præcipuam Europæ partem. Observatur hic valde familiaris melancholia hypochondriaca, quæ merito, summæ pigritiæ, otio, sedentariæ vitæ, & profundis speculationibus adscribi debet; accedit & illud, quod veneri nimis immature indulgeant, & parum vini bibant; unde sanguis crassus terreus, ablata parte subtiliore, qui in hypochondriis damna adfert, in capite vero multa phantasmata & imaginationes efficit. Deinceps fluxus hæmorrhoidalis in viris, in feminis mensium fluxus creberrime visitur, quod a sanguine crasso & fœculento viscera abdominis infarcta sunt: unde æqualis & libera sanguinis distributio impeditur, quo fit, ut cum impetu ruat, & in partibus extremis stagnet, ibique vasa disrumpat. Divitum & procerum plerique, quos Grandes vocant, apoplexia, procul dubio sanguinea, pereunt ob lautum victum, vini generosi potum, & quotidianum succoladæ usum, quæ omnia sanguinis conciliant copiam. Notabile autem est, quod scabies & scorbutus ibi non reperiatur, utut carne suilla recenti quotidie vescantur; aer nempe in Hispania est subtilissimus & penetrantissimus, & aqua ibi levissima, ac victus salis expers. A transpiratione igitur laudabili, porisque apertis fit, ut rudes illæ crassæque feri particulæ exhalent, quæ intra poros & glandulas cutis alias stagnant, & pustulas illas efficiunt.

8. Pergimus ad Belgii fœderati provincias, inprimis Hollandiam, ubi scorbutus endemius morbus est, qui partim a victu duro, piscibus marinis, carniibusque infumatis; partim ab aere denso, nimis humido, & pessimis aquis suos mutuatur natales. Præter hunc morbum  
in hi.



in hisce provinciis frequentissime ex renum & vesicæ calculo laborant, nec unquam ullibi tam creber hic adfectus, in omni etiam ætate, visitur, quam in Belgio, nusquam etiam ob hanc causam meliore lithotomi propter operationis frequentiam degunt, quam ibi. Hujus calculi vesicæ causam in immoderatum lacticiniorum & caseorum cum acetariis abusum rejicimus, quæ fercula singulis fere diebus mensis apponuntur; quantum autem ad concretionem calculosam lacticiniorum & acidorum abusus faciat medicæ artis peritis probe perspectum est, utpote calculi elementa, & concretionis materia sunt terreum atque aqueum.

9. Accedimus ad maris Baltici incolas, Danos, Suecos Norwegos, Pomeranos, Livonos, Curlandos, ubi ceu communis morbus & fere inquilinus scorbutus grassatur, qui per dolores artuum, membrorum lassitudinem atque torporem, maculas, gingivas putridas & tumores sese manifestat. Hic adfectus quam notus est his populis, tam ignotus est antiquis; nec ullibi fit hujus mali mentio, neque apud Arabes, neque apud Græcos; & perperam locus *Hippocratis* lib. 2. prædict. ad hoc malum trahitur, ubi auctor de lienibus magnis, oris graveolentia, & tibiæ exulceratione agit. Minime tamen existimandum antiquis temporibus ipsum non existisse; sed de novo ante aliquot annos esse natum: credibile potius est, cælum *Hippocratis* hunc morbum non agnovisse: ubi enim aer valde tenuis & calidus est, ubi dura & falsa exulat diæta, ibi quoque hic morbus silet, unde in tota Græcia, Italia Hispania, etiam Gallia fere incognitus est, nisi in quibusdam locis Galliæ Narbonensis, ad maris oram sitis, propter aquas impuras, salvas, palustres; & circa Ragusam Italiæ, quæ hujusmodi generis aquas alit, quandoque existit. Est igitur hic morbus frequens modo dictis populis & regionibus arcticis, quæ a gradu 55. usque ad polos porriguntur, propter aerem densum, frigidum, humidum, victum salsum, durum, pisces

marinos, aquas crudas, ex quibus omnibus sanguis fixus terrestris, balsamo & sulphure benigno destitutus elaboratur, qui ad obstructions corruptionemque valde est proclivis. Cæterum nullum dubium est, quin hic morbus jam inde ab antiquis temporibus in his terris regnaverit; licet historicorum testimoniis non probare possimus, quod nimirum nulla jam exstant scripta de hisce populis composita; sed veteres medici, qui in Græcia, Arabia, & Italia vixerunt, atque scripserunt, illarum saltem nationum morbos scriptis reliquerunt, horum populorum affectibus omissis. Quod vero marinus aer, crassa diæta, otium, ac impuræ aquæ scorbutum ingenerent, navigantes manifestum præbent documentum, qui omnes fere hunc morbum reportant, licet alterius climatis sint incolæ, & sub alio cælo navi vehant. Neque prætereundum est hos populos arthritide etiam, paralyti, hydrope infestari, quæ cuncta symptomata mali scorbutici sunt fructus.

10. Illud vero admiratione dignum, quod præter scorbutum in Dania, Suecia, & Livonia febres maxime sint familiares, cum e contrario in Norwegia, Islandia, Lapponia & Finnia, plane exulent, & fere sint incognitæ *schef-ferus in descriptione Lapponiæ* cap. 7. scribit; quod Lappones commodissima utantur valetudine, & morbos plerisque ignorent, nullaque pestis, nullæ febres acutæ vel ardentes apud ipsos deprehendantur, cujus rei rationem reddere alaborabimus. Novimus nempe in calidissimis regionibus pestem grassari, ibique ordinario suos habere natales. Pestis enim est penetrantissima putredo, quæ mirifice a motu activissimo calido, intestino, humidoque generatur & promovetur; eapropter quoque in frigidissimis locis, ubi omnia sunt concentrata, quieta, motu intestino activo destituta, putredo, nec radices agere, nec pestis excitari atque propagari potest. Quod ad febres attinet, sunt hæ ipsæ nihil aliud, quam intensiores sanguinis & humorum agitationes ac commotiones, a



nes, a tono fibrarum motricium & musculorum maxime cordis & arteriarum adaucto, factæ, unde quo fibræ sunt sensibiliores, ad motum & impulsu aptæ, eo facilius ad febres est proclivitas. Et hæc est causa cur cholerici temperamenti homines, juvenes viri calidum clima inhabitantes, plus sint obnoxii febribus quam senes phlegmatici, melancholici, & frigido sub cælo viventes, qui magis fibris tensis, immobilibus, constrictis, & insensibilibus gaudent. Facilis inde fuit ratio, cur in Lapponia, Islandia & NorWegia febres non observentur; immobilitas nempe & fibrarum rigiditas, quæ in horum corporibus est, minus apta ad tremulos & elasticos fibrarum motus & spasmos existit, quales ad generandam febrem, tam horrorem, quam calorem requiruntur. Ratio quoque ex dictis evadet clarior, cur ad febres tam domandas quam supprimendas efficacissimus sit internorum adstringentium usus, ex quorum classe sunt china, parata vitriolata, martialia, aluminosa, radices vegetabilium stypticæ; item cur adstringentia & in forma emplastri roborantia v. g. mixta ex alumine, terebinthina, herba rutæ, aceto carpis manuum plantisque pedum applicata, potenter febriculosos insultus discutiant, quoniam nempe hæc omnia fibras valde rigidas efficiunt.

II. Præterea Lapponibus, Finnis, Norwegis, eodem *Scheffero* teste, frequentes sunt lippitudo & ophthalmia, unde non raro cæcitas evenit; quarum causa est, quod a prima ætate in fumo versari cogantur, quo tuguria illorum æstate & hieme abundant; quam noxius autem sit fumus oculis, sale acri plenus, est notissimum. Deinceps peripneumonia & dolor in dorso & capite in his oris quam maxime dominari solet, Causa tribuenda sanguini crasso & denso, qui a frigore externo in minimis musculorum tubulis, inque pulmonum vasculis tenuissimis facile sistitur. Neque reticendum est, in omnibus provinciis borealibus sphacelum, ex levi etiam externa membrorum læsione, fa-

cillime generari. In promptu est ratio, sphacelus nempe ex sanguinis circulo in membro vel parte aliqua destructo nascitur. Impeditur vero & destruitur sanguinis progressus, si ipse densus est, crassus, terrestris, spiritu & virtute destitutus, qualis horum populorum, ut & scorbuticorum est.

12. Aliud adhuc malum vexat illos, qui boreales plagas incolunt, quibus Russi, Tartari &c. annumerandi sunt. Perniones nempe ibi sunt seu ulcera & pustulæ a frigore subortæ; non rarum quoque est a frigoris immanitate nares & aures decidere. Strictissimum enim gelu, motu rectilineo vehementissimo, omne, quod subtile quodque in fibris motricibus spirituosum est, exstinguit; unde flaccidæ hæc sunt & ferme emoriuntur, stasesque humorum & inde perniones atque sphacelationes nascuntur. Solemne ipsis est remedium, partes frigore adustas nive fricare, donec stupor cesset, & sensus redeat; dum demum successive igni admovent, id quod, si prius accidit, valde est damnosum. Frigus enim motu suo flaccidas fibras, si quidquam adhuc spirituosum inest, plus excitat, quam calor, qui reliquas elasticæ spirituosæ materiæ ulterius dissipat. Cæterum notandum, quod hi populi exilioris sint staturæ, animalia etiam boves cornibus destituti, vix asini magnitudine pares propter immane gelu constringens, & succi nutritii æqualem distributionem impediens.

13. Polonicam gentem jam, & illi vicinam Lithuaniam accedimus, ubi notissimus & vernaculus morbus est, qui plica appellatur. Consistit hæc in magnitudine capillorum præter naturam aucta, qui in scirrhus inexplicabiles concreti & conglutinati, monstrosam præbent speciem. Hos si secant, sanguis cum dolore capitis, visus læsione, & sæpe cum vitæ periculo effluit; & hoc adfectu maxime Judæi laborant. Morbi hujus causa valde perplexa & difficilis videtur, nihilominus eam, quantum fieri poterit, indagare allaborabimus. Primo multum sordidum vitæ genus



genus confert; cui hi populi addicti sunt, dum raro crines pectunt, in humidis & depressis locis dormiunt, & spiritum vini liberalissime ingurgitant. Suum quoque Symbolum aquæ contri- buunt: hinc non male *Gebema in epist. ad Bontekoe de plica Polonica pag. 10.* sen- tit, hæere vitium in nonnullis Polo- niæ aquis, ut si vel potentur, vel cor- pus iis abluatur, plicam producant: que- madmodum id duorum militum exem- plo comprobatur, qui cum in stagnum aliquod corporis lavandi causa ingressi es- sent, vix immerso in undas capite, mul- tas ibi plicas contraxerunt. Nos suppo- nimus quoddam vitium hæreditarium, quod in nimia pororum & bulborum ca- pillorum sub cute in capite consistit; unde succus nutritius crassus & glutinosus, prava diæta ex crudis aquis productus, calore, quem potus spiritus vini conciliat, urgentur ad tubulos capillorum, ex quo- rum poris exsudat, & monstruosam il- lam intricationem efficit.

14 Hungariam ingredimur, quam ve- teres Pannoniam & Illyricum appella- runt. Graviter hæ gentes affligi solent podagra & arthritide, quæ ex abusu vi- ni spirituosæ lantaque diæta nascitur. In- gens quoque ibi pediculorum est copia, ut plebei & milites contra hosce vermi- culos sese defendere nequeant. Multum ad hæc mala calida & humida soli na- tura confert. Observatu dignum *Conrin- gius* scribit in *thesaur. rerum publ.* quod bene tota Hungaria præsertim inferior habeat ignem subterraneum, quod ex eo apparet, quando prope Drawum vel Danubium scrobes effodias, poteris ibi sudare & balnea parare; & quoniam re- gio simul est aquosa, perpetuæ ibi sunt evaporationes, quæ faciunt, ut aer mi- nus sit salutaris, qui morbos putredini aptos creat, quæ & pediculorum gene- rationi favet. Ex hoc fonte promanat etiam genesis febris sic dictæ Hungariæ, cum summo capitis dolore, agrypnia, cardialgia, deliriis & angina stipatæ. Mi- lites ordinario hoc malo affligi solent, qui humi cubant, & diætam irregularem habent. Accedit, quod de die intensus

fit æstus, nocte autem summum frigus, unde transpiratione prohibita, facilior ad corruptionem sanguinis fit transitus. Præterea ex alio morbo Hungari labo- rant, qui *Cremer* ipsis dicitur, quando nauseam vel ex cibo vario inordinate sumto, vel ex potu nimio sibi contra- hunt, statim palmam manus in parte do- mestica fortiter fricant, hancque partem dolere dicunt. Interim si aqua cordiali reficiuntur, statim disparet. Alter quo- que quem *Strint* vocant, semper in ore est, & omnem vel in ore, gutture vel ano tu- morem, inflammationem, *Strint* vocant vid. *M. N. C. dec. I. an. I. p. 5. 6.*

15. Jam nostram perlustrabimus Ger- maniam, quæ merito in eam, quæ sep- tentrionem & quæ austrum spectat, par- tem debet distingui; in illa scorbutus & ex eo pendentia mala dominari solent, nec ullus fere morbus est chronicus, cui sese nihil scorbutici adsociet. Valet hoc maxime de superiore Germania & West- phalia, ubi Batavorum more halecibus, petalonibus, asellis, ostreis, piscibus ma- rinis atque id genus pulpamentis dele- ctari cepimus. In Westphalia rarissime febres malignæ petechiales videntur, fre- quens ibi est peripneumonia, scabies fre- quentissima; sanguinem alunt nimis cras- sum, qualis fit ex copiosa carne porcina infumata, tenui cerevisia, pane grossio- ri vulgo *Bonpournickel* & abusu spiri- tus vini; hic sanguis in pulmonibus sta- gnans inflammationes causat gravissi- mas, & minus a sordibus purgatus scabio- sum efficit morbum: hisce morbis præ reli- quis patent, qui otio sunt dediti & vitam nec motu, nec labore exercent, qui egre- gium tam scorbuti, quam scabiei est reme- dium. *Hollatiam* qui incolunt non lon- gævi sunt; abundant enim soli uberta- te, hinc lautior diæta ipsis copiosum ingenerat sanguinem. Verum paludosa est regio, præsertim *Ditmarsia*, qua hinc inde aquæ sub agris stagnant, & crebras ex mari experiuntur inundationes: unde febres petechiales & malignæ complu- res homines corripunt atque auferunt. In parte australi Germaniæ *Silesia*, *Fran- conia*, *Austria*, & *Suevia*, ubi tene- rior



rior est victus & vinum bibitur, phtisis, arthritidis, febres ardentes, hæmorrhagicæ excretiones & inflammationes crebro observantur. In Misnia præsertim Lipsiæ singularis est adfectus, qui aliis regionibus plane incognitus, familiarissime invadit incolas, præcipue feminas puerperas, quibus sæpe est exitio. Dicitur is morbus purpura, quæ in rubram & albam dividitur: maculæ enim miliacæ in cute summa rubræ vel albæ, pulicum moribus similes, cum cutis asperitate, pruritu, præcedente febre, cum summis anxietatibus prorumpunt. Quandoque hoc malum petechiis, morbillis, variolis, febribus aliis continuis sese associat, ubi quando omnia circa declinationem videntur salva, demum hoc malum propullans tragicum eventum ægroto adfert. Soboles est feri putridi vappidi, sique hariolari licet, culpa & causa delicato & tenero vivendi generi assignari potest, dum otium, dulcia & placentas amant, quæ nullo maiori in copia visuntur, quam in Misnia, & in iis, quæ eam circumjacent, locis. Nullum enim dubium est, quin serum inde valde viscidum & impurum evadat. Et cum gravidæ sint ordinario plethoricæ & cacochymicæ; hinc in iis majorem tyrannidem similis victus exercet. In infantibus etiam peculiaris observatur valetudo: corripit nempe hanc ætatis teneritudinem tabes, ut macie confecti tanquam simulacra hominum appareant, vulgo quidem fascino contactos pueros esse putant; sed qui naturæ abdita perscrutarunt, in cute vermes crinium nigrorum vel chordarum forma, latitare observarunt, & si cutis melle vel in balneo loco calido fricatur, prorumpunt, frigore si condensatur, intus se condunt: vocari solent comedones, quod quasi debitum naturæ nutrimentum intercipient. Legatur de hoc morbo *Sennertus lib. V. praxeos part. I. cap. 24.* Ulterius & illud notari meretur, quod in nulla regione tam superstitiosi & creduli sint, ubi adfectus præsertim atrophicos convulsivos a naturali causa, scorbuto vel vermibus proficiscentes, incantationibus & fascino dæmoniaco adscribere solent. In Hun-

garia etiam eadem superstitio hominum mentes tenet.

16. Germania jam perlustrata nos ad Græciam, Macedoniam, & Thraciam convertimus: pauci ibi sunt morbi præsertim chronici, pauci etiam ibi reperiuntur medici. Tenue enim cælum & aquæ limpidissimæ obstructions, indurationes, viscerum glandularumque infarctus minus ferunt; nihilominus tamen febres acutæ, aliæque, dysentericæ, phrenitides sunt frequentissimæ, ad quas ingenerandas fructuum horæorum præstantissimorum, item vini generosi suavissimi abusus multum confert. In mari Ægeo & ejus insulis epilepsia exercet imperium, quod etiam HIPPOCRATES in lib. de morbo sacro docet. Constantinopoli omnibus annis dira grassatur pestis, quæ ordinario verno incipit tempore, & circa menses autumnii trigos Octobrem ac Novembrem desinit. Causam & ortum indagaturis plurima nobis occurrunt, quæ hanc luem promovere videntur. Plurimum urbis amplitudo, quæ incredibilem hominum multitudinem continet, mari fere ubique cincta est, adeo, ut muri eo affundantur; ac itaque exhalationibus aqueis refertus valdeque humidus est, cælum vero & clima admodum calidum: humidum vero & calidum aerem sobolem esse putredinis adeoque pestis, quæ, omnibus consentientibus medicis, putredo est penetrantissima. Accedit incolarum detestanda sordities, dum squalores & omnis generis excrementa in plateas projiciunt: unde aeris infectio, & exinde magna morborum vis oritur. Præterea a vino abstinentia, cujus usus Mahometana lege ipsis interdictus est, ad corruptionem corpus præparat: si ullum præstans datur alexipharmacum, & quod magis putredini resistit, certe moderatus vini usus est. Addimus & hoc, quod apud ipsos mos sit quotidie balneis & lavacris mollibus foveri, quæ quantum fibras relaxent, corpusque humectent, & virtutem sanguinis suffocent, inter omnes constat. Accedente igitur miasmate in corporibus ad corruptionem dispositis & ad fomitem contagiosum recipiendum præparatis, trunculentum



lentum hunc morbum propagari, facile potest intelligi. Eadem ratio est, cur Smyrnæ Aleppi idem malum ferme perpetuum sit. Constantinopolis porro incolas continuo podagricis doloribus excruciarī ex Nicephoro Callisto **HIER. MERCURIALIS** lib. V. c. 24. tradit. Eodem morbo ceu peculiari malo Athenienses affici, idem loco citato testatur. Illud vero admiratione dignum Constantinopolitum veneream plane exulare; cum tamen hæc gens in libidinem sit effusissima, suæ alienæque pudicitiae maxime prodiga. Damus vero hanc rationem, quod feminae, a quibus scaturigo mali fuit, post veneream *συντριβή* semper se lavantes, impuras sordes eluant & abstergant. Idem veteres meretriculas in usu id habuisse vel ex **MARTIALIS** lib. 2. epi. 50. constat.

17. In Asiam traicimus. Exordium vero a diffusis Indiæ regnis capimus, ubi magna morborum endemiorum est varietas. Notabilis est adfectus admodum molestus, Berberi dictus, qui species paralyseos seu tremoris est: motum enim sensumque manuum ac pedum, imo quandoque totius corporis depravat & tremere facit. Vitium hæret in nervis, quos lentus viscidusque humor implet, quod malum auctores a maxima inæqualitate aeris deducunt, quæ hic locorum observatur; de die existente intolerabili solis fervore, de nocte vero maximo frigore, dum nempe ex prima regione aeris vapores intensissimo calore per diem elevati nocte decidunt, qui sub dio cubantes idque sine tegmine vehementissime affligunt, in rarefactos per calorem poros frigore altius intrante, serum incrassante, porosque obstruente: unde fibris & musculis vigor & elater tonusque perit. Est etiam frequens his gentibus malum Mordehi dictum, quod nil nisi ventriculus depravatus est. Perpetuus æstus & inde excussus corpori sudor copiosus, & superveniens frigus ventriculum valde debilitat; jam si nimio cibo & potu maxime vesperi se implent, non possunt nisi depravate cibum concoquere: eandem ob causam diarrhœa vulgaris, curatuque difficilis ibi morbus est. Deni-

que spasmodica colica iis evenit; quia ingluviæ & crebro spiritus vini ingurgitationi plus justo indulgent; a qua aquas bibentes sunt immunes.

18. Singularis quoque spasmi species illis populis esse solet communis, dum subito homines rigidi & statuae instar permanent, & vel in anteriorem vel posteriorem corporis partem musculi involuntario motu trahuntur. Accedit quandoque spasmus cynicus, dentium stridor, inconditumque murmur; latius hac de materia **PONTIVS** de medicina Indorum videri potest. Quod mali genus ex copioso bilioso ac sulphureo sanguine venit: quia sanguis missio & nitrosa sunt auxilio. Præterea hisce regionibus consueta est diarrhœa, quæ ut plurimum necat: hujus causam fructibus Indicis, quibus si quis oryza vel pane non caute vescatur, vix hocce defugiet malum, non secus ac in Gallia & Hispania, qui uvas sine pane avidius comedunt, statim dysenteriam incidunt. Præcipuam etiam causam hujus mali modo laudatus adserit **PONTIVS** pag. 127. potus adusti copiam, quem Arack appellitant & quod Chineses ex oryza admixtis holothuriis in mari fluctuantibus, conficiunt, quæ Belgice Quaben & Quallen vocari solent. Hæc holothuria tam acris sunt caloris, ut attactum cutem exulcerent ac vesicas inducant. Notandum & illud, quod febres contagiosæ malignæ raro, pestis vero nunquam visatur in India, variolæ autem ipsis sunt contagiosæ. Tertianæ simplices & duplices sunt communissimæ: carnes, julecula & ova summo studio febricitantibus interdiciunt. Aer valde subtilis temperatusque morbos ex putredine & peste non admittit: intermittentes vero ex transpiratione prohibita a frigore nocturno fiunt, præsertim post vitia in diæta.

19. In insula Ceylon & præcipue in regno Jafnapatnam hieme febres & ventris tumores, ex falsis crudis & calcareis aquis suborti, regnant: hiems ipsis valde est pluviosa, inde transpiratio impeditur. In Malabareses vero variolæ summa sævitia grassantur, **BALDÆUS** in descri-



*descriptione insula Ceylon & Malabaria* ex humido anno & fructibus autumnalibus earum vehementiam atque malignitatem derivat. Apud Crinenses Japponenses frequentia sunt oculorum vitia, lippitudines, cataracta, cœcitates, quæ mala ex oryza decocta calide sic devorata, quam loco panis quotidie comedunt, derivantur. Valde enim viscida sic generatur lymphæ crassusque sanguis, qui per tunicas & tubulos capillorum, quando cum impedimento circulator & stagnationem efficit; oculis varia inducit incommoda, cœcitatē, cataractam, lippitudines, & quæ alia sunt oculorum vitia. Et ut exemplum ab equis desumamus, ex facili cœcos nimium avena & hordeo saginatos & post fortiolem laborem, nimiamque in cursu agitationem fieri. Arthritis & podagra rara in Sinensium regione sunt, quod illi forsitan populi continuo calido potu fruuntur, qui aperta servat emunctoria, transpirationem promovet, & impura tartarea scorbutica salia e corpore ejicit. In insula Formosa, quæ calido & humido cœlo tegitur, pestis est morbus periculosissimus, quæ grassante incolæ ædes suas relinquunt, & in altissimos aviosque montes se recipiunt, qui immunes ab hoc malo propter subtiliorem aërem putantur: incolæ bibunt aquas optimas, & nil nisi plantas & fructus comedunt, nec prius domos repetunt, donec aëre correcto pestis desævierit. Vid. *Georg. Tsamanaa Zaear decript. de l'Isle de Formosa en Asie cap. 27.* Clarissime ex dictis apparet, vappidum, calidum, neque ventis expurgatum aërem pestiferam corruptionem excitare posse, subtilem vero & serenum optime pesti resistere. Mirandum illud, quod arthritides & febres intermittentes, eodem auctore teste, plane ibi sunt incognitæ, quod forsitan temperantiam incolæ insigniter colant, ab ingluvie luxuriaque longe remoti, a quibus has passiones oriri perquam notum est.

20. Eadem in insula variolæ vim suam adeo exserunt, ut raro quis existat, quin hocce malo corripiatur. Plerumque fere tertio ætatis anno iis ita inno-

xie adfliguntur, ut raro puer aliquis iis auferatur. Superatas variolas rubor per totum corpus restitutorum diffusus, & incolis Schiptio dictus sequitur. Is morbus longe variolis ipsis est periculosior, cum vehementi æstu conjunctus, & ita infantibus infestus, ut ni probe curentur, in summum vitæ discrimen sæpius adducuntur. Mulieres graviore cum periculo edunt partum, quam quidem Europæ puerperæ eam ob causam, quod corpus nunquam exerceant, sed ut Græcæ olim mulieres semper intra domos ac interiora latitent conclavia. Lues venerea ibi ignoratur, quia ipsis polygamia est concessa, & adulteria commissa graviter puniuntur.

21. Goæ urbe principe Lusitanorum in India morbus valet, Mordexyn vocatus, subitus ac improvisus cum nausea vomituque perpetuo, quod malum commune est, multisque funestum. Venerea lues morbus ibi universalis & patrius est, sine ulla infamiæ nota. Calculo ac hernia plurimi item laborant, præsertim mariti, quod continuo aquam potant, milleque lascivias exercent cuticulam curantes. Crassum ibi ventrem scædo abdomine multi trahunt, reliquis, qui expertes sunt hujus dedecoris, illis irridentibus & per jocum Barigos i. e. maximos ventres appellantis. Causa hujus mali est sacchari dulciumque intemperans usus, cui hi homines adsueta, & quod plerumque semper nudi maxime post prandium in porticu sedent, de qua re fusius tractat LINSCHONT. *in itin. p. 44.*

22. In Armenia oculorum doloribus vehementissime incolæ adfliguntur; cujus mali causa ea esse videtur, quod per totam hiemem, quæ per octo integros menses ibi extenditur, in fumo, fornacibus destituti, versantur, per quos fumus possit evolvi. Nocet igitur hic maxime illorum oculis, ut lippitudinibus, cataractis aliorumque acidulorum vitiis semper sint obnoxii, teste *Carolo de Piacenz missionario in Congo in itin. pag. 237.* Cæterum & illud monendum, quod nulli medici in Armenia inveniantur; sed si qui illis forte appulerint, maximi æstimentur suspi-



suspicianturque. Podagra etiam exercentur Armenii; quia plus vini, quam aquæ potant.

23. In Persia calculus & podagra vix observantur: quia ibi lege Mahometana vino plane abstinent Persæ; calculum vero ex potu vini immoderato nasci ii demonstrant, qui in regionibus vino fertilibus habitant, ut Rhæni incolæ, Franci Austriaci, alique. In insula Laar, Gamro dracunculi inveniuntur, de quibus infra agemus.

24. De Tartaris ultimo loco aliquid addendum, quod nimirum cæci per aliquot a partu dies maneant; quod ita intelligendum, non quod vera cæcitas obducatur oculos, sed quod palpebra superior, propter musculos nimium laxos & extensos per aliquot dies oculos clausos teneat.

25. Progressum jam facimus ad Africam, ubi primum sese offert Ægyptus, cujus regionis morbi sunt scabies, lippitudo, & cæcitas. Alexandriæ multæ mali moris febres incolas autumnæ extorrent; hieme vero oculi lippientes exercent, qui per totum annum durant. Alexandriæ variolæ grassantur valde contagiosæ. Vulgares etiam sunt hydroceles, pneumoceles item melancholia hypochondriaca. DAPPERTUS optimus de Africa scriptor p. 127. & seqq. optime hæc vitia, ex aeris intemperati squalidi, evaporationibus Nili repleti, usura deducit. Stagnantibus etiam impuris aquis, quas in cisternis habent, & turbidæ Nili aquæ potui, denique dulcibus fructibus crudis balneisque adscribit. Accedit diurnus æstus, nocturnum vero frigus, quibus omnibus ventriculus depravatur, spirituosusque sanguis depressus ad corruptionem pronus fit. Hoc imprimis tenendum est, pestem raro in Ægypto vitio aeris inexistere, quæ potius ex nimia Nili inundatione originem trahit. Eo enim flumine per longiustempus obruente solum, tota regio paludosa stagnanti mari similis evadit, quod accedentibus austris, & vehementiore solis æstu in putredinem abit, & modo dictam luem excitat. Accidit etiam, ut

aer natura loci jam calidus, excedente alveum suum plus justo Nilo, & altius terram tegente, nimis humidus fiat; & exinde pestis existat causa: tantum enim abesse credo, ut hæc lues ex aere nimium calido hac in regione oriatur, ut potius hoc ipso sæpe extinguatur. Elephantiasis etiam, ALPINO teste de medicina Ægyptiorum lib. I. cap. 4. est familiaris Ægyptiis, sicut etiam Arabibus & Javanis, de quibus videatur disputatio Dn. Albini; illud vero malum a victu insueto præsertim carnis asininæ, & potu Nili turbido deducunt, cui sententiæ subscribit GALEN. l. I. de facult. aliment. it. Avicenna fen. 3. 4. tract. 3. c. 1. Lucret. lib. VI.

Est elephas morbus, qui propter flumina Nili

Gignitur Ægypto in medio, neque præterea unquam.

26. Circa Æthiopiam hoc memorabile, quod mulieres ibi facillime pariant, in genua procumbentes ad effundendum naturæ opus, uti diligentissimus rerum Æthiopicarum scriptor LUDOLFUS in bist. Æthiop. refert. Eandem fortitudinem & robur in Brassiliensibus feminis laudat BARLÆUS in libr. de rebus in Brassilia gestis ita scribens: nec Europæ more in hebdomadas quinque aut sex puerperia trabuntur; verum altero a partu die ad opera laboresque firma, quamvis pusilla, corpora redeunt; sæpius audiui & legi de ancillis Indicis in Batavia Hollandis servantibus, quod post partum ipsæ in profluentem aquam abeant, seque infantesque suos sine ullo sanitatis periculo lavent.

27. Qui in Guineam navigant & in castello S. Joris de Mina degunt, per aliquot milliaria plerumque vermibus per totum corpus vexantur; magis tamen Æthiopes, quam Germani. Tanta vero vehementia sævitiaque hujus mali est, ut præternavigantes etiam adfligat, quibus prurire statim incipit cutis, partim in brachiis & pedibus partim in obessoribus corporis partibus multaque carne rectis. Prodit mox pustula modo unius modo trium pisorum magnitudinem exæquans, quæ ab ipso verme non perumpitur, ab accersito ton-

N

fore



fore rei hujus perito tempestive cognita diffecatur. Apparent tunc in aperta pustula duo parvi pili, qui, cum candidi sint, & capiti inhæreant, barba vermibus vocitantur. Excitata pustula aqua est referta, ex qua matutino vespertinoque tempore vermis extrahitur. Si obefiori loco infederit, & ad membri longitudinem ex pustula prominuerit; sæpius accidit, ut totus & una quidem vice extrahatur. Ipsi illi vermes longitudinem sæpe unius ulnæ referunt, colore nivem exæquantes, tactu frigidi sunt, licet calida ex carne exeant, crassitudine filum paullo robustius exsuperant. Si in pedibus sedem fixerint, adeo musculis venisque involvuntur atque implicantur, ut non toti sed per frustra educantur, colligente se exinde magno in cruribus tumore, atque cutis materia. Quæ ut erumpere possit, fontanellæ incidendæ sunt, vel alio modo exitus puri parandus: quo fit ut multa inde pedum vitia, sæpius etiam claudicantem ægri incurrant vid. DEMMER-SAN *Itin. Indic.* Meminit etiam hujus morbi PLUTARCHUS *sympos. cap. 9.* qui erudite admodum de hoc malo ita scribit: *qui mare rubrum accolunt, ut Agatharchides testatur, novis adfiguntur morborum symptomatibus, quæ parva sunt & dicuntur Dracontia. Hæc suras & brachia exedunt, & sese inclinant & prospiciunt; contrectata vero sese rursus illatibran. ac fugiunt; complicata vero in musculis phlegmones intolerabiles excitant.* Plura de hac materia legi possunt apud WELSCHIUM in *dissert. de vena Medinensi* apud LUDOLF. in *hist. Æthiop.* & HIERON. MERCURIAL. *V. L. lib. 2. cap. XX.*

28. Draculorum causam invenire res certe est difficilior; paucis tamen ut nos expediamus, verosimillimum est a corruptione aquarum id fieri malum. Sopponimus cum PISONE in *H. N. l. 2. c. 16.* sub æquatore & calidissimis locis aquam scaterere omnis generis vermiculis, præsertim puteales stagnantes, quos sol fervore suo fovet atque excitat. Nullum inde dubium, quin quando

aquæ hæ avidius potentur, vel etiam post æstum poris apertis aquæ immerguntur pedes, semina musculorum atque cutis intrent interstitia, quæ ibi quæta calore humido temperatoque foventur ac nutriuntur. Non novum apud nos quoque tale vermium genus est, qui sub cute in cervis, vitulis, aliisque animantibus, hospitant, & cutim ita exedunt, ut tota inde fiat pervia. Tangit hoc malum juniora maxime animalia, quæ inde conficiuntur macie.

29. Restat adhuc America, de qua etiam pauca circa endemios morbos exponere licet. Memorabilia sunt, quæ nobiscum communicavit Baro de la HONTAN *nouveau voyage dans l'Amerique septentrionale Tom. II. pag. 144.* Incolæ Americani adeo robusto compactoque corpore sunt, ut paucis morbis sint obnoxii: nulla ibi membrorum resolutio, nullus calculus & hydrops observatur. Tanto major vero admiratio tam vegetæ sanitatis in agrestibus his corporibus est, quanto minor ipsis cura est servandæ valetudinis, quam etiam nimis corporis exercitationibus, saltatione, venatione, militia, temperamentique per diem crebra mutatione debilitare videntur. Pleuritis interdum illos affligit, cujus curandi morbi norunt remedium; maxime varo variolæ in Canada versus septentrionem, & versus meridiem lues venerea grassantur: prior morbus per hiemale tempus propter impeditam transpirationem periculosus est, posterior per Illinoisensium fluviique Mississipi tractum vulgatum malum est, Magnam quoque hominum copiam in Canada spiritus vini abusus interimit: absument enim, ex nimia hujus potus ingurgitatione, nativus calor omnes fere illi morbo implicat, quem consumptionem vocant. Cæterum medicamenta non magni æstimant, vomitoriorum & venæsectionis usum irridentes. Singulis autem fere hebdomadibus sudare solent, ita quidem, ut sani & diffuentes sudore per æstatem fluvios ingrediantur, & per hiemem in nivem se immergant.



30. In insula Cuba, Jamaica, & Hispaniola serpentes & scorpiones morfu plurimis nocent, contra quod malum ita sese defendunt. Partem nempe adfectam ligant, ipsamque aliquando scarificant, imponentes postea theriacam, quam etiam intra corpus adsumunt, intus etiam pulverem ex corde & hepate serpentum ad scrupulum unum devorant, quibus non solum a morfu horum animalium sese præservant, sed & facile se curant. In Peruvia endemia est venerea lues, ibi primum excitata post novi orbis inventionem, inque Europam anno 1494. advecta, & primum in Neapolis obsidione visa est. Præter hanc turpitudinem accusant humanæ carnis, lacertarum, piscium frigide comestorum usum, quæ de re legi potest Dn. TETRI *hstor. des Anchilles tom. II. Traët. V. cap. 2.*

31. Hæc sunt, quæ de morbis certis populis ac regionibus familiaribus ex nostris notatis & observationibus communicare volumus. Judicet lector benevolus, physices studium ad medicinam quam utile sit, & quod ex iis rebus quibus vivimus, corporeis nempe & mechanicis, ægrotemus restituamur & moriamur.

## DISSERTATIO V.

### DE LÆSIONIBUS EXTERNIS, ABORTIVIS, VENENIS AC PHILTRIS.

**T**anta artis salutaris dignitas est atque potestas, ut non modo ad vitam cum sanitate tuendam, morbosasque afflictiones perferendas salutaria suppeditet consilia atque auxilia; sed & Jureconsultis, in gravioribus casibus, ubi de hominis vita & morte, fama & felicitate agitur, viam monstret & fundamentum suggerat, cui innitentes, ipsi postea, quod justitia poscit, decernere possint & exsequi. Nemo enim non novit, Juris peritos semper, & quidem merito, medici exquirere judicium, quando tragicus quidam incidit casus, & delictum in vitam & sanitatem alte-

rius admissum est, atque etiam prout medicum hoc fert decusum, poenam a iudice vel graviolem, vel mitiorem infligi. Quod quidem medicorum officium forente, quum versetur circa res maximi momenti; ipsi omnino serio sunt monendi, ne præcipitanter aut temerario; sed summa cum prudentia, circumspectione, ac deliberatione eodem perfungantur: neque etiam ex opinione aut hypothese quicquam decernant, sed ex certis & inconcussæ veritatis fundamentis, medicis æque ac chirurgicis judicent, omniaque firmis ac demonstrativis rationibus corroborent. Name egregie non minus, quam vere monet TULPIUS lib. IV. cap. VII. plurimum, in-  
*quiens, interest, sententiam suam baud leviter ferre, nedum in tam gravi casu amicitiae aut hostilitati quicquam dare; quin potius soli veritati litare, quæ ut semper recta sit, nunquam non iusta ac DEO grata est. Sit tibi religio nunquam iudicem in fraudem elicere. Neque enim minores poenas DEO dabit, qui insontem damnat, quam qui sontem dimittit. Quare si forsam in re majoris momenti medici & physici ad judicandum requisiti minus aptos ad hoc sese sentiant; satius est & conscientiae melius consulunt, si aut peritiores simul in consilium vocant, aut iudicium suspendunt & rogant, ut Facultati medicæ acta ad iudicium ferendum tradantur. Non enim Jurisconsulti, ut iudices; sed ipsi medici per decusum suum absolvunt, aut condemnant; ac si in promendo hoc falluntur, ille supremus iudex non minus sanguinem, per injustam rei absolutionem inultum, quam insontis perperam damnati effusum, certe vindicabit. Ipsi vero etiam Jureconsulti, capropter sunt monendi, ne semper privatis medicorum & physicorum fident responsis quippe qui sæpe non sufficienter anatomica chirurgica, & rationali medica scientia sunt instructi; sed ut potius conscientiae rationem habentes ab integro quodam collegio iudicium rogent, antequam decretoriam suam ferant sententiam. Deinceps medici in reddendis iudiciis sæpe in eo delin-*  
N 2 quunt,



quunt, quod licet non falsa, ea tamen afferant, quæ minus ad rem faciunt. Evenit hoc, uti novimus, haud raro quando acta sine quæſtionibus traduntur: medici autem attente acta non perlustrant, nec eapropter quid potissimum in quæſtione sit & determinandum norunt; sed dubia dubiis, rationes steriles rationibus, allegata allegatis cumulant, & æquivoca dictione efferunt; quod tamen certo definendum, ut postea iudicibus, rerum medicarum plerumque ignaris, difficile sit, vel allata intelligere & ex ambagibus in viam redire: tantum abest, ut in usum suum inde quicquam depromere possint. Ex quo quum errores sæpe & confusiones oboriantur; semper omnino eo allaborandum est medico, ut post curatam actorum perlustrationem contentorumque considerationem, in quo cardo rei verſetur, perspiciat, sententiam suam perspicue & succincte promat, eandemque solidis, clavis, & ad rem facientibus argumentis confirmet. Sed tum hæc, tum alia, medico forensi, tam facienda, quam vitanda, in hac dissertatione uberius evolvere & monstrare nobis constitutum est; ita tamen, ut selectas tantum observationes, de *lēsionibus extērnis, abortivis, venenis ac philtis* excerpamus, omniaque luculentis ex experientia depromtis exemplis illustremus ac confirmemus.

*Observatio. I.*

Cadaveris inspectio absolute est necessaria, quando homo aspectu sanus, ita ab altero læditur, aut vulneratur, ut paulo post, vel intra horæ spatium, e vita discedat.

*Scholion.*

Nonnulli quidem ex celeberrimis JCtis, ac inter hos etiam FELTMANNUS de *inspect. cadaver. cap. LIV. §. IV.* ea in opinione versantur, ac si tum non opus esset inspectione & iudicio de absoluta lethalitate, quum ipse effectus idem jam clarissime demonstraret. Sed tum etiam nihilominus instituendam esse sectionem & in mortis causam inquirendum, rationes urgent graves.

Agitur enim hic de hominis vitā, in quo negotio probationes debent esse quam clarissimæ, oculis autem & manibus plus credendum esse, quam opinionibus, perhibuit jam HIPPOCRATES. Deinceps utique accidere per experientiam constat, ut quispiam leviter, vel minimum non absolute lethali modo læsus; exacto tamen exiguo temporis spatio non ex læsione, sed delitescente interius alia causa intereat. Memini adhuc rustici Westphali, qui mensæ assidens, & ab uxore contumeliosis verbis exceptus, frustum panis Westphalici, quem vocant Bonpurnickel, irritus arripuit, & in uxoris triclinio exeuntis sinistrum latus coniecit, eo cum effectu, ut illico male haberet, & post aliquot horas inter animi deliquia obiret. Sectione facta, lien quidem disruptus & aliquot sanguinis coagulati & congrumati mensuræ in abdominis cavo comparuerunt; sed femina diu jam antea aspectu fuerat pallida & in iram prona, ipse quoque lien disruptus ingentis & præternaturalis erat magnitudinis. Hinc recte a medico iudicatum: ob vasa adeo distenta, tunicamque per se tenuem nimium expansam, facile dissiluisse lienem, nec ab ictu hoc, si status fuisset naturalis, potuisse disrumpi. Quo JCti permoti, marito non ordinariam, sed extraordinariam, fustigationis poenam decreverunt. Alium in dextro latere baculo aliquoties percussum, postea in sinistrum latus cecidisse & brevi post obiisse, novi, ubi post mortem interius lien aliquot fissuris hians, & copiosus coagulatus sanguis in ventre inventus; exterius autem in latere sinistro nulla sugillatio, sed in latere dextro apparuit. Neque tamen hæc mortis causa plagis, sed potius facto post eas lapsui tribuenda fuit, eo quod lien in homine totus ex vasis sanguiferis copiosis est coagmentatus & ob membranarum, quibus cingitur, tenuitatem facile potest rumpi, ex quo postea succedit sanguinis effusio lethalis. Halberstadii accidit, ut viro juveni, quadrato & robusto sanguineo, inter rixas cum sodalibus

caput



caput percuteretur cum cantharo ligneo, ilque inde in lectum ob crapulam delatus mane inveniretur mortuus. Instituta sectione vix levis sugillatio & cutis lauciatio a plaga observata, nec in capite, nec aliis corporis visceribus quicquam præter naturam inventum. Sed dissecto tandem corde, ingens in conspectum prodiit polyposum concrementum, arteriæ pulmonali firmiter impactum. Quod quia ostium pulmonali arteriæ clausit, per iram & crapulam sanguinem valide fuisse commotum, polypum e dextro cordis ventriculo abruptum, pulmonali arteriæ intrusum, sanguinis cursum interceptum, & sic subitam mortem inductam tuli iudicium. Caveant igitur medici, ne perfunctorie inspiciant cadavera, nec eas tantum partes, quas proxime tetigit vulneratio; sed ut vicinas etiam, imo totum corpus omnesque ipsius partes, examini subjiciant, quo sicut tandem mortis veram & adæquatam causam inveniant.

*Observatio II.*

Læsiones absolute lethales, oppido paucæ sunt in genere; sed plures in specie, in alio scilicet atque alio individuo.

*Scholion.*

Læsiō per se & absolute lethalis in genere ea dicitur, quæ vitam omnibus, semper & necessario adimit, cujuscunque ætatis, temperamenti, sexus & corporis constitutionis ac roboris sint, licet etiam optima quævis tempestive adhibeantur præsidia. Sic lethiferæ sunt paucæ læsiones & tantum eæ, quæ vasa sanguifera majora circa cor, pulmones & viscera interna afficiunt, quando cor ipsum perfoditur, caput & cerebrum circa nervorum principium, medullam oblongatam & spinalem, gravius læditur, aut ibi effusus humor colligitur, nec ulla arte discutiendus, nec educendus, sed putrescendo necans. Multæ vicissim occurrunt læsiones, quæ licet in genere non sint absolute mortiferæ; in illo tamen, in quod inciderunt, individuo, morientili necessitatem imponunt absolutam. Nam ex vero scribit CELSUS lib. V. cap. XXVI. confert etiam aliquid & ætas, Opusc. Patb.

& corpus, & vita propositum, & anni tempus: quia facilius sanescit puer, vel adolescens, quam senior; valens, quam infirmus; neque nimis tenuis, neque nimis plenus, quam si alterum ex his est; integri habitus, quam corrupti. Res patebit exemplis. Senex septuagenario major graviter in pede dextro a glande plumbea trajecta vulneratur, tibiæ & fibulæ os frangitur, & insignis succedit hæmorrhagia. Adest quidem illico chirurgus peritus, qui sanguinis fluxum compefcit, & vulnus secundum regulas artis tractat: nihilominus accedit corruptio, sphacelatio, & quinto die mors ipsa. Lethum igitur intulit vulnus: non tamen in genere fuit absolute lethale. Sphacelus enim externus efficacibus remediis cohiberi, vel etiam pars illo affecta amputari & sic, ne latius serpat putredo, potest impediri. At, in juvenili, robusto, & valido corpore, id quidem commode perficitur, minime vero in sene, viribus fracto, cujus succi jam in putredinem proni, in quo sphacelati pedis amputationem ob virium defectum & hæmorrhagiam subsequuturam institueri non licet; quin licet operatio tentaretur; metus tamen esset, ne in tanta succorum impuritate, sphacelosa corruptio repullularet; quum non insolens sit, vel levem incisionem & læsionem tendinis, ex abscisso pedis clavo, sphacelationem attulisse lethalem. Quare rectum omnino iudicium: vulnus descriptum in hoc individuo fuisse absolute lethale: quia nulla certa demonstratione potest evinci, quod sanationem ullo modo fuisset admissurum. Eadem ratio etiam aliorum est vulnerum; neque enim medicus, nec chirurgus vulnus tantum curant & vitam servant; sed ipsius corporis natura, sive partium solidarum & fluidarum dispositio optima & potissima, uti morborum internorum, sic etiam læsionum externarum, est medicatrix; quam medens, si deficit, juvare, sublevare, & impedimenta optati successus remove debet. Hæc si non satis valens est; sed per ætatem, nativam & hæreditariam dispositionem, per morbum



prægressum crebrioresque animi affectus, languida est ac debilis, succi impuri, fibrarum robur remissum, corpus molle & spongiosum; lœsiones inflictæ utique facile fiunt absolute lethales; licet medicus, chirurgus & adstantes omnia, quæ ex usu sunt, contulerint.

*Observatio III.*

Vulnera ut plurimum lethalia & propter naturæ bonitatem in quibusdam tantum sanata, in aliis cum lethali eventu occurrentia, non per accidens lethalia censenda.

*Scholion.*

Nihil in foro medico frequentius, quam ut mortuo vulnerato, rei defensor suspectam vulneris lethalitatem reddere nitatur, idque, quamvis gravissimum, per accidens lethale fuisse contendat, allegatis ex medicorum observatis multis raris, sanationis fere miraculosæ exemplis. Sed magna inter vulnus ut plurimum, & per accidens lethale intercedit differentia. Nam lœsio per accidens lethalis ex se & sua natura nunquam ad mortem inferendam est sufficiens, & in robustioribus æque ac infirmis sanationem recipere potest; ob intervenientes autem fortuitas quasdam causas, ad eventum lethalem deducitur. Causæ etiam, quæ mortem procurant, nec a lœsionis, nec læsi natura dependent; sed non naturales sunt & ab extra accidunt. Sic quando musculus temporalis aut pericranium læditur, id quidem non moriendi infert necessitatem; sed sanationis commodissimus est locus. Interim quando læsus frigori, vel urenti calori affectam partem exponit, aut impetuosius animo movetur, nec non quando in plethorico venæ sectio omittitur, aut chirurgus perperam medicationem instituit, & acria atque stimulantia admovet; mors excipit & lœsio fit per accidens lethalis. Longe verò alia ratio est illarum lœsionum, quæ graves & ad interficiendum sunt sufficientes. Nam si quandoque sanatæ commemorantur, id non vulneris levitati sanitatem admittenti, sed peculiari prorsus naturæ robori est tribuendum. Contra ea, quan-

do lethalem sortiuntur eventum, naturales & intrinsecæ indeclinabiles, a vulneris & corporis debilioris natura pendentes causæ subsunt, nec lœsio eapropter tantum per accidens lethalis est habenda. Exstant exempla, qui a vulneribus intestinorum tenuium, ventriculi, diaphragmatis, hepatis, ob validum minusque exquisiti sensus corpus convalescunt. Plures vicissim eodem modo vulnerati occubuerunt; licet nec in curatione, nec vitæ victusque regimine quicquam utile omissum, & nocivum admissum est, ex quo lethalis eventus posset derivari: tantum quod non tam eminens fuerit virium robur, & superando tam gravi vulnere sufficiens. Miraculosa enim sunt nonnulla exempla de cerebri cum membranis ipsius vulneribus, e quibus successive magna cerebri portio exiit, quæ tamen in plebeis & robustis hominibus sanationem recepit. Sed si ejusmodi vulnera corpori accidunt, solito tantum robore pollente, tanto magis senili, aut infantili infirmo, nunquam non necant, nec ob rara sanationis exempla in his propter accidens prolethalibus venditanda.

*Observatio IV.*

Dantur lœsiones in se & sua natura non, sed tamen absolute lethales: quia ad ipsas sanandas non est accessus.

*Scholion.*

Non quidem omnia insanabilia vulnera, sunt absolute lethalia. Prostant enim exempla eorum, qui in hepate & intestinis vulnerati, per longum adhuc vitæ tempus, lœsionem non consolidatam circumtulērunt. Nihilominus verum, manet, quod lœsiones insigniores, uti sunt in vasis sanguineis, nisi medicina admoveri possit, necessario fiunt lethales. Nam si quis in suprema femoris parte profundius paullo fuerit sauciatus, & vasa ibi discurrentia ampliora dissecta, omnino lethale est: quia ob profunditatem stipticum nec applicari, neque dissectum vas ligari potest; sed vitam cum sanguine effundi indeclinabile. Novimus etiam quendam tam leviter in abdomine fuisse sauciatus, ut vix polli-



pollicis crassitie penetravit gladius, rite quoque vulnere tractato, bene habuisse, functionesque iterum expedite successisse; post quatrimum autem ex improvise languescere & animo linqui coepisse, viribusque indies magis concidentibus, sexto die animam exspirasse. Dissecto post mortem cadavere, notabilis cruoris in abdominis cavo copia fuit inventa, quæ ex disscisso omenti vase sensim profluxerat. Nemo sane vulnus hoc inflictum per se lethale; sed ampliari, sanguinis stillicidium compesci, vel vas sauciatus ligari potuisse judicabit. At chirurgus conjicere non potuit, imprimis in principio, quum nullum urgeret symptoma, quod & quale vas, in omento præsertim, fuerit læsum. Et licet etiam chirurgus sectione ampliationem tentare voluisset; procul tamen dubio æger, nihil mali præsentiens, renuisset; ne dicam ejusmodi incisionem semper periculi expertem esse. Atque adeo in morali hac, non physica, sanandi impossibilitate, quid decernendum sit, quæstio altioris indaginis Jctis decidenda venit.

*Observatio V.*

Quandoque exigua admodum est læsionis nota; mors tamen inde subita sequitur.

*Scholion.*

Obversantur animo plures ejusmodi casus. Memini adhuc quendam pugno fortius in scrobiculo cordis percussam, qui illico concidens, adhibitis frustra analepticis, sub animi deliquiis periit. Post mortem, nec corruptio, nec sphacelus, nec sanguinis extravasatio, nec ulla vasis ruptura visa, sed tantum macula nigricans thaleri ambitu in diaphragmate fuit, ubi ensiformi cartilagini connectitur. Mors cito sequuta, plagam hanc ipsius causam fuisse prodit, sed quo pacto tam levis, uti visa fuit, læsio id efficere potuerit, primo intuitu in difficili esse videtur. Verum diaphragma pars exquisitius sentiens est, ejusdemque actio ad respirationem, quæ cum vita pari passu ambulat, est absolute necessaria. Ob sensum igitur acutum pugni percussione spasmus septo huic est inductus,

qui non modo ad universum nervosarum partium systema propagatus, sed & diaphragmatis motum sufflaminavit: quo cessante, necessario & pulmonum, & cordis motus cum vita cessavit. Interim neutiquam absolute asserere vellem, ejusmodi ictum, semper eundem, vel similem tantum in corporibus producturum fore effectum, quæ non adeo sunt sensibilia & ad spasmos concipiendos disposita. Leve etiam erat vulnus, quod militi in ventre circa umbilicum tantum per integumenta erat gladio inflictum, quod tamen intra quatrimum erat lethale. Nam quum, accepto ictu, vehementer adhuc cum adversario rixaretur & corpus commoveret, sub inspiratione fortiori omenti particula in vulnus fuerat intrusa. Chirurgus pinguedinem vulnus claudentem esse putans, non reposuerat; sed emplastrum tantum apposuerat, nullumque periculum adesse declararat: hinc omenti incarcerationa portio abiit in sphacelofam corruptionem, quæ latius serpens, eadem labe abdomen totum contentaque in ipso viscera tam subito affecit, ut æger quarto die interierit. Chirurgus culpam declinavit eo quod omenti portio non ex vulnere apparuerit; sed inter membranas & musculos abdominis hæserit, ubi dijudicare & discernere non potuerit, an profunde penetrarit vulnus, an vero occlusum fuerit omento. Interim reus, quia læsio intra quartum diem & fatalem terminum mortem attulit, capitis ab Jctis est damnatus, juste, an injuste, nobis non est definiendum. Neque prætereundum leve illud aspectu diaphragmatis vulnus, quod inter binas ultimas costas in substantiam septi ibi accreti vix ad duos digitos transversos gladio obtuso fuerat inflictum, sine ipsius perforatione, & sine notabili sanguinis effusione, post aliquot tamen horas sub cælo frigido lethale, eo quod violentus inde diaphragmati spasmus inductus, quo respiratio non modo interclusa; sed & vasa amplissima per diaphragma transeuntia compressa, ut sanguis in laxa mesenterii compage & inter adiposam



renis dextri tunicam, perrumpere fuerit coactus. Quin quandoque nec lœsio, nec instrumentum lædens, externo aspectu morti inferendæ videntur apta; & lœsus tamen brevi periit. Novimus fistula tenui terrea fumigationi tabaci serviente, orbitam oculi inter pocula ex improviso fuisse pertusam, & quia os ibi tenuissimum, & cerebrum ejusque basis propinqua, citam a lœsione subsequutam esse mortem.

*Observatio VI.*

Lœsio per se non lethalis, sæpe ex ignorantia, aut defectu chirurgi, mortem infert.

*Scholion.*

Non adeo infrequens hoc est in foro & praxi medicochirurgica, nec adeo multum temporis effluxit, quum facultati medicæ acta transmissa, de vulnere cæsim inflictio in externa parte cubiti, ita ut eminens ossis humeri portio abscissa, cum cute & carne esset pendula. Commode hæc lœsio potuisset persanari, si remota abscissa parte, hæmorrhagia in loco obvio cohibita, balsamum vulnerarium applicatum, & epithemata discutientia defensiva fuissent admota. Sed quia chirurgus fructum pendulum iterum adducendo, viam ad sistendum sanguinis stillicidium præcluserit, emplasticis suppurationem impedivit, nec defensiva apposuit, non modo cum ingenti virium lapsu hæmorrhagia sæpius recrudivit, sed & ob ligatam arctius, ne sanguis irrueret, supernam brachii partem, infra vulnus illud perfrigeratione & necrosi affectum est, ac lœsus undecimo die expiravit. Potest etiam contingere, ut vas majus arteriosum, vel venosum discindatur, in tibia, aut brachio, ubi commodus alias delegandi locus est. Lœsus autem quia extra urbem, aut in pago degit, ubi chirurgus, vel nullus, vel non peritus obtinendus erat, ob hæmorrhagiam, per remedia alias & artem compescibilem, sub his vero circumstantiis nimis effusum & lethalem, periit. Quæstio est, an percutiens plecti possit poena capitali. Interim si forsitan chirurgus etiam nonnihil, quod utile esse po-

tuisset, in vulnere lethum inferentem omisisset, ea propter ipsi tamen soli non illico mortis causa tribuenda; sed semper lœsi corporis constitutio consideranda, & videndum, an, etiam si omnia ex arte exquisite fuerint confecta, ipse potuisset servari, vel secus. Atque etiam si casus fuerit dubius, utrum lœsi naturæ, an chirurgi medicationi fatalis eventus sit adscribendus, medicum collegium, corporis vulnerati robur & rationem ignorans, in chirurgum mortis causam per accidens conjicere nequit; licet reprehensione & poena dignum judicet ipsum, quod non omnia, ad sanationem ex arte proficua, contulerit.

*Observatio VII.*

Lethalitas vulneris, ex temporis, quo lœsus supervivit, diuturnitate æstimari nequit.

*Scholion.*

Est quidem secundum legum civilium constitutionem novem dierum spatium, ille fatalis terminus, ex quo absoluta vulneris lethalitas judicatur: vulnus vero per accidens lethale, interea mortem inferre posse, supra jam docuimus. Et quod in vulnere absolute lethali funestus eventus longius, ad aliquot interdum hebdomades, protrahi queat, uberius per experientiam constat. Exemplo sit vulnus vesiculæ felleæ, quod absolute est lethale; cito tamen non necat. Diu enim adhuc succedere possunt cordis & articularum, vitam sustinentes, motus, & bilis exigua copia destillans aliquandiu in abdominis cavo, vita superstiti, fluctuare. Sed quia vulnus nulla arte consolidandum, & biliosus humor continuo in abdomen effunditur, temporis diuturnitate nimis augetur, & non modo tunicas intestinorum arrodit, sed & alia viscera corrumpit; atque adeo lentam mortem, post mensem & ultra necessitate affert indeclinabili. Nec dissimilis vulnerum œsophagi, ventriculi & intestinorum est ratio, quæ quum non proxime vitalem sanguinis progressum turbent; non cita mors excipit, sed post aliquod demum tempus, ob sensim factam succi alimentosi & chylosi exstilla-



lationem, corruptionem cum morte inferentem, sequitur.

*Observatio VIII.*

Mortis causa in renunciatione curate distinguenda a causa lædente, semperque videndum, an illa, ceu effectus, ita comparata, ut adæquata sit huic, tanquam causæ efficienti.

*Scholion.*

Hoc si observatur, facile patebit, an læsio per se attulerit mortem, an vero causa eandem induxerit alia. Nonnunquam enim læsis, eodem modo ac sanis, accidit morbus, ex quo, quum moriatur, causa perperam læsioni tribuitur. Erat adolescens, qui baculo in pectore circa quartam & quintam costam, cum levi duntaxat sugillatione percussus, tertio die prævia horripilatione incidit in febrem, cui accessit tussis sicca, respiratio difficilis, & quarto die sanguinis sputum, quod tandem substitit, & septimo die æger occubuit. Post mortem in dextro latere, ubi percussus erat, corruptus cror, & magna feri in pericardio colluvies inventa; orta inde disceptatio est, annon ex illata læsione obierit. Sed per inquisitionem patuit, tum temporis epidemium fuisse inter juniores pleuriticum morbum, nec dubium esse, quin adolescentulus eodem decubuerit: quia non modo ordinarium pleuritidis veræ symptoma, sputum quarto die cruentum, adfuit; sed & causæ morbo huic inducendo aptæ, ut ira gravis & superingesta frigida larga potio, innotuerunt. Plurimum itaque refert, ut medicus probe in circumstantias inquireret omnes, quæ ad lethalem eventum conferre potuerunt, quo certus sit, nullam aliam causam, quam læsionem, intulisse lethum. Ante viginti circiter annos ordini medico hujus Academiæ tradebantur acta, cum annexo baculo ex ligno betulæ, crassitie pollicis, quo femina in collo & humeris percussa, paulo post interierat: inventis quidem in collo & humeris plagarum vestigiis; sed in capitis exterioribus, nulla adfuit sugillatio, fissura, vel fractura; in cerebri autem ventriculis aliquot cochlea-

ria sanguinis extravasati visa sunt. Medicus, qui sectioni præfuerat, extravasationem absolute lethalem fuisse edixit: quia nec per remedia pharmaceutica, nec chirurgica, removeri potuerit. Defensor suspectam hanc relationem eam ob rationem reddidit, quia læsa viva & satis adhuc valida aliquot milliaria pedibus emensa sit, quod facere non potuisset. Quare iudices a binis in Saxonia collegiis medicis academicis rogarunt iudicium; quæ vero in partes transierunt, & absolutam lethalitatem asseruerunt. Quum vero nobis tandem traderentur acta, vidimus, a testibus depositum fuisse, defunctam mensium suppressione, & sæpe etiam colica convulsiva laborasse, post verbera quoque de ingenti ventris dolore esse conquestam. Unde pronuntiavimus: mortis causam fuisse quidem sine dubio sanguinem in ventriculos cerebri effusum, sed quod hæc mortis causa, proxime & immediate a plagis fuerit inducta, id esse in quæstione, nec ullo modo posse demonstrari. Percussionem enim tantum in collo & humeris factam non tanti fuisse, ut potuerit in capitis interioribus tam lethiferum inducere effectum; sed feminam procul dubio interiisse apoplexia; dum commoto per iram sanguine, eodemque per dolorificos in ventre spasmos ad caput impetuosius translato, tenera plexus choroidei vascula dissiluerint, sanguinemque effuderint.

*Observatio IX.*

Medicus in relatione sua claras tantum & certas sententiæ rationes allegare debet; neutiquam vero rerum conjecturis & præsumptionibus plus tribuere.

*Scholion.*

Nuperius admodum id factum esse a medico veterano ipse reminiscor. Secuerat is foetum per abortum septimo mense exclusum, jam tum quidem perfectum, sed flaccidum & quasi tabidum, comparente nulla in capite totoque corpore lethalis læsionis nota, pulmonibus etiam in aqua subsidentibus. Mater ex furtiva venere gravida occuluerat, & graviditatem negarat; quinto mense post

fre.



frequentes vomitus & anxietates, ob diætā insalubrem inciderat in tertianam, eamque post binas hebdomades piperis, & radice imperatorie ex aqua ardenti usu profligarat. Postea carceri mancipata de capitis dolore, languore artuum, appetitus prostratione, nec non dolore ischii & siti fuerat conquesta, ad quam fallendam aquam frigidam copiose ingurgitarat. Elapsis aliquot diebus accesserant ventris tormina, & aquosus humor continuo e genitalibus stillarat, donec tandem foetum primum, ac postea secundinas, remotis arbitris, sub atrocissimis doloribus excluderet. Medicus igitur in relatione sua iudicavit, ex circumstantiis in foetu observatis probabiliter ratione esse concludendum, matrem per multa pellentia foetum exturbare voluisse, hoc autem iam nimis adultum, irritum fuisse molimen, interim subtrahendum embryoni esse alimentum ut contabuerit, tandemque vivere desierit. Sed in actis nihil plane fuit reperiendum, quo potuisset confirmari, matrem abortiva assumisse, & veri potius fuit simillimum, ex insalubri diætā succos redditos impuros, & post tertianam non recte tractatam successisse lentum morbum, sanguinem & succos laudabiles consumentem, foetuique subtrahentem, demumque per terrorem & iram ob incarcerationem, abortum esse inductum. Quare ejusmodi in casibus omnino necessarium, ut inquisitione finita, acta collegio medico transmittantur. Sic enim ex testimoniis sæpe circumstantiæ innotescunt, quæ ad decisionem categoricam, absolutionem, aut condemnationem, multum faciunt, quæque medicum renunciantem a principio la-tuerunt.

#### Observatio X.

Medico, qui curationi læsi defuncti præfuit, in propria causa testanti, non semper fides habenda.

#### Scholion.

Medicus, qui læso medicatus est, hoc pereunte, absolutam plerumque incusat vulneris lethalitatem, ne se ipsum inculpet, quasi quicquam ad vitam ser-

vandam omiserit, aut quod noxium admiserit, licet sæpe culpæ non expers sit, inprimis quum pauci ex junioribus, præsertim medicis ac physicis, sufficienti polleant experientia, ut sciant, quomodo graviter læsis per interna & externa recte sit succurrendum. Comperit id exemplo cujusdam habeo, in pectore, duobus transversis digitis infra mamillam dextram, vulnerati. Effluxerat ex hoc vulnere per aliquot dies sanguis purus, sanie postea remixtus, sed non adeo copiosus: medicus & chirurgus, deficiente sputo cruento, non ex pulmonum viscere, sed ex vulnere in obeso corpore prodire materiam putarant, vulnusque post tertiam hebdomadem ad consolidationem deduxerant. Sed consolidato ipso, tussis successit, spiratio difficilis, cum lento calore, copiosis sudoribus matutinis, & æger post quartam hebdomadem fati cessit. Dissecto cadavere, dextra thoracis cavitas magnam puris continuit copiam, totusque ibi pulmo fere corruptus, niger & putridus comparuit, & procul dubio sanies, per consolidationem exitu præclusa & sanguini remixta, mortis causam præbuit. Alius in pulmone vulneratus, parum sanguinis sputo rejecit, cui medicus decoctis traumaticis & adstringentibus occurrit, eoque cohibito & phthisis, pulmonis ulcus, tandemque post duos menses mors ipsa successit. Medicus curationis artifex insalabile fuisse malum testatus est; ego vero aliter sensi. Nam ea tantum pulmonis vulnera sunt lethalia, quæ vasa majora lædunt; non vero levia, minores canales fauciantia. Prostant potius exempla, de pulmonum vulneribus, subsequente sputo cruento, tussi & difficili respiratione, quæ tamen perfecte sanata sunt. Quin TULPIUS lib. II. cap. XVII. pag. 219. memorat: frustum pulmonis uncias tres pendens fuisse abscissum, sine vitæ dispendio. Et PECHLINUS in bist. vuln. thor. art. XXIII. non tantum vulnus pulmonum; sed & partem lobuli decisam observavit, ægro convalescente. Quare culpa potius in

usur-



Corrupta sputum cruentum silentia rejicienda, quibus sanguis subsistens, & in putredinem abiens phthisicum morbum genuit.

*Observatio XI.*

Pulmonis in aqua subsidentia, non est infallibile foetus in utero mortui signum.

*Scholion.*

Embryonem in utero non respirare, res est indubia. Pulmonis etiam vasculosum vesiculosumque viscus ab aere atmosphaerico expandi aptum, eapropter in uterino clauetro collapsum, minus spatium occupare, & ob id aqua specificè gravius in hac subsidere, & vicissim, postquam extra uterum aer gravitate & elasticitate sua irruens, compagem omnem diducit, majus spatium explere, aqua levius reddi ac supernatare, id pariter certum. Sed quod medici infanticidio imputato indubium venditarunt foetus in utero mortui signum, subsidentiam, id non adeo certum, sed fallax est. Novimus enim infantis jam per aliquot hebdomades extra uterum vivi, & a matre melancholica suffocati, pulmones, aquæ injectos fundum petiisse. Ratio hujus observationis in proclivi est: in suffocatis scilicet, ob interclusum spiritum, sanguis ex uno ventriculo non potest transferri ad alterum; sed in pulmone congeritur, vascula numerosa farcit, coagulatur, & præternaturalem gravitatem visceri huic conciliat. Medici itaque, qui sectioni oræest, officium est, ut pulmonum corpus probe perlustret, & dispiciat, an vasa sanguine crasso sint facta, quod in embryone non accidit.

*Observatio XII.*

Non dantur pharmaca, simpliciter & absolute natura sua talia, quæ abortum procurant, sive foetus immaturum utero expellunt.

*Scholion.*

Abortiva pharmaca per se & sua natura talia, quæ si non in omnibus gravidis; tamen in plerisque foetus expellunt, ut purgans alvina stercorea, emeticum saburram e ventriculo & duodeno,

diuretica urinam, sudorifera sudorem, plane negamus. Creditur hoc quidem vulgo & etiam a quibusdam medicis perhibetur; uti jam olim ab HIPPOCRATE, DIOSCORIDE & PLINIO factum fuisse, literarum monumenta docent. Passim etiam hoc nomine nota sunt varia pharmaca, maximeque sabina, ejus extractum & oleum, oleum terebinthinæ, balsamus sulphuris terebinthinatus, baccæ lauri, myrrha, crocus, elixir proprietatis Paracelsi, nec non purgantia acriora & emetica, item sanguinis missiones iteratæ, & tertio præsertim & quarto mense institutæ. Neque negandum, ab his in copia usurpatis, proritatum quandoque fuisse abortum. Sed quod hoc non semper; sed raro & sub certa tantum corporis dispositione cooperante contingat, asserimus. Observarunt jam celeberrimi medici, ROLFINKIUS, LUDOVICI & B. WEDELIUS, multas vomitoriis, purgantibus, emmenagogis validioribus, nec non venæsectione usas; foetus nihilominus legitimo partus tempore sanum ac vegetum exclusisse. Quot sunt feminae, quæ secundo vel tertio mense perpetuam vomitionem experiuntur; neque tamen abortiunt? De venæsectione tertio mense instituta perhibet HIPPOCRATES, quod abortum cieat: sed multas novi feminas, semper abortientes, nisi venæsectionem sub graviditate bis vel ter instituant. Abortus potius per convulsivum uteri motum succedit, nec unquam accidit, nisi hæmorrhagia ex ruptis in utero vasis præcesserit. Quare, nisi talis in utero adsit dispositio, ut fibræ ipsius ad concipiendos convulsivos motus sint aptæ, & vasa a stagnante & infarcto sanguine facile perrumpantur, abortus fit nullus. Si vero vicissim adest hæc ad abortum dispositio; is levi causa, per impensiolem corporis & animi commotionem, per oneris gestationem, lapsum in terram, usum medicamenti spirituosius exstuantis, per morbum, præsertim febrem, sine causa alia manifesta, inducitur; tanto autem facilius, si purgans, aut emmenagogum validius fuerit assum.



assumptum. Quin impotentiam hanc pharmacorum foetum expellendi conspectius arguit, quod ne quidem ejusmodi medicamenta sint, quæ menses certo cieant, aut quacunque alia corporis ex parte sanguinem emoveant, nisi intrinseca quædam adsit dispositio atque proclivitas. Atque adeo, quum abortus sine hæmorrhagia contingere nequeat; hanc autem in omnibus proritare non liceat; abortum etiam indiscretim provocari non posse, patet. Divinæ potius sapientiæ ac providentiæ tribuendum, quod non absoluta ejusmodi facultas & efficacia medicamenti indita, qua cædes innumeras, & infanticidia plurima patraturi fuissent homines improbi atque perversi. Posset quidem nostro huic asserto contrarium videri HIPPOCRATIS in *jurejurando* præceptum: ut medici a pennis vulvæ subdititiis abortivis caveant. Verum nec HIPPOCRATES descripsit, nec nostro hoc tempore nota sunt medicamenta, quæ sine inflammatione & erosione id præstare possent. Atque etiam credibile est, in Græcia & calidioribus regionibus, feminas fuisse teneriores & ad abortum magis proclives; in nostris autem robustiores esse, minusque exquisiti sensus. Notent autem hætenus allata Jureconsulti ac Judices, qui secundum legum criminalium rigorem, abactionem partus vitalis studio patrata, infanticidium censent, eodemque modo utrumque delictum puniendum esse putant, quum licet animus malignus non abfuerit, ipsa etiam corporis natura, & morbosa dispositio ad effectum obtinendum plus contulerit, quam medicamentum ipsum. Teneant quoque in eodem hoc negotio, partum vitalem a medicis tantum haberi illum, qui vivus extra uterum aeris & alimentorum usu potest durare; non vero embryonem quinque aut sex mensium, cujus partes nondum eam firmitudinem & perfectionem adeptæ, quæ ad circulationem humorum, sive vitam sustinendam, sunt necessariæ. Si vero vita eo sensu accipienda, ut denotet illum cordis sanguinisque motum, quo foetus in utero nutritur & augefcit; pri-

mo hic statim mense adest. Quod si per abortum ejicitur foetus, an possit pro infanticidio haberi; nos quidem juris naturalis doctoribus determinandum relinquimus.

### Observatio XIII.

Medicamina quæ feminis sterilitatem; aut viris impotentiam conciliare apta sint, in rerum natura non existunt.

### Scholion.

Vulgaris, sed falsa est opinio, dari in rerum natura nonnulla, quæ generationem in utroque sexu impedire possint, seminis virilis vim extinguendo, & conceptionem feminæ impediendo. Veteres jam naturæ consulti DIOSCORIDES, PLINIUS, PAULUS AEGINETA, nec non SCHOLASALERNITANA, tribuerunt ejusmodi virtutem rutæ, agno perperam casto dicto, (quum *ἀγνος* jam donet castum,) nec non camphoræ. Sed hæc inter fabulas veterum, solida & rationali physices scientia destitutorum sunt referenda. Saluberrima potius & præstantissima esse hæc variis in morbis remedia, nec unquam hunc ab ipsis observatum esse effectum, per experientiam constat. Multo minus autem veritati respondet, quod de camphora circumfertur, quasi odore impotentiam conciliet; quum TACKENIUS fidem faciat, Venetiis pharmacopœum sublimasse camphoram; ipsius tamen uxorem præter morem crebrius peperisse. Neque etiam ullis medicamentis castitas; sed animi continentia & objectorum declinatione obtineri potest, quæ sensus movere & ad libidinosos actus pellicere apta est. Nec a contrario argumentari licet; quum medicamina venerem excitantia & semen augentia prostent; ea propter etiam dari, quæ venerem extinguunt & semen minuant. Illa enim, uti vinum generosum, decoctum succoladæ, piper, ostreæ, radix ninsi, satyrionis, ita sunt comparata, ut partim copiosum & spirituosum chylum, ex quo postea, semen uberius & vividius, ingignant, partim etiam seminales vesiculas & partes geni-



genitales stimulent, ex quo coeundi cupiditas oritur. De his autem, licet non negandum sit, sine cerere & baccho, veteri disterio, frigere venerem, & esse nonnulla, ut nitrosa, acida, & refrigerantia, quæ sanguinis intestinum motum & chyli proventum minuendo, veneris stimulos obtundunt; longe tamen alia ratio esse debet eorum mediorum, quæ viris impotentiam & feminis sterilitatem afferre possunt. Ad hoc enim obtinendum non sufficit, ut seminis proventus minuat, sed ut penitus per ea tollatur, quæ aut seminalia vasa cum testiculis prorsus constringunt, & paralytica resolutione afficiunt, & in feminis, ut non modo sanguinis orgasmus sedetur, sed & ejus effluxus ad ovaria & uterum prorsus intercipiatur. Hujus virtutis media existere, merito negatur, nisi forsam sint venena, quæ tamen non tantum generandi potentiam, verum etiam totius corporis integritatem labefactant & destruunt, idque morbis obnoxium reddunt, in quibus semper languet venus.

*Observatio XIV.*

Multa pro venenis habita, talia non sunt, & multa venenata non æstimantur, quæ tamen sunt.

*Scholion.*

Si relicta DIOSCORIDIS & PLINII monumenta evolvimus, plura in venenorum classem relata esse offendimus, quæ virulentam naturam non habent. Sic communiter toxicis annumerantur sanguis tauri, calx viva, vitriolum, antimonium crudum, auripigmentum, argentum vivum, nec non a quibusdam adamantis & vitri pulvis; quæ tamen sine noxa assumi possunt. Mercurius quippe currens non modo innoxie, vel ad libram, ingerendus, sed & præstabilis est virtutis adversus truculentum passionis iliacæ malum, ut per ipsam constet experientiam. Antimonium crudum ad sanguinem repurgandum, sudorem movendum, & arthriticos atque rheumaticos dolores abigendos, tam in pulvere, quam decocto oblatum, spectatæ virtutis est remedium. Sed quando ignem

experitur, eoque sulphurea pars aufugit, & metallica mercurialis, in regulum & vitrum abiens, remanet; tum demum virulentam & emeticam facultatem nanciscitur. Calx viva ex aqua decocta, optimum præbet tam internum, quam externum remedium. Pulverem adamantis eodem modo intestinorum tunicas, ac vitrum discindere, eaque propter necare, sapit fabulam. Auripigmentum, quod veteres dixere arsenicum, hodiernum a quibusdam perperam habetur pro arsenico flavo, quod ex cobalto & sulphure conficitur, quum hoc sit artificiale, illud nativum. Falso etiam hoc auripigmentum venenum censetur lethiferum, quum experientia doceat, illud innoxie ab animantibus & hominibus deglutiri posse: quod potius similis fere naturæ & crasseos cum antimonio crudo est, ipsiusque mineralis drastica portio ita particulis sulphureis ligata est ac involuta, ut fibras nerveas minus arrodere & lancinare queat: certum enim est, pingua, sulphurea, & oleosa, intimius venenis, etiam corrosivis, mixta, deleteriam eorum vim prorsus cicurare. Summum illud venenum arsenicum, si cum æquali portione sulphuris vivi miscetur, ambo igne liquata abeunt in massam rubicundam, eoque adeo venenata virtute orbatur, ut cani sine damno possit offerri. Neque minus error est, fontes veneno posse infici & venenatos reddi. Creditum id fuit, imperante *Carolo. IV.* quum pestis sæviret mirifice, & imputatum est Judæis, quod fontes intoxicarint, qui ea propter Germania expulsi & in deserta relegati sunt. Sed physicarum, chymicarum, & medicarum rerum gnarus, rerumque corporearum vires callens, ultro fatebitur, nec in rerum natura dari, nec per artificium ejusmodi res parari posse, quæ hunc præstent effectum. Falsissima etiam est traditio, tam penetrans & subtile venenum confici posse per artem, quod chartæ illitum, epistola huic inscripta resignata, legentem illico interficiat. Quod antiquissimis temporibus usuale fuit venenum, est

cicuta



cicuta, ejusque succus inspissatus; ac nostro tempore in veneficiis plerumque adhibetur arsenicum: quod, quia insipidum, clanculum potest ingeri; quum sublimatus mercurius corrosivæ sit virtutis, eaque propter non commode occultandus. Deinceps sunt in rerum natura nonnulla, quæ quidem plerumque venena esse non putantur; sed tamen vim necandi habent præsentissimam. Horum in numero est maxime carbonum vivorum fumus, qui in loco humiliori conclusus, syncope, suffocatione, & apoplexia brevi, licet ratione ferre insensibili, necat. Confirmata est deleteria hæc vis innumeris fere exemplis, incognitam vero etiam celebris esse medicis, testatum fecit tragicus ille casus, qui Jenæ nostra memoria accidit, de quo meum de *vapore carbonum vivorum nocentissimo* schediasma, nec non in *Tomo II. Medic. rat. system.* hoc de argumento exposita legi possunt. Eundem venenatorum, licet plerumque esse non credantur, censum subeunt, saturnina, saturnus ipse, ipsius fumus, lythargyrium, minium & cerussa. Quamvis enim non cito & in minori dosi interficiunt; lenti tamen veneni vim habent, & aliquoties data, certam adducunt mortem. Graves illi & atroces morbi, convulsiva colica, paralytis & asthma convulsivum, quibus metallurgi gravissime excruciantur, non aliam habent causam, quam fumum saturni cum aere haustum. Is enim non modo in pulmones descendit, eosdemque stringendo & exsiccando respirationi facit ineptos, sed & in ventriculum defertur, ibique cum acido primarum viarum permixtus, facultatem contrahit infestam, nervosas fibras & tunicas cum minimis vasculis constringentem, quæ graves morbos, ipsamque tandem mortem inducit, uti primus solide evicit STOCKHAUSEN de *noxio lithargyrii fumo*. Sunt quidem ex medicis nonnulli nocentissimæ in saturno virtutis ignari, qui ad cohibendum seminis stillicidium, ipsum quoque hæcticum calorem, præparatum ex hoc metallo saccharum & antiphthi-

cam Grammanni tincturam laudant: Sed peritiores observarunt, inde alvum valide fuisse adstrictam, & colicam convulsivam cum atrophia inductam, eaque propter usus horum jam fere penitus exolevit. Ex omnibus autem hætenus allatis, id teneant medici: ut circumspecti in ferendo de veneficiis sint iudicio.

#### Observatio XV.

Arsenici validissimi specificum antidotum res simplicissimæ, pingua nempe & oleosa, cum lacticiiniis, sufficienti copia data.

#### Scholion.

Observatio hæc per ipsam experientiam est certissima. Ponamus vero, porrexisset malitiosum hominem cuidam cum alimentis arsenicum; licet non sufficiente ad necandum dosi; sed incipiente cum doloribus ventris & nausea veneni operatione, poenitentia duci, ad medicum currere, veneficium manifestare & impense rogare, ut suppetias ferat: medicum autem minus peritum ad exturbandum e stomacho venenum præbere emeticum stibiatum, eoque spasmus ventriculi & veneni vim intendere, toxicatum tandem stomachi inflammatione & sphacelatione sic perire: quo in casu mors non tam veneno, quam medici ignorantia tribuenda. Tum enim opportune adhuc deleterius effectus per certissimum oleosorum antidotum potuisset præscindi; sed artifex ignarus vomitorio vim veneni adauxit potius, quin dubium omnino est, annon forsitan sola natura veneni parce oblatis vim superasset, si non datum fuisset emeticum. Est igitur dignum meditatione Ictorum argumentum, quo cum certa demonstratione ex æquo decernant: an, & quali poena, tam medicus quam veneficus, afficiendus?

#### Observatio XVI.

Pharmaca amorem conciliantia non dantur certa,

#### Scholion.

Vetus, sed erronea, in civili quoque Jure obvia, est opinio, dari philtrea, sive pocula amatoria, quæ etiam venenis a qui-



a quibusdam annumerantur, & prisca Poeta effato;

*Noceat animis vimque furoris habent.*

Hujus virtutis varia a RODERICO a CASTRO in *Med. polit. pag. 218.* nec non a SYLSTR. RATTRAJ in *adit. ad sympatb. rer.* recensentur, inter quæ potiora semen virile, sanguis menstruus, cerebrum felis, item pulli asinini, virga lupi, scincus marinus, spuma in equarum inguine ex sudore generata: verum hæc omnia non sunt venena, neque etiam ullo modo odium, vel amorem conciliare possunt. Nec in levi habendum hoc creatoris beneficium, quo res deficiunt, quarum abusus maximus & damna forent gravissima: Efficacissimum philtum amabile objectum, quo adeo sæpe abripitur phantasia, ut amor sequatur plane insanus. Mirum certe, a solo aspectu, aut tantum concepta animo imagine femellæ venustæ, illico genitales partes sanguine & succis copiose affluentibus irrigari & quasi animari. Quæ phantasie vis utique tanta est, quanta in medicamento nullo est ad ciendos venereos stimulos. Non quidem negandum est, gloriari nonnumquam improbos homines, quod per media naturalia amorem procurare queant. Sed sublesta eorum fides, & dubitandum merito, quod unquam id effecerint, ac nonnisi ubi jam in cerebro dispositio quædam, & occultus quidam amor in animo delituerit. Belladonnæ etiam philtis conficiendis servire ferunt, quæ quia solani species, venenum omnino est narcoticum, animum obnubilans ac phantasiam pervertens. Unde, si forsan phantasie jam inhæret amoris idea, in insanum amorem, & præsertim in feminis mobilioris phantasie, furorem uterinum eandem erumpere, veri est simile, & facinus hoc gravi poena dignissimum. Semper tamen necessarium est, ut a judice, qui inquisitioni veritatis præest, omnia investigentur cum cura, priusquam firmum quid statuatur.

DISSERTATIO VI.

DE METALLURGIA MORBIFERA.

§. I.

**C**Orpus nostrum a fluido, qui sanguinem tam motu centrali, quam in lineam abeunte jugiter exagitat, sicque vitam tuetur & conservat, motore regi, nemo physiologorum ibit inficias: huius motoris resectorium unice ex aere, qui catholicum fluidorum omnium seminarium, & astralium corporum vehiculum est, petendum esse existimo: hinc fluidi istius aerii ad vitam instaurandam & servandam tanta est necessitas, ut homo & quicquid est animantium, sine ejus usura vix momentum vivere possit. Quocirca aer quo purior, sincerior, inque singula momenta recens est, & ad vitam & sanitatem aptior est; & contra quo impurior, quoque magis inquinatus ac inveteratus, eo magis ad vitam & sanitatem labefactandam facit.

2. Unanimes autem physicorum consensu, varioque experimento constat, aerem ex duplici conflatum esse substantia, una tenuiori subtilissima, veteribus astrali & ætherea dicta, altera crassioraque, variisque particulis salino-sulphureis referta. Ætherea mobilior & activior quasi menstrui universalis est, quod in solidum assidue agit, illudque penetrando atterit, dividit, & secum, menstruorum more, in poros suos recipit. Menstrualem hanc vim luculenter illa, in nostro aere atmosphærico contenta, manifestant, quæ omnia ex solido & crassiori fluido suum petunt principium. Humiditas ejus ad oculum patet partim ex augmento & deliquio salium fixorum ad extremum calcinatorum, partim & acidi fortiter concentrati e. g. butyri, antimonii, olei vitrioli, & quæ hujus generis sunt alia. Salsuginem in aere marino præter alia & scorbutus, genuina salis proles, illis familiaris, qui tali fruuntur aere, simul & rubigo metallorum abunde testantur. Mirabile est, quod JOSEPH a COS-



**COSTA** *Hist. Ind. occident. lib. 3. c. 9.* refert, metalla eo usque ab aere falso fuisse corrupta, ut inter digitos compressa scæni instar torrefacti dissoluta ac contrita fuerint. Circa Narbonensis Galliæ littora salem candidum & lapidum arborum foliis & graminibus insidere auctor est **DUHAMEL** *lib. de consensu vet. & nov. philos. p. m. 742.* Nitrum, alumen, vitriolum, nec non sal commune denuo progerminare, internis horum salium penitus exhaustis & quasi mortuis, ex solo aere, si huic satis diu fuerint exposita, quotidiana experientia confirmatum constat. Præter salia & bituminosa sulphurea aer vehit corpuscula. **FRANCISCUS FERDINANDUS** *de TROILO in itinerat. orientali p. 30. 31.* refert, in mari sic dicto mortuo se observasse ab ipso crassum, densum ac nigrum vaporem, propter bituminis copiam ibi contentam in altum ascendisse.

3. Majorem admirationem excitat, quod etiam compacta firma & densa corpora, ipsaque metalla *avædōmīkōis* & effluvia de se emittant, quæ fluidissimo aere recepta mirabilem sæpe efficaciam & effectus, ad oclusas olim qualitates damnatos, in illo exercent. Miramur imprimis, quod **Cel. BORRICHIUS** *in Act. Hafniens. de negotiatoribus Indicis*, qui sine lapide lydio, sine lancibus, sine mordacibus aquis, solo nummorum ad nares admotu de præstantia eorundem statim judicare potuerant. Sulphur vulgare nec non antimonii, in substantiam fluidissimam in auras diffusibilem converti & facessere, eleganti spiritus fumantis experimento, qui argentum etiam cistis ligneis inclusum fusco colore inducit, comprobatur. Hujus spiritus efficaciam porro mirabilem reddit ejus penetrantia, dum litteras certo liquore scriptas & centum chartis tectas nigricante colore tingit, ut atramento sympathetico vix detur præstantius. Plurima exempla de cælo lapsum non exigui ponderis aeris aut ferri corporum adfert **JOH. AMOS COMENIUS** *Synops. physic. ad lumen*

*divinum reformat. p. 113.* Nec mirum hoc illi esse debet, qui metalla fixissima omnem vim ignis eludentia considerat, partim impetu menstruorum volatilitari; partim ignis vehementia in auras propelli posse, ipsa consentiente experientia. Aurum certo menstruo solutum & crebriori cohobatione sic subtilisatum totum in auras avolare sæpe observavi, & **BOYLE**, philosophiæ mechanicæ præstantissimus instaurator *Tract. nov. experiment. physico-mechan. exper 22.* scribit, se sal quoddam subtilissimum & volatile possidere, quod solidum auri corpus in magna copia sub exhalationum forma evehat. Argentum aqua forti solutum & postmodum falsa aqua præcipitatum infusione semper de pondere aliquid amittit. Sub fusione metallorum intensissimo igne facta, portionem argenti simul in caminos avolare fuligo testatur, cujus collectæ, observantibus expertissimis Cheruscorum metallurgis, centenarius sæpius uncam unciam & ultra argenti adhuc largitur.

4. Ex his jam adductis plane intelligi posse existimo, aerem corpora nostra ambientem, & qui intro subit vitalia, & respiratione ad ipsos pulmones ducitur, vectorem esse variarum exhalationum & diversissimorum corpusculorum, quæ pro diversitate illorum varie corpus nostrum adficere, illius humores præter naturam depravare & immutare possunt: id quod jam satis suo damno miseri illi homines experiuntur, qui metallorum ac mineralium effossioni, fusioni, separationi, variæque tractationi intervium. Hi sane ab effluviis aeris nocivis durissimos patiuntur morbos, sævissimaque symptomata rarissime in alterius generis hominibus observanda. Bis enim metallurgi patiuntur morbos, nimirum ut alii homines, & ut sunt metallurgi; familiares utpote & sibi proprios habent morbos, a mineralium seu metallorum, quæ continuo versant ac agitant, effluviis maximam in partem derivandos. Et quoniam in medicorum scholis minus illi hæctenus fuerint tractati, quinimo plures medicorum de illis



illis nec quicquam audiverint, vel in illorum tradenda explicatione mirum fuerint, hallucinati excepto STOCKHUSIO qui solus ferme *de fumo litbargyril* noxio solidi quid litteris prodidit; hinc in præsentiarum paullo penitius morbos metallicos quasi proprios tractare, illorum causas accuratius evolvere, & elegantiores observationes, & curandi modum sollicitè annectere institui.

5. Antequam autem in horum morborum genesin & differentes illorum causas specialius indagandas descendam, primum operæ pretium erit dispicere, qua ratione aer ambiens variis particulis heterogeneis confertus, corpus nostrum subire, ejusque humores attingere queat. Et primo hic notari velim, me minus illorum sententiæ adsentiri, qui censent aerem nostrum atmosphæricum densis sæpius effluviis stipatum, immediate cum sanguine communicare. Contrarium qui tuentur, non levium rationum momentis instructi sunt; dum vias in pulmonibus satis esse patulas putant, quibus aer ipsum sanguinem adire possit, cum per easdem etiam, per quas a sanguine secernendi vapores transeunt, aer ingredi possit. Dein suam assertionem experimento *Malacbiæ Thrustonis* Angli evincere student, utpote qui per arteriam pulmonalem animalis siphone liquorem injecit, quem partim per venam redire, partim per tracheam cum spuma erumperè observavit; quo ipso vias se tetigisse arbitrantur, quibus aer intra pulmones substantialiter sanguini admisceri possit. Verum enim vero quod primum concernit, numquam probari poterit, humidum & vaporosum, quod aer in expirationis negotio secum vehit, immediate ex massa sanguinea fluere; sed potius tunicarum glandulosarum beneficio, quibus bronchia vestiuntur, illud absorberi ac imbibi, & sic in aerem recipi vero videtur simillimum. Ad alterum moneo, a violenta illa liquoris in pulmones infusione ad statum naturalem non concludendum esse, & si viæ & meatus ex trachea in venas pul-

monales patentesset, sequeretur, quod infusus liquor per tracheam & venam pulmonalem redire deberet; quod tamen minus fieri videmus.

6. Magis tamen illorum mihi arridet sententia, qui statuunt, subtiliorem aeris portionem, cui vis elastica simulque ætherea inest, tantum per vesicularem substantiam transcolari, & sanguini intimari; non autem densiorem & crassiorem aeris substantiam, quæ magnas turbas, & irregulares in humoribus vitalibus motus, & illorum mixturam destruendo concitare queat. Et ab hoc subtiliori aere coccineus sanguinis color, qui in pulmonibus & cordis sinistro sinu demum apparet, unice petendus est; quoniam ante aeris appulsionem satis attritus & crassus existit. Præterea continua effluviarum per cœca cutis foramina a sanguinis & humorum massa separatio, nec non notabilis quorundam animalium post mortem in vitro ab aere vacuo existentium inclusorum tumescencia sufficienter aeris expansivam elasticam vim humoribus insidentem produnt. Interim tamen non negabo, longe subtilissima effluvia cum aere vecta, & naribus simul attracta fluido in nervis contento motum imprimere, varique illud alterare posse. Quantam in excitandis syncopticis, in pathematibus sævissimis hysterics producendis odorifera habeant efficaciam, quotidianæ testantur observationes. Pulchre scribit HELMONTIUS in tract. qui *Imago fermenti* p. 92. inscribitur: odore delectari spiritus, eo quod odor immediate attingat & illos penetret: sunt enim odores, qui pestem, dolores capitis, & vomitus movent; suntque odores suffocantes convulsivi & infatuantes; sunt & alii, qui simili modo eadem sanant aut saltem mitigant. Aer effluviis narcoticis refertus quantum nervis noceat, & spirituum animalium motum intercipiat, passim loquuntur historici. A sola candelæ sebaceæ extinctione, abortum, uteri suffocationem, epilepsiam, & mortem ipsam AMMANIUS in medic. critica cas. 59. annotavit. Et



tandem fumi mercuriales, quod ipsius aeris beneficio angustissimis nervorum porulis sese adfocient, & fluidum in ipsis contentum mirum exagitent, fusius infra docebo.

7. Ex hisce jam adductis satis apparere arbitror, effluvia peregrina subtilissima, quamvis non sanguini immediate communicentur; nervos tamen occupare, ibique perniciosam suam vim satis eminenter exercere posse. Deinceps exhalationes salinæ sulphuræ & mercuriales, & quæ hujus sunt generis aliæ cum aere vectæ, dum pulmones in inspirationis actu intro subeunt, in caver-nulis pulmonum vesiculosi facile hæ-re possunt, quas corro-dunt, exulcerant, & resolvunt. Ex omnibus enim pul-mones labem patiuntur principaliter ab æ-re variis effluviis inquinato, uti hoc infra morbi metallici clarum facient, quorum plerumque in pulmonibus initia sunt. Porro & aer circumfusus, depravatis effluviis qualitatibus refer-tus in cutim ejusque poros ac spiracula magnum jus habet; imò illos subiens succis vitalibus noxam affricare & dam-num adferre valet: quare sudores illo-rum, qui in calchanti mineris labo-rant, corrosivi, linteamina exedentes observati fuerunt; de quo infra plura dicemus.

8. Tandem effluvia mineralium & me-tallorum in aere soluta deglutitione ma-ximam partem subeunt, ventriculo & intestinis intrinsece communicantur. Aerem ad os continuo appellere, & ibi salivalem laticem morantem afficere nullum amplius erit dubium. Spuma, quæ sæpius in morbis, ubi respiratio adaucta vel citatior facta apparet, nil nisi saliva est crebriori aeris appulsu sic agitata & conquassata in minimas bul-lulas, quæ ab omni latere lucis radios reflectentes niveum colorem efficiunt. Quanta aeris copia in saliva sit recon-dita, ejus intentia in vitro testatur ebul-litio; si aer ope antliæ evacuatur, quod phænomenon ad solum aeris ex po-ris salivæ egressum referendum est. Quam itaque ipse substantiali salivæ

sese immisceat, & cum ipso ad ventri-culi & intestinorum canalem feratur, facile consequitur, effluvia varia hete-rogenea in aere contenta eodem modo ad corporis interiora descendere. Sa-livæ vehiculo miasma pestiferum ad primas vias ferri, inter alia, quæ ibi gignuntur, horrenda symptomata, car-dialgiæ syncopticæ, nausea, inflamma-tio sphacelosa testantur. Quocirca pru-dens nonnullorum medicorum est con-silium, in subjectis, vel contagiosis lo-cis nunquam deglutire salivam; sed continuo illam excernere, quo infectio avertatur. Deinde nemo non fatebitur, ipsum aerem pondere suo intrare, & ven-triculi & intestinorum cavitatem reple-re, cujus præsentiam sufficienter & ru-ctus & flatus magna vi nonnunquam prorumpentes comprobant. Tandem vero videtur simile, effluvia aeris ope ad ventriculum adducta non tantum ibi manere; sed etiam interiora & mas-sam sanguinis irrepere KERCKRING in observ. p. 58. de rustico fistula labo-rante in humero narrat, qui quoties cepas ore masticavit, statim illarum odorem per fistulam quoque percepit. Omne enim quod subtile est, corpus nostrum transpirabile facile penetrat & pervolat. Sicque veneni in forma solidi adsumti vis extremas etiam cor-poris partes pertingere ibique tyranni-dem exercere valet; multo magis id efficiet, si illud in partes tenuissimas fluidas resolutum est.

9. Ex hætenus dictis clarissime ap-parere arbitror, effluvia, quibus aer repletus est, variis modis ac viis patu-lis ad corporis penetralia intime cum succis corporis nostri sese miscere, & partim fluidas, partim solidas partes præter naturam adficere: quod ipsum jam sufficientissime historia morborum metallurgicorum, quorum genesis & causæ ex mineralium noxiis effluviis foras intro haustis petendæ sunt. Cum autem mineralium classes diversissimæ sint; hinc etiam diversam ipsæ exha-lationes sortiuntur naturam: siquidem unum minerale præ altero magis vel minus



minus fixum est seu volatile; unum præ altero corpori magis est infensum: quocirca pro diversitate exhalationum varia propullulant mala & morbi. De-  
 mum observamus diverso tempore metallicolis contingere ipsa mala atque incommoda; alii labem sibi contrahunt in puteis & fodinis, dum ipsa eruunt metalla; alii extra illas, dum præparant, cremant, excoquunt vel separant. Primo loco placet mihi, illos in morbos inquirere, qui originem suam ex effluviis & exhalationibus tam copiosis, quam pravis trahunt, quæ intra loca subterranea suboriuntur & elewantur. Statuo nimirum, uti per totam mundi fabricam & omnium animantium corpora, sic quoque per subterranea loca diffusum esse æthereum quendam & tenuissimum spiritum, aerem communem subtilitate longe superantem, qui tam quantitate notabili, quam rapidissimo motu omnes subterraneas regiones subbeat & penetret, nec non vivifica & seminali quadam vi instructus, terras lapidesque impregnet, inque varias metallorum & mineralium species transmutet. Extra dubium enim est, naturam semper in productione corporum a fluido ad solidum procedere: quare & metalla eodem modo ex fluida quadam substantia generari haud improbabile videtur.

10. Consentiant in hoc omnes veteres, & qui de metallorum solidi quid prodidere, statuētes: primam metallorum materiam fluidum esse quoddam unctuosum subtile, quod consistentiam seu coagulationem in aqua, non in lapidibus & argilla acquirat: quare hæc pro principio vaporum metallicorum fixativo habebetur. Et hæc jam est ratio, cur metalla illa, quæ intra aquam crescant longe meliora existant, quam quæ extra aquam superiori versus terram superficie posita sunt. Spiritum hunc ad naturam sulphuream acidam accedere multis ex argumentis colligere licet. Veteres chymicorum unanimiter crediderunt sulphur metallorum primum esse principium, eo quod assiduus illorum & mineralium

comes sit. Omnes ferme mineræ e venis erutæ sulphur olent, & igni aperto commissæ stagma fundunt acidum, non secus ac sulphur in libero aere accensum. Præterea magna sulphureorum fumorum apparentium copia, vel in mineris vel extra illas evidens venarum distissimarum latentium habetur indicium. Accidit sæpe, ut in locis sylvæ Hercyniæ de nocte flammulæ sulphuræ salientes circa terræ superficiem vagantes cernantur, procul dubio a metallorum effluviis sulphureis subterraneo calore in copia exhalantibus, & ex ipsa tellure sursum elevatis KIRCHERUS in *Mundo subterraneo lib. X. sect. 3. refert*, in fodina Hungarica quadam tantam exhalationum sulphurearum esse copiam, ut facillime ab accenso lumine maximo cum fragore & ambustione operariorum, possint incendi, adeo, ut cutis facillime possit detrahi, ac si aqua fervente sit adusta. Simile contigit quoque aliquando Clausthali dum fossiores locum pro relicto a veteribus habitum aperire volebant: ecce magno cum impetu aqua sulphurei odoris erumpit, quæ in momento a flamma lampadum forsan accensa, vestes ipsamque cutim mirum quantum amburebat, ut vix medicamentis præsentissimis ambusta restitui potuerint. Sulphur principium fluidum per totum terræ ambitum circulatur, perque omnes mineras, me iudice, dispersum est, a quo non immerito caloris subterranei effectus mirabiles, montium deflagrationes, & terræ incredibiles motus duci ac derivari possunt.

11. Menstruum itaque subterraneum seu solvens universale ætherum statuo, quod potenter dividendo, subtilizando, resolvendo terras præparat, imprægnat, inque metalla vertit, nec non ipsa confecta non raro iterum destruit. Non infrequens enim est, venas metallis refertissimas, solvente hoc subterraneo, metallo suo defraudari, uti id matrices conglomeratæ ab apibus vel exsuctæ, nec non mineræ varii generis in calcem effoetam redactæ testantur, quibus visis, sero sese accessisse, protinus



nus ipsi fossores conquerantur. Hoc acido solvente sæpius durissimos lapides montanos, exesos & in calcem cretaceam redactos cernere licet. Tandem menstruum hoc subterraneum sulphuræ acidæ esse naturæ, liquidissime mineralium quarumvis præparationes patefaciunt; dum illæ alcalinis salibus fixis sulphur & acidum absorbentibus, institui debent, quo fundi & purior metalli portio ab inutili sequestrari debet.

12. Solvens itaque hoc subterraneum sulphureum subtilissimum, rapidissimo suo vivifico motu continuo agit in ipsas telluris & mineralium partes, illas attrahit in altum secum evehit: unde non mirum est effluvia tam sulphurea, quam metallica ipsis in fodinis & puteis esse copiosissima. Quodsi enim sola ignis vehementia & salinorum menstruorum activitate fixiores metallorum particule in auras propelli possunt; multo magis ope caloris & menstrui subterranei longe activissimi id fieri potuit. Ab his dictis itaque in fodinis surgentibus mineralium metallorumque sulphureis exhalationibus miseri ii operarii pessima incurrunt mala, inter quæ præcipua est respirandi difficultas & suffocatio. Sæpius reperiuntur in antris suffocati & extincti citra quandam interiorem læsionem, nisi quod extrinsecus tota fere cutis cœruleo colore tincta sit; quod phænomenon illis, qui suffocatione, nec non convulsione pereunt, familiare est. Notum est ab aere nimis denso & crasso, item a fumo carbonum, seu vaporibus in fermentatione musti vel cerevisiæ elevatis suffocari & extinguere animalia, testantibus id *Marcello Donato Histor. medic. mirab. c. 6. lip. 1. & Platero observ. lib. 1. p. 16. 17. ut & Mercuriali de venenis l. cap. 13.* Multo magis id accidit si in fodinis subterraneis majori copia effluviis sulphureorum aer confertus est; hinc artifices in iis laborantes vehementi angustia pressi prope suffocantur, altoque & suspirioso spiritu aërem ducere contendunt. Adfectus hic

perperam a venosa miasmatum qualitate semper deducitur, utpote qui magis copiarum effluviis adscribendus est: ex commotis enim a fossoribus mineris, spissæ mineralium particularum nubes elevatae totum foveæ replent spatium, & posita cujusvis materiæ impenetrabilitate, materiam aeris subtilem respirationi aptam expellunt, sicque loco laudabili aeris effluvia sulphurea metallica inspiratione intenuissimas vesiculas pulmonales illabuntur, quæ spirandi angustia inferunt. Sanguis sic particulis subtilissimis suis elasticis orbatus, minus rarefactioni, expansioni seu spiritus vitalis sufficit: hinc cor languidius pulsatur, vires convelluntur, & retardato tandem vel penitus cessante humorum circuitu, tota corporis machina labefactatur, vel penitus corrumpitur. Notum est, ipsas gallinas, & volucres loco angustiori stricte occlusas, vel etiam vaporis sulphureo accenso admotas facillime suffocari posse; quod sub præparatione lactis sulphuris contigisse etiam vidi. Neapoli caverna est, ab indigenis *la Grotta del Cane* nuncupata, ex qua fumosa tenuis, sensibilis tamen emergit aura, manumque sentitur modicus calor, in hujus fundum, qui undecim pedes distat ab aëre soli, canes vel alia animalium viva immissa statim anhela in convulsivos motus, mox in spasmus, tandem, prostratis viribus, in deliquium, hiantem ore, moribunda decidunt. Quod autem hic stupendus effectus saltem densato in fundo exhalationibus sulphureis copiosissimis debeatur, solide deduxit *Bernhardus Connor dissert. de mirabili viventium interitu.* Et notabile est non tantum in crypta hujus interiori, sed etiam in antris subterraneis, ubi aer effluviis refertus est, candelam accensam statim extinguere.

13. Accedit, quod aer in puteis & fossis mirum quoque a fumo pulveris pyrii condensetur, quo saxorum durities frangi solet: quare qui huic negotio sunt destinati, ut plurimum anhelosa respiratione, nec non raucedine corripuntur, maxime dum ignis vi subtiles virulen-



virulentæ particulæ ex ipsis fossilibus exprimuntur, & cum fumo sublevantur: hinc illi asthma nec non contractura misere torqueri solent, qui Clausthali in locis angustioribus crebrius mineras pulvere pyrio diffringere student: plumbeæ enim particulæ ignis vi in altum rapiuntur, sicque eundem morbum, cui ustores, vel separatores obnoxii sunt, sibi contrahunt. Simile quid contingit etiam in illis locis, ubi igne accenso, pro diruendis faxis & mineris utuntur, qui modus veteribus fuit in usu vid.

*Agricola de re metallica lib VI.*

14. Præter copiam autem effluviorum in fossis & fodinis sulphuræ nocent illæ particulæ, quæ tenuissimas pulmonum vesiculas constringunt, dilacerant, & spiritu suo rodente valde exulcerant, sicque tussim siccam, raucedinem & taben excitant. Propter effluvia hæc sulphurea tam intra quam extra terram endemii ejusmodi in locis sunt morbi, & regionibus etiam certis proprii. Non minus autem dictis adfectibus sunt obnoxii, qui sulphuris mineras extra terram præparant, & sulphur ex iis elicere student, quod Brunsvicensis prope Goslariam maxima in copia efficiunt. Struunt ibi magnos acervos cum lignis in minimas partes discissis, & mineris sulphureis; has postmodum accendunt, sic densæ sulphuræ exhalationes graveolentes nebularum instar exsurgunt, & purissimum sulphur rubinei coloris fluidum apparet, quod tandem in inferiore locum in strias elegantissimas flaventes exstillat. Fumum qui copiose & assidue hauriunt, minus validæ sunt naturæ, vitium in pulmonibus concipiunt, tussi, aridura, anhelosa respiratione, & non raro pulmonum exulceratione, partiumque tabe corripuntur. Notabile hic est, fumum hunc sulphuris moderate naribus exceptum mirifice illis conferre, qui ex capitis dolore a levi quadam obstructione vel ebrietate laborant, dum penetrantia sua subtilissima humores stagnantes colliquat, & poros aperiendo evaporationem materię peccantis proritat.

*Opusc. Patb.*

15. Ad ipsius sulphuris naturam proxime accedit vitriolum, quod nil nisi spiritus sulphuris est coagulatus in terra vel martialis vel venerę indolis. Ex spiritu enim sulphuris & ferro elegantissimum paratur vitriolum, nec non ex ipso vitriolo spiritus sulphuris acidus summe volatilis & genuini ferri portio haberi potest, si rite operatus fueris. Abundantissime vitriolum Goslarie in monte Ramelio invenitur, ex quo per aliquot secula, ut litterarum monumentis consignatum est, illud fuit erutum. Qui id in profundissimis fodinis colligunt, nudi sine omni veste & indusio id facere debent: tam corrosivæ enim ibi sunt exhalationes, ut lintamina non secus ac vestes corrodant ac dilacerent, adeo, ut in minutissimas partes facili negotio discerpi queant: ejusmodi quoque effectum spiritus vitrioli, nec non omnes spiritus mineralium acidiedunt, qui quicquid est linthei, vel panni, vel corii erodunt & destruunt. Memorabile est, effluvia hæc calchanti caustica ipsam etiam cutem aggredi & ejus minimis porulis sese insinuare, adeo, ut corpore aqua probe utut abluto, lintamina tamen, quibus dormiunt vel sudant, a reliquiis vitriolicis in poris stabulantibus corrodantur.

16. Ratio jam in procinctu est, cur raro hi homines quadragesimum annum superent, nisi validioris sint naturæ: effluvia enim hæc caustica bronchiis & pulmonum cavis firmiter inhærescunt, dispncæam, aliis suspiriosam orthopncæam, exulcerationem, aliis ariduram & marasmm inducunt. Sic plures dira illa tabe brevi intereunt, ut inveniantur mulieres, quæ septem viris nubere possint, quod de Carpati montium incolis scribit *Agricola de re metallica lib. VI. p. 272.* Quanta vero noxa particulis calchanti insit, aqua testatur, quæ ex monte Rammelio scaturit, in qua nullus piscis vivus manere potest. Jam dudum annotavit Italus FALLOPIUS in lib. de aquis medicat. quod Ochra fluvius, qui est ad montem Ramebur rivulum scatentem e monte illo



in se recipiat, & quam primum rivulum illum receperit, statim omnes pisces necent, etiam si vix aquam istam attigerint. De vitrioli effectibus & noxia vid. Dn. TRUMPHII *scrutinium vitrioli*, quem librum Angli ob curiositatem in Acta sua referre dignati sunt.

17 His decursis jam ad mineralia majoris virulentiae accedo, quorum primum est arsenicum, cujus genuina matrix est cobaltum. Reperitur illud in propriis suis fodinis larga satis copia, vel aliis argentinis & Jovialibus sese associat mineris. Quam causticam volatilem & corpori infensissimam qualitatem ipsum arsenicum custodiat, ejus vires testantur, lethalibus infamatae exemplis, de quibus legi meretur *Helmontius Tract. de peste. Ephem. Germ. an. 9. p. 45.* HENRICUS *ab Heer obs. 16.* SALMUL. *cent. 1. obs. 10.* Et HILDANUS *obs. p. 606.* ab arsenico extrinsece saltem applicato, syncopen, delirium, vigilias, febrem & mortem observavit. TIMÆUS a GULDENKLEE *lib. 7. cas. II.* meminit pharmacopæi in præparatione dealbationis veneris occupati, qui ab ejus venenatis fumis in lipothymiam incidit, cum præcordiorum angustia, spirandi difficultate, corporis jactatione, vigiliis, gulæ ariditate conjunctam, conf. quoque hac de re. Cl. WALDSCHMIDIUS *in praxi 1080.* Sic & ego tristis casus memini, qui Lipsiæ contigit, dum in domo stannarii qui arsenicum cum cupro admisceret, ab haustis ejus venenatis fumis, plures in eadem domo habitantes, maligno morbo adfecti & mortui sunt. De pictore scribit *Sennertus prax. med. lib. VI. part. 6. c. 9.* qui aperta capsula arsenico repleta diuque conclusa in lipothymiam incidit, ut exquisitissimis alexipharmacis vix liberari potuerit. Quocirca qui in arsenico vel a cobalto separando, vel sublimando laborant, quippe ex cobalto & silicibus conficiunt smaltam vomitus, anxietates syncopticas, cardialgias, variaque patiuntur symptomata; longe autem magis id experiuntur ii, qui mineras tales legunt &

effodiunt, maxime si igne seu pulvere pyrio ad diffrigenda saxa opus habent, vel si vetustissima squalida loca aperiunt. Notabile est Kuttembergæ in Bohemia, ubi mineræ arsenicales saturninæ & cadmia metallica refertæ effodiuntur, in officinis, ubi venæ cremantur, laborantes respirationis difficultate, suffocatione, tremore artuum penitus confici, ita ut instar sceletorum vivorum appareant. Fovet arsenicum principium volatile, summe tamen causticum, quod fibrillas corporis nostri tenuissimas tam nerveas, quam musculosas subeundo, spasmos, convulsiones, contractiones dolorificas, violentas excretiones excitat & vitæ infensissimas struit insidias.

18. Alterum summe virulentum minerale, quod arsenicum vi superat, est hydragyrum: hujus effluvia nervis summe infesta & periculosa esse plures docent historiæ. Compertum est, quam gravia incommoda fabri aurarii a solius hydragryri vapore sentiant: frequentes ipsis sunt sudores frigidi, lipothymia, convulsiones, lassitudines, tremores & ptyalismus. *Fernelius* mentionem injicit aurifabri, qui bis aut ter ad summum hydragryri vapore imprudentius admissio, statim stupidus, veteranosus, ac plane mutus evasit; quæ in os indebantur, devorabat quidem; stercus tamen & urinam minime exire sentiebat, neque ad aures inclamantem audiebat. Sex exactis mensibus in febrem incidit, a qua tandem liberato cerebrum grave, torpidique sensus omnes remanserunt, mensque ex intervallis perturbata. Similem fere historiam lectu dignissimam de hydragyro noxio vapore idem annotavit auctor *lib. de luis venerea curat. 590.* Qui Venetiis in conficiendis speculis operantur, apoplexiæ maxime obnoxios esse testes sunt Acta Anglicana. Epilepsiam, aphoniam cum ptyalismo vehementi, gravissimis doloribus ab hydragryri vaporibus in muliere Gallica observavit quoque Cl. STISSERUS *specira secundum laborat. chymic.*

19. Ex hisce facile conjici potest, quam deleteria mercuriales mineræ de



se spargant miasmata, ipsis metallicis nocentissima. *Fernelius loc. cit.* dicit, horrendis nervorum pathematibus, nec non partium debilitate & tremore omnes illos corripit, quicumque argentum vivum in puteis legunt & effodiunt, vel illud in igne tractant, sicque & ore naribusque excipiunt. *FALLOPIUS de aquis medicat. p. 120.* tradit, illos qui mercurium effodiunt plumbei esse coloris, & brevi tempore in paralyfin, vel in nervorum convulsiones incidere, tandemque suffocari; ita, ut raro quadragesimum annum transeant. E contrario scribit, inter illos, qui se in aliis fodinis exercent, reperiri homines, qui vixerunt supra quadraginta annos. In fodinis Italiae pro Julio, moneta Italica, laborant integrum diem, sed non diu perseverant; nam quamquam nemo illorum maneat in fodina ultra sex horas, omnes tamen brevi fiunt paralytici & moriuntur hæctici. Vir qui spatium saltem semestri fodinis fuerat addictus, tam plenus mercurio fuit, ut si frustum auri in os suum imposeret, aut digitis suis fricaret; extemplo illud instar argentei album redderet, quasi cum ipso mercurio esset fricatum. Erat præterea adeo paralyticus, ut manibus suis ambabus vitrum ad medietatem vino repletum ori sine profusione non posset admoveere, referentibus sic *Actis Anglicanis an. 1665. mens. April. p. 18.* Iphis in fodinis Hungaricis & aurifodinis; ubi & mercurius prope Cremnitium foditur, odor virulentus contineri dicitur, qui metallicos necet, ut aurum ibi in magna quantitate reconditum effodere non audeant, recensente *Edoard. Brown in Itiner. part. V. pag. 180. 181.*

20. Duplici nimirum modo nocet lithargyrium tam partium suarum tenuitate & gravitate, quam specifica textura acida spicula detinente. Spiritu quodam metallico subtilissimo ipsum præditum esse, inter alia vis ejus firmissimam metallorum compagem dissolvens comprobatur. Hic spiritus totam corporis sphaeram pervolando & minutis-

simos poros subeundo potentissime lentum mucum dissolvit, & totam sanguinis compagem discerpit & comminuit ut elementa sanguinem constituentia ex facili relaxentur, & fugam a se invicem intendant. Præterea membranas, nervos & fibrillas tenuissimas nimis aperit, laxat, & poros magnos conformat, ut sic peregrini facile ibi decumbant, & obstructions, rheumatismi, lymphæ effusiones, ptyalismus, paralytes summæ debilitates, & nervorum tremores inde nascantur; quinimo mercurii fumus ne ossibus quidem parcit, siquidem dentes inde vacillant & ossa cariem contrahunt. Dein mercurius præter partium tenuitatem maxima pollet gravitate: est enim fluidorum omnium gravissimus, quare etiam minutissimæ ejus moleculæ, respectu aliorum fluidorum semper specie sunt graviores, unde impetu quoque & vi tam fluidi particulas, quam ipsum solidum aggreditur. Singulari tandem specifica gaudet textura, qua salium aculeos promte imbibit arteque detinet, ut sic harum unione corrosio, propter summam partium tenuitatem, augeatur, & brevi stamina fibrosa ventriculi & viscerum corrodantur, dilacerentur, vel fortiter irritentur: unde convulsiones, spasmi, hæmorrhagiæ, inflammationes, gangrænationes, excrementorum suppressiones oriuntur lethales.

21. Denique & antimoniales minere noxios quosdam vapores exhalant. Antimonium, quod ex substantia sulphurea & regulina mercuriali compositum est, non est venenum, simulac autem vinculum illud solvitur vel igne, vel variorum salium adjectione, separata a sulphuris consortio mercuriali parte, protinus drastica sese vis exserit. Pulvis reguli in substantia canibus oblatum, illas brevi necat, apparente in ventriculo nigricante macula. Fumum ejus imprudenter haustum, vomitus & purgationes excitatæ testantur *Ephem. Germ. dec. I. an. 3. obs. 31.* Illos, qui antimonii mineras versant & tractant, vomitione, ptyalismo, membrorum de-



bilitate, animi deliquio corripī certior sum factus. Quod salivæ fluxum ab antimoniali medicamento concernit, exstat hanc in rem elegans observatio in *jam citatis Ephemerid. dec. I. an. 3. obs. 270.* Incidit nimirum quidam ab adsumtis floribus antimonii in apoplexiam, qua durante, validissimus ptyalismus fuerit secutus, ita, ut per nares & os spumosi phlegmatis facile mensuram expuerit. Corpus defuncti apertum fuit, & pulmones totaque pectoris regio, stomachus, caputque materia ejusmodi plena fuere reperta: regulini enim antimonii pars magnam cum arsenico alit affinitatem. Antimonium drasticam suam virtutem a solo hoc regulo habet, & fumos emittit albicantes, metalla ipsa friabilia reddit more ipsius arsenici, ex quo arte etiam confici potest regulus. Tandem typographi ex suscepto antimoniali fumo, dum litteras suas fundunt & præparant, apoplexia sæpe, paralyfi, & ventriculi subversione tentantur.

22. Tandem ad fumum noxium ipsius plumbi examinandum accedo. Nullum ex metallis tam promte in auras ignis violentia avolat, quam ipsum plumbum: totum enim in fumum subdulcem & crassum, coloris ex albo flavescentis facescere & converti potest. Videmus hoc maxime in sylvis Hercyniis, ubi mineras saturnitas igne tractant, urunt, calcinant, fundunt & separant; quod autem nil, nisi plumbum in minutissimas particulas resolutum sit, exinde patescit, quia ex fornacibus & officinarum parietibus separatus, verissimum plumbum citra notabilis ponderis imminutionem, debita liquefactione, reddit. Fumus hic tempore nebuloso minus, & maxime circa noctem, propter insignem suam gravitatem descendit, aerem inferiorem replet, sicque per pulmones attractus, & in os cum saliva deglutitus, ubi instar sacchari saturni saporem dulcem præ se fert, abit ad ventriculum & intestina, ubi horrenda symptomata excitare solet. Præcipue autem morbum spasmodicum,

tormina summe convulsiva cum alvi pertinacissima obstructione producit, quod intolerabilis intestinorum cruciatus, ægrotantem nonnumquam rabiosæ felis circumgyrationem imitari cogat. Hisce hominibus aliquando nec standi, nec sedendi datur potestas, inquieti huc atque illuc moventur, lecto si aliquantum incubuerint, terram vicissim repetunt, unguibus eam rodunt, & immanes ventris dolores, cum sudore nonnumquam frigido & lipothymia patiuntur: quibus statim vehementissima alvi constipatio complicatur, ita, ut nihil flatuum, nec excrementorum per anum habeat exitum. Purgantia omnia irritò effectu propinantur, & sæpius malum exasperant; superveniunt cardialgiæ syncopticæ, vomitus, febres lentæ, cum siti, urinæ suppressione, & tandem, si morbus diu duraverit, accedunt etiam convulsiones musculorum, contracturæ item partium externarum, crurum ac manuum paralyfes. Morbus hic quasi proprius est Claustro hali, Zellerfeldi, nec non Hartzerothæ & ubi minere Saturninæ tractari solent, omnibus operariis, qui vel in fodinis plumbarium metallicum lapidem pulvere pyrio separant, extra fodinas illum urunt & liquefaciunt, & qui fornacibus separatoriis præsumt, vel magis adhuc illis, qui lithargyrium ponderant, a cujus copioso fumo & polline per halitum excepto mirum in modum læduntur & memoratum morbum incurrunt. Quæ dicta omnia sufficientissime demonstrant & comprobant, male horum symptomatum causam ab arsenicalibus vaporibus derivari, sed magis a solo lithargyrii fumo deglutito illam esse petendam.

23. Porro præter illa in officinis, ubi minere Saturninæ tractantur, observata phænomena, fumum lithargyrii seu plumbi proximam morbi metallici causam evincunt. Plumbum interne adsumtum perniciosam vim habere loquuntur observationes, sic *Fernelius tract. de lue venerea cap. 7.*



scribit de empirico, qui plumbi pulverem adversus arthritidem commendavit, quo ad sesqui libram adsumto, æger primum dysenteria crudeli, dein, hac cessante, ventris gravissimis rosionibus & torsionibus cum contumacissima ventris adstrictione, virium debilitate, appetitu dejecto, incendio interno, vigiliis & ictero tandem fuit correptus. Plura vid. in *Dioscoride lib. 6. cap. 27.* Deinde testatur experientia, figulos, qui in fictilibus lithargyrio incrustandis occupantur, simili fere morbo metallico infestari. Incidunt exinde in vehementissimos intestinorum dolores cum præcordiorum angustia & spirandi difficultate, membrorum tremore, contractura, articulorum debilitate, summa virium diminutione alvoque pertinacissime clausa. Maxime autem illud iis in locis fit, ubi ollis calidissimis lithargyrium agglutinant; ubi autem argilla bona est, quæ frigide lithargyrium admittit, non tanta figuli experiuntur symptomata.

24. Horum omnium recensitorum symptomatum, quæ fumus lithargyrii producit, ratio optime ex saturni singulari textura mechanica peti ac derivari potest; plumbum nimirum de mercurio multum participat: hinc etiam est gravissimum, quinimo verus mercurius vivus, beneficio variorum commixtorum salium, prævia quasi facta subtilisatione & fermentatione, ex plumbo destillari potest. Ob mercurialem hanc naturam facile in auram cedit, & vehementissimo ignis motu in minimas resolvitur partes; quæ tamen ob gravitatem suam & molem majorem non tam promte, ab ære ambiente sustentari possunt: hinc ad inferiora descendunt, & collectæ fumum flavescensem dulcis saporis constituunt, qui deglutitus ad ventriculum & intestina vehitur, & partim gravitate sua, partim tenuitate mercuriali, non tantum membranæ seu illorum tunicis adhærescit; sed etiam poros intimius tunicarum nervearum & musculosarum penetrando obstructions in iis efficit, simul fibras illas nerveas & musculosas

fortiter lancinat, irritat & rodit, ut adeo spiritus animales, fibras illas incoherentes magno impetu & copia ad has partes ferantur, qui quoniam propter pororum obstructionem non æqualiter circulari & moveri possunt, fibras patentes mirum inflant, distendunt, contrahunt, sicque spasmus, constrictionem harum partium, simulque crudelissimos dolores, qui harum fibrarum saltem spasmodicæ contractioni debentur, progenerant. Validissimæ huic tunicarum, intestinorum & ventriculi constrictioni adscribenda etiam cætera symptomata, vomitus nimirum, cardialgiæ, anxietates, alvi, urinæ, & flatuum suppressiones, intestinorum inflammationes &c.

25. Ulterius particulæ illæ Saturninæ continuo ore exceptæ, & ad ventriculum delatæ cum succo chyloso abeunt etiam per poros intestinales, & venas lacteas ad ipsam cruoris & humorum massam; & in transitu vasa lactea & melaraica cum tempore occludunt & obstruunt, & in sanguine & humoribus particulæ hæ Saturninæ ad partes vectæ, propter specificam suam gravitatem, qua omni fluido corporis nostri præponderant, facile secedunt & præcipitantur, sicque tubulos partium solidarum, vasorumque angustissimorum cutis poros constipant & obstruunt: unde atrophix, ariditæ partium, & cachexiæ subnascuntur. Cum succo lymphatico ad nervos, tendines, ligamenta delatæ in angustissimis illorum tubulis ex facili quoque hærent, & ibidem stagnant, tam obstruendo, quam irritando dolores, spasmos, spirituum animalium interceptiones; & inde paralyses & contracturas producant. Falsum enim est, in paresi vel contractura ventris doloribus superveniente, per consensum adfici nervos, vel ipsam peccantem materiam ex primis viis per nervos ad partes extremas deferri. Placent mihi hanc in rem THOMÆ ERASTI *disputatione quarta contra Paracelsum verba: satis, inquit, mali causam non in nervorum, quibus distribuuntur, principio; sed in manibus ipsis exstitisse. Quoniam par-*



tes supra carpum optime se habent: quod esse non potuisset, si nervorum principia adfecta fuissent. Existimandum itaque, particulas Saturninas cum sanguine & lymphâ in musculofas carneas & nerveas fibras influere, & pondere suo secedere, arctissimosque illarum poros occupare, ibique immanes dolores, & propter obstructions fluidi nervei interceptiones & spasmos parere, musculorum robur mirum in modum labefactare.

26. Quod autem substantialiter lithargyrii partes ex ventriculo ad ipsum sanguinem deducantur, inter alia elucet exinde, quod urinæ illorum, qui morbo metallico Clausthali laborant, incoctæ, prævia decenti tractatione & fusione, præbeant veri plumbi quantitatem, sæpe observavi. Ulterius autem quod Saturninæ minutæ, fibrarum nervearum poris insinuatæ paralyfin & contracturam partibus illis adferre queant, observationes testantur. Sic a sacchari Saturni immodico usu paralyfin ortam lege ap. JOH. RHODIUM *Cent. 3. obs. 10.* Notatu digna de sale Saturni communicat BORELLUS *cent. 4. obs. 32.* amicum, inquit, habui, qui sacchari Saturni hausit nimiam quantitatem: unde tanquam paralyticus & fere mortuus est factus, tandemque conclameretur; rigebant membra ejus, & tanquam congelatus & apoplecticus erat.

27. Quod reliqua concernit metalla, quæstio non inutilis oritur, an illa tractata de se emittant effluvia, item an hæc ipsa damnum adferre queant. Stannum si in igne fortiori detinetur, vel si mineræ ejus funduntur & præparantur, quod emittant etiam exhalationes, quamvis non tam copiosas, quam Saturnus, nemo negabit. Quod autem hæc non sint nocivæ confirmat BOYLE *tract. de salubrit. aeris*, dum scribit illos, qui in stanno Anglicano laborant sanos & vegetos esse, & raro morbis corripitur; plantas optimas illis in locis, ubi mineræ Joviales effodiuntur, crescere & progerminare. Denique metalla alias fixiora ferrum & cuprum tam igne quam calore & motu vehementiori tractata,

effluvia quædam de se spargere hæc improbabile videtur. Ex relatione Cel. KRUGII, viri, in scientia metallurgica curiosissimi habeo, illos, qui Schmalkaldiæ acuendo & poliendo ferro inserviunt, respiratione anhelosa laborare. Quod cuprum attinet, notabile est monetarios, qui ex argenti & cupri mixtura faciunt monetam levem & minus nobilem, contrahere sibi in manibus cœruleas multas maculas; quod non contigit, si purum argentum tractant: referri huc possunt quæ superius de effluviis metallorum dicta sunt.

28. Ex hisce itaque deductis satis liquido constare arbitror, metallicolas a miasmatibus variorum mineralium plurima pati ac perpeti mala & morbos gravissimos; præter hos autem adhuc plurima experiuntur incommoda. Omnia enim metalla tanto sanitatis & vitæ discrimine eruuntur, ut tot hominum millia huic negotiose se suosque devovere non frustra mireris: interdum de scalis in puteos delapsi, brachia, crura aut cervicem lethaliter frangunt, aut decedentes, in lacunas suffocantur, aut denique ab accensione pulveris pyrii contusiones gravissimas patiuntur. Concidunt præterea montes, eaque ruina oppressi pereunt, uti id sæpius fit in Misenia, maxime in iis, quibus venæ sunt cumulatae, sique fossore, fornices crebros montibus sustinendis destinatos non relinquunt, aut substructiones faciunt. Patiuntur tandem damnum metalli fossore a saxi abruptis, articuli sæpius mirum atteruntur & contunduntur: quod ne fiat, metallici structuris necessariis puteos, cuniculos, & fossas latentes fulcire debent. Postea aqua fodinarum frigidissima nervis mirum in modum infensa est: hinc artubus non sufficienter munitis, facile nervorum resolutionem, contracturam, ac paralyfin gignere potest. Tandem a vaporibus frigidis densis, quibus aer specum subterraneorum repletus, itemque fumis lampadum densissimis inquinatus, transpirationem liberam impedit, cœca cutis spiracula obstruit, sanguinis subtilisationem ejusque motum



motum promptiorem sufflammat, sicque morbos frigidos asthma, symptomata hypochondriaca frequentissime parit.

29. Recensitis sic variis & incommodis, quibus miseri illi metallici homines graviter divexari & affici solent, restat jam, ut medicationem illorum & ablationem, quantum fieri potest, meditemur. Nolo autem in præsentī in decernendis remediis & medicamentorum compilandis formulis copiosus esse; sed generatim, breviter tamen, quænam singulis malis convenient remedia & præsidia exponam. In genere itaque moneo, præservationem ab hujusmodi incommodis quam optime institui, si, quantum possibile est, fumos istos noxios, densos, præprimis tempore existente nebuloso & cælo minus sereno, fugiant: dein ab inspiratione fumorum per os & nares, nec non ab illorum crebriori deglutitione caveant. Præstat enim, quando in ejusmodi locis inquinatis versantur, raro deglutire salivam, sed continuo fere illam exspuere. Deinde optimum est consilium, ipsas officinas exstruere, ubi cremantur, funduntur & separantur mineræ, sub libero aere & cælo, etiam caminos satis patentes erigere. Porro optime se præservare possunt a noxa dictarum exhalationum tam mercurialium, antimonialium, sulphurearum, arsenicalium; quam Saturninarum, aliarumque, oleosis: nempe butyrum scilicet parum salitum magna in copia adsumant, jusculis ex cerevisia Goslariensi, butyro non salito & saccharo confectis, admixta nonnunquam olei olivarum, amygdalarum dulcium sufficiente quantitate, probe se sæpius muniant. Accedit quod juscula hæc ex tali cerevisia spirituosâ parata, & aromatibus Zingibere, floribus macis, cardamomo vel cinamomo condita transpirationem liberiores & motum celeriores sanguinis efficiant, sicque obstructionibus resistent.

30. Deinde omnibus metallicis præter diætâ oleosâ & pinguem, emollientia diluentia & temperantia commendantur. Humidis his efficitur, ut

alvus eo rectius suum faciat officium, & ne partes nervæ membranacæ ab acribus & calidis istis fumis nimium exsiccentur & contrahantur: his quoque efficitur, ut vehiculo horum diluentium & vi emollientium miasmata illa mineralia acuta rigida partim demulceantur, partim etiam ex corporis poris & emunctoriis eliminantur & proscribantur. Hunc in finem laudatissima sunt sequentia, infusum veronicæ, malvæ, hederæ terrestris, coffeæ nec non lac bubulum calide copioseque haustum, vel solum, vel cum dictis infusis remixtum. Item juscula ex carnibus pingua, lardum, ova sorbilia, pruna Damascena, poma Borsdorffiana, ficus & passulæ crebriori sint ex usu. Fugiant diætâ acidam, salitam, indurâtâ, viscidam, aromaticam, spiritus vini nec non tabaci abusum. Ex fonte pharmaceutico ad præservationem a sævissimis his morbis multum conferre potest tale medicamentum, quod vim habet balsamicam, alexipharmacam, & tenuissimis particulis poros & vascula aperientem; quod componi potest ex nucistâ, croco, myrrha, enula, corticibus aurantium, citri, zedoaria, theriaca, spiritu vini, spiritu salis ammoniaci, camphora, quale elixir balsamicum præstantissimæ virtutis est, & præservandi & curandi fine opem fert præsentissimam; si quotidie ad guttulas LX. cum jusculo sumatur.

31. Quotiescunque ab haustis copiosis fumis arsenicalibus truculenta invadere solent symptomata, theriacalia antispasmodica, nervina cum oleosis, jusculis & decoctis mixta, hic omnibus palmam præripiunt: tinctura bezoartica, discordium Fracastorii, Sylvii, theriaca cœlestis, essentia scordii, succini, castorei, spiritus antispasmodicus nostræ præparationis, qui ex spiritu balsami Peruviani, succini, eboris, addita sufficiente castorei quantitate & croci constat; confert quoque pulvis Marchionis.

32. Ad intolerabiles & immanes intestinorum dolores conjunctos cum alvi suppressione pertinacissima, a copioso fumo lithargyrii feliciter abigendos & diffi-



diffipandos, primo loco commendantur clysteres ex meris fere oleis parati, quonimis fortiter constrictæ & spasmodice contractæ intestinorum fibrillæ relaxentur, & pori intestinales aperiantur. Hisce clysteribus commode misceri possunt carminativa penetrantia, spiritus vini camphoratus, spiritus salis ammoniaci, vinum Hispanicum, qua simul ratione partes læsæ solatium recipiunt & blande demulcentur. Extrinsece vero unguenta ex oleo amygdalarum dulcium, carvi, hyosyami parata juvant, quorum virtus egregie, addita sufficiente quantitate spiritus volatilis, exaltari potest; quibus totus venter calide sæpius inungendus est. Intrinsece singularem obtinent virtutem juscula oleo amygdalarum dulcium probe imbuta, in quibus essentia carminativa cum spiritu antispasmodico prædicto assumi potest, & , urgentibus doloribus, addi possunt grana aliquot laudani opiatæ nec non ipsius camphoræ. Omnia hic fortiora purgantia rejiicio & damno, quæ spasmodicas constrictiones augere, & symptomata ut plurimum exasperare solent. Leniora autem e. g. infusum rosarum laxativum, syrupus mannæ, pilulæ ex gummatibus, scammonium per fermentationem paratum, cum tartareis & carminativis mixta, aliquando locum inveniunt. Quod si autem tanta est spasmodorum vehementia, ut medicamentis etiam generosissimis cedere nolit, commendanda sunt ex omnibus balnea, ex herbis emollientibus, nervinis antispasmodicis concinnata, quorum usum in nervis solandis, poris aperiendis, & dolorum ferocia sistenda mirifice laudo.

33. Ad contracturam & paralyin membrorum & artuum, quæ sæpius ipsos, qui cum fumo Saturni versant, exercere solet, præter jam dicta antispasmodica nervina emollientia & olea sudorifera, blanda tamen prosunt v. g. spiritus eboris seu cornu cervi balsamicus, spiritus Bussii, spiritus cornu cervi succinatus cum decocto enulæ, vel vino enulato calide adsumta. Externe inunctiones, linimenta, balnea laudatissima sunt ex re-

gno animali petita v. g. unguentum sequens Dn. HERRSTELLE Pharmacopæi Clausthalens. recipe axungia humanæ unciam unam, olei caryophyllorum, cinamomi ana drachmam dimidiam. M. Hoc linimento calide contracta membra frequentissime inungantur. Deinde fots ex sanguine porcino, item ex intestinis calidis proficiunt.

34. Tandem asthmati metallico morbo frequentissimo præter jam dicta opponi possunt elixiria pneumonica cum balsamo sulphuris anisato, nec non Peruviano roborata, elixir proprietatis sine acido, spiritus salis ammoniaci anisatus, essentia croci inspissata, essentia gummi ammoniaci, helenii, aqua hyssopi, & quæ omnibus palmam præripit, aqua Tragioni cum vino parata, quam idem jam laudatus pharmacopæus in asthmate inveterato tollendo commendat. Vulgus contra hunc & alios morbos metallicos in usu habet alliacea, nec sine ratione: hæc enim sale volatili acri gaudent, quo amurcam viscidam, tartaream firmitus cellulis pulmonum inhærentem detergunt & resolvunt, & transpirationem humorum incalescentia, & acrimonia humorum suorum volatili adaugent. Et hisce metallurgiæ morbiferæ impono finem.

## DISSERTATIO VII.

### DE INFLAMMATIONE VENTRICULI FREQUENTISSIMA.

#### §. I.

**P** Rincipum partium morbos vel omnino exitiales vel ad curandum difficillimos esse, unum est ex publicis in medicina confessis etiam dudum in veterum scriptis celebratum. Jam vero ex omnibus corporis nostri partibus nullæ majoris sunt momenti, nec ullæ majorem merentur considerationem; quam quæ sensuum ac motionum sunt instrumenta, quibus anima proxime utitur; & tales sunt nerneo-membranosæ. Principatum vero ex hisce merito obtinet ventri-



ventriculus, ex membranis nerveo-fibrosis totus compositus, qui non modo exquisitissima sensatione pollet; sed & motu gaudet contractorio & dilatatorio, qui peristalticus dicitur. Et quoniam ob nervorum copiam hæc perquam nobilis pars fere cum toto corpore accuratam habet consensionem, & præter hæc succis & fluoribus corporis nostri commodam ad vitam præbet materiam; facile est colligere, omnem gravem morbum in eo consistentem magno cum vitæ discrimine esse conjunctum. Non dubitavit itaque HELMONTIUS ob hujus visceris in corpore præstantiam sedem animæ ibi collocare: & quamvis hæc pars multis magnisque pateat morbis; non gravius tamen & quod magis terrere possit malum reperies, quam inflammationem. Inflammatio quidem, quæ stasis corruptiva est sanguinis, ubicunque sit, non sine periculo habenda; periculosior tamen, ubi membranaceas occupaverit partes, ob exquisitum, quo pollet, sensum ac consensum: gravissima & funesta simul symptomata adsociantur. Quæ de causa etiam meningum inflammationes, ventriculi & intestinorum in summum ægrotantes adducunt periculum. Plures harum partium inflammatione, ceu primario morbo extinguuntur, alii, ceu aliorum morborum symptomate. Illud vero mirandum est, quod cum frequentissimus sit adfectus ventriculi, a practico tamen parum omnino observetur; & quod magis mirum videtur, illorum libri vel plane de hoc silent, vel negligentius curant. Multi ex iis rarum pronunciant adfectum; si tamen in praxi diligentius attenderis, frequentissimeprehenditur. Quod igitur in libris & scriptis medicorum tam rara hujus mali sit mentio; placet in præsentī utilissimam hancce materiam paullo curatius pertractare.

2. Prius vero quam in hujus adfectus indolem, causas, ac ortum penitus descendamus, convenientissimum mihi videtur, ex anatomicis, quæ ad ventriculi structuram, situm, ac officium pertinent, paullo curatius repetere. Situs est

ventriculus sub diaphragmate, cujus posteriori parti etiam incumbit. Tres ferme partes sinistrum latus occupant, cum dextrum ab hepate cingatur. Orificium dextrum, quod pylorus vocatur, sub cordis scrobiculo juxta cartilagine miformem jacet; sinistrum vero spinæ dorsæ vicinum, & firmissime peritonæo adnexum, musculosam diaphragmatis in dorso partem percurrit; non vero nerveo tendinosam, uti vulgariter in tabulis depingitur. Substantia ventriculi mere est membranacea, utpote ex meris tunicis & lamellis membranaceis est compositus, quarum vulgo quatuor numerantur. Primæ originem a peritonæo deducunt, constantes fere ex fibris longitudinalibus, ab uno orificio ad alterum protensis: huic subjacet musculosa, quæ ex circularibus seu spiralibus carnis crassioribus componitur, quæ majore agmine collectæ circa dextram & inferiorem orificii partem pylorum nempe videntur: quoniam hic loci majori motu & constrictione, ad propellenda versus intestina ejus contenta, opus est. In sinistro latere, ubi maxima ventriculi capacitas, tunica hæc valde rara & subtilis est: non enim hic opus erat insigni constrictione, cum ob situm altiore respectu dextri facile descendant alimenta. Extant ibi vasa brevia, quæ in cruento vomitu plerumque aperiuntur, quoniam fere nuda, & tenuissimis saltem membranulis communita jacent. Notabile est, quod in superiore parte ventriculi, ejus dorso nimirum, fibræ carneæ ab uno orificio ad alterum secundum longitudinem sint expositæ, quæ in orificio sinistro in circulos abeunt: factum id esse provida natura eum in finem credo, ut, facta constrictione, facilis ex uno orificio in alterum liquorum fiat transfusio, sicut quandoque in vomitu videmus, ubi, quæ paullo ante fuerunt adsumpta, & in fundo ventriculi adhuc resident, non ejiciuntur; sed quæ ante aliquot dies sumpta in intestina jam transierunt. Tertia tunica dicitur nervea, quæ valde densa est, cui substernitur quarta, quæ glandulosa dici-



dicatur five melius villosa, ex tenuissimis fibrillis & vasculosis ductibus contexta. Hæc lympham & mucum fundit, crassiorque est in ventriculi fundo & parte ejus dextra; defendit hæc quoque nerveam a molesta medicamentorum vel ciborum vellicatione. Accipit ventriculus nervorum ramificationes valde insignes a pari vago, quod constituto nervo cardiaco ac pneumonico juxta oesophagi latera descendit. Dividitur in duos ramos, interiorem nempe & anteriorem; ille rursus in nervum coalescit, qui juxta anteriorem partem orificii sinistri ad fundum ventriculi abit; hic vero exterior ad dorsum ventriculi fertur, & ab uno ad alterum orificium transit. Ex his duobus ramis varii propululant furculi, qui per parietes orificii sinistri distributi, plexum nerveum, instar reticulæ constituunt. Deinceps e nervis hepaticis, alii in pancreas, alii in vasa cholodocha, duodenum & pylorum deflectunt, iisdemque densas propaginum series inferunt. Hisce ab utroque nervo stomachico aliæ uniuntur: unde ratio apparet, cur vellicatione in ventriculo facta, bilis e cystide sua in duodenum effundatur, quæ postea, spasmodica intestini constrictione in ventriculum sublata, vomitu rejicitur.

3. Si qua proinde corporis pars exquisito & delicato sensu instructa est, certe est ventriculus. Hic intus undique membrana nervea cingitur, quæ sic appellatur, quod in hanc multi illique insignes nervi excurrant, imo cute; a cuticula separata multo sensibilibior animadvertitur. Sentit hæc ventriculi membrana spicula antimonii, quæ cutis etiam nuda sine noxa tolerat. Oculi admittunt in collyriis crocum metallorum, licet acutissime præ cute sentiant, imo apiculi nervi linguae adæquati saporis organa minus ab ejus spiculis adficiuntur. Testis hujus rei est famosa cicuta aquatica, quæ intus sumta ob vehementem irritationem tunicæ, in ventriculo venenum est; exterius vero in forma cataplasmatidis, vel emplastri lieni tumido, vel duris tumoribus applicata

magna eaque innoxia est medicina. Subtiliori etiam sensu præditum esse ventriculum inter alia appetitus & sitis, varii dolores, ardores ab adsumtis medicamentis rebusque heterogeneis ac venenis declarant. Et quod maxime mirandum, dantur quædam medicamina, quæ simul ac ventriculum contingunt, effectum etiam in dissitis partibus exserunt. Exemplo sit opium princeps remediorum sedantium; hujus vel dimidium saltem granum, idque vel solum vel cum aliis mixtum, simul ac ceperis, & sedat dolores, & dormiendi adfert cupidinem. Nitrum quo non clarius vel majus anti spasmodicum, parva etiam dosi, in febris vel in ardore inflammatorio datum, mox refrigerationis sensum per universum corpus diffundit. In nimia fibrarum relaxatione, serique vel sanguinis fluxu validius stypticum datum, dum adhuc in ventriculo versatur, etiam in remotioribus locis, constringentem ostendit effectum. Ex quibus abunde potest intelligi, quam subtili sensu polleat ventriculus, qui, si a corde discesseris, omnium in corpore partium princeps merito est appellandus. Et proinde non sine ratione, uti diximus, *Helmontius* in sinistro ventriculi orificio tanquam acutissimi sensus parte animi sedem collocavit. Eundem quoque ob summam præstantiam regem vocat nobilis poeta medicus Serenus Sammonicus. Verum non solum ventriculus sensu gaudet, sed & consensu: quoniam enim ex intercostali magno & pari vago accipit nervos, hinc cum cerebro, cum dura matre, cum spinali medulla, faucibus, aspera arteria, corde, pulmonibus, hepate, diaphragmate, renibus, ipsisque intestinis multo conspirat sensu. Si igitur hæc partes laboraverint vel irritatæ, fuerint laborat etiam ventriculus & socius fit periculi.

4. Præter sensationem acerrimam, quæ admirabilis in primis, mirandus etiam in ventriculo singularis motus species, quo ceu fultura egregie illius robur sustinetur; motus hic vocatur peristalticus, & simul intestinis est communis, qui



qui in eo maxime consistit, ut una parte constricta altera dilatetur. Motus is reciprocus per totum intestinorum canalem cum in finem exercetur, ut contentorum & excrementorum fiat expulsio. Ut enim omnium fluidorum beneficio systoles & diastoles in vasis fit progressus; ita eadem motus specie in magno intestinorum ductu contenta ab uno intestino ad alterum promoventur. Sicuti vero cor principium est circuli sanguinis & motus systaltici, quo sanguis, constrictione juvante, in arterias expellitur, quæ dilatantur, & post factam dilatationem in venas propellitur: ita & mihi ventriculus principium videtur motus peristaltici, qui in intestinis viget. Tanta potentia, tanto robore hic motus instructus est naturæ providentia, ut merito in admirationem sui physicos rapiat. Maxime vero hujus motus peristaltici vis ex vomitu patet, in quo nimirum is invertitur, ut magnum sæpe humorum pondus, quasi vecte commotum, uno impetu magnaque vi extrudatur. Et quod mirabilius omnino, videmus argentum vivum ad dimidium libræ in iliaceis adsumtum, quod, excepto auro, cum sit gravissimum; nihilo tamen fecius virtute & robore motus peristaltici ex fundo in pylorum & intestina premitur. Quodque magis advertendum putaverim, dum per alvum mox ejicitur, necesse est, ut per prolixos istos & anfractuosa intestinorum sinus modo descendat, modo ascendat. Ad hunc ascensum magna vis certe & robur est necessarium, quod in intestinis systaltici motus est beneficium; qui etiam a purgantibus & emeticis vel etiam a venenis adsumtis valde augetur.

**CI. WEPFFERUS**, qui compluribus artem nostram nobilitavit, in *libro de cicuta aquatica* p. 172. in animalibus naturam & diversitatem hujus motus, oblatis prius venenis, sollicite observavit. Inter alia experimenta e catello, cui radicem napelli dederat, excidit ventriculum, inque ipso motum observavit vermicularem. Placet jam integra auctoris verba hic inferere: *integrum*,

inquit, excidi ventriculum, movitque se motu vermiculari. Stomachus sive sinister orificium arctissime sese constrinxit, ut ne guttula quidem excideret. Quando vero ventriculus circa medium sese contraxerat, motus lente versus pylorum procedebat, illeque erigebatur, & liquor subpallidus, quandoque sensim, aliquando cum impetu protrudebatur. Constricto pyloro, ventriculus rursus intumuit totus, moxque rursus circa medium sese constrinxerat, novusque liquor per pylorum ejiciebatur. Hac constrictionis in medio & inflationis alternatio per octavam hora partem continuavit, stomacho semper clauso permanente. Postea ventriculus sese movere desit. Plura vid. eod. libr. hac de re lib. I. p. 262.

5. Officium ergo ventriculi secundum naturam, & ordinem recte se habet, quando debitus & moderatus sanguinis per vasa in ejus membranas fit adfluxus & refluxus: ab hoc enim pendet secretio. Dein & in eo versatur, ut motus ejus peristalticus æquabilis & moderatus conservetur: hinc placida fit sensatio, nec molestus oritur dolor. Omnia itaque, quæ in ventriculum incidere possunt vitia, aut ex motu ejus peristaltico læso, aut circuitus sanguinis per ejus substantiam defectu, aut secretionem liquoris gastrici præternaturali, derivanda sunt. Ex multis vero magnisque ventriculi morbis jam tractandum suscepimus, qui ex tono ventriculi fortius læso inprimis, & postea ex sanguinis circulo per hoc viscum impedito excitatur; hac ventriculi inflammatione certe nec quidquam periculosius, nec feralius existimandum est. Prius vero quam ejus causas, earumque ordinem persequamur, e re nostra esse arbitramur, signa, quibus cognoscitur, & quibus ab aliis morbis differt, breviter attingere.

6. Sunt vero inflammationis ventriculi notæ perpetuæ, & indivisi veluti comites, dolor immanis & fixus ardor circa præcordia & illam regionem, quæ cordis scrobiculum comprehendit: adest simul anxietas, ut maxima, ita mole-



molestissima, corporisque jactatio. Febris porro cum siti, vigiliis, pulsu duro, parvo, frequenti, & inæquali comitatur. Juncta sunt præterea vel ipsi vomitus, vel ad vomendum proclivitas, alvi adstrictio, quandoque etiam inflammatio faucium anginae speciem præ se ferens. Remittunt ad tempus hæc mala, mox vero cum impetu repetunt, suumque resumunt impetum: accedunt subinde singultus, extremorum refrigeratio cum sudore frigido, delirium, animi defectio & convulsio; & urina sæpe plane supprimitur. Hæc symptomata ubi accidunt, de ægro actum esse non obscure prædixis. In corporibus dissectis ventriculus valde rubicundus, variis modo rubris, modo nigris maculis distinctus, vasaque sanguinea & capillaria multo sanguine turgida reperiuntur; quandoque orificium sinistrum macula lata nigra notatum visitur. Interdum quoque hæc inflammatio, antequam aperiatur corpus, primo ad spectui est exposita; sæpe extenditur ad duodenum, & paucis sæpe diebus occidit; quandoque longius protrahitur, imo in exulcerationem lentamque febrem terminatur. Non totus vero ventriculus semper; sed pars saltem, maxime vero fundus: inflammatur, nonnunquam tenuior, sinistra nempe ejus pars, ubi vasa brevia sita sunt; sæpe dextra pylorum respiciens adfligitur. Ventriculi orificium si inflammatio occupat, periculosissima est, & uti FORESTUS dicit, Jovis filii dicendi sunt, qui evaserint. Adfectus hic vel idiopathicus est & primarius, vel symptomaticus, quod aliis morbis accidit, maximeque pesti, variolis, febribus petechialibus, podagræ retropulsæ, febribus ardentibus & inflammatoriis est socius.

7. Inflammatio ventriculi, ut adfectus est periculosissimus; ita & communissimus, qui plurimos opprimit atque præcipitat; mirum tamen, quod tam parca hujus tam apud veteres, quam recentiores fiat mentio. HIPPOCRATES, ni fallor, nullibi inflammationis

ventriculi, vel ejus orificii meminit; præcordiorum vero inflammatorum de vict. acut. §. 36. Et in Coac. prænot. §. 2. hæc habet: *oris ventriculi dolor & pulsus præcordiorum febre perfrigerata, malum, tum alias tum si insuper exsudent*. Item præcordiorum dolores tum alias mali sunt, cum si alvos humectent. Et lib. I. Epidem. exemplum inflammationis hujus cum febre in ægroto adfert. Hic quoque locus respicit in Coac. prænot. §. 317. *præcordiorum*, inquit, *dolores cum febre, si dolor intensus ad caput progressus fuerit, repente convulsivo modo occidunt*. GALENUS in libris suis erysipelatis stomachi facit mentionem. Inflammationis quoque stomachi meminit CELSUS lib. IV. cap. 5. §. 15. his verbis *at si inflammatio ventriculi subest aliqua, hanc fere dolor & tumor sequitur*. Ex veteribus observat quoque hoc malum ALEXANDER TRALLIANUS lib. 7. cap. 14. & CÆLIUS AURELIANUS methodicorum summum decus lib. 2. de morb. cap. 2. sub nomine cardiacæ passionis hunc nostrum adfectum comprehendit atque confirmat, ejus essentiam in stomacho atque ore ventris esse quærendam, & emergere frequentius quinta vel sexta die in febribus ardentibus continuis vel inflammatis; & cap. 32. hanc sequi adferit febrem celerimam & inflammatoriam, pulsum celerem cum siti modica, pulsu parvo, genuum gelido stupore & cum vigiliarum assiduitate.

8. Recentiores etiam raro hanc materiam in suis libris tractarunt. SENNERTUS brevis est in hoc malo exponendo; ETTMULLERUS rarum appellat adfectum. Verum sæpissime occurrens adfectus vel pro inflammatione hepatis vel pro cardialgia illis accipitur. Jam dudum id notavit Gallia ille HIPPOCRATES FERNELIUS lib. VI. cap. 2. de part: inflammationi, inquit, *ventriculi adfixis est inflammatio hepatis, quæ vel summum jecoris lobum, quo ventriculus obtegatur, vel incumbentem illi abdominis regionem occupat. Tumor enim prominens & circumscriptus cum dolore in ventriculo sito inest, & febris, & aliorum malorum plura,*



plura, ut proinde vel experientissimos saepe medicos fallat. Distinguitur autem sola symptomatum, vehementia & pernicie, quandoquidem in ventriculo omnium sævissima inflammationes incidunt. Cardialgia vero & inflammatio ventriculi multum inter se conveniunt ob plurima symptomata, quæ utrumque horum adfectuum concomitantur. In eo tamen differentia est, quod in cardialgia febris deficiat, deficiat etiam ardor intensior, fixus in ventriculi regione, denique clementior benigniorque symptomatum sit accessio.

9. Jam non immerito quærendum mihi videtur, unde tantum periculi tantumque discriminis ventriculo inflammato immineat. Cum enim aliæ corporis partes profundioribus & gravioribus pateant inflammationibus, ut pulmones, mesenterium, uterus, renes; minus tamen habent periculi, nec tamen celeriter hominem conficiunt; eo magis igitur mirandum ac investigandum puto, unde hæc inflammatio tantum mali secum vehat. Minus enim credibile est, illam sanguinis paucitatem, quæ in ventriculi vasis residet, solum vitæ adeo periculose insidiari. Medici ab adsumpto veneno propter inflammatum ventriculum absolutam lethalityatem judicant: sollicitius igitur indagandum, qua ratione inflammatoria stasis vitam tam celeriter opprimere possit. Vulnera ventriculi absolute lethalia non sunt, cujus rei testes cultrivori, quorum ex ventriculo vel dissecti cultri, vel per suppurationem effuerunt expulsi. DOLÆUS in Chirurgia cap. 49. lib. II. expresse scribit, vulnera ventriculi non solum superficialia, sed & profundiora Limburgi curata fuisse. In ulcerationem & abscessum etiam abire ventriculum inflammatum, & in lentam hecticamque febrem tantum desinere experientia nos docuit; ejusmodi vero suppuratio sine præcedente inflammatione consistere nequit.

10. Nostram itaque sententiam ut hæc re exponamus, ita nobis videtur, sanguinis in vasis stasim inflammatoriam in

Opusc. Patb.

se spectatam non esse causam mortis & tam tristium symptomatum, a quacunque etiam causa proficiscatur. Longe alio ex fonte hæc derivanda esse liquido affirmamus. Duplex nempe mihi statuenda videtur causa tanti periculi in inflammato ventriculo: una scilicet est spasmus violentissimus, qui semper inflammationem præcurrit, & hic unus & solus fere est, qui inflammationem progenerat: altera est, quod ob stagnantem sanguinem spasmus adhuc augeatur, partesque inde nobilissimæ nervæ irritentur. Inflammatio igitur per se non jugulat; sed spasmus potius, cujus sævitia post inflammationem magis cumulatur. Spasmus vero ejus est naturæ, ut si partem sensibiliorem nerveam invadat, maximas in universo corpore perturbationes motusque vitæ inimicos atque adversos excitare possit. Et sane gravissimorum morborum ratio ex spasmis plerumque nervosarum partium est deducenda: passio iliaca, quæ cito hominem cum singultu, convulsione, delirio, extremorum frigore, doloris atrociam, alvi que contumacissima obstipatione interficit. Causam tam subitamque vehementis mali si quæris; spasmus est intestinorum tenuium motusque peristaltici inversio, ob incarceratum & pondere fœcum intestinum oppressum. Passio colica, quæ spasmodica & convulsiva dicitur, immanibus ægrotos adficit tormentis, ut propter animi deliquium & summam anxietatem in vicinia mortis sint constituti. In medio uretherum calculus asperior vel grandior hærens spasmodicorum inde resultantium vehementia, vomitus, anxietates, corporis refrigerationes, calorem, animi deliquia, tremores, contractiones & convulsiones producit. Spasmus duræ matris convulsionem totius corporis musculorum universalem, sive epilepsiam excitat. Quam graves adfectiones spasmodicus dentium dolor producat, non modo infantes, quibus dentes erumpunt; sed & adultiores, quibus nervæ dentium membranæ a sero acri vellicantur, cum summo tædio molestiaque experiuntur. Tunicæ ner-



vosæ vellicatio, quæ meatum auditorium tuetur, tantum dolorem & spasmus parit, ut cor præcordiaque constringendo, anxietates, animi deliquia, deliria & quandoque convulsivos partium motus efficiat. Novimus exemplum, ubi lapillus in meatum auditorium infantis intrusus solo spasmo epilepsiam, anxietates, vigilias, calorem præternaturalem & miram anxietatem excitavit. Hæc omnia symptomata remiserunt, ubi inunctione olei anodynæ a spasmo fibræ fuerunt relaxatæ; imo post hæc sternutatione facta, lapillus, qui parum commode extrahi poterat, sponte fuit excussus. Silentio præterimus articulorum dolores acerbissimos, qui simili ratione universum corpus adficiunt, pulsu id celeri, febre, anxietate, vigiliis, mentisque perturbatione testantibus.

11. Ex his, quæ adduximus, abunde demonstratum arbitror, spasmum vehementem in hac sensibilissima nervea, quæ cum tot partibus consentit, parte ventriculi, nempe inflammationem, tantumque symptomatum cumulum inducere. Certe enim hic omnes nobiliores corporis partes in consensum trahendo, omnem ordinem motuum, circuitus sanguinis nempe & excretiones ac secretiones turbat atque pervertit; atque adeo percommode ex spasmo symptomatum, quæ ventriculum inflammatum infesto agmine appetunt, ratio facile constabit.

12. Ac primum quidem sistit se nobis intolerabilis illa circa præcordia anxietas, quæ nil nisi species spasmi est existimanda. Hic spasmus ad diaphragma, pulmones, & cor tendentes nervos comprimit, liberum sanguinis per has partes progressum retinet & intercipit; quam anxietatem variis denotat vocibus *Hippocrates*, & quidem talibus, quæ gravitatem huius mali perquam eleganter exprimunt. Vocat nempe illam *δοσφορίαν*, *ριπτασμόν*, *βλησπισμὸν ἀσπὴν*, *ἀλυσμόν*, & *ἀπορίαν*. Quæ voces id symptomatis genus pulchre significant, cum ægri varias decubitus formas expetunt, & impatien-

tes certi loci certæquæ sedis varie se iactant atque movent, modo se attollendo, modo deiciendo, modo in latus, modo in ventrem, vel in aliam figuram corpus doloribus fessum disponendo. Inquietudo enim anxietatis comes est, provenit indentidem a vellicatione nervorum, & circulo sanguinis per totum corpus inæquali atque impedito. Pulsus durus, parvus, & frequens, qui omni graviore spasmo, nostroque etiam morbo sese adsociat, a nimia strictura fibrarum cordis musculosarum provenit; qua ejus libera diastole & sanguinis receptio, item expedita systole expulsioque impeditur. Hinc sanguinis progressus tardus est, lentiusque justo per cor & pulmones consuetum iter explicat, sique cordis nervi nimium spasmo stringuntur; cessat plane ejus debita systole atque diastole, & ad tempus circulus sanguinis suspenditur & animi fit defectio. Extremorum frigus partim stricturæ, quæ meatus & vasa capillaria premit, partim languidiori sanguinis influxui est adscribenda; referendus huc sudor frigidus, & facies sub tali adfectu *Hippocratica*: concavi sunt oculi, nasus acutus, facies livida, tempora collabuntur, musculi subsident, quæ cuncta vehementiæ sævitæque spasmi, & spasmodicæ stricturæ sunt tribuenda. Hoc enim modo fit, ut legitimus sanguinis adfluxus, a quo calor, color & faciei vigor dependet, male intercipiatur.

13. Vomitus quoque inflammationi ventriculi jungitur ob fortissimam ventriculi constrictionem, & hanc orificii sinistri & œsophagi inde sequentem dilatationem: hac constrictione quodcunque in ventriculo continetur, fortissimo motu impellitur, atque sursum ejicitur. Vomendi vero nisus, licet irritus, fit a constrictione utriusque orificii, unde denegato exitu nihil redditur. Neque minus formidanda alvi pertinax constriction, quæ nihil ejicit, nec injectos admittit clisteres, dum membranæ intestinorum spasmo contractæ cavitatem intestinorum adeo coarctant, ut nihil possit in ipsa inte-



intestina penetrare. Alvi enim debita & ordinaria dejectio exigit tonum peristalticum intestinorum saluum atque incolumen. Læditur plerumque hic tonus vel dilatatione nimia vel constrictione; utrumque vero in spasmō accidit, dum altera pars nimium contrahitur, altera relaxatur, & sic progressus eorum inhibetur, quæ intra intestina continentur.

14. Nec prætereundus est singultus, quo nil frequentius nilque magis minatur periculi, quam hoc inflammationi nostræ signum junctum. Hic si huic malo sese adlociat, sinistram sane morbi eventum augurari licet, nec fallat augurium. Fatendum omnino singultum a diaphragmate edi, comprobante hoc vibratione, quæ circa præcordia observatur. Non raro etiam idem accidit cum respirationis vitio & sonitu, qui fit non tam a flatu per gulam emisso, quam ab aere per asperam arteriam eliso atque in larynge fracto. Utcunque vero hoc concedamus; negari tamen non poterit, quin ipsum diaphragma ad hunc motum a ventriculo ventriculique orificio sinistro concitetur. Multos ego novi, qui ex nimia ciborum repletionē vel acriorum rerum, uti piperis, usu hoc malo graviter adficiantur. Et ne obscurum hocce esset, remota causa, diluta nempe materia vel evacuato ventriculo, ipsum malum removetur. Nec mirum esse videtur, cur diaphragma ex ventriculi adflectione patiat: oesophagus enim mediante membrana ipsi cum pleura communi, & inferius juvante membrana cum peritonæo communi connectitur. Præterea a reliqua diaphragmatis parte, ubi gula illud transit, filamenta nervæque membranæ arctissimo veluti vinculo conjunguntur, & ulterius progressæ cum rectis ventriculi fibris maxime coeunt.

15. Tumor quoque in præcordiis quandoque deprehenditur, qui nil nisi ventriculus est, quia fibris circa utrumque orificium a flatibus contractis & contentis exitu præcluso, necessario ejusmodi exsurgit moles. Trahit hic tumor comites maximas angustias, dum nem-

pe sursum premit diaphragma, ut libere moveri nequeat. Icterus quoque per sæpe nostro adfectui adlociatur, præsertim si duodenum simul spasmō corripitur. Hujus enim tunicis violenter contractis, constringitur & ductus chodochus, qui per ejus membranas longa & obliqua fertur via: inde bilis infusione in intestina impedita necesse est, ut in lympham regurgitet, quæ dein totum corpus luteo colore inficit. Ulterius convulsiones non nisi ex spasmō sunt derivandæ: vehemens enim ventriculi spasmodica contractio duram cerebri matrem in consensum trahit, quæ omnes nervos tam ex cerebro, quam spinali medulla molli sinu complectitur; hæc si spasmō infestatur, musculorum fit convulsivo universalis, sive epilepsia. Ultimo loco dicendum de delirio, inflammationis nostræ non infrequenti symptomate. Nascitur hoc, dum sanguis propter contractam duram matrem in circulo sistitur, & inflammationem excitando mentis usum vel immittit vel plane exstinguit.

16. Ipsa vero inflammatio ventriculi identidem spasmi soboles est: constat enim hanc ipsam a sanguine in vasis hærente & velut incluso fieri: unde venæ tument, ingens fit ardor, arteriæque pulsant. Namque spasmus ejus est indolis, ut constrictione venas, quæ minorem ob defectum pulsus habent resistentiam, facile comprimat & angustet: unde regressus ejus impeditur, & inflammationum fiunt natales. Dixerunt id veteres attrahere dolores & adfluxum humorum concitare; quod ipsum quidem ipsa comprobatur experientia, ut & ratio: dolor enim fit ex spasmō, qui dum venas constringit, sanguis & humores, in arteriis residentes, congeruntur: unde turgent & tument a sanguine vasa, & nisi progressus illius adjuvetur, succedit inflammatio, & ea propter graviores dolores & inflammationem plerumque post se relinquunt. Ex his intelligitur, ventriculi inflammationem, a veneno vel alia causa irritante exortam, spasmi esse effectum, & testari



de truculenta validissimaque hujus tyrannide. Tollit itaque non tam inflammatio, quam spasmus, qui causa illius est, ex quam inflammatio augetur & exasperatur: unde apparet, tonum & motum ventriculi in hoc maxime malo esse destructum.

17. Exposita sic adfectus nostri causa formali & proxima, quæ tam gravia progignit symptomata, jam ad eas investigandas causas nos convertimus, quæ spasmodicæ sævitæ in ventriculo lenocinantur. Et ut nostra methodo omnium morborum causæ in materiales & immateriales distinguuntur; sic ab his initium sermonis faciamus. Primum vero vehementissima animi commotio se sistit, quæ fit ex iracundia. Loquitur vulgaris experientia, exandescentiam nimiam plerumque suppressam consequi compressionem molestissimam circa scrobiculum cordis cum ardore præcordiorum, alvi adstrictione, oris amaritie ac vigiliis; succedit sæpe icterus itemque febris. Tam longum foret tot exempla repetere, qui ab ira misere sunt extincti, cum hæc ipsa abunde satis practicum libri suppeditent. Ipse sæpius ex ira inflammationem ventriculi observavi. Tale exemplum prodidit etiam HIL-DANUS *cent. VI. observ. 34*. Licet vero inflammatio ventriculi ex ira concitata periculosa admodum sit; periculosior tamen evadit, & parum læti promittit, si vomitoriis purgantibusque oppugnetur. Patet & hic dicendi campus de noxa horum medicamentorum, nisi ab instituto observationes me revocarent. Commode mihi in mentem venit elegans Canonici Halberstadiensis historia, quæ satis superque nostrum illustrabit institutum. Hic vir perfecte sanus, cum inter rixas atque jurgia vehementissime exandescens mox vinum calidum superbiberet, quod vulgo *Seß* appellant: insequenti die statim intra venas conceptum malum persequitur. Tum enim incredibiles dolores circa præcordia, horum angustia & conatus vomendi sequebantur; ardor porro stomachi adebat, inque stomacho quicquam, quod

exitum moliretur, inhærere videbatur. Vocatus in consilium medicus, vomitorium ex sulphure antimonii aurato compositum præscribit; sumit hoc æger, eoque sumto ter bene vomit; sed tantum aberat ut symptomata levarentur, ut potius crescerent. Jam pulsus erat parvus & fere nullus, & frigus frigidusque sudor parum spei ad meliora ostendebant: namque intra decem horarum spatium, convulsionibus accedentibus, est extinctus. Dissecto post mortem cadavere, in fundo ventriculi plures videbantur maculæ, partim nigrae, partim rubrae, & nonnullæ etiam altiores, non obscuro indicio, spasmus tam ab ira, quam ab emetico suscitatum inflammationis ac ipsius mortis existisse causam. Docet cæterum hæc historia quantamira in concitandis circa regionem ventriculi habeat potentiam.

18. Iram ut plurimum gravis circa illum locum excipit compressio, ubi pylorus & duodenum situm habent; nec infrequens est observatio iracundiæ icterum succedere. Cujus rei non alia dari potest ratio, quam quod spasmus, qui ad ductum cholodochum pervagatus, illum constringit, & hoc ipso efficit, ut bilis in lympham regurgitet. Tali in casu minus aperientia; sed anodyna & sedativa summam adferunt opem; id quod suo jam tempore SYLVIVS observavit. Dein ira sursum protrudit bilem, unde os amaro sapore repletur, & ad vomendum fit cupiditas, constrictio nempe pyloro: unde facillimum erit iudicatu, in ejusmodi casu parum convenire vomitoria, cum ad spasmos teneras ventriculi fibrillas irritent, & ipsos spasmos augendo ad nostrum malum facile viam pandant. Eadem cautio tunc maxime adhibenda, si ventriculus ad spasmos proclivis est, ubi ab iis vel plane abstinendum, vel parcissima in dosi illis utendum. Funesti memini casus, quem vomitorii imprudens usus excitarat. Balneator quidam, ultra sortem suam sapiens, uti genius est horum hominum, feminae tertianæ laboranti vitrum antimonii in substantia ad grana VIII. dederat. Hoc cum adsumsisset mulier, accedente febre,

insigni



insigni vomitus frequentia exercebatur, remittente illa, purgatio & vomitus identidem, cum magna tamen virium amissione, recedebant. Redeunte febre febrisque indivulso comite frigore, purgatio vomitusque repetunt, idque cum summo mulieris dolore ac intoleranda prope anxietate. Cum tertia fieret febris accessio, accedebat rursus vomitus, dolor acerbissimus, & qui suprema instare non obscure significabat: & paulo post summa inquietudo, extremorum frigus, animi defectio & convulsio, postremoque omnium mors ægræ tam occupat. Apertum cadaver inflammationem ostendebat partem ventriculi inferiorem, maculis hinc inde nigris ac rubicundis tam in duodeno, quam intestinis apparentibus. Et quod magis mirandum, antimonii pulvis crustaceæ adhuc tunicæ inhærebat, unde causa mortis manibus fere tangi poterat. Ab adsumto croco metallorum puellam quinque annorum vomitu & convulsionibus vehementissimis præcedentibus fuisse extinctam **BLASIUS** refert *in observat. anatom.* Aperto cadavere angustus & contractus fuit repertus ventriculus, ut ovi magnitudinem vix referre videretur; vesica fellæa præter modum turgida erat, ut ex facili ventriculi inflammatio deprehenderetur.

19. Summa proinde cura artem exercentibus est providendum, ne cum impetu quodam vomitoria rapiant, sed suspensa manu ægris exhibeant. De sanguinis missione in apoplexia adhibenda **CELSUS** dicit, illam vel occidere vel liberare. Idem ego adfirmaverim ut de cæteris medicamentis validioribus; ita etiam de iis, quibus vomitus excitari solet. Est quidem, quod nullum medicamentum ipsis sit præstantius, si tempestivus eorum est usus; & nullum sane perniciosius, & quod proinde formidandum, quam hoc ipsum auxilium. Viderint proinde medici, quam recte faciant, qui ventriculum ita commotum vomitoriis oppugnant ac exasperant: tantum enim abest, ut hæc remedia in hoc adfectu expediant, ut potius do-

lorem atque morbum reddant ferociorem. Prudentis potius medici est antispasmodicis rem aggredi, eoque imprimis adniti, ut spasmodorum vehementia, ac furor omni modo exarmetur. Demus hoc omnino, ipsam naturam pronam ac proclivem tunc ad vomitum videri, & ad hunc urgeri quasi ac stimulari, pyloro nempe fortiter se contrahente: demus etiam ipsos ægros anceps sæpe hoc remedium deposcere; at hæc omnia, quæ medicum ad porrigendum vomitorium invitare possunt, ipsius potius sagacitatem commonere debent, ut omni modo illud respuat rejiciatque.

20. Non minus adfectui nostro adferunt periculum illa purgantia, quæ acriora & valentiora sunt: illis enim eadem est perimendi ratio; spasmis nempe agendo inflammationes in ventriculo & intestinis excitant. Evenit id imprimis iis, quibus prima regio crebris spasmis exercetur, vel qui ob bilem acriorem & copiosiore stomachi inflammationibus sunt expositi. Aliquot ab hinc annis memorabile exemplum in chirurgo hujus loci observavi, qui accepto vehementi purgante ex elateri helborique nigri extracto, nec non ex trochiscis alhandal & gummi guttæ, statim cum magnis torminibus crebriorem alvum dejecit. Circa vesperam frigidæ cerevisiæ aliquot mensuris in cella Senatus oppidani haustis, additisque aliquot taleolis raphani rustici, nocte & insequenti mane de ingenti dolore querebatur cum anxietate præcordiorum, inquietudine, vomendique cupiditate. Accessit paullo post febris, pervigilium, virium defectus, faucium inflammatio cum pituita acri viscida, glandulas obsidente; singultus tandem, supremæ horæ index, secutus ipsa mortem attulit. Nullum hic est dubium, quin inflammatio ventriculi adfuerit, suborta quidem ab acri caustica purgantium refina, firmiter ventriculi tunicis infixæ, quæ continua rosione ventriculum ad spasmos sollicitavit. Inde inflammatio, inde illi dolores, qui ex frigido potu semper morbis spasmodicis



inimico facti sunt intensiores. Novimus etiam exempla, ubi intertiana continua ex fortioribus purgantibus eadem fere symptomata necem intulerunt. Nam in omni tertiana sive simplex, sive duplex & continua sit, spasmi vexant ventriculi regionem, vomitu id ipsum testante. Idem patiuntur ductus biliarii: unde febre hac laborantes, non raro etiam ictero implicantur. Sedulo igitur monendi sunt qui artem faciunt, præsertim tyrones, quibus salus ægrorum curæ cordique est, & qui conscientia consulere cupiunt, ut his medicamentis circumspicte utantur. Quod quidem diligentius ipsis observandum, ubi prima regio ad spasmos proclivis non medio crem inflammationis metum injicit.

21. Nunquam vero solennior frequentiorque inflammatio ventriculi occurrit, quam ubi fuerit venenum causticum adsumtum, præsertim ex minerali regno petiitum. Et hoc nomine famosum est arsenicum, de cuius infelici effectū plures historiae ac observationes a practicis commemorantur. Equidem non negari potest, mercurium sublimatum ipso arsenico vehementius potentiusque esse venenum; nihilo tamen secius, si frequentiam funerum spectes, quæ hoc ipsum dedit, adeo cum illo non certaverit solum, sed etiam facile superaverit. Rara enim sunt exempla, raraque in libris de mercurio sublimato fit mentio quod homines interfecerit; cum contra de arsenico multæ & copiosæ existent observationes. Rationem huius rei si expetis, non alia esse videtur, quam quod arsenici sapor nihil acre causticumque præ se ferat, & ipse hominum error est, quod sæpe propter similitudinem pro saccharo adsumant. Arsenico extincti, ubi illos aperueris, ventriculum inflammatum semper ostendunt, eumque variis maculis, aphthis ac ruboribus suffusum, atque adeo ventriculi inflammatio essentialis veneni corrosivi adsumti signum est habita, & adhuc habetur; sed vix commemoratur etiam ab alia causa proficiens, nisi e veneno, licet illa sæpius ab internis causis

excitetur. Illud tamen memorabile, has inflammationes non proximam mortis causam, sed potius de spasmis testari, qui per totum corpus se diffundentes ordinem vitalium motuum turbant, & hac ratione non dubiam mortem adferunt, ipsa celeritate conspicuam. Iterum hic ad partes mihi est vocandus sed summa cum laude Cl. WEPFFERUS qui in lib. *de cicuta aquatica* hanc rem variis pulcherrimisque comprobavit experimentis. Nam cum ex regno vegetabili & minerali varia venena, variis animantibus vel jam extinctis, vel cum morte adhuc conflantibus, ventriculum arctissime constrictum atque inflammatum deprehendit.

22. Hactenus de venenis externis, quæ imprimis homines formidant, jam ad ea venena transimus, quæ intra corpus nostrum latent, inque ipso generantur. Non minus ab his expectandum periculum, sive vehementiam ac nocendi celeritatem, sive ipsa symptomata ac signa, quæ cum illis habent communia, spectes: ab his enim, uti a ceteris venenis inflammatio ventriculi non raro provenit. Ipsa certe pestis, quæ celerissime præcipitat, non alio modo hominem interimit, quam quod virulentum miasma cum saliva deglutitum, in ventriculo spasmos pariat, & ex spasmis dein inflammationem. Cujus quidem rei testes sunt dissecta cadavera, in quorum ventriculo eschara quædam sphacelosis maculis obducta plerumque invenitur. Porro & ipsa signa ac symptomata, ut animi deliquia, frigidi sudores, summæ anxietates, & denique singulus abunde id testantur.

23. Petechialibus febribus retrocedentibus, vel non expulsis petechiis, a sale acerrimo ortis crebro feralis inflammatio ventriculi sese adsociat, ex essentialibus signis probe cognoscenda. Idem malum quam sæpiissime accidit a podagra intra corpus remanente, cum nempe illa vel externis linimentis intra corpus compellitur, vel deficiente virium robore non foras ejicitur. Tum enim salia acria, intercluso ipsis consueto exitu, ad alias partes



partes divertunt, & periculosa mala, inflammationem maxime ventriculi, excitant. Pessima igitur consuetudo est, quæ inter nonnullos nostri sæculi medicos invaluit, qui externis linimentis sedativis ex camphora, spiritu vini, & opio constantibus, vel etiam emplastris anodoynis sævienti podagrico dolori occurrunt. At quam infelici sæpæ successu ejusmodi remedia adhibeantur, a quibus omnino abstinendum erat, observationes confirmant. Multa novi exempla, quæ hic adferri possent, nisi sequentia sufficerent. Vir generosus non ita pridem in vicinia periit, qui cum per multos annos podagræ sævitiam sustinisset, multis frustra tentatis remediis, medici consilio tandem ad emplastrum Saturninum refrigerans confugit. Placuit quoque ipsi statim hoc dulce venenum, quod ingruentem dolorem in pedibus, pectore, & dorso, admodum egregie levare videretur, eoque ipso per biennium ceu singulari adversus imminentes dolores præsidio utebatur, donec illud tandem fefelit. Ille enim vehementiori ira commotus, statim dolores podagricos emicare sensit, qui jam non amplius pedes & exteriora occupabant; sed ad interiora remeasse videbantur. Nec in obscuro erat, ventriculum imprimis pati, ac ad inflammationem esse pronum. Miræ igitur jam anxietates, febris cum pulsu parvo & inæquali, nulloque somno aderant: non multo post singultus per quinque dies continuus, item ardor faucium cum siti inexstinguibili & anxietatibus, ab adsumto liquido auctis consequebatur. Qua ratione cum nulla spes salutis superesset, novus ab invasione dies dolorum vitæque finem ægro attulit. Manifestum exinde erat non podagram, sed ventriculi inflammationem, quæ totum fere corpus in consensum trahit, ægrum exstinxisse. Materia enim podagrici doloris serum biliosum causticum est, quod glandulosis articulorum membranis insidet: id si motu febrili critico non propellitur, sed spasmus justo maturius sedantur; in corpus regreditur, & in membranaceas in-

primis partes furorem suum effundit, spasmos nempe concitando. Incredibile est, quantis tunc doloribus, quam sævistormentis ventriculus & intestina torqueantur, ita, ut non raro inflammatio & ipsa mors inde sequatur.

24. Similis generosi cujusdam viri valetudo me recordantem in se morari cogit. Hic cum iniqua & longa podagra conflictatus remedium doloris in externis quærere cœpit: admotis igitur linimentis, ex spiritu vini, camphora, & opio paratis, egregie sibi allevatus videbatur; remittente nempe per aliquot annos dolorum inclementia; quantum vero hæc medicina frustrata fuerit, exitus docuit. Proxime enim in cachexiam, pedum tumorem, & quod ceteris pejus, asthma convulsivum, quod ægre curatum est, incidit. Discant exinde medici prudentiores temperare sibi ab ejusmodi remediis, ne pro medicina venenum ægro adferant; discant quoque, summa cum cura ac sollicitudine opium adhibere: hoc enim in podagra imprudenter datum, quantum malorum excitet, præter adducta sequens docebit historia. Vitriarius quidam hujus urbis diu podagræ doloribus excruciat, opii essentiam adsumserat, sperans, hac ratione fractum iri mali vehementiam. Sed falso, paullo enim post podagra in corpore, velut vinculo quodam retenta, summos procreavit dolores, qui infixi velut præcordiis circa cordis scrobiculum, maxima cum anxietate, emicabant. Infirma mox crescebat valetudo, crescebant dolores, & accedente singultu, post gravissima tormenta ægrum conficiebant. Adeo opium non dolores, sed vitam potius exstinxit.

25. Ventriculi inflammatio quandoque etiam eos comitari solet, qui variolis vel morbillis decumbunt: hi enim vel retrocedentes vel ad exteriora minus recte exeuntes ad interiora serpunt, & præcordia ventriculumque maxime infestant. Solet hoc accidere, cum ob malignitatem, tum ob molem peccantis materię, qua hæc exanthemata impedita intra corpus, cum maximo ægri detri-



mento, remanent. Vidimus non paucos variolis discessisse, quibus non alia mortis fuit causa, quam ventriculi inflammatio, quæ ex ardore circa præcordia, virium defectu, extremorum frigore, faucium inflammatione, & singultu denique cognoscebatur. Ita nobilem quandam virginem exspirasse novi, quam morbilli graviter adfluxerant, quibus menstruorum fluxus accedebat. Hunc medicus, ceu minus salutarem sistere tentabat, & sistebat quoque additis & volatilibus spiritibus ad promovendam exanthematum expulsiorem. Prodierant quidem morbilli exigua levatione mali, quod hoc ipso magis accrevisse videbatur. Septimo die magnus ardor & præcordiorum dolor ægram occupat, item pulsus inæqualis & frequens cum delirio & singultu, & his malis ægra occubuit.

26. Dicendum jam erit de bile, magna & non infrequenti inflammati ventriculi causa: hæc enim in cystide fellea re-tenta, sive id ob calculum, ductum illum obsidentem, sive ob spasmus meatus hosce constringentem fiat, facillime adfectum nostrum progenerat. Multa & clara huius rei exempla habuimus, & medicorum quoque comentarii habent; pauca tamen adducere sufficiat. Studiosus quidam temperamenti melancholici, paucis abhinc annis variolis corripiebatur. Erumpebant circa tempus ordinarium variolæ; sed sinistro statim augurio comitatæ, quippe nec attolli, nec in pus abire videbantur. Pauco interjecto tempore æger de anxietate pectoris, dolore exurente præcordia, & summa lassitudine conquerebatur, ut non sine ratione inflammationem stomachi suspicari liceret; nec ita multo post ingravescit malum, fit singultus, & tandem convulsio fatalem adfert moriendi necessitatem. Dissectum corpus omni fere pinguedine destitutum apparebat, nisi quod membranæ, quibus illa alias adhæret, paucis oleosis globulis obsiderentur, idque tam externe super musculos, quam in abdomine, ubi ejus alias observatur copia. Musculosa contra solito durior & ultra mo-

dum grandior ac crassior videbatur; ventriculi fundus totus erat inflammatus; fellea vero vesicula materia, liquidam referente picem, turgescibat, velut cartilagine quadam meatibus occlusis. Hærebant porro multæ guttulæ acerrimæ bilis in hepatis concavo, quæ non minus vesicæ inspersæ erant, & vicinum colon dextrumque stomachi orificium, flavo eoque fædo colore infecerant. Ecquis igitur dubitaret, quin bilis malorum fuerit causa, tum variolarum male procedentium, tum feralis inflammationis & ipsius mortis hanc consecutæ?

27. Idem malum eodem ex fonte procurrens ante aliquod tempus virum egregium comitis cujusdam moderatorem e medio sustulit: hic ex abusu fructuum horæorum tertianam sibi contraxerat, cumque interea nec vacaret morbo, nec a profectionibus, frigidioris cælo, sibi temperaret, mox in pejorem morbum febris est mutata. Me igitur accedens de intolerabili circa præcordia æstu querebatur; hincque meum efflagitavit consilium. Neque vero causa huius morbi mihi latere potuit, quin statim inflammationem ventriculi subesse deprehenderem, quam non obscure, præter ardorem summum, pulsus parvus, durus, & inæqualis significabat. Præterea ab omni liquido pejus se habuit, quibus omnibus & icterus se adjungebat cum sinistro sane omine exsuperandi morbi. Ut primum spectatis remediis obviam itum malo: remittebant modo dolores, modo vehementiores recurrebant. Altero vero die cum adventaret febris, cum majori impetu recrudescebant. Ego interim cum extra urbem excurrere cogerer, mox redux ægrum decessisse cognoscebam. Nec meum fefellit iudicium aperto enim cadavere, ventriculum mire inflammatum inveni. Præter hæc ductus cholodochus multis, iisque nigris calculis obstructus erat; ipsa vero vesicula biliOSO humore repleta. Ex quibus facile intelligitur, non obstructionem solum, sed acrem etiam bilem, nervos hepatis ventriculique irritantem, caus-



causam ictero ac inflammationi dedisse. Adde, quod spasmos jam per se effrenes magis efferaverit, & sumtum fortasse purgans ad causam morbi non parum contulerit.

28. Simile quid in Illustrissimo Comite observare mihi contigit, cum in thermis Carolinis versaretur. Hic summus vir, per biduum sumtis thermarum aquis, statim sentire coepit urinæ suppressionem. Conjectura fuit de calculo vel in ureteribus hærente, vel etiam de spasmō hos ductus coarctante. Optime proinde antispasmodicis & emollientibus ægrotanti subvenire visum fuit. Interim alius adhibetur medicus, qui purgantibus & vomitoriis malum adgredi constituit, ratus nempe, viscidam saburram in ventriculo & intestinis delitescentem causam esse hujus lotii retentionis. Me igitur reclamante, propinat tamen vomitorium, mox satis validum purgans: purgatur æger vigesies, malo interim nihil imminuto. Emulsione tandem data, tanta copia ac vis urinæ instar loturæ carneæ profluxit, ut quinque mensuras impleret. Nono morbi die omnia ingravescebant, summa anxietas, pulsus parvus celer ac inæqualis, & quod omnium pessimum, singultus per duos integros dies continuus. Præter hæc faucium inflammatio cum albißima viscida pituita, fauces obsidente, viriumque languor sequebantur, quibus malis confectus paullo post mortalitatem implevit. Post mortem tumor scirrhusus instar fabæ interne in vesica apparuit, quo tumore ejus orificium obsidente, urinæ fluxus fuit impeditus. Ipsa urina, quæ retenta erat, similis erat loturæ carneæ, ureteres erant extensi, renes flaccidi magni eorumque substantia mollis ac velut dissoluta. Ventriculus cum œsophago vehementi inflammatione erat adfectus; in vesicula vero fellea lapides viginti minores & duo majores in ductu cholodochō hærebant, ex eoque excindendi. Vesica urinaria valde erat turgida in cujus orificio, uti diximus, corpus glandulosum non dissimilis cum prostatica naturæ,

cum quibus quasi continuabatur. Hic tumor a pondere urinæ ex copia thermalis aquæ depressus, firmiter vesicæ ora claudens, contumaciter urinam supprimebat: inde urina restagnans, in renes & ureteres regurgitans humor substantiam corrumperat. His accessit supremum malum frequens ac intempestivus purgantium usus; quæ sine dubio ad flatum atque inflammationem non parum contulerunt. Cæterum vitium bilis ejusque suppressio ob obstructionem ductus cholodochi utique ad ventriculi inflammationem multum contribuit. Bilis enim hac ratione acris reddita per poros vesicæ transfundat, & subjectas partes vehementi adficit ardore. Pulchre RIOLANUS in *enibirid. lib. 1. cap. 3.* scribit: *interdum cystis fellea vicina tangit, tingit ventriculum, ac si titione ardente ureretur.* Nec minus bene PLATERUS *lib. 2. pract. pag. 436.* observavit, ventriculum tingi macula lata lutea: unde perpetuus ventriculi ardor, cujus quidem ardoris causam in bilis vesicula multa bile turgente, & macula lutea deprehendit. Imo nec quidquam frequentius in praxi occurrit, quam ictericos a bile stagnante copiosa, plexus stomachicos & cardiacos arrodentes, vomitus, anxietates & ardores experiri. Quæ cuncta symptomata a spasmis, qui ventriculi regionem lacerant, merito sunt deducenda. Eadem bilis caustica sæpe efficit, ut dysentericæ malignæ inflammatio ventriculi jungatur. Ita post dysenteriam malignam, ventriculi fundum maculi obsitum repertum fuisse PATERSON HAIN in *M. N. C. an. 1671. obs. 115.* scribit. Cavendum proinde in ictero, ne ea adhibeantur, quæ spasmos reddunt acerbiores; cujus generis vomitoria, purgantia, calidiora acria, frigus denique & frigida potiones sunt. Icterus enim sæpe præcedit inflammationem ventriculi, sæpius etiam sequitur. Sic ante aliquot annos generosus vir laborabat febre cum summa anxietate, extremorum frigore & tremore. Quarto die icterus, & septimo mors ipsa ægrum corri-



corripiebat. Neque dubium, duodenum inflammatione fuisse adfectum, unde ob stricturam vehementem ductus chodochi bilis ad sanguinis & lymphæ massam regrediebatur.

29. Sunt & aliæ causæ maxime externæ, quæ ventriculum subita inflammatione adgrediuntur, inter quas frigidus potus inprimis est connumerandus: qui post calefactum prius corpus intemperantius ingestus, quantas excitet noxas, vulgari etiam opinione comprobatur. Nec vero alia hujus dari potest causa, quam quod sanguis motu prius concitatus, accedente frigore, mox in cursu suo sistatur, & intra venas resideat: unde stomacho inflammato, sanguis in copia in ejus vasis colligitur tumore, dolore variisque spasmodis inde concitatis. Omnes enim, qui ex frigido potu moriuntur, inflammatione ventriculi & spasmodis extinguuntur. Memini adhuc quæstoris, qui in Carolinis morabatur. Hic cum contra medici monitum per duas horas balneo usus, dein una vice magnum acidularum poculum, quæ dicuntur BUCHSAVERLING, exhausisset; ex eo tempore, prospera antea fructus valetudine, pessime se habere cœpit. Aderat enim summus ardor, extremorum frigus, somnus inquietus & plane nullus, virium debilitas, ad vomitum nifus, pulsus debilis & frequens. Hæc recensita symptomata ad sex vel septem dies grassata, medicamentorum tandem diaphoreticorum, item infusorum calidorum ope feliciter propellebantur. Simile exemplum vidi in studioso, qui post fortiores corporis in ludo gladiatorio commotionem, & dein copiosius frigidum ingurgitatum potum, gravissimis ventris torminibus, mox solenni præcordiorum æstu vexari cœpit. Hinc quotidie in pejus abeunti malo tertio die delirium, & delirio convulsionem accesserunt; neque multo post æger occubuit, inter lulum jocum causa mortis inventa. Exstant de hoc malo historiæ medicæ, ex quibus unam ex BLASIO in observ. anat. p. 424. adduxisse juvat. Juvenis, scribit, XXIV.

annorum, cum motu vehementiori incaluisse, frigidum potum largius adsumserat; statim conqueri cœpit de maximo dolore pectoris, & ardore circa scrobiculum cordis, & post paucos dies expiravit. In aperto corpore omentum gangrænosum, ventriculusque inflammatus reperiebatur.

30. A vermibus non raro nostrum adfectum provenire medicæ confirmant observationes. Refert HERCULES SAXONIA part. 2. cap. 7. prælect. præct. puerum sexennem ex dolore summo ventriculi obiisse, & dissectum duos vermes in ventriculo exhibuisse. Superiori, pergit, orificio inusta erat macula ex rubro livescens, unguis in digito minori magnitudinem referens, orta a punctione majoris lumbrici, qui ventriculo adfixus causa fuit anxietatis. A causa externa violenta inflammatio ventriculi nonnunquam gignitur. Et ne longi sumus in enarrandis exemplis, suffecerit HILDANI diligentia, qui a deglutita acicula fanesta symptomata suborta observavit vid. cent. 1. obs. 64. A morsu vel ictu bestiarum inflammationem ventriculi nonnunquam proferri, medicorum libri testantur. Non hic quoque reticendum ventriculi inflammationi admodum esse expositos, eaque periclitari maxime illos, qui spongioso laxoque corporis habitu gaudent; & quibus fibras teneras, vasa exilia ac copiosa, succorumque abundantiam dedit natura: in hisce enim ordinario sanguinis progressus est lentior, quippe in spongioso corpore propter fibrarum laxitatem necessarium deficit robur ad fluidorum cursum promovendum. Namque impetus & potentia impulsus in tot innumeris parvisque ramificationibus valde frangitur, indeque tardior fit progressio. Deinde ætas juvenilis & virilis plus cæteris apta est ad inflammationes omnis generis suscipiendas. Hæ enim ætates sensibiliores & ad spasmos maxime proclives sunt. Facit huc etiam succorum copia proveniens in fœminis ex menstruorum vel hæmorrhagiæ criticæ suppressione, vel in iis, qui laute vivunt, ex intermissa sangu-



sanguinis missione, cui alias adsueverunt. Constans enim est hæc regula, plethoricos magis obnoxios morbis, quam qui proportionatam ad vasa in venis alunt sanguinis copiam. Nam animi adfectus, & spasmi facilius in iis generantur, & periculosiores concitantur commotiones.

31. Quod ad curationem hujus mali attinet, hæc ipsa facilius ex suppeditatis causis tradi potest: auxilia enim & remediorum genera & directe & indirecte morborum causis apposita esse debent. Primum itaque in quæstionem venit, num venæsectio in hoc adfectu admittenda sit: cui quidem quæstioni ut satisfaciam, respondeo, illam magis præservationi quam curæ ipsi convenire; cum scilicet metus hujus adfectus est ex plethora aut ex mensium suppressione, maxime venæsectio est amplectenda. Plethora etiam, si manifesta est, & si ex frigido potu, vel febre ardente malum impendere videtur, in principio plane necessarium est, ut sanguis detrahatur. Hoc enim modo sanguinis stasis dissipatur, ipsique sanguinis suus motus reditur; si vero a veneno vel maligno symptomate vel morbo introrsum pulso malum est, tum plus damno erit, quam emolumento. Debilitat enim & vires jam imminutas magis imminuit. Idem tenendum in cachecticis corporibus & macie confectis.

32. Altera quæstio est de purgantibus, an nostro congruant morbo. Elegantissimus vero hac de re locus est HIPPOCRATIS de vict. acut. §. 36. qui sic se habet. *Maxime, inquit, inflammationes, & supra septum transversum dolores, ac morborum collectiones solvi non possunt; si quis prius medicamentis purgare adgre-diatur. Nam venæsectio in talibus principalis est, dein infusa per clysteres; si non magnus & vebemens fuerit morbus. Sin minus etiam postea medicamento purgante opus est; sed & post venæsectiones, pur-gans medicamentum securitate ac modera-tione opus habet. Quicunque vero ea, quæ inflammata sunt, statim in principio mor-borum medicamento solvere tentant (i. e.*

purgante, id enim Græcis est φάπανον) *bi de intento quidem & inflammato nihil auferunt: non enim remittit adfectio, quæ adhuc cruda est; quæ vero morbo resistunt ac sana sunt, colliquesaciunt. Debili vero evadente corpore, morbus invalescit. Quum autem morbus corpori prævaluerit, tale jam incurabiliter adfectum est. Non piguit commemorasse longiorem hunc locum, qui omnia curationis momenta in compendio quasi complectitur. Auctor nempe gravissimus experientia instructus copiosa pulchre demonstrat, neutiquam purgantia in adfectu nostro esse adhibenda: hæc enim medicamenta constringendo tunicas & glandulas, serum extrahunt, fæcesque alvi educunt. Minus vero ea facultate pollent, ut sanguinem hærentem in ventriculi vasis discutere possint; sed potius spasmos augendo malum exasperent. Unde uno quasi ore omnes veteres practici pronunciant, in hoc adfectu purgantia plane esse respu-enda vid. FORESTUM lib. 4. obs. 31. Si vero alvus adstrictior est, expedit adhibere clysteres molles ac lenientes. Quod si vero ex iracundia bilis nimia in copia ad intestina fuerit præcipitata, quæ præsertim acris, materiam præbere potest malo, tunc necessarium omnino, ut illa expellatur, ac ejus acrimonia mitigetur. Quem in finem pulverem ex rhabarbaro, lapidibus cancerorum, & nitro compositum commendo.*

33. De opiatis & anodynis ita censemus omnia validiora ex iis præsertim opiata, uti in omni inflammatione; ita maxime in hac valde esse periculosa: facili enim negotio, sensum fibræ adimendo ad spacelum disponunt. Correcta vero & cum diaphoreticis juncta, præterea principio circumspectius data, sæpe egregio sunt adjumento. Theriacam, quæ opium fermentatum alexipharmacis correctum est, non sine ratione ceu venenorum antidotum antiquitas deprædicavit, idque in ictibus inprimis animantium. Non alia vero ratione prodest, quam quod spasmos tollat, & tranquilliori facto corpore per debitas vias illud ejiciat. Quod si itaque



itaque ex bilis acrimonia caustica, item in passione cholericâ, iliaca, cardialgia ex morfu virulenti animalis, nec non ex vomitoriis vel purgante vehementiori ventriculi inflammatio est metuenda, utique theriaca cœlestis cum bezoardicis, cinnabarinis & nitrosis commixta, utilissima erit medicina.

34. Maxime omnium vero profunt in hoc malo, quæ spasmos leniter sistunt, sanguinemque & humores in circulo suo conservant, & acrimoniam, si qua subest, demulcent. Egregie hoc fine commendari merentur infusa ex herba veronicæ, scordii, floribus sambuci, bellidis, chamomillæ vulgaris & Romanæ, semine fœniculi, radice glyzyrrhizæ; quæ calidissime, licet parcius hausta, egregium promittunt levamen. Calida enim floribus roborata sanguinem in fluore servant & ejus stasim impediunt: unde hæc ipsa præsentissima sunt medicina in ventriculo inflammato ex frigido potu protinus exhibita. Denique nitrofa, quoniam sunt magna antispasmodica, moderata in dosi data in febribus inflammatoriis, ardentibus, cholericis, ipsa peste, morbisque retrocedentibus, ictero, bile acri caustica egregio sunt auxilio & omnibus fere remediis anteponenda. HILDANUS in observ. nitro purificato, in decocto hordei exhibito, pylori inflammatione laborantes curavit.

35. Si inflammatio ex veneno caustico minerali accidisse videtur, tunc nihil utilius est lacte cum oleis expressis tamdiu epoto, donec vomitus desinat. Nulla enim exploratior medicina & præstantius antidotum, quam hoc ipsum est. Cujus excellentiam cum jam CELSUS prædicat, ipse ante aliquod tempus expertus sum. Hospes nempe quidam cum loco sacchari ex errore juscule arsenicum admiscuisset, appposito illo convictoribus suis, quorum nonnulli clari & nobiles erant, in ultimum fere illos conjecit periculum. Omnes enim, qui degustaverant offam, statim summa pectoris anxietate, angustis, dolore, & ad vomendum conatu se correptos sen-

tiebant. Vocatus ego in consilium & cognita mali causa, insignem copiam lactis cum oleo amygdalarum dulcium cuique ægro exhiberi jussi, idque tamdiu, donec vomitus quiesceret. Vomebant ægri per diei dimidium, quidam vel centies, & ingerebatur tamdiu lac, donec nihil amplius veneni superesse videretur. Quibus rebus fiebat, ut recreati anceps periculum, quod ipsis imminere videbatur, Deo juvante, evaserit. Nonnulli tamen, qui justo parcius lac atque oleum potaverant, emollientibus ac oleosis clysteribus adjectis restituti.

36. Ad præservandas inflammationes, a quocunque etiam oriantur, nitrum camphoratum summo est præsidio, vel etiam sequens mixtura: recipe spiritus nitri vel vitrioli dulcis, spiritus cornu cervi volatilis, essentiæ castorei singulorum drachmam unam ad guttas XX. vel XXX. propinandam. Hæc tinctura valde est antispasmodica & in morbis malignis, & quando exanthemata recedunt vel podagra regreditur, magna ex parte implet curationem. Externis quoque remediis nostro adfectui subveniendum. Quo nomine commendari meretur linimentum nervinum ex spiritu vini camphorato, oleo nucis, croco, castoreo, & nitro volatili compositum, vel balsamum nostrum vitæ camphora mixtum; hæc ventri imposita non mediocriter adferunt levamen. Parari etiam potest epithema ex absinthio, mentha, floribus sambuci, rosarum rubrarum, chamomillæ vulgaris, lavendulæ, semine fœniculi, carvi, anisi & aceto rosaceo, quod calide ventriculo admotum egregie stagnationes discutit. Requiritur porro quies corporis & animi, & moderatus calor, victusque tenuis ac mollis. Abstinendum a carnibus, vino, spiritu vini, & circumcidendus acidorum usus. Potui intervi-  
fervire potest cornu cervi cum hordeo decoctum. Meliora vero frigidis sunt calida. Quando extrema frigent, tunc calore atque frictione probe sunt fovendi pedes, & in calidam aquam immit-  
tendi. Hæc ubi rite observantur, multa  
fane



sanè præstare possunt, licet non negandum, hunc ipsum adfectum, si natura imbecillior, acutiorque morbus simul adsit, raro medicinæ viribus exsuperari.

*DISSERTATIO VIII.*

*DE MORBIS HEPATIS EX ANATOMIA DEDUCENDIS.*

*§. I.*

**D**UO nostro quidem sunt iudicio, ad tuto, certo, & cum exquisita ratione excolendam artem nostram scitu summe necessaria, eaque propter omnibus, qui cum laude in ejus exercitio versari cupiunt, plurimum commendanda. Primum ac præcipuum est, exactior machinæ animalis omniumque ejus partium, quoad artificiosissimam structuram, connectionem, & usum, per curate institutum anatomicum scrutinium, acquisita cognitio, qua simul motuum, qui ad corporis vitam & ad functionum integritatem conservandam faciunt, ratio, natura; ac leges cognitæ fiunt atque perspectæ. Alterum accuratiori rerum naturalium, quæ corpori ingentem mutationem inferre possunt, & sine quibus istud durare plane nequit, scientia, physica Græcis dicta, continetur, quæ potissimum institutis variis experimentis, rerum corporearum affectiones, proprietates ac vires evolvuntur, quo eo melius salubria ab insalubribus, quod præcipuum artis conficit momentum, discerni queant. Binæ hæ disciplinæ, si quid aliud, firmum ac stabile artis præbent fundamentum, cui certo ac tuto, qui medicinam facit, inniti & potest & debet. Hæ enim experientiam, quæ sola facile fallit incautos ac decipit, rationalem, certam, atque fundatam reddunt. Hæ errores in vulgari praxi medica admodum solennes manifestant, eorumque originem detegunt. Has qui penitus perspectas habet, quævis in morborum historiis obvia, ardua etiam & difficilioris solutionis phænomena, facili negotio explanare, & ad rationes revocare poterit. His denique

qui instructus est, in quibuscunque etiam ac difficilibus morbis, tutam ac facilem methodum, tam inveniendi, quam applicandi congrua remedia, perspiciet & exploratam habebit.

2. Quo major itaque harum disciplinarum ad salutarem artem excolendam ac perficiendam præstantia est atque excellentia; eo magis utique est, quod miremur, tantum etiam hodiernum doctorum quorundam esse sinistrum iudicium, ut physicas æque ac anatomicas doctrinas, proprie non ad medicum scopum ipsamque artem referendas esse; sed tantum ornare & garrulum reddere medicum acriter, at frivole, contendant. Sed hi fere sunt, qui ex putridis scholasticorum lacunis hauserunt explosum dogma: corpus licet ex variis organis ad motum recipiendum aptis compositum; iners tamen ac mere passivum esse, & a principio, nescio quo, sensu & ratione prædito animari, ac certo ordine, tempore, gradu, ad determinatum finem moveri. Ingeniosa certe capita, quæ si philosophiæ naturalis præcepta & experimentalis producta cognita haberent, nossent utique, corporibus inesse activas motrices vires, & a materialibus rebus externis, alimentis scilicet, elementis, venenis ac medicamentis, magnas corpori humano accidere mutationes has ad vitam, ad sanitatem, ad morborum dispositionem & generationem eorumque curationem, quin mortem ipsam inducendam, maximum & præcipuum conferre momentum; ab earundem viribus & effectibus actiones in corpore nostro vivo unice causaliter dependere, ac medici officium in eo maxime esse positum, ut differentes valde pro varietate corporum earum virtutes & operationes longo usu & experientia addiscat atque pernoscat. Nostri autem instituti ratio jam non fert, ut nobile hoc argumentum pluribus copiose prosequamur; sed hoc duntaxat in præsentiarum asserere ac demonstrare animus est: ignoratam structuram & pensum habitum verum hepatis usum, plurimorum tam in causali



deductione, quam practica tractatione morborum ex jecoris vitio, errorum esse originem; & vicissim, ex accuratiori consideratione fabricæ, officii, nexus atque usus amplissimi hujus visceris, æque solidam affectuum, qui ejus labe nituntur, ætiologiam, ac facilem, certam ac tutam iisdem medendi methodum promi posse ac suppeditari.

3. Exposituris igitur utilitatem maximam, quæ ex penitiori cognitione fabricæ hepatis in praxin, æque ac pathologiam medicam redundat, ordo rerum dicendarum exigere videtur, ut prius ex anatomicorum doctrinis, portiora ad hanc considerationem facientia delibemus & præmittamus. Est vero hepar viscus abdominis amplissimum, in dextro hypochondrio situm, irregularis & inæqualis figuræ, vasculosum, biliosi potissimum humoris secretioni dicatum.

4. Amplissimum diximus hepar abdominis viscus, eo quod non solum amplum occupat spatium, & reliquis fere omnibus imi ventris visceribus obvertitur; sed etiam eximiam obtinet gravitatem, quæ plerumque quatuor vel quinque libras æquat, & accedente præternaturali constitutione, in longe ponderosiores ac majorem molem excrescit. Abdominis autem viscus additur, quia in superiori dextri ejus lateris regione locatum est, ita quidem, ut a spuris costis, diaphragmate & spina, ad anteriorem ventriculi partem, pancreas, duodenum, jejunum, colon, renem dextrum & umbilicum usque protendatur, & a retinaculis quibusdam, ligamentis dictis, suspensum in sede sua detineatur. Scilicet superius appensum est diaphragmati & sterno, illi arctius per ligamentum tendinoso-membranaceum robustum, in ipsa jecoris substantia firmatum, suspensorium vocatum, & huic per vinculum non adeo robustum, ensiformi cartilagini insertum. Interius vero dextrorsum ad costas spiritus per plura ac brevissima stamina in unum demum fasciculum coeuntia amplæ peri-

tonæi areæ laxius annectitur, & exterius sinistrorsum vena umbilicalis fissuræ hepatis implantata istud umbilico alligat, quo hac ratione undiquaque firmatum, sub quavis corporis positura & inclinatione, stationem suam servet, nec unquam in adversam partem nimis ruat. Connectitur tamen etiam vasorum ope cum confinibus partibus, & quidem venæ cavæ productione cum septo transverso, per portæ venam cum liene, pancreate, mesenterio, omento, ventriculo, & denique, interventu ductuum biliariorum, cum ipso duodeno.

5. Sic alligatum & ad diaphragmatis fornicem oblique positum hepaticum viscus, faciem exhibet exterius convexam, interius concavam, pluribus & variis eminentiis, fissuris ac sinibus distinctam, & haud incongrue in lobum dextrum majorem, & sinistram minorem dividitur. Tunicas, quibus obducitur & quæ firmitus ejus parenchymati concreverunt, interius a vasorum involucribus, exterius a peritonæo nanciscitur; præter quas alia firmior robusta musculosa tunica, pariter peritonæi foliis, canalium tam sanguiferorum ex vena porta, quam biliariorum parietes investit, eisdemque una cum articularum ramis involvens, capsula vocatur, ab inventore Glissoniana. Utrum vero interior jecoris substantia glandulosa sit, an vasculosa, lis est auctoribus potissimum MALPIGHIO & RUYSCHIO acriter agitata; facile tamen dirimenda, si modo quis consideraverit, glandulas sic dictas conglomeratas, nonnisi congeriem esse ex variis implicatis & aggregatis canaliculis sub membranis serpentibus compositam, adeoque perinde esse, si quis hepar glandulam conglomeratam; vel viscus ex contortis innumeris majoribus, minoribus, & minimis vasculis conflatum, appellet.

6. Noscum RUYSCHIO hepar dicimus vasculosum, rimaturi jam, unde aber iste copiosissimorum in jecoris parenchymate vasorum concursus. De quo quidem in genere id tenendum: ex venæ

portæ,



portæ, cavæ, & biliariorum ductuum ramis & furculis ipsum hepatis corpus penitus coagmentari. Nam licet dexter arteriæ celiacæ ramus hepatis sese insinuet & in omnem ejus ambitum discurrat; ipsius tamen propagines non ipsam visceris substantiam ingrediuntur; sed vasorum reliquorum involucri tantum irrigant, in iisdemque terminantur, aptum nutritioni sanguinem advehentes & per totam vasculosam texturam distribuentes. Venæ portæ autem, cavæ & canalium biliosorum ramificationes hepatis parenchyma confertim perreptant, implicitæ, junctæ, invicem sese decussantes mutuisque osculis unitæ atque concretæ, & sic vasculosum viscus efficiunt.

7. Ex his potiores & numerosiores sunt, quæ ortum debent venæ portæ, cujus tam quoad structuram, quam officium, plane singularis est ratio. Quum enim venæ reliquæ omnes ex minimis furculis in truncum abeant, porta id sibi peculiare servat, ut, priscis jam notantibus, arboris figuram apprime referat, & innumeris ferme radiculis, venis scilicet mesaraicis, hæmorrhoidalibus internis, epiploicis, gastroepiploicis, gastricis variis, vasis brevibus, pancreaticis, splenica, omnibus prope modum abdominis visceribus implantata, in ampliores primum duos canales & demum truncum crassum coeat, qui denuo in quinque plerumque ramos divaricatus, hepar in centro concavæ partis, in sinu a duobus lobulis *πύλαι* dictis efformato, ingreditur, ubi in quamplurimos furculos explicatur, qui universum parenchyma perreptant. Deinceps in eo quoque singularis venæ portæ est structura, quod licet valvulis destituatur; tunicam tamen, venarum crassiorem & arteriarum æqualem, paullo antequam hepar subit, induat, eademque vestita quaquaversum feratur. Officium vero hujus venæ si expendimus, duplex est atque diversum ab aliarum venarum functione. Porta enim, non solum, quod omnium venarum est, sanguinem ex partium compage,

intestinis nempe, ventriculo, liene, mesenterio, pancreate, & omento, ad cor reducendum recipit; sed arteriæ etiam vices subit, dum collectum in sinum cruorem ad hepar advehit, eundemque ex protensis, copiosis ramulis per totam jecoris substantiam iterum diffundit.

8. Post venam portæ cava contemplanda, cujus truncus foveam hepatis superiorem in postica parte, ubique parietibus illius annexus, trajicit, & sanguinem a nutritione residuum, nec non per portam advectum, a scorii biliosis liberatum, ex hepatis parenchymate colligit, & ad cordis sinum revehit. Tendunt videlicet dimissi e cava ramuli e superiori hepatis parte ad inferiorem, & ascendentes portæ ipsis semper amplioribus ramis occurrentes, iisdem lateraliter inseruntur, & sanguinem puriorem ac fluidiorem ex his absorptum, ad trunci alveum transmittunt, cordi iterum infundendum. Accedunt biliarii ductus, per hepatis compagem numerose disseminati, ac eadem quam portæ rami, firmiori tunica per capsulam obducti. Sunt hi portæ propaginibus continui, iisdemque incumbentes, aut minimum proxime adjacentes, iter legunt, & exceptum osculis biliosum humorem ex minoribus in majores alveos trudent, ductuique hepatico infundunt, ex quo per communem cholodochum demum cystidem præterlabens in duodenum eructatur.

9. Præter uberem canalium sanguinem & biliosum liquorem vehentium apparatus, hepar quoque instructum est copiosissimis lymphaticis vasis, quæ tam interiorem, quam exteriorem ejus superficiem obsident. Hæc omnium optime & accuratissime post RUDBECKIUM & BARTHOLINUM exposuit NUCKIUS, qui se plus quam trecentos ejusmodi aquæductus in gibbosa parte numerasse testatur. Qui per convexam hepatis partem serpunt, ex sola extima hujus visceris membrana incunabula trahunt, & in pauciores alveos aggregati, per ligamentum suspensio-



pensorium tendentes, ductui thoracico sese insinuant. Qui vero in concava parte observantur, ex infima & profundiori jecoris substantia; non vero glandulis conglobatis in infima parte locatis emergunt, & hinc per pancreaticis portionem, inter duplicaturam peritonæi in commune lymphæ receptaculum, cisternam, humorem exonerant.

10. Nervi denique per hepatis compagem distributi sunt pariter multi & eximii. Ortum hi ducunt, tam ab intercostali dextri lateris ramo, quam octavo vago pari. Illi quidem proxime, ubi diaphragma superarunt, divaricantur, & tam ad vesiculam fellis & ductus biliaris tendunt, quam juxta tractum arteriæ hepaticæ, eandem cingentes, explicantur. Hi autem ab orificio ventriculi sinistro protensi, cum illis infima parte uniti, plexum constituunt hepaticum, qui surculos quaquaversum dimittens, cum lienari, mesenterico, stomachico, & orificio superiori ventriculi communionem alit haud exiguan.

11. Jam, si perspecta hepatis artificiosa & peculiari plane fabrica, porro scrutamur finem, in quem hæc omnia ita efformata; is utique primarius est, humoris recrementitii sulphurei visceri, biliosi dicti, e sanguinis massa secretio. Quum enim non solum per ingesta variæ heterogenæ indolis materiæ nutritioni minus aptæ corpus ipsumque sanguinem subeant; sed etiam perenni & intestino & progressivo motu laudabiles quoque & utiles partes ita atterantur, discerpantur ac subtiliscentur, ut demum in recrementa fatiscant; necessarium utique erat, quoad conservandam corporis integritatem jugiter e sanguinis connubio ista purgamenta segregarentur, succique intemperati præstarentur. Hoc itaque ut perficeretur, præter renale cribrum & sudoris colatoria, constructum etiam est hepar, viscidarum, pinguium, & sulphurearum materiarum separationi dicatum, tam amplum, quo universæ sanguinis massæ depurandæ sufficeret,

tam numerosissimis vasis refertum, tam mira vasculorum advehentium, secretum suscipientium, & residuum purum sanguinem adcorreduentium fabrica, connexione & distributione conspicuum, quo biliosi humoris non solum sufficiens, sed prompta etiam & expedita in ejus compage succederet secretio. Hunc in finem sanguis adducitur crassior in pancreate, intestinis, mesenterio & per luxuriantes passim lymphaticos canales, fluida substantia orbatus, quo recrementitia materia ad separationem magis congeratur & propius coeat, quin tardo admodum itinere, post toties in alveorum curvaturis fractum impulsus, mediante vena pulsu carente sanguis advehitur, ne citiori transitu sordes simul abriperentur & secretionem subterfugerent.

12. Et hæc est primaria utilitas, quam corpori præstat hepaticum viscus, præter quam adhuc magis secundarii usus sunt, quorum primus, quod ventriculum calore fovens, digestionem secundet. Scilicet quamplurimis experimentis compertum est, miram caloris humidi arctius inclusi ad intime dissolvenda durissima etiam corpora esse efficaciam, adeoque, quin idem in stomacho succedat, non est quod dubitemus. Dum enim ventriculo ex una parte accumbit hepar, ex altera lien, calidissima ambo ob sanguinis copiam viscera, eundem quadantenus operiunt & orificiorum occlusionem proritant; halitus calidi humidi ab iisdem, quo minus dissipentur cohibiti, efficacissime agunt in contenta eademque intimius recludunt, ut accedente peristaltico ipsius ventriculi motu, promptissime in pastam fatiscant chymosam. Et hinc est, quod animalia, quæ jecur majus, & ventriculum ejusdem lobulis strictius circumdatum gestant, voraciora magisque famelica esse observentur.

13. Deinceps utilissimum quoque hepatis est munus, quod sanguinis moli exundantis præbeat diverticulum. Amplum enim & capax ejus est corpus, expansilis & distensionem obsecundans ejus

com-



compages & ex quamplurimis corporis partibus per portam & coeliacæ arteriæ ramum ad istud affluxus, ut tertiam, & quod excedit, sanguinis in toto corpore partem comprehendat. Quare si sanguis copia redundat, aut nimis re-  
 factus in alveis æstuat, & periculum est, ne soluto vasorum elatere, ruptura fiat aut cursu intercipiatur; patent hepatis portæ, & moli facilius cedentes, aliis partibus molestum suscipiunt atque recondunt. Elucescit potissimum hoc hepatis officium ex eo, quod animalia, quæ copiosiores & calidiores sanguinem in venis alunt, jecur majus obtineant; ac vicissim in quibus parcius est, vel abundans pinguedini insumitur, minorem ejus molem exhibeant. Neque minus experientia constat, crebrius sanguinis contingere stillicidium, si hepar obstructum, aut lien infarctu laborat, nullam aliam ob causam, quam quod obice hic posito, cruor ad alia loca impetuosius divertat ibique erumpat.

14. Quæ omnia uti tam clara atque perspicua patent, ut a nemine in dubium vocari possint; ita fictitium utique est officium, quod nonnulli comminiscuntur, qui antiquata recoquentes, cum veteribus hepatis sanguificationis tribuunt negotium. Nimirum autumant, venas mesaraicas haud multo minus chyli imbibere & ad hepar transmittere, ibi in sanguinem coquendum & cordi insinuandum, quam ipsa lactea, eaque propter hepar tantum non cordis & cerebri officium superare contendunt. At vero neminem certe, qui ipse cadavera curate lustravit, in assensum pertrahent, nisi prius vias, per quas chylus mesaraicas subit, & sic ex intestinis ad hepar transfertur, in homine monstraverint. Nam notissimum est, omnia sanguifera intestinorum vasa, in nervea eorundem tunica terminari, nerveæ instratam adhuc esse villosam cum osculis lacteorum & excretoriorum. Si itaque, prout nonnulli haud exigui intermedicos nominis viri suspicantur, chylus per mesaraicas venas ad hepar transfret; necessarium utique foret, ut hic succus

non solum villosæ tunicæ poros permearet, & sic ad nerveam primum penetraret; sed etiam deinde per nerveam & mesaraicorum tunicas alveis ipsis sese insinuaret, & demum ad hepar volveretur: quod vero de chylo crassiori multisque rudioribus particulis repleto liquore sibi persuadent, merito plane non probabile videtur. Quod si etiam quispiam opinari velit, forsitan chylum, haud secus quam ex quorundam mente sanguinem, interstitiis fibrarum insinuat, patulis venarum osculis, mediante tonico motu, intrudi & ad portæ venam agi; post toties tamen totiesque factas in vasa injectiones, in confesso est, arterias cum venis in universo corpore continuos constituere canales, & ex illis immediat in has sanguinem traici, nisi quis evidentissimis veritatibus præfracte contradicere haud erubescat. Largiamur autem tantisper, venas mesaraicas chylum recipere; id omnino prona inde fluere consequentia: easdem modo chylum, modo sanguinem vehere; quod tamen nemo unquam vidit. Posito porro, mesaraicas ex intestinis chylum ad hepar traducere; longe utique promptius & copiosius ingesto largius potu imbibent tenue liquidum, id citissime ad jecur mittent, eoque bilis secretionem, ad quam crassior sanguis requiritur, eximie turbabunt, & sanitas detrimentum capiet, quod dictu vix credibile.

15. Exposita sic hepatis fabrica & naturali constitutione, evoluta quoque genuino ejus usu atque officio; expedita nunc & facilis via est, ad præternaturalem statum pernoscendum & morbos, qui hujus visceris labem nituntur, ex allatis deducendos. Ex his enim cuivis innotescit, nullam corporis partem tam numerosissimis, majoribus, minoribus, & minimis canalibus, maxime venosis, esse repletam penitusque compositam, quam hepar: unde patescit, nullum aliud in corpore viscus tantam sanguinis copiam simul capere, ac ipsum jecur. Nunc exploratum est, tardius quam ullibi spissiore tantisper cruorem, per hepar trajici. In plano por-



ro est, hepar amplissimum viscus, paucioribus pro mole sua instructum esse nervis, non per ipsam substantiam, sed arteriarum tantum & potissimum bilioforum ductuum tunicas distributis, eaque propter non adeo exquisito sensu pollere. Perspectum denique habemus, hepaticum viscus non solum ambitu suo quamplurimas abdominis partes propius contingere; sed etiam cum iisdem tam nervorum, quam in primis vasorum interventu, consensum alere exquisitissimum. Hæc qui explorata tenet, is certe facili negotio morborum, qui ex hepatis vitio ortum trahunt, causas & symptomata ad rationes solide revocare, accomodam iisdem medendi methodum poterit invenire.

16. Sunt vero permulta omnino vitia, quæ in jecur cadunt, & tam ipsum ejus corpus occupant, quam ex eodem tanquam sede in alias corporis partes redundant; omnia tamen, si violentiam illatam exceperis, intercepto fluidorum per ejus compagem cursu continentur ac foveantur. Et primo quidem frequentissimæ observationis est, sufflaminari in hepate sanguinis progressum. Nam licet succussoria hepatis a diaphragmate sub respiratione commotio, nec non communicatus venosis ductibus a discurrentibus per earum tunicas arteriarum ramificationibus impulsus, ipsumque robur tunicarum venæ portæ, sanguinis cursum haud leviter adjuvent; nihilominus tamen, dum cruor lentescens appellitur, vena, pulsu & valvulis destituta, eundem advehit, isque in innumeros capillares ductus, per universam compagem dimittitur, insita jam certe haud levis ad stagnationem & infarctum est dispositio, cui si accedit redundantia, & ob parciolem potum, vitam sedentariam, ingesta liberalius acida & vini spiritum lentor sanguinis, fractum quoque per animi ægritudines, mentis fatigationes morbosque prægressos, partium ipsiusque hepatis robur; ex facili utique vasa infarciuntur, & sublata proportionem ad motum, sanguis segniter trajicitur, & passim in

canalium alveis stagnat. Et hæc morbofa hepatis constitutio plerumque comitatur, vel potius antecedit morbos chronicos, & nonnunquam ita incrementum, ut arteriarum ramuli in aneurismata, maxime vero venarum propaggines in varices fornicentur, cuius rei exempla MORTONUS, VESALIUS, nec non BIANCHI de arteriæ celiacæ aneurismate memoriæ prodiderunt. Quin nonnunquam ob lentioris progressum sanguis plane in polypos concrevit, & latius serpente obstructione, hepar adeo grandescit, ut duplo & quadruplo naturalem molem superet, & diaphragmate cum ventriculo deorsum coactis, dolores & spasmi, diaphragmatis tensiones, difficilis spiratio, & inclinatio ad vomitum, cum magno sanitatis detrimento oboriantur.

17. Quo frequentior autem & familiarior hepatis est ejusmodi infarctus, si ve frigida oppletio; eo rarius vel plane non in illud cadit calida obstructio, si ve stasis inflammatoria. Sunt quidem inter veteres atque recentiores plurimi, & tantum non omnes, qui de inflammatione hepatis multa sermocinantur, eandemque ex febre, ardore, dolore acuto circa regionem hepatis, dijudicare fatagunt, autumantes, eandem admodum periculosam esse & facile in sphacelum abire, ideoque non tantum venæ sectione, sed etiam internis æque ac externis balsamicis, inflammationi & putredini residentibus contra eandem pugnandum esse serio injungunt. At vero si paullo penitius hepatis fabricam contemplamur, eandem inflammationi concipiendæ plane non aptam esse deprehendimus. Nimirum hepar ob nervorum & membranarum nervosarum defectum, rudi admodum sensu præditum, ita ut etiam mirum in modum distento eodem & infarcto, præter gravitatem quandam nihil ferme doloris percipiatur; inflammationes autem non nisi partes nerveo-membranaceas sensibiliores, cujus generis ventriculus, intestina, meninges ipsique pulmones sunt, corripunt, eo quod, si sanguis copiose cum impetu in vasa capil-



capillaria adactus & firmiter obhærescens, fibras & membranas nerveas premendo ac distendendo dolorem suscitatur, quem spasmus & strictura subsequitur, quæ coarctativa fororum alvei, affluentem sanguinem non admittunt, eodemque ad majores canales represso, calor partis cum tumore ac dolore inducitur, quod demum totum genus nervosum in consensum trahitur & sic febris accenditur. Accedit, quod quum ad inflammationem ciendam fortiori opus sit sanguinis appulsu & congestione, quo vasa magis quam par est distendantur & distorqueantur; ad hepar vero sanguinis tarde admodum per venam impulsu destitutam deducatur; clare pateat, hanc venam ad inducendas inflammationes plane non aptam esse; sed ob minorem renitentiam atque tensionem moli cedere, ac potius infarctum & lentam stagnationem, quam stasim inflammatoriam contrahere.

18. Deinceps ipsi illi auctores, qui hepatitidis mentionem injecerunt, incomplete admodum & valde obscure acutæ jecoris affectiones descripserunt, & minus curate discrimen notarunt inter inflammationem, quæ in ligamenti hepatis & reliquis externis jecori adjacentibus hypochondrii dextri partibus occurrit, & inter illam, quam in ipsum hepar cadere volunt; eaque propter haud injusta suspicio est, eosdem inflammationem in pleura & circa costas, vel in peritonæo & musculis abdominis, pro hepatis in convexa parte phlegmone habuisse, vel etiam si duodenum & ipsi annexi ductus biliarii, nec non pylorus inflammati fuerint, convexam hepatis partem sideratam falso credidisse; in primis quum in tot auctorum monumentis nulla plane deprehendatur observatio, quæ clare & sine dubitatione facta dissectione defuncti doceri possit, in antea sano viscere hepatis subito inflammationem cum ingenti dolore, siti, æstu, febre acuta, lethalem fuisse obortam.

19. Nos igitur hepatis phlegmonem, si non in non entium, tamen rarissimorum affectionum classem merito referimus, &

solicite externarum ab internarum partium inflammatione distinguendam esse inculcamus, ne recte monente FORESTO lib. XIX. de hepat. affect. imponatur tumor dextri hypochondrii medico, tanquam sit in jecore affectus, quum tamen sit in musculis abdominis. Omnia enim illa symptomata, dolor scilicet dextri hypochondrii, cum anxietate spirandi, inquietudine & febre acuta, non nisi inflammationem partium, quæ spurias costas cingunt, & quibus hepar annexum obtegatur, produnt, & affectus recte ut pleuritis, sic etiam hepatitis spuria vocari potest. Neque etiam hæc inflammatio tam a sanguine stasim concipiente, quam potius a sero acri, nerveis his partibus firmiter inhærescente, oboritur, & quasi rheumatismi species est. Et licet multum periculi alere videatur, quia ob dolorem in consensum trahit diaphragma cum musculis intercostalibus & febre continua stipata est; nihilominus tamen, si prudenti medicatione excipitur, omnis periculi expers est, & tempestivo antispasmodicorum, blande diaphoreticorum, sique ere est, venæsectionis usu, junctis simul externis discuti-entibus ac emollientibus, intra septem vel undecim dies ut plurimum discedit.

20. Sed quia hæc a me in dissertat. de hepatitis inflammatione vera rarissima, spuria frequentissima, fusius excussa sunt, pergo jam ad lustrandum abscessum & sphacelum hepatis; de quibus passim in scriptorum medicorum monumentis fit mentio. Utrosque post hepatitidem in hoc viscere subnasci, communis quidem fert opinio; sed si modo memorata momenta curatius pensitamus, erroribus eandem accensendam & longe aliam horum vitiorum generationis rationem esse patet. Scilicet ne de illata externa violentia dicamus, nonnunquam evenit, ut ex hepatitide spuria, intra membranam peritonæi, vel musculos abdominis consistentem, oboriatur abscessus, quo rupto, pus in convexam hepatis partem effunditur, ipsumque hoc viscus, ni matura apertione evocetur, egreditur, corrumpit & putrilagine inficit; id quod



exemplis confirmant FORESTUS lib. XIX. de hepat. affect. obs. 10. M. N. C. Dec. II. obs. 11. nec non COITER in observ. anatomico-chirurg. Est tamen etiam ipsum hepar abscessibus producendis idoneum, qui vero lentius gignuntur & plerumque hepate obstructo & in tumorem elevato, sub chronicis potissimum morbis, ut hydrope & hectica, enascuntur, a sanguine lentefcente parti inhærente, sensim substantiam excavante & in pus abeunte, producti. Inprimis frequenter in observatis medicorum sunt casus, quod post graviora capitis vulnera, cum effusione humorum sub calvaria, post mortem in hepate abscessus reperiantur, cujus phænomeni rationem hanc BIANCHI in histor. hepat. pag. 147. affert: quod absorpta in canales & sanguini insinuata purulenta materia & delata ad hepar, in quo lentior sanguinis cursus & viscidarum sordium solennis secretio, sanies simul per idem colatorium alliciatur, & deficiente ad expulsionem potentia, in eodem obhærescat & abscessum formet. Insanabiles autem plerumque quidem sunt hepatis abscessus, præsertim si intimius ipsum viscus obsideant, & agris hectica febre tabescentibus demum mortem inferunt; nihilominus tamen TULPIUS, HARDERUS, BECKERUS aliique exempla consignarunt eorum, qui rupto abscessu & effuso per cholodochum in intestina pure, eodemque per alvum aut vomitum excluso, convaluerint.

21. Eadem ferme sphaceli in hepate est ratio. Hunc enim indivulsam magnæ inflammationis pedissequam esse, plurima medicorum turba censet. Verum frequentioris certe observationis est, sphacelosam corruptionem oboriri sine præcedente gravi æstu vel tumore, & sine causa externa violenta, & inprimis in senili imbecilli corpore extremos pedum apices corripere, funesto plerumque eventu. Quare quin etiam interne in visceribus idem sine prævia inflammatione, maxime in parte per quam tardius sanguis iter legit, & ubi ad corruptionem pronus est sanguis, fieri possit non est

quod dubitemus. Testatur sane experientia, haud raro sphacelosam corruptionem in corporibus, quæ graviori animi affectu, diuturno inprimis mœrore, confecta & viribus exuta, ex longa sanguinis in hepate a debito tono defecto stasi oboriri, & præcedente febre hecticam mentiente, demum cum summa virium prostratione & singultu mortem inferre. Ejusmodi exemplum narrat DODONÆUS observat. cap. III. Ante viginti, & quod excurrit, annos ipse vidi in Consiliario. Is per diuturnum tempus mœrori nimium indulserat, & primum in virium jacturam cum appetitus prostratione incidebat. His complicabatur calor lentus cum pulsu celeri ac debili, donec accedente tandem singultu & conatu licet irritato ad vomendum, elapsis quatuor hebdomadibus placide expiraret. Aperto post mortem cadavere, hepar corruptum, instar picis nigrum cum fœtore apparuit, infecta simili labe diaphragmatis, quæ hepati adhæret, nec non anteriore ventriculi parte.

22. Quemadmodum autem hæc hepatis vitia sanguini potissimum stagnanti & corrupto ortum debent; ita nonnulla etiam sunt, quæ ex intercepto lymphæ progressu natales ducunt. Rarioris paullo observationis casus sunt, ubi hepar a copiosius secreta lymphæ, & non in aqueductuum alveos recepta, sed per textentium fibrarum interstitia exundante, intumescit, & tumore quasi œdematoso totum afficitur, quem jecoris affectum præter alios inprimis annotavit GLISSONIUS in anatomia hepatis. Frequentissimum autem hepatis appendi aquosos tumores, hydatidem vocatos, dum scilicet aut remissæ lymphaticorum fibrillæ, a concluso inter binas valvulas humore, exterius urgentur, sensimque ampliatæ sacculos & vesicas efformant, aut ipsa lymphæ inter substantiam & tunicam hepatis effusa membranam elevat & subtus colligitur; id quod plerumque, si majores paulo minusque pellucidi aquosi tumores jectur obsident, factum esse observatur.

23. Porro etiam lymphæ lentor & præternaturalis spissitudo, ejus per hepar iter, modo



modo levius; modo gravius, remora-  
tur. Videlicet non adeo insolitum, sed  
chronicis plerumque morbis complica-  
tum, lymphaticum humorem sanguini  
adhuc permixtum, variis de causis spif-  
fescere, & secedentem ex ejus connu-  
bio, passim in hepate obhærescere, ita  
tamen, ut medicamentorum ope, vel  
temporis successu, iterum in motum  
cieri possit. Quod si non contingit, sed  
lymphæ, dissipata magis adhuc fluida  
substantia, ad majorem crassitudinem  
redigitur; concretiones fiunt irresolu-  
biles, quas pro materiæ concretæ ha-  
bitudine, atheromata, steatomata &  
melicerides vocant, quarum exempla  
notarunt, GLISSONIUS l. c. SEGE-  
RUS, WELSCHIUS & BIANCHI  
l. 1. pag. 153. Gravissimum denique ob-  
structionis lymphaticæ in hepate genus  
est induratio & scirrhus. Ambo oriun-  
tur, quando distentis nimium alveis,  
contentus humor quiescens omnem peni-  
tus fluiditatem exuit, ipsæque tunice  
crassescunt; ita tamen, ut induratio  
magis intimiora visceris occupet & la-  
tius porrigatur; scirrhus vero in exte-  
riori parte membranacea vasisque exte-  
mis obhærescat, occallescentibus peni-  
tus, ac in cartilagineam substantiam de-  
generantibus membranis.

24. Atque hæc sunt præcipua, quæ  
hepatis viscus infestant ac obsident, vi-  
tia. Quorum quum ea sit ratio atque  
indoles, ut ex intercepto humorum cur-  
su pullulent, adeoque facili quidem ne-  
gotio arceri, aut prima statim in herba  
jugulari possint; contra vero invalescen-  
tia & confirmata difficulter vel plane  
non sanationem recipiant; patet utri-  
que, palmariam medentis curam eo diri-  
gendam esse, ne hostem tam periculosum  
admittat; sed inoffensum sanguinis re-  
liquorumque succorum per hepar progres-  
sum præstando, tempestiva ope corpus  
ab ejus incursu muniat. Quemadmodum  
vero, secundum GALENI edictum, om-  
nis curatio per medicamenta etiam sele-  
ctissima inanis & supervacua est; nisi recta  
atque exquisita victus ratio accedat, quæ  
profecto, tutissima ac certissima ratione,

*Opusc. Patb.*

morbos averruncat; ita etiam perpau-  
cis hoc loco subicere e re erit, quæ-  
nam ex rerum sic dictarum non natu-  
ralium censu ad hepatis vitia averten-  
da, & viscus hoc saluum & integrum ser-  
vandum salutaria sint atque idonea,  
& quænam vicissim evitanda.

25. In harum itaque numero, quum  
ad vires frangendas, tonum viscerum  
dejiciendum, functiones eorundem la-  
befactandas, sicque ad chronicas passio-  
nes promte arcessendas, nihil pernicio-  
sius sit crebrioribus animi turbis ejusque  
fatigationibus & diuturnis ægitudini-  
bus; contra vero ad motus, qui vitæ &  
sanitati præfunt, integros servandos, ro-  
bur fulciendum & incolumitatem, custo-  
diendam, nihil aptius magisque proficu-  
um, quam menstrua tranquilla, sedata, & ab  
omnibus curis affectuumque intemperan-  
cia immunis; huic ut summa opera stu-  
deant, omnibus serio est injungendum.  
Deinceps commendanda quam maxime  
aeris puri ac temperati usura, quippe  
qui genuinum pabulum fluido subtilissi-  
mo, quod motum corpori præstat, sub-  
ministrat, fluidorum cursum moderatur,  
eorumque texturam illibatam servat. Fu-  
giendus autem intemperatus, humidus  
& infestis exhalationibus refertus. Por-  
ro quia ad præcavendas, nec non rese-  
randas obstructions, ipsumque sangui-  
nis progressum per vasculosam structu-  
ram promovendum, nil utilius atque præ-  
stantius convenienti motu & exercitatio-  
ne corporis; hæc pariter ad abigenda he-  
patis ex infarctu vitia, omnibus aliis a-  
peritivis, laxantibus & sanguinem depu-  
rantibus, longe superior & anteferenda  
est. Præterea esculentorum delectus  
instituendus: in quo quidem non tam  
qualitatis, quam potius quantitatis ratio-  
nem habendam esse censemus; quum, li-  
cet optimi sint cibi; copiosius tamen in-  
gesti, mole stomachum aggravant, ne-  
que penitus comminuti, cruditates in-  
gignunt naturæ infestissimas; ut adeo  
semper quantitas ingestorum ad corporis  
vires dimetienda sit, ne debiles & imbe-  
cilles ciborum copia gravius lædat, &  
digestione vacillante, separatio utilis



ab inutili, ipsaque recrementorum egestio intercipiatur. Denique maximum certe ad sanitatem tuendam momentum in potu repositum, utpote qui fluiditatem succis concilians, sufficiens esse debet: quandoquidem ad bonum ac nutritioni accommodum chylum constituendum, fluidum septupla minimum portione solidam in alimentis massam superare debet, prout ex lactis examine patet. Sit vero etiam salubris, hoc est tenuis, qui neque ventriculum inflat, neque caput petat, sed expedite emunctoria subeat & secretiones cum excretionibus secundet.

26. Inter diætetica jam memorata sanitatis præsidia referendus quoque aquarum foteriarum usus: de quo quidem candide & confirmatius asseverare possumus, eodem dextre atque prudenter instituto, ad declinandas omnes, quæ viscerum obstructione nituntur, passionēs, ipsumque infarctum submovendum, nihil esse præstantius, nihil certius, nihil efficacius. Quum vero non una eademque salubrium fontium ratione elementorum sit indoles atque virtus, sed aliæ aliis, pro diversitate corporum & dispositionis ad morbos, sint meliores ac præstabiliores; summopere utique necessarium, ut medicus antequam ad eorum usum descendat, plenam & exactam eorundem habeat cognitionem, quo in tam eximio mineralium aquarum proventu, certa cum ratione, quæ magis ex usu sint, suadere, & ad illum, quem intendit, scopum consiliis suis dirigere possit. Nos quidem ad referenda obstructionum in hepate repagula, hoc discrimen & hanc cautionem servamus, ut ad instituendas, prout solenne est, vere & autumno curationes, acidularum vel thermarum, quæ paullo validioris sunt naturæ, uti ex acidulis Pyrmontanæ & Egranæ, ex thermis Carolinæ, usum ad aliquot hebdomades protractum inungamus: pro potu vero ordinario, si res postulat, per integrum annum, quæ mitioris sunt indolis, ut Selteranas, Wildungenses & Emsenses cum exoptatissimo successu commendemus. Est enim medicatorum horum fontium ea vis atque facultas,

ut non solum crudos & impuros ventriculi & intestinorum canali inhærentes succos diluant, abstergant & per alvum exturbent; sed etiam tenaces & viscidos in sanguine, vel in viscerum penetralibus stabulantes humores dissolvant, & fluidos reddant, partes simul excrementitias salino sulphureas ipsis admixtas diluant & contemperent, tandemque quæ crassioris sunt naturæ, per renale cribrum, quæ vero tenuioris indolis, per cutis spiracula eliminant.

27. Quum vero non omnibus foterios fontes adire integrum sit, neque etiam eorundem copia ubique obtineri queat; in quæstionem venit, quænam alia præsidia horum in locum commode surrogari possint. Nos promimus consilium, ut exclusi ab huius remedii usu, alias puras & leves, & si conditio locusque feret, martialis prosapiæ aquas seligant, easque vel calide herbis roborantibus & aperientibus loco thee infusas mane bibant, vel etiam easdem tepide ad aliquot libras mane potent, adjecta drachma una vel altera salis aperitivi, quale confici potest ex solutione oculorum cancri, terra foliata tartari, tartaro vitriolato, arcano duplicato, nitro antimoniato, sale Sedlicensi, polychresto absynthii & quæ sunt huius generis plura. Possunt quoque radices quinque aperientes, & ex herbis nasturtium aquaticum, beccabunga, chærefolium, sero lactis, vel jusculo carnis incoqui, ac ut eo certior atque præstantior effectus sublequatur, mitior martis tinctura, ut est pomata vel cydoniata, instillari decocto, idque sufficienti copia, subjuncto debito ratione motus & diætæ regimine, potari. E re tamen etiam est, ut his remediis interponatur interdum usus pilularum balsamicarum leniter aloeticarum & helleboratarum, quarum virtus in roborando dejecto viscerum tono, atque in promovendis excretionibus longe est spectatissima.



## DISSERTATIO IX.

## DE PULSUUM NATURA GENUINA DIFFERENTIA ET USU IN PRAXI.

## §. I.

**Q**uemadmodum in medicina a multis retro sæculis, tanta opinionum & interpretationum dissensio atque discordia fuit, ut nihil fere a dubiis & difficultatibus manserit intactum, nihilque constans ac firmum exstiterit; ita illud ipsum evidentissime cernere licet in practica illa de pulsibus materia, que quo utilior & magis nobilis est, eo majoribus etiam dubiis & dissidentibus opinionibus involvitur. Ita complures etiam ex recentioribus reperiuntur, qui circa pulsus physiologiam non similes, sed contrarios sœvent conceptus, cum dubitent, an motus ille, qui tactu in arteriis percipitur, sit systole vel diastole, item, num cordis & arteriarum motus temporis momento sit unus idemque. Alii & maxime veteres innumerabilem pulsuum differentiam insinuant, quæ plane inutilis, & subtilitatibus multis metaphysicis Herophilæis referta est, quarum plurimæ nec tactu percipi, nec intellectu possunt comprehendere. Alii ex adverso nimium constringunt pulsuum differentias, & duas vel tres tantum in praxi admittere volunt. Nonnulli certas pulsuum species pro una eademque habent, cum alii contra distinctionem harum in praxi pernecessariam, & confusionem summe perniciosam urgent. Res clara est de pulsu celeri & frequenti, ubi plurimi recentiorum, unum eundemque pulsuum sic dici posse firmiter & constanter asseverant, alii contra in praxi maximum momentum in horum distinctione versari contendunt. Pulsus vehemens, fortis, magnus, & celer subinde ab auctoribus pro una eademque specie habentur, quæ tamen separatas esse, alii volunt. Paucis, si experientiam consulimus, raro duo medici ad lectum ægri circa pulsus denominationem inter se

conveniunt. Quod ad pulsuum in praxi usum attinet, & hic variæ se sistant opiniones, dum quidem fallacissimum esse in morbis signum & tantum in quibusdam febribus, pulsuum habere usum asseverant; alii autem tam necessariam practici existimant pulsuum notitiam, ut si quis in hac non excellat, certum circa morbos præsertim latentes pronosticon atque iudicium formare nequeat: unde cum Chinensibus pulsuum scientiam maximopere suspiciunt & æstimant, adeo ut per longum tempus variis in partibus accurate pulsus explorandos esse statuunt. Nostri opinionis origo ac fons harum dissensionum ex eo videtur profluxisse, quod veteres sanguinis circularem ignoraverint motum, & pulsuum differentes species excogitatas ex speculativis differentiis corporis cujusdam solidi impulsu desumserint. Recentiores autem sicuti utilissimum inventum circulationis rarius in pathologia & praxi applicaverunt; ita contenti veterum circa pulsus regulis, neque ex hoc invento recte pulsuum naturam & differentias explicuerunt. Ut itaque aliquod firmi, constantis, ac rati habeamus, quo dubia omnia remove possimus, ne amplius decipiantur magistri vel alios decipiant; placuit ex fundamentis & regulis mechanicæ, maxime autem ex sanguinis circulo, pulsuum indolem & veras differentias statuere & usum practicum simul ostendere.

2. Antequam ad pulsuum differentias & causas varias enodandas nos accingamus, pernecessarium esse arbitror, fundamenti loco, pulsus physiologiam, sive ejus constitutionem secundum naturam præmittere, ut eo melius postea reliqua connecti & ex justa connexionem veritates desideratæ detegi ac explicari possint. Controversia autem hoc loco occurrit, an motus cordis sit unus idemque cum pulsu, sive an uno eodemque tempore, quando cor est in systole, arteriæ etiam sint in systole, & systole cordis & arteriarum verus sit pulsus; an potius inversa ratione, systole cordis & diastole arteriarum reciprocent,



sive quando cor est in systole, arteriæ sint in diastole, & pulsus, quem tangimus, non systole, sed potius diastole arteriarum sit. Jam autem magnus noster SENNERTUS, in *Institutionibus Lib. 3. part. 1. Sect. IV. cap. 1.* priorem amplectitur sententiam, & ibi docet eodem tempore cor & arterias dilatari & constringi, & temerariam esse dicit, his, quæ sensibus percipiuntur, non acquiescere. Et quamvis eodem in loco dubio valde nobili suam sententiam oppugnet, dum nempe scribit: *si eo tempore, quo cor constringitur & expellit, etiam arteria constringuntur, sequi, arterias non posse sanguinem recipere; & contra quo tempore cor & arteria simul dilatantur cor non posse sanguinem ab arteriis trahere, cum mutua hætractiones sese impedirent; nihilominus ita huic dubio respondet, nihil incommodi ex eo sequi, dum non ita arteria comprimuntur & clauduntur, ut plane nihil possint recipere; sed sufficiens adhuc sit cavitas, ad id, quod cor transmittit, recipiendum. Item cor ex pulmonibus trahere, neque arterias solum ex corde, sed etiam ex vicinis partibus, & venis in dilatatione trahere posse.* At vero quod hæc sententia sano conceptui, de motu sanguinis circulari, quem suo tempore, cæterum non satis laudandus, vir ignoravit, quivis facile perspicere poterit.

3. Non possumus autem satis mirari ex recentioribus, celeberrimos quosdam Sennerti vestigia premere, & quibus sanguinis circulus exacte cognitus est, adhuc non vereri hæc differere: cordis motum in systole ipsissimum esse cum motu arteriarum, qui sentiatur in pulsu, & systolen notare *αὐτὸ τοῦτο* pulsum, unde eos refutant, qui motum cordis & arteriarum non eundem, sed alternatum statuunt. De cætero mirantur, tantum virum GALENUM & JOHANNEM BAPTISTAM MONTANUM *Lib. I. de pulsibus dignosc. cap. V.* scripsisse, non cujusvis pulsus posse systolen seu contractionem sentiri; imo rejicit plane eos, qui diastolen credunt, quando pulsus micet. At vero pace tanti viri,

qui nobis charus & semper honorandus est, asserimus cum recentioribus ferme omnibus solidioribus, pulsum nihil aliud esse, quam arteriæ dilatationem sive expansionem a sanguine cordis contractione ex sinistro ventriculo protruso & expulso in arterias, quæ a sanguine corde exeuntis illisu, universo sanguinis fluido communicato extrorsum tenduntur & dilatantur, & postmodum dilatatione omnes resiliunt, & in pristinam figuram non modo redeunt, sed & ultra aliqua ex parte constringuntur, & sanguinem novo impulsu ulterius in extremas arteriolas, inque venarum origines propellunt. Duplici enim motu, ipsæ arteriæ gaudent, recte sentiente BELLINO in *Tract. de pulsibus*; uno extrorsum qui dilatatio est, seu incursus in digitos; altero motu introrsum qui constrictio est, seu subductio digiti, quæ difficillime cognoscitur ac percipitur, recte sentiente GALENO. Circulus enim sanguinis, a quo jugi ac perenni vita nostra pendet, sine mora & quiete ulla fit, & reciprocis istis cordis & arteriarum motionibus perficitur, nec sine illis intelligi potest. Quandocunque enim cor est in systole & expellit, arteriæ sunt in diastole & recipiunt, & quando arteriæ propter copiam fibrarum, quibus constant, spiralem & musculorum sese contrahunt, venæ & cor sunt in diastole, & ex arteriis sanguinem capiunt. Memorabile hoc loco est, ipsum GALENUM jam suo tempore eandem fovisse sententiam, quæ egregie cum circulo sanguinis convenit, dum *Libro VII. de Anatom. administr.* scribit: *pulsatio cordis & arteriarum ita se habet, ut quando cor attollitur, arteriæ demittantur, & quando cor dimittitur, arteriæ attollantur, quod ex anatome cognoscitur.* Egregie quoque conspirat hanc in sententiam FERNELIUS p. 185. *pulsus ex diastole & systole constat. Diastole, id est distractio, est, qua arteria se quoque versum diffundit; systole autem contractio est, qua in se ipsa undique subsidet, seque submittit.*

4. Ratione hujus pulsus non levis inter medicos dissensio & opinionum divor-



divortium hinc inde deprehenditur. Veteres unanimi ferme ore has species inter sese distinctas velunt: ex recentioribus autem nonnulli frequentem & celerem pro uno pulsu æstimandum esse, quod passim ex scriptis eorum cognoscitur; a quorum tamen sententia nonnulli discedunt, præsertim qui præ aliis sapere volunt, & tantam distinctionem esse affirmant, ut practicus illum absurdum haberet, qui vellet hos pro uno pulsu venditare. Ut igitur ex hisce dubitationibus & difficultatibus emergamus, pretium operæ est, rem paullo clarius & plenius scrutari atque inquirere. Veneranda antiquitas hac fuit in constanti sententia, cum pulsus motus sit localis; hinc quodcunque ad motum localem requiritur, & quicquid de hoc motu in universum negari & affirmari potest, illud etiam de pulsu negari & concedi debere. Et cum juxta GALENUM & SENNERTUM quinque ad motum localem requirantur, nempe primo movens, 2) spatium, per quod fit motus 3) tempus, quod confecerint in spatii transitu 4) si motus ex contrariis est compositus, quies, & 5) instrumentum per quod motus perficitur. Ex hisce jam differentiam pulsum simplices petunt. A motore pendet vehementia & debilitas: hinc pulsus vehemens & debilis. A spatio seu quantitate distensionis magnitudo & parvitas pulsus. Tempori, quod arteria in motu consumit, respondet ejus celeritas & tarditas. Et prout parum vel diu in quiete moratur, dicitur creber vel rarus. Ab organo autem pulsus, quod est arteria, quæ nunc est mollior, nunc durior, oritur pulsus mollior & durus.

5. Quamvis autem SENNERTUS in *Institutionibus* p. 576. celerem pulsum definiat, quando arteria brevi tempore spatium suum percurrit; ipse tamen postea cognoscit, celeritatem pulsus ad spatium applicari non posse, quoniam illud spatium tactu cognosci non possit: unde monet in definiendo pulsu celeri ad motus qualitatem, an nimirum incitatus vel remissus, sit, respiciendum

esse. Unde FERNELIUS & cum ipso complures pulsum celerem definiverunt, quod sit is, qui brevi tempore arteriam distendit; tardum contra, qui longo tempore hoc facit. Cl. BELLINUS in *tract. de pulsibus* pag. 75. ait: *celer ille pulsus dicitur, qui ad digiti pressionem minimum temporis persistit, tardus qui diutius*. Frequens autem pulsus appellatur ille secundum SENNERTI, FERNELII aliorumque sententiam, cui breve quietis tempus subest, id est modicum interpositum intra utramque diastolen tempus; rarus cui longum quietis tempus inter unam & illi succedentem arteriæ distensionem longum est; sive adhuc pressius: frequens dicitur, qui brevi quietis intervallo arteriam distendit, tactumque ferit; rarus, qui longioribus intervallis id facit. Paucis: frequentia non proprie de motu dici potest, celeritas autem vel tarditas sive intensio vel remissio vis motricis proprie motui competit; cum quivis motus per se ratione celeritatis sive intensiois, & tarditatis sive remissionis æstimandus sit. Non autem unus motus in se consideratus dici potest frequens vel rarus; sed hæc saltem differentia de pluralitate & numero pulsum in certo ac determinato tempore valet. Unde v. g. dicitur motus seu impulsus frequens, quando intra dimidium horæ ex siphone aqua centies ejicitur, rarus autem, quando trecies intra dimidium horæ emittitur, ubi nempe longa quietis intervalla manent. Rectissime itaque tali in casu, ubi globus v. g. impellitur, celeritas impulsus, quoad nempe singulos ictus, potest habere locum; & tamen rarius, id est longo temporis intervallo interposito quivis ictus fieri possunt. Ita enim remissus ratione vehementiæ potest esse quivis ictus globi, & tamen frequentius repeti.

6. Hæc omnia rite se habent quidem in motibus, qui non sunt continui, sed certa interposita quiete gaudent, & ubi utique differentia hæc insignem & egregium usum habet, neque ita invicem celer & frequens debet



conjugi. At vero longe alia est ratio in arteriarum motus negotio: hic enim motus est continuus, nec ulla eget quiete, ut fluxus sanguinis jugiter sine ulla mora ac impedimento ex corde in arterias, & ex his in venas, & rursus ex illis in eas transeat & circumvolvatur. Equidem minime existimandum est, quando, post pulsum seu dilatationem arteriæ extrorsum, nullus motus vel ictus amplius tactu percipitur, feriari arteriam & veram intercedere quietem; sed potius, ut in superioribus dictum, & res per se clara & perspicua est, statim post dilatationem arteriæ sive pulsum nulla quies interponitur; sed mox arteria propria elastica vi, tum spirituum in fibras illarum musculosas influxu, introrsum resilit, movetur, & contrahitur, qua contractione ipse sanguis in venas urgetur, & hanc rursus mox dilatatio seu ictus extrorsum excipit. Unde pulsus perpulchre comparari potest cum pendulo, quod etiam perficit uno latere in alterum motum continuum, sine ulla sensibili quiete observabili. De tali motus continui specie, quem veteres non agnoverunt, sed recentiores optime capiunt, quæstio oritur, an inter sese celeritas & frequentia, quando de ipso prædicatur, res plane sit distinctissima. Et hoc est, quod jam sub examinis in eundem revocabimus. Quandoque itaque intra quadrantem horæ bis mille pulsus in ægrotante subjecto annotat medicus, illum frequentem, id est naturali frequentiore pronunciat; quando autem in alio subjecto intra idem tempus ictus tantum mille numerat, dicit illum raram. Jam si alius medicus advocetur, & in iisdem subjectis frequentem denominet celerem, raram autem tardum; inde quæritur, quis verum dixerit. Nos respondemus utrumque verum. Nam impossibile est, cum motus cordis & arteriarum semper in systole & diastole sit constitutus, ut pulsum numerus intra temporis spatium exiguum crescat & major observetur, nisi quævis systole & diastole

arteriarum sit citatior & intensior, seu breviori tempore fiat; non secus ac in pendulis videmus, quæ quo numerosiores certo tempore faciunt vibrationes, eo breviores adeoque celeriores debent fieri. Probe enim hic notandum est, unus ictus celeritatem non posse per se sentiri, quoniam vix punctum temporis durat. Unde felicissimus ille practicus SYLVIVS in *praxi medica Lib. I. Cap. XIX.* scribit, *celeritas pulsui adscripta mente quidem concipi potest; non item digitis tangi ac percipi*, in quod etiam confirmat ingeniosissimus medicus mathematicus BELLINUS in *tract. de pulsibus p. 75.* inquiens: *celer pulsus, quia digito minimo temporis persistit, in statu a naturali parum recedente, vel tactu distinguere non potest, cum naturalis motus extrorsum arteria via punctum temporis duret: multo minus in statu præternaturali id sensibile erit.* Ex quibus dictis liquido jam constare arbitror, pulsum non dici posse frequentem, nisi celeritas sit conjuncta, & celerem non posse dici, nisi sit frequens: quoniam unus ictus non potest facile ratione celeritatis distinguere; unde rectissime scribit CL. SCHELHAMMERUS in *Tract. de pulsibus p. 73.* frequentem non citra celeritatem observari. Et jam perspicua erit ratio, qua de causa nunquam legitur in historiis morborum pulsus tardus & pulsus frequens conjunctus, vel pulsus celer & pulsus rarus simul, quas species in motu interrupto dari, nemo negabit; in non interrupto autem sive continuo ac jugi non possunt coincidere. Ex eo jam liquido consequitur pulsus species minime referendas esse ad cujusvis motus localis sive corporis impulsus naturam, ita ut quod de quovis motu locali prædicari possit, asserendum quoque sit de pulsu. Ignoravit enim cordata antiquitas circulum sanguinis, seu motum continuum, ex quo merito omnes species & differentię pulsus peti ac explicari debent.

7. Haud ignotum est, quod omnes fere tam ex recentioribus, quam veteribus scriptores unanimi sententia peculiarem



liarem differentiam pulsus celeris & vehementis constituent, dum illum intensum, citatum, velocem, & contrarium remissum; hunc autem validum, fortem, robustum, & oppositum debilem, imbecillum, languidum denominent. Et quemadmodum celeritatem a motu brevi tempore facto; ita vehementiam a moventis virtute valida vel debili ducunt atque derivant. Verum enim vero non leve hic occurrit dubium, an non celer pulsus sit etiam dicendus vehemens, sive pro uno eodemque habendus; quandoquidem celeritas, ut constans est mathematicorum sententia, non nisi vis movens aucta & intensior est, sive celeritas nunquam sine intensione virium motricium concipi potest. Virium autem intensio sive celeritas magnos præstare potest effectus, sive multum vincit resistentiæ; jam autem vehementia motus dicitur tantum respectu effectuum, quando nempe per actionem moventis magnum mobilis resistentis vincitur: unde omnes statici & mechanici in eo conveniunt, quod celeritas parvi corporis æquare & compensare possit magnum pondus, magnamque corporis molem, cum notum sit, globum duplo celerius motum plus effectus præstare, quam globum duplo majorem in tardiori motu existentem.

8. Conspicimus porro quam mirabiles effectus tenuissima corpora, aer, æther, ignis, in celerrimo motu constituta, præstent. Videtur etiam ipse **GALENUS Lib. III. de differentiis pulsuum Cap. V.** in eam conspirare sententiam, quod celeritas & vehementia pulsuum non multum inter se differant, id quod sequentibus declarat. Vulgo, inquit, apud auctores vehementiæ nomen dicitur de contenta seu forti simulque celeri actione & homines *ἰσχυροὶ* dicuntur, qui contentam & celerem edunt actionem. Et propterea idem **GALENUS** ibidem scribit, si vocabula medica constituendi potestatem haberet, sibi que liberum esset, nomina pulsibus imponere; simplicem qualitatem ac differentiam renitentium ac tactum ever-

tentium pulsuum se nominaturum, vim vel robur, vel contentionem, vel simile quid; differentiam vero, ex hac & celeritate compositam vehementiam se appellaturum. Verumtamen quia nomen vehementiæ maxima pars medicorum de una ex simplicibus differentiis usurpat; illud retinendum, nec mutandum esse censet. Ut autem hæc universa clara & perspicua evadant; pernecessarium est, ex staticis & mechanicis hoc loco supponere, vehementiam duplici modo considerari posse, vel respectu molis moventis, vel respectu intensiōis vis motricis. In genere vehementia de motu prædicatur, quando ille magnum valorem habet, sive magnos effectus præstet, multum resistentiæ corporum vincit: unde etiam vehemens pulsus dicitur, qui tangentis manum valide ferit; languidus autem & debilis, qui imbecilliter & remisse manum percutit. Jam autem vehementia respectu moventis est, si magna sit ejus moles, sive copia virium motricium: unde corpus magnæ molis seu quantitatis magnum in motu præstat valorem, seu vehementem motum efficit.

9 Deinceps vehementia quoque dicitur de ipsa motus intensiōe, quando nempe ille concitatus, intensus est, sive celeritate fit: unde patet minimæ molis corpus celeriter quidem moveri posse, & magnam quoque exercere efficaciam; longe autem validiorem & gradu vehementiorem exsurgere potentiam, si utrumque concurrat, nempe moles moventis corporis & simul celeritas motus. Tamen si ergo celer pulsus in se consideratus, recte sentiente **GALENO**, nunquam vehementiæ sit expers; recte tamen ille pulsus tantum vocatur vehemens, quando spiritus copiosi adsunt, & fibras cordis animant: qui si sine celeritate est, dicitur robustus: cum celeritate, vehemens & simul magnus, quando non parva, sed ingens sanguinis quantitas, una cordis systole, in arterias dejicitur; & tunc, quod signum est vehementis pulsus, manus fortiter & cum violentia quadam



dam percutit. Quoniam autem non opus, est, ut sub celeri systole cordis semper adsit virium sive spirituum copia, neque sanguinis magna semper quantitas ejiciatur, sed sæpe pauci spiritus sufficiunt; unde non fortiter tunc arteria percutitur, licet celer sit pulsus.

10. Cum veteres, uti in superioribus monitum, species pulsum ex motus localis natura desumerint, & hinc quot species motus dantur, velexcogitari possunt, tot etiam pulsum species finxerunt, adeo, ut simplicium & compositarum innumeræ ratione temporis, spatii, instrumenti, ordinis, æqualitatis, proportionis rythmorum, virtutis morventis, descriptæ præsertim apud GALENUM differentiæ legantur. Postea autem factum est, ut speciose has confictas, cum non in praxi deprehenderent, vel inutiles vel incomprehensibiles, & propterea multas rejiciendas esse, solide ac docte monuerint. Ita Job. Bapt. MONTANUS *Consilio* 256. de minoribus pulsum differentiis in genere fatetur, se eas cognoscere non potuisse, & GALENUM hac in re nescio quid græci habuisse existimat, atque se credere, ait, GALENUM, cum ista scriberet & pulsum genera ad minimum divideret, risisse. Postea addit, utut istæ differentiarum ratione atque intellectu colligi possint, tamen proculdubio omnes tactu perceptibiles non sunt. Egregius quoque hanc in rem exstat locus in Casparis HOFFMANNI *Instit.* p. 650. dum scribit: *De pulsibus cum brevibus & nervose scripserit Goldaldinus putaverim præferendum illud compendium esse tribus GALENI operibus, de differentia, causis & præsagiis ex pulsibus. Quin puto subtilitates esse HEROPHYLEAS, quas insuper habere possit, non tantum instituendus, sed & medicus exercitatus. Hujus opinionis semina injecit mihi MONTANUS Consilio* 257. Confirmavit amicus in Italia, qui ex ore D. D. Bartholomæi SCHWALLII medici Pragensis senis referebat, contentum se esse tribus differentiis, æquali & inæquali, veloci & tardo, valido & debili; momentum amplius dedit Plempius, in

*fundam. Medic. L. V. Sect. 2. Cap. 2. Multa, inquit, medicos de pulsibus nugari, multaque mentem ingeniosam fingere, quæ sensus nequeat assequi. Acutissimus WELSCHIUS in operibus pag. 285. talia prodidit: In universa pulsum doctrina multa incerta, superflua, imo & rarissima ad lubitum excogitata jam dudum doctiores advertunt, qui longe alium sanguinis motum in circulum compererunt, quam facultati pulsificæ ac vitali plerique alii ad muscas notas potius, quam mechanicas rationes explicandum per somnium adscripsere. SYLVIUS paucissimo numero inclusit prolixas alias veterum differentias pulsum, & ad tria tantum reduxit capita, nimirum ad pulsus robur, magnitudinem, & frequentiam. Per pulsum robustum intelligit vehementem, qui vi quadam digitos tangentis ferit; debilis vero est, quando id leniter vel leviter contingit. Magnum definit, quando multo & amplo spatio, parvum, quando paucio & angusto spatio; arteria explicatur. Frequentem dicit, quando eodem temporis spatio sæpius quam alia, vel in aliis pullat; rarum vero, quando minus sæpe, quam solebat, aut decebat arteriæ expansio & ictus observatur.*

II. Ut autem hæc omnia in concinnum redigamus ordinem & genuinas, quæ in praxi occurrunt & in statu secundum & præter naturam deprehenduntur, differentias adstruamus; primo omnium necesse est, ut ex mechanicis supponamus, omnem motum vel celerem esse vel tardum. Vera enim proprietas motus est celeritas vel tarditas. Qua de causa recte docuit GALENUS in *libello de pulsibus ad tyrones Cap. III.* proprie ad motum pertinere celeritatem & tarditatem, quorum hæc est motus remissus, illa incitatus: & de his faciendum esse judicium ex comparatione naturalis pulsum. Secundo, omnis motus vel in magna, vel respective in parva mole fit, adeoque omnis motus est vel vehemens, vel languidus. Tertio, ratione ordinis, motus est æqualis vel inæqualis, æqualitate intellecta tam ratione temporis sive celeritatis, quam ratione magnitudinis

sive



sive vehementiæ: & quarto respectu mobilis magnus vel parvus.

12. Supponimus autem, motum cordis & arteriarum esse continuum ex systole & diastole reciproce constantem, nulla quiete comprehensibili interjecta, quapropter omnis pulsus est vel magnus vel parvus. Magnus est, si multum sanguinis, unica cordis constrictione, emittitur in arteriam, adeoque ejus distensio fit magna & ampla. Parvus est, si pauca sanguinis quantitas unica systole transit in arteriam, quæ parum nec in magno spatio distenditur. Deinceps pulsus est vel celer sive velox, vel tardus. Celer est, quando cor celerrimo & brevi temporis spatio sese contrahit, & sanguinem in arteriam ejicit. Tardus est, quando longiori tempore eget cordis constrictione, sive paulo longius durat vibratio sanguinis in arteriam. Cum autem in singulis pulsibus gradus celeritatis vel tarditatis non bene & accurate possit mensurari, quoniam momento temporis fit; hinc rectissime ex frequentia, id est, quando eodem temporis spatio sæpius, quam alias arteriæ expansio observatur, celeritas pulsuum determinari debet; ita tamen, ut frequentia tantum signum, character, & mensura celeritatis sit, & raritas tarditatis, cum frequentia de nullo motu in se considerato dici possit. Bene autem in continuo motu, qui tamen ex diversis speciebus systole & diastole constat, ubi una percipitur, altera non, celeritatem ex frequenti illo perceptorum motuum numero dijudicare debemus. Tertio pulsus est vel æqualis vel inæqualis: æqualis est, quando ratione celeritatis sive frequentiæ pulsuum succedentium, item magnitudinis & parvitatibus exacta est æqualitas; inæqualis autem est, quando jam pulsus magnus existit, alter autem parvus debilis, sive unus celer, alter deinde valde tardus, ut quasi videatur pulsus intermittens; cum tamen intermissio pulsus, ad inæqualitatem, quæ in magna tarditate consistit, optime possit referri. Quarto, pulsus est vel vehemens sive fortis, robustus, aut

debilis. Vehemens est, quando magna copia virium motricium, seu spirituum systolem cordis parit: debilis est, quando cor contrahitur ab exigua spirituum quantitate.

13. Differentiæ istæ a veteribus descriptæ vermicularis, formicantis, tremuli, ferrati, caprizantis, partim ab inæqualitate pulsuum, maxime omnium autem a tunicarum, quibus arteriæ constant, convulsione dependent, unde semper fere in acutis periculosa sunt judicandæ. Quod attinet ad pulsuum durum & mollem, hic identidem tantum a constitutione arteriæ pendet. Quandoque enim a nimio dolore, spasmus vel convulsione nimis tensæ, duræ & renitentes arteriolarum evadunt tunicæ, ut renitentia quædam sensum tactus feriat, dicitur durus; mollis autem fit, si fibræ tunicarum in arteriis flaccidæ, remissæ, & humido obsessæ sunt; quando magnus & vehemens cum tali arteriarum molli statu concurrit, undosus vocatur, qui prodromus est imminentis magni sudoris.

14. Ex simplicibus hisce jam statutis differentiis liquido dijudicari poterit, quænam pulsuum species invicem possint conjungi, & quænam non. Itaque pulsus ex magno & celeri compositus datur, item pulsus magnus & vehemens, robustus & celer, vehemens celer & parvus. Secundo datur etiam pulsus frequens & debilis, item celer & parvus. Tertio datur præterea pulsus tardus & magnus, qualis in statu naturali, & senibus plethoricis contingit, item in melancholicis, nec non scorbuticis quibusdam: nunquam autem datur celer & tardus pulsus, neque tardus & rarus, neque vehemens & debilis, nisi vocabula invicem plane confundere velimus.

15. Quemadmodum motus cordis & pulsus arteriarum a copia, robore spirituosæ elasticæ expansivæ substantiæ, quæ tam in sanguine, quam in liquido nerveo existit. 2. a debito fibrarum musculosarum cordis & arteriarum tono 3. a sanguinis debita temperie, quantitate & consistentia secundum naturam qui fit,



fit, ex eodem fonte derivari ac deduci debet. A circulo autem debito & æquabili sanguinis ac humorum per partes solidas, vitam & sanitatem pendere, ac universam regi corporis machinam, extra dubium est, adeo, ut non inconcinne motus hic sanguinis naturæ nomen mereatur, qui quo magis moderatus & ad legem compositus, æquabilis, eo perfectior natura sui conservatrix & morborum medicatrix existit; & ex adverso, quo magis deflectit ab æqualitate, moderatione, eo debilior dicenda est natura, variis incommodis & morbis obnoxia. Multum itaque interest, ut medicus cujusvis individui circulum, tam in statu secundum naturam, quam præter naturam, cognoscat, ut deinde eo melius iudicium de dispositione ad morbos, de ipsorum morborum natura & eventu ferre possit. Jam autem nullus ibit inficias, circulum sanguinis non meliori via investigari posse, quam per tactum arteriarum sive pulsum; non superficiallem, sed crebrioribus vicibus & sufficienti & decenti tempore indagandum. Is enim non modo vitium & robur totius corporis; sed sanguinis naturam & constitutionem, nec non secretionum pernecessariam conditionem refert & patefacit. Et sicuti inquires sive pendulum horologiis appositum motu suo æquabili temperato, de horologii præstanti fabrica ac usu testatur; ita etiam pulsus totius hominis naturam omniumque functionum vigorem vel depravationem facit testatam.

16. His ita constitutis primum in pulsus moderati, constantis, æquabilis, qui cæterorum lex atque mensura sit, inquirendum est. Moderatus autem pulsus appellatur, qui magnus, non autem celer vel tardus, nec durus, nec inæqualis. Is est ad cuius comparisonem cæteri omnes dijudicari debent, nonnisi optimam totius corporis harmoniam ac temperiem, & omnium rerum præternaturalium absentiam & moderatum ac temperatum calorem designat. Hic si adest, debitam spiritus ascentiæ præsentiam, fibrarum naturalem tonum, &

sanguinem temperatum fluxilem denotat, adeoque liberam transpirationem, bonam nutritionem, vigorem actionum animalium, omnesque secretiones in debito statu existentes; paucis sanum corpus significat. Quandoque autem plus solito est citatior, celerior, adeoque frequentior, cor præternaturaliter, uti veteres amant loqui, irritatum indicat, nisi a causis externis & non naturalibus oriatur; si vero diutius perseverat, certe morbum cum augmento caloris, imo febrem denotat. Et oritur plerumque a motu sanguinis intestino inordinato & spirituum crassi ob admixtionem variarum heterogenearum sæpius causticarum partium immutata. Quando vehemens est & simul celer, indicat febriculosam intemperiem & heterogenei quid sanguini, lymphæ, & spiritibus immixtum; copiam tamen simul virium & spirituum patefacit. Si vehemens & celer simul est magnus; circulatio tunc intensior ac citatior sanguinis est, & calor & sitis urget, habitusque totus corporis calore, rubore, ac turgescencia est perfusus: ubi parvus autem pulsus adest, & exilis quantitas ex corde transit in arterias atque ex venis rursus in cor, debilis & imminutus sanguinis circulus præsto est: unde transpiratio, secretiones imbecilles ac languidæ sunt, vires paucæ & infirmæ fiunt: si talis parvus simul debilis & frequens sive celer est; virium insignem languorem, motum intestinum præternaturalem & sanguinis circulum debilem arguit; qui si talis diu persistit, malignitatem magnumque periculum denotat.

17. Tardus pulsus sanguinis ut plurimum visciditatem & crassitiem & parvum debilemque circulum & secretionum languorem indicat; si simul autem debilis est, non adeo tutus observatur, sed virium plane succumbentium suspicionem suppeditat. Tardus autem & magnus pulsus, virium adhuc robur, fibras cordis & arteriarum tensas & crassas & sanguinem tenacem viscidum arguit. Inæquales omnes pessimi sunt, nec



nec æqualem spirituum influxum, & sanguinem in mixtura sua turbatum & inæqualem, denunciant; præsertim si debiles simul sunt, qui nihil unquam boni præfagiunt. Ita etiam pariter, intermittentes infausti ominis sunt, & vulgo pro lethalibus habentur. At vero non universale id est: sæpius enim sine periculo id observatur, ubi nempe prava sunt symptomata, & vires ægri adhuc constant: unde haud infrequens hypochondriacis & melancholicis est, ubi sanguinis motus intestinalis ob ejus crassitiem depressus est. Si autem debilitas & celeritas juncta fuerit, plerumque mortem præfagit. Durus pulsus, dolorum, spasmodum, convulsionum ut plurimum testis est, propter fibras cordis & arteriarum spasmodice contractas. Irregulares, caprizantes, discreti, pessimum totius corporis statum, tam quoad partes fluidas & impetum facientes, quam solidas manifestant.

18. Probe hic notandum est, non unum eundemque pulsus in omnibus individuis observari; sed quoniam pulsus a tono fibrarum musculosarum, a spirituum influxu, a sanguinis natura & temperie dependet, & hæc universa mirum variant in corporibus humanis ratione sexus, ætatis, temporum anni, regionum, vitæ generis, somni, animi pathematum; hinc etiam pro diversa harum rerum constitutione variat & differt multum inter se pulsus. Ita ordinario viri præ mulieribus pulsus habent longe majorem, vehementiorem; fœminæ autem tardiores & debiliores, utpote viri firmioribus fibris & sanguine calidiori præ fœminis instructi sunt. Quare etiam in viris sanguinis circulus auctior est: non tantum enim colluviam exsuperantis sanguinis & aliorum humorum generant, quam fœminæ, quæ ordinario imbecilliores & morbis facilius subjiciuntur. Deinceps cholericis & sanguineo-cholericis pulsus majorem, celeriores ac vehementiores præ phlegmaticis & melancholicis habent; adeoque citatior in eis est motus, excretio promptior, sanguis fluxilior quam, in hi-

scie; utpote illorum sanguis majori copia partium oleosarum sulphurearum, quæ fons ac matrix caloris & spirituscentiæ sunt, imbutus ac præditus est. Ita enim porro quoad habitum corporis macilentiores, & qui fibras strictiores habent, vasa majora, præ obesitas, qui laxis fibris gaudent, vasaque tenent angusta, majorem & validiorem pulsus possident: unde etiam saniores, robustiores, aptiores ad perferendos labores sunt illis; & hæc jam est ratio, quare natura crassi & obesi citius, quam graciles ægrotent atque intereant. vid. HIPPOCRATES *sect. 2. aphor. 64.*

19. In ætatibus infantis ac pueri pulsus creber atque mollis est; senis contra tardus ac magnus; juvenis ac viri pulsus magnus & vehemens. Ordinario enim pueri & infantes copiosos humores, qui etiam ad auctiorem ipsis necessariis sunt multasque sordes colligunt, quæ causa est, cur pueri & infantes facilius ægrotent ac moriantur, quam juvenes & viri. Senes crassum sœvent sanguinem, sed rigidiores habent fibras; unde pulsus eorum durus est, & fortius manum percutit. Mollior autem in pueris & infantibus, ob fibrarum teneritudinem & laxitatem, deprehenditur. Pulsus porro anni tempora, corporis motus, ingesta, animique perturbationes immutant. Vere medio pulsus magni sunt & vehementes, ubi etiam vigor corporis tunc est maximus: unde rarius tunc ægrotant homines, & citius convalescunt. In æstate media celeriores & debiliores sunt, quoniam a nimio calore languescit virtus; intestinalis autem motus solito major est. In autumno autem pulsus tardiores, molliores & debiliores fiunt; in hieme duriores & paulo vehementiores, tardiores. E regionibus & cœli constitutionibus, quæcunque calida fuerit & æstuosa, æstati mediæ, quæ vero frigida hiemi, quæ temperata, veri simillima putetur.

20. Exercitatio pulsus, adeoque circulum sanguinis augeat; otium autem ac torpor tardum, debilem ac segnem facit pulsus, sanguinisque circulum imminuit.

Ali-



Alimenta spirituosissima pulsus edunt magnos, vehementes, crebros. Dormientium tardi, parvi, ac languidi pulsus sunt: eorum vero, qui expergiscuntur, e vestigio magni fiant, citatiores, robustiores. Iratorum pulsus magnus vehemens & celer; terrore affectorum, frequens, parvus, inæqualis; tristium parvus, languidus & tardus, adeoque uti pulchre scribit FERNELIUS lib. III. de pulsibus pag. 160: *quotidianæ corporis affectiones pulsus immutant, sine quarum animadversione non certo possit pulsus percipi, nec quantum per morbos a naturali distet*. Itaque pulsus naturalis observandus est, neque mox ab exercitatione, balneis, a cibo immodico, a vino, aut ab aliis causis cor & spiritus agitantibus: de pulsu nihil quicquam statuendum, antequam externarum causarum vis deferbuerit, omnisque sedata sit corporis perturbatio. Equidem pulsus certissimum quidem signum & index motus cordis & sanguinis est; sed si solus is spectetur, & non aliarum simul circumstantiarum ratio habeatur, fallere judicando potest. Quoniam vel mille rebus, ut ait CELSUS de medicina lib. III. cap. VI. potest turbari.

21. Non levis dissensio inter medicos semper fere fuit, qualis pulsus sit essentialis febribus, vel qui pathognomonicum earum signum præbeat. Plurimi ex veteribus, ex quibus GALENUS primus est, pulsum celerem & frequentem febrem denotare in scriptis suis prodiderunt. Ex recentioribus autem plurimi pulsum frequentem pro febris genuino signo allegant. SILVIUS in praxi medica Lib. II. pag. 460. ingenue scribit: *hoc unicum febri omni soli ac semper competens signum est, adeoque pathognomonicum, pulsus scilicet præter naturam frequentior, quo præsentem febrem adesse, absente autem, abesse febrem, certo pronunciari queat, nec enim aliud signum, quod competat omni febri & semper, innotuit practicis*. Reliqua enim signa omnia non tam febrem, quam febris speciem, aut gradum, aut tempus indicant & demonstrant. ETTMULLERUS si ullus, certe hic,

solidus & accuratus in praxi, p. 284: hæc differit: *pulsus naturaliter frequentior recte statuitur signum pathognomonicum febrium a Sylvio tam in Dissertatione de natura febrium, quam in praxi, quicquid in contrarium scribit, DEUSINGIUS Tract. Disquisitione anti Sylviana Belgarum Practicus DECKERUS in notis ad Barbette p. 102 scribit: ubicunque pulsus præternaturam frequentior observatur, ibi febris est. SCHELHAMMERUS in tr. de puls. p. 47. frequentem in omni febrium genere nunquam non sese offerre scribit, & cum calore earum esse signum pathognomonicum. Cl. BOHNIUS in Collegio M. S. semiotico sententiam hac de re fovet sequentem: in frequenti pulsu, inquit, causa morbifica & cordis par robur videtur, si scilicet constans & uniformis permaneat, adeoque unicum febrium pathognomonicum signum; verum si debilitas celeritati superveniat, concidere vires indicium est; magis tamen vel minus, prout nunc vehementiores plures ictus notantur. Alias auctoritates circa hanc rem adstruendam arcescere, nullius pretii foret: saltem in universum monemus, ex falsa hypothese veteres & plurimi recentiorum distinctionem fecerunt inter celerem & frequentem. Frequentem nempe ipsum dixerunt, si intra certum tempus crebræ pulsationes fierent; per celerem autem vehementem voluerunt intellectum, unde ipse WILLISIUS tract. de febribus p. 195. pulsum febrilem illum vocat, quando arteriæ vehementius & citatius vibrant, quo loco dicit, si pulsus debito est vehementior, febris intenditur. COELIUS AURELIANUS lib. I. p. 37. ait, febrium ponunt signum fervorem plurimum, atque immutationem pulsus in vehementiam, nisi hæc ex aliqua causa manifesta fiat.*

22. Quapropter Dn. BROWN in observationibus medicis in regii praxi passim confirmat, celerem & debilem pulsus sibi esse contrarios, adeo ut pateat, per celerem sive velociorem intellexisse vehementiorem. Quamvis auctores accuratum conceptum de pulsum speciebus hactenus vix sibi formaverint; nihilominus tamen



tamen in eo omnes tam antiquiores, quam recentiores conveniunt, quod pulsus frequentem in omni febris specie sive continua sive intermittens sit, sive benigna sive maligna, sive ejus principium sive status sit, adesse pronuncient: unde illum semper vel cum celeri, vel cum debili conjungunt; idcirco in eo conveniunt, quod pulsus frequens magis secundum ipsorum sententiam, sit dicendum signum essentiale febrium, quam celer, quoniam eum nec in febrium principio, tempore horroris, neque in malignis adesse, vix unus est, qui statuatur.

23. Ex nostris autem suppositis jam facile patet, has sententias discrepantes optime posse conciliari; dum celer pulsus nullus alius est quam frequens, qui utique verum est febrium signum. Est autem hæc frequentia vel major vel minor, & magno aut vehementi, vel parvo & debili sese associat, pro diversitate febrium ac temporum morbi. Frequens enim debilis & parvus nunquam fere bonus, & circulum sanguinis non auctum, sed languidum denunciat. Frequens autem magnus sive vehemens, qualis solet esse ut plurimum in statu continuarum, intensiorem sanguinis circulum & auctum fervorem corporis denunciat. Pulsus autem frequentis, qui fere præternaturalis est, pluribusque morbis sese annectit, causam ut inquiramus, res poscere videtur. Sequemur autem ea in re **BELLINUM** medicum accuratissimum, qui in *tractatu de pulsibus* cordis motum ex influxu sanguinis per coronarias & liquidi per nervos in fibras cordis deducit, vel concludit exinde cordis musculos frequentius moveri, quando in ipsis excidit liquidum nervorum frequentius, quod contingit, cum sanguinis apta quantitate fluente ad cerebrum validius hoc ipsum premitur. Per frequentiore autem constrictionem cordis fit pulsus frequentior: hic igitur indicare poterit aptam sanguinis quantitatem ad cerebrum fluere, & hoc ipsum premi validius, quod fiet, vel si sanguis ad cerebrum subsistat, obstructis solum venis ejus, vel si san-

guis earum in reliquas refluere non possit, stagnante sanguine intraneo vel in pulmonibus; vel si sanguis effervescentiam conceperit, qua majori impetu quaquaversum nitatur, & cerebrum premat validius. Rursus moventur muscoli frequentius, stimulo aliquo irritati; si igitur sanguis æquo acrior, calidior, aut hujusmodi fuerit, ita ut in cordis sinus derivatus, molestus sit illis, cor frequentius contrahetur, eritque propterea pulsus ille frequens sanguinis stimulantis index.

24. Cum ex superioribus satis, ut arbitror, deductum fuerit, pulsus testari non modo de sanguinis circulo, ejus constitutione ac temperie, sed & motu spirituum ac virium præsentia; hinc medicus in morbis cognoscendis, in formando circa eos prudenti judicio, nec non in administrandis medicamentis, notitia & attentio pulsuum non potest non insignem utilitatem atque usum medentibus afferre. Præcipuos saltem hic usus attigisse sufficiat. Primo autem monendum hic merito est, sollicite esse scrutandum pulsus, nec superficialiter. Chineses medici Europæis hac in re longe sunt attentiores, cum integram sæpius horam in hoc negotio consumant. Nostri autem medici ad lectum ægri accedentes vix duas pulsationes expectant; quod maxime culpandum est, utpote sæpenumero evenit, post decem demum vibrationes arteriarum, inæqualitatem vel intermissionem quandoque occurrere; quod fit, dum sanguis inæqualiter, mixtis partibus refertus, cordis transit penetralia. Deinde tangendus quoque pulsus est in utroque carpo, in collo, temporibus; cum testetur experientia variare sæpius pulsus in manuum carpis, & in uno commodius, quam in altero posse explorari. Deinceps perquam dignum notatu est, etiam certarum partium pulsus in considerationem venire debere. Ita nonnunquam hypochondriaci sub costis in sinistro latere magnum advertunt pulsus; quod fit, dum sanguis crassus & viscosus calore vel ex alia causa exagitatus celeritatem per-



pancreas & lienem transitum urget, at hærens in angustiis pulsationem & punctationem efficit, unde pulcre *Job. Ant. vander LINDE in selectis medicis p. 253.* scribit: *seditionem facit lien pungendo pulsandoque.* Quam sint lienis punctiones aculeatæ, experiuntur aliqui etiam sanorum, quam primum incalescunt. Ita magna pulsatio fuit illis, cujus *Cen. II obs. 28.* meminit *Nicolaus TULPIUS*; pulsatio venarum capitis interna major in febribus continuis & malignis plerumque delirium subsequens designat. Judicium enim est, sanguinem ibi congestum impeditius circulari, ibique herentem tandem inflammationem meningum gravissimam causare. Præclara sunt, quæ scribit *HIPPOCRATES in Coac. prænot. 128.* *Pulsus magnus si a nimia & excessiva sanguinis ebullitione oriatur, ita ut venarum temporum in febribus pulsent & facies turgida absque præcordiorum mollitie, longum fore morbum metuere oportet, qui nec sine largiori narium hæmorrhagia aut singultu, convulsione aut coxendicum dolore desinit.* Ratio nobis hæc est, sanguis exsuperans quærit exitum, sive per nares sive per inferiora seu sedis venas, qui quantocius accidit, eo citius liberatur æger a morbo & contra.

25. Deinceps si in parte quadam corporis pulsatio observatur, quæ alias non advertitur, inflammationi & suppurationi, præsertim si tumor & dolor adfuerit, partem affici certissime credendum est. Porro si pulsus durus percipitur, inflammationis in partibus membranaceis nervosis signum fere indivulsum esse solet. Durities enim hæc pulsus sive nimia arteriæ tensio vibratioque spasmodici quicquam, quod ex consensu inflammationis & doloris oritur, indicat. In genere autem omnis pectore affectorum pulsus frequens, inæqualis, & languidus esse solet, quod etiam contingit in cordis palpitatione. Talis autem pulsus, nisi vehementia adjungatur, nullum habet comitem calorem præternaturalem, & fit, dum sanguis non recte ac libere per cordis thalamos pulmonum lobos pertransit. In virium debilitate,

dispositione ad syncopen, pulsus parvi, rari ac languidi esse solent; si autem plane non possunt percipi, interea sudore frigido corpus diffluit; mentis tamen functiones non penitus destructæ, tunc per ipsam experientiam a nobis aliquoties observatum fuit, intra sex horarum spatium mortem certissime subsequi, & tale quid a corrosivo veneno assumpto, binis vicibus a nobis quoque notatum fuit. Præterea notabile est circa tempora critica in febribus, quando natura vel per alvum vel per sudorem emittit noxia & superflua, pulsus quidem adhuc esse languidum, nihilominus magis ordinatus nec tam creber observatur; id quod indubitatum convalescentiæ præbet indicium. Quod si autem mollis percipitur, qualis undosus dici solet, excretionem criticam per sudorem instare salubrem, prædicendum est.

26. Tandem nec silentio prætereundum, a medicamentis subire mutationem ipsum pulsus. Ita post purgantia vehementiora nimias sedes causantia pulsus celerior esse solet. Post sanguinis missionem præsertim in plethoricis ordinario pulsus fieri solet citatior, indicio circulationem sanguinis, facto spatio majori, auctam esse bono cum eventu; dum nempe suppressi menses vel hæmorrhoides hoc auxilii genere in ordinem ut plurimum redire solent. Post martialium usum pulsus citatiorem evadere, faciem fieri rubicundiorē, & calorem augeri, testis est ipse *C. SYDENHAMIUS*, cui etiam experientia adstipulatur: sudorifera valentiora ex volatilibus oleosis conflata notabiliter cordis & pulsus motum intendunt ac augent. Ex adverso anodyna, opiata, nitrosa, pulveres præcipitantes, acida, & quæ intestinum sanguinis motum deprimunt, & sulphur ejus figunt atque enervant, moderatiorem & sedatiorem pulsus in doloribus, inflammationibus, ac febrili intemperie efficiunt. Talem effectum plus vice simplici notavimus quoque in praxi a nitri & camphoræ debita mixtura. Postremo loco in exhibendis medicamentis, quod etiam suo tempore *WILLISIUS in tract. de febr.*



*febris* probè observavit, cautiones & regulæ non levis momenti a pulsu desumuntur. Ita prohibentur purgatio & vomitio a pulsu nimis citato & vehementi, etiam ab humili & depresso, utpote quando sanguis in vehementi motu ac ebullitione est, secretiones ut plurimum feriantur; si vires autem deficient, quod ex pulsu languido dignoscitur, pharmaca eas magis prosternunt atque convellunt: quamobrem medicus, qui vomitoria vel purgantia ægrotantibus propinare conatur, imprimis pulsum exploret. Quando enim pulsus est validus, & motus sanguinis sedati, excretiones dictæ artificiales optime quadrant. Eadem hac cautione opus est, in exhibitione sudoriferorum & analepticorum omniumque, quæ calorem & motum sanguini scenerant. Quod si enim pulsus validus & creber est, talismodi spiritiosa, quoniam sanguinem nimis rarefaciunt, & intestinam ejus motionem accelerant, plus damni, quam emolumenti afferre solent. Hoc pacto enim sæpe delirium aliæque inflammationes accersuntur. Adhuc magna circumspeditione opus est pulsumque exploratione in exhibendis narcoticis sive opiatis. Hæc quoniam potentia gaudent motus sanguinis & spirituum nimium sistendi, adeoque vires infringendi; hinc nunquam, ubi pulsus debilis, languidus, & parvus est, ea ipsa sunt exhibenda; sed potius cane pejus & angue vitanda. Si autem simul inæqualis intermittens est, somnum perpetuum facile accersunt.

## DISSERTATIO X.

### DE GENERATIONE MORTIS IN MORBIS.

#### §. I.

**P**Rinceps ac præcipuus professionis salutaris scopus, & unica medentum intentio, esse debet, ut mors, qua non datur terribilius hisce in terris malum, a corpore, velut mentis humanæ apto domicilio atque organo, omnibus mo-

dis propulsetur & jucundissima vita, quæ omnis felicitatis, quam in terra consequimur, fundamentum est, diu conservetur. Quum vero non propinquior via ad mortem sit, quam per morbum valde gravem & periculi plenum; hinc medici utique palmaria cura esse debet in sanandis morbis, providere ne mors ipsis superveniat, utut ex voto & penitus omnes expugnare in ipsius viribus minime sit positum. Ut autem hoc feliciter & fundata ratione præstet; maxime omnium non modo morborum, sed & mortis proximas & mediatas causas exquisitè pernoscere debet. Atque ut verum, more nostro, non dissimulemus, perpauci medicorum sunt, qui mortis ingenium rectè perspectum habent, ut in quo consistat, & quo modo, & processu ex morbis successive producat, & qua methodo præcaveri possit, accuratam habeant notitiam. Neque hujus rei deficit ratio, quia, perpauci genuinas morborum causas, & motus, qui ad mortem ducunt, habent perspectos, multo minus, quomodo eæ averti possint, rectè sciunt. Juvat itaque non parum, ad saluberrimam hujus rei notitiam adquirendam, diligentiori anatome corpora defunctorum scrutari, & feralem partium internarum læsionem annotare; & hinc, non sterilibus speculationibus, sed ex mechanico physicis principiis, genuinas destructioni corporæ causas eruere. Neque dubium est, quin, si paulo majori studio mortis in morbis accedentis, causas ac rationes investigemus, futurum sit, ut multi serventur, qui a morbis facile perituri essent.

2. Prima itaque nostra meditatio erit, ut, quid proprie mors sit & in quo ejus natura contineatur, perspiciamus. Neque vero felicius in hujus scrutinium descendere nos posse arbitror, quam si prius vitæ, cujus privatio mors est, rationem rectè evolvamur. Fate-mur autem hic rursus ingenue & aperte, ex veterum monumentis, qui omni solida physica & medica theoria carebant, vitæ cognitionem depromi non posse: siquidem in universum fere om-



nes, non secus ac vulgus solet, in adsignandis vitæ, sanitatis, morborum ac mortis causis ad entia sensibus & rationi plane incognita naturam, spiritum, animam, calidum innatum, energiam vitalem confugiebant, quæ nec explicari nec demonstrari; multo minus causis aliis & affectibus demonstrandis vel detegendis adplicari poterant: quia solum nomen, quod nihil significat, pro causa rerum venditari nequit. Communis veterum fuit sententia, vitam consistere in conjunctione animæ cum corpore: & mortem fieri, quando illa corpus deserit. Quid vero anima sit in sua natura atque essentia, quid ejus conjunctio cum corpore, & quomodo hæc corpora a putredine vindicare, & ejus discessio corruptionem inducere possit, minime ab illis explicatum legimus: unde meræ sunt fictiones, quibus nihil commercii cum intellectu humano intercedit. Quapropter ii aliquando clarius procedunt, qui principium quoddam movens, quod animam vocant, in corpore admittunt, & hoc ipsum, mediante motu progressivo & excretorio, corruptibilem subinde materiam a corpore propulsare adserunt. Equidem non incongrue hic causa conservationis & durationis corporis, in se corruptibilissimi, motibus adscribitur; nihilominus tamen causam motuum, quam maxime nosse debet medicus, nondum satis explicato vocabulo nobis tradant. Scitissime HIPPOCRATES *Lib. de arte* §. 3. existimat: *ex nominibus species rerum minime provenire, quia nomina lege quadam naturæ insita sunt; res autem non lege sancta, sed naturæ germina existunt.* Itaque ubi res pro causa allegatur, hæc demonstrari & definiri prius debet, cui deinde facile nomen imponitur. Namque ejus indolis debet esse definitio realis, ut ex hac vel axiomata vel theoremata profluant, quorum adplicatione & connexionem postea causæ & affectus incogniti detegi & demonstrari possint. Atque adeo, cum anima, item natu-

ra, principium motus corporis nostri dicitur, res non explicatur, sed tantum, quod ex hac definita profluere debebat, proponitur. Siquidem non aliter sese res habet cum hac definitione naturæ, ac si panem definire vellem per substantiam nutrientem, qua minime scio quid panis sit, sed quæ ejus sit efficacia. Deinceps, cum magna distinctio sit inter motus percipere eoique dirigere, & ipsos motus facere; necesse quoque est, ut non ab una, sed a diversa causa hæc dissimiles operationes profiscantur, quæ ideo etiam diversis nominibus, melioris doctrinæ gratia, debeat insigniri. Jam vero corpora movent & moventur, & hi quoque motus certis sunt legibus: anima vero percipit; secundum vero motuum leges nequaquam sunt perceptiones. Hinc quoque anima ab eo, quod motum in corpore nostro præstat, est distincta.

3. Qui porro vitam conservationem corporis mixti a putredine, & mortem ejus corruptionem dicunt; hi affectum vitæ & mortis, non vero causam ponunt: siquidem experimento quotidiano compertum est, corpus in mixtione & structura sua integrum diu posse servari e. gr. intenso frigore exsiccatione humidi in putredinem admodum proni, aut balsamatione, ubi tamen vita non est præsens; sicut etiam contra mors recte prædicatur de corpore, quamvis ejus corruptio, ut videmus in iis, qui morte violenta pereunt, nondum adsit. Neque etiam motus excretorii directe & absolute vitam tuentur, utpote qui vitio laborantes potius ad morborum causas explicandas maximi sunt momenti.

4. Quum autem vera definitio vitæ & mortis sit genuinum demonstrationis & theoriæ medicæ fundamentum; hinc utique eam recte ponendam esse censemus. Nos vitam animantium dicimus esse cordis & arteriarum motum, cujus beneficio tota fluidorum massa per omnes corporis canales circumvehitur, ut totum corpus mixtum & structum a corrup-  
tione



tionē vindicetur. Primata vero motus cordis & solidorum causam dicimus esse liquidum purissimum & tenuissimum cerebri, nec non tenuem & spirituosam aeris & alimentorum portionem in sanguinem delatam, quorum influxu cor debito constrictionis & dilatationis motu gaudet, quo vigente universa postea sanguinis & humorum massa in perennem orbem ac circulum volvitur; hoc vero præsente, non modo anima inorganis ipsi destinatis percipit & dirigit, sed & corpus nutritur & a corruptione præservatur. Hoc vero liquidum, secundum HIPPOCRATEM, *impetum faciens*, & humores mobiles aere & alimentis ingestis sustentari, vel ex eo patet, quod harum materia penitus detracta, vitam perire necesse sit, atque adeo patet, ut vita conservetur non tantum egestionibus, sed & ingestionibus opus esse.

5. Quapropter investiganda utique jam erit causa, quare homo non diu sine aere & alimentis subsistere possit. Dicimus ob id perpetuo & in dies necessarias esse ingestiones, quia corpus animantium ita constructum est, ut auxillum ejus, quod assumitur, remaneat, sed omne fere rursus per varia emunctoria ejiciatur. Nam quodcumque bene, calculo exquisite posito, perpendimus, quod robustum corpus vix, ac ne vix quidem ultra triginta libras fluidorum in canalibus circumvehatur: & ejusmodi quantitatem per potum & cibum intra duos minimum dies in corpus adsumi; hinc ex eo consequitur, excretiones fere ingestionibus debere esse proportionatas atque æquales. Cujus rei rationem adferimus, quod fluida in tubulis contentæ partes jugi intestino calido motu, qui individuus progressivi comes est, successive valde alterentur & a naturali crassi discedant, ut motibus vitalibus continuandis minus idoneæ, atque effectæ reddantur: quare ut hæ excernantur, & nova accedant necessarium est. Et animadvertimus quoque, novum semper vigorem, non solum universo corpori, sed & animo, mox ab adsum-

tis alimentis accedere, infallibili consequentia, cordis & omnium musculorum motui robar ac vim motricem ab aere & alimentis, adeoque ab extra accedere; ut itaque non opus sit ad occultam & spirituales quandam causam refugere.

6. Sanguinis vero circulus ad durationem & integritatem corporis humani conservandam summe necessarius est: quia hujus beneficio non tantum inutilis & in corruptionem fatiscentes salino-sulphureæ partes per congrua emunctoria jugi motu expelluntur; sed & recens & apta materia, tam ad alendas partes, quam ad secretionem spirituosam in cerebro & nervis liquidi, cujus vigore partes & sentiunt & moventur, adducitur. Ulterius hic sanguinis circulus non invenisse vinculum animæ cum corpore dici potest. Nam quamdiu hic in corpore viget, & per cerebrum ac sensoria corporis benefet; tamdiu etiam anima suas functiones exsequitur: & simulac sanguis cessat moveri ad cerebrum, nec liberum per ejus vasa transitum invenit; protinus omnis sensatio, cogitatio, memoria, ratio, motusque voluntarius expirant. Quicumque itaque vult vitam conservare & efficere, ut corpus non minus atque omnia suis muneribus fungatur, is liberum sanguinis per omnes corporis partes, maxime vero earum nobilissimam, cerebrum, fluxum ac refluxum præstare acturi debet.

7. Explicata sic vera vitæ ratione, jam facillimum erit mortis naturam atque proximam causam investigare. Hanc itaque in plenaria cordis motus & sanguinis circuli destructione, optima ratione, ponendam esse censemus. Quare etiam secundum vulgi sensum is dicitur mortuus, ubi nullus amplius vel intra vel extra corpus animadvertitur motus. Et, quia cordis motus fluidorum progressum maxime regit atque moderatur; hinc quoque non sine ratione cor primum vivens ac ultimum moriens a veteribus salutatur. Quia vero interdum ad tempus motus cordis, & sanguinis circulus suspen-



ditur, ut sit in syncope; hinc cavendum est, ne hanc pro morte habeamus, cum hæc potius irrevocabilis motus cordis abolitio sit, qualis ex morbo præcedente & circumstantiis præsentibus facile poterit distingui atque dijudicari. Hunc circulem exstinctum sanguinis motum, putredo, neque minus omnis sensus ac motus privatio, presso pede sequitur.

8. Ex quibus apparet, quod omnia ea, quæ cordis pulsus & circuli sanguinis progressionem plenarie auferunt, ad inferendam mortem potentissima sunt, & quod in omnibus morbis lethalibus mortis causa unice in iis quærenda sit, quæ hos motus estinguendi facultate prædita animadvertimus.

9. Quamvis vero homo non uno morbo interimatur, sed tot viæ ad mortem, quot magni morbi, sint; attamen id indubitata certitudinis est, quo omnes mortiferæ causæ eo conspirare debeant, ut fluidorum motus & cordis pulsus in corpore nostro ex toto deficiat. Atque ut hanc maximi momenti in medendo veritatem clarissime demonstramus, certe opera & labore dignum existimamus. Neque verò nobis melior ad detegendam hanc veritatem suppetit via, ac si funestis morbis defunctorum anatomicas observationes paulo majori cum cura ac studio intueamur, occurrentia ibi phænomena bene perpendendo. Hinc quoque accuratiora, quæ possunt haberi, observata anatomico practica in præsentem contemplari instituiamus, quo facto clarissime apparebit mortis causam minime ab incorporea quadam re ac energia fieri; sed crasso & sensibili mechanismo, ad motus sanguinis omnimodam destructionem tendente, quem & sensus capere, & ratio perspicue intelligere poterit, proficisci.

10. Hisce diductis initium scrutini mortis jure meritoque facimus a funestis capitis morbis, quo numero omnium consensu apoplexia, lethargus, epilepsia atque phrenitis continentur. Primo omnium itaque quærenda causa est, quare sæpe sani & robusti homines,

in optimo vigore ætatis & virium constituti, ex apoplexia tam repentina morte occumbere debeant. Et hanc ipsam jam nobis accuratior anatome hoc morbo defunctorum, quod sanguinis vel feri extravasatio in cerebro sit, clarissime suppeditabit. Et testatur de apoplecticis clarissimus WEPFFERUS, quo nemo in hoc malum majori solertia inquisivit, se semper fere extravasatum sanguinem, ex plexu chorioide prodeuntem, reperisse. Videatur *tractatus de apoplexia*. Deinde Cl. WILISIUS refert *Lib. de anima brutor. cap. IX pag. 222.* historiam, ubi juvenis sanguineus, plethoricus & vino indulgens, apoplexia correptus fuit, in cujus capite aperto anterior cerebri cavitas sanguine grumoso, cum feri copia, impleta viscebatur. WARTHONUS in *Adenograph. Cap. II.* narrat: se in iis, quos apoplexia subito abstulerat, ventriculos cerebri sanguine refertos deprehendisse. Haud dissimilis quoque observatio legitur in *M. N. C. D. II. A. X. obs. 161.* dum dissecto apoplectico multum saniosi feri ex cerebro diffuxit, sinus falcatus, cruore turgidus, & ventriculi lymphæ repleti fuerunt. Alius apoplecticus in ventriculis copiosum sanguinem serosum extravasatum habuit; & grumus sanguinis ovicolumbini forma ibi repertus fuit, nec non quartus ventriculus & infundibulum sanguine turgebant. *vid, M. N. C. D. III. A. 1 obs. 154.*

11. Et quemadmodum ex extravasato sanguine apoplexia nascitur; ita in lethargo, paralyti & hemiplexia, quæ sæpe diuturnis cephalalgis, scorbutis & aliis gravioribus affectibus chronicis lethales superveniunt, ingens feri copia in cerebro conspicitur. Sic in quodam post cephalalgiam diuturnam ex lethargo defuncto WILISIUS *Lib. de anima brutor. p. 155.* cerebri anfractus tam exteriores, quam cavitatem internam aqua limpida impletam invenit. Puer trium annorum, ex ophthalmia & exanthematibus faciei soporosus & cæcus factus, sub meningibus ingentem vim limpide aquæ stagnan-



stagnantem habuit, cujus copia etiam ventriculos atque thalamos opticos implevit, quos comprimendo cœcitatem intulit. vid. WILLISIUM *de anima brutor.* cap. IX. *de paralyfi* pag. 225. Ex cephalalgia scorbutica demortuo ventriculi copiosiori & acriori lymphæ turgebant adeo, ut uncix decem effluerint ut M. N. C. D. II. A. X. obs. 3. testantur. Paralyticum sectum vasa cerebri atro sanguine turgentissima, & ventriculosejus copioso sero distentos ostendisse, auctor est C. PEZOLDUS *vid. Obs.* 60. Idem confirmat C. HARDERUS *Obs.* 34. cum paralyticus & a longo tempore cachecticus sectus fuit, ubi versus ventriculos & prope basin cerebri & cerebellum serum copiosum occurrebat, ubi etiam polypus oblongiusculus extractus est.

12. Ex epileptico vero malo qui tolluntur, habent plerumque vasa cruore turgida, & serum quod a sanguine secedit, in inferiori cerebri parte stagnans. Idem fit, quando quis ex phrenitide moritur, huic enim funesta epilepsia ordinario solet supervenire. Ita apud HARDERUM *obs.* 34. epilepticus quatuordecim annorum sanguine inflata cerebri habebat vasa, atque ejus ventriculi anteriores, vesicæ instar aqua distentæ, protuberabant, e quibus, incisione facta, ichor copiosissime profluxit, qui in tertia & quarta cavitate non minori quantitate stagnavit. Atque ejusdem tenoris est observatio, quæ a WILLISIO *Lib. de morb. convuls.* pag. 504. adducitur, ubi in femina moribus convulsivis & epilepticis mortua vasa meningum ita sanguine turgebant, ut quasi tota cruoris massa in capite aggesta videretur, cerebri vero substantia humore aquoso supra modum irrigata fuit, & ventriculi aqua limpida repleti. Similem historiam idem gravissimus auctor *cap. X. pag.* 542. describit: ubi in femina, pathematibus convulsivis & hysterici oppressa, vasa cerebri mirum sanguine distenta fuerunt, ut ejus vix quicquam in reliquo corpore effluerit; omnes vero cerebri cavitates & recessus colluvie serosa pleni erant. Simili ra-

tione solertissimus & anatomicus & medicus PETRUS PAW *in obs.* commemorat in epileptico & phrenitide demortuo *obs.* 8. vasa meningum sanguine atro & adusto distenta, & in cerebello putridum humorem fuisse repertum. Et IOH: RHOLDIUS in phrenitide membranas cerebri cum rubore adeo tumentes invenit, ut venæ a cerebri substantia separari possent. In alio piæ matris vasa inflammata reperta fuerunt. *vid. Cent. I. obs.* 39. & 40.

13. Sequitur jam, ut, cur extravasatio sanguinis vel feri in capite tam subito mortem inferat, demonstramus: Cerebrum sanctius animæ domicilium, & tenuissimæ ac purissimi liquidi, quod vim, robur, tonum, ac motum fibræ & solidis corporis nostri partibus conciliat, secretorium ac officinam esse, & saniorum veterum fuit sententia, & diligentior recentiorum observatio anatomica corroborat: siquidem corticem ejus & medullarem substantiam vasculosam, atque medullam oblongatam ac spinalem, principium nervorum & scaturiginem spirituosæ, qui immittitur, liquoris esse, plurimis rationibus probatur: siquidem constricto vel dissecto membri cujusdam nervo, ejus sensus & motus protinus expirat; diffracta vero vel discissa spinali medulla, partes infra læsionem illico omni sensu & motu privantur, cervice vero fracta & læso vel obturato ejusdem spinæ principio, animans illico vita privatur. Quoniam vero ex medulla oblongata, in basi cerebri sita, decem nervorum paria oriuntur, quæ sensoriis maxime præsent, & ad præcipuas vitales partes, cor & pulmones, abeunt; facile patet, hac a sero vel sanguine extravasato obstructa vel compressa, influxum nervi mobilissimi liquidi intercipi debere: quare non mirum, animam nihil amplius percipere, & cor atque arterias activo & vitali systoles motu privari & ita subito mortem accelerari.

14. A morbis capitis progredimur ad eos, qui in pectore seque ac domicilium suum habent, atque interimendi potentia valent. Et hi sunt syncope



sic dicta a veteribus cardiata asthma & catarrhus suffocativus, peripneumonia & phthisis. De hisce etiam experientia anatomica edocemur, quod non alio modo internecioni dent hominem, quam quod liberum circulum ac transitum sanguinis per cor & pulmones sistant atque intercipient. Testantur id polyposæ concretiones vasa obturantes, neque minus scirrhusi tumores & corruptiones saniosæ ac spaculosæ, quæ pulmonum substantiam hisce in morbis infestant. Et quod attinet primo ad syncopen, quæ sæpius subito, & præter omnem opinionem, plures extinguere, imo in lecto, quem sani firmique conscenderant, manere demortuos reperiri, non novum, sed res crebræ experientiæ est: causa tam subitæ mortis non alia, quam viscidior & coagulata membranacea compages, quam polypum vocamus, & quæ prius cordis columnis & lacertis, quasi radicibus implantata, tandem, vi dissoluta, ostia majoris vasis obturans, liberum iter ac motum sanguinis penitus intercludit, unde protinus tota sanguinis circulatio extinguitur. BARTOLINUS *Lib. de lacteis thoracicis Cap. XIV.* scribit, se in iis, quos subito fato extinctos aperuerit, majora cordis vasa sanguine concreto repleta invenisse. Plura de hac re exempla legi possunt in *dissertat. Malpighii de polypo.* item in *Disputat. Cl. BERGERI de polypo cordis & in Boneti anatom. pract. L. I. S. II. & L. II. S. II. & dissert. nostra de subita morte præcavenda.* Solent vero polypi plerumque dextrum cordis ventriculum, eique adnexa vasa, occupare, & ampliores quoque ibi esse, quam in sinistro: fortasse quia redux sanguis a nutritionis & transpirationis negotio multis particulis tenuibus liquidis, sulphureis & salinis depauperatus, viscidior est. Accedit, quod a chylo ex ductu thoracico adfuso, facile in coagulum filamentosum præcipitetur, quod in auriculæ finibus, vel amplis dextri ventriculi columnis, subsistens, ex adsociatis præterfluentibus feri viscidii partibus, paulatim & successive in magnam molem extenditur.

15. At vero polypus, vasa majora obstruens, non modo syncopes & inopinatæ mortis causa est; sed sæpiissime etiam aliis gravibus & periculi plenis pectoris malis sese adsociat, & cito suffocatione interimit: siquidem in iis, qui asthma & catarrho suffocativo tolluntur, plerumque polyposas in vasis cordis & pulmonum concrecentias repertas fuisse, observationum fide constat, ita D. GREISELIUS *M. N. C. A. 1670. obs. 74.* scribit: *quotquot catarrho suffocativo, quo homo frequentius morte decedit subita, mortuos aperti, in omnibus corpora callosa, viscida ac glutinosa in corde deprehendi.* Ita quoque Cl. PEZOLDUS *obs. 61.* in asthma suffocativo & pectoris hydrope cor magnum polypo solido repletum, cum magna in vasis copia atrii coagulati cruoris observavit. In *M. N. C. D. II. A. X. Obs. 174.* asthma ex polypo cordis & pulmonum cum duro lobo sinistri pulmonis, descriptum nobis tradunt. Inter alia vero notabilis est observatio, quam citavimus in *diff. de asthmate convulsivo*, ubi medicus castrensis Doct. GRÆVIUS vel quingentos milites asthma suffocatos incidit, atque semper vel hydropem pectoris, vel polypum, cordis ventriculos & vasa obsidentem, adinvenit. Nos quoque ipse testari possumus, quod aliquoties nobis obtigerit occasio asthma suffocatorum cadavera dissecandi, ubi polypus in vasis pulmonum & cordis, nec non serum fœtidum, extravasatum, in thoracis cavo deprehendimus, cujus causa merito difficilius sanguinis cursui per pulmones debetur: unde serum secedens per lymphatica vasa rupta exprimitur, inque pectus descendit; quare graviori asthma perpetuo fere hydrops pectoris junctus est. Qua de re vide egregias observationes collectas in CAROLIS PISONIS *libro de morbis ex sero pag. 217.* item apud BAGLIVUM in *praxi p. 7.*

16. In peripneumoniacis non modo pulmones materia crassa & cruore repletos ac inflammatos; sed & sæpiissime polyposas in vasis concretiones exhiberi, anatomicè addocemur. Tale exemplum re-



cenſuimus in *dissert. de peripneumonia* §. 10. Dissecuimus nempe juvenem hoc malo demortuum, cujus exempti pulmones apparebant valde duri instar carnis; vesiculæ quasi carnea crassa rubicunda substantia fuerunt infarctæ, & cum discinderetur, pauca quantitas ichoris putridi sanguinei effluebat, nullo præſente pure: pendebant, libra examinati, V. pondo, & injecti in aquam constanter fundum petebant: in arteria aspera spumosa & tenax materia reperiēbatur. Præterea erat memorabile, arteriam & venam pulmonalem, circa confinia cordis, continuisse polypolas concretiones, quæ ex corde & auriculis, quarum columnis & fibris firmiter erant connexa, ramisque horum vasorum, extractæ, ultra uncias duas pendebant. Cordis autem ventriculi cruore crasso, nigricante toti erant constipati, nec non in pericardio sex ad minimum cochlearia aquæ instar carnis loturæ cernebantur.

17. Rara quidem sunt exempla eorum, qui hæmoptysi pereunt; attamen non ita pridem memorabilis casus hic loci evenit, ubi virgo octodecim annorum, teneræ constitutionis, ex mensium obstructione, diu respirandi difficultate premebatur, cui malo inopinato enormis sanguinis profusio, cum tussi, ex pulmonibus, aliquot reiteratis vicibus, superveniebat; & tertia vice tanta copia erupit cruor, ut aliquot vasa repleret, ubi simul frusta magna, dura, carnea ex faucibus extrahebantur, quæ, examine a me instituto, postquam aquam calida sufficienter elota fuissent, non alia, ac polyposæ & fibrosæ membranaceæ concretiones erant, & ultra quatuor uncias pendebant, quæ in spiritu vini rectificato usque eo adservantur. Quia vero a tam immensi sanguinis profusio omnes vires penitus consumptæ erant, tertio die virgo honestissima animam placide efflavit. Rarissima hæc hystoria nos docet, aneurysmatibus vel varicosis pulmonum vasis polyposa hæc corpora insedisse, unde, illis disruptis, in majores bronchiorum ramos, simul apertos, penetrarunt. Neque dubium

est, gravem hæmoptysin sæpiissime ex magna obstructione, a polypo vel scirrheicentia lobi cujusdam pulmonalis, provenire, unde libero sanguinis itinere impedito, ipse magno impetu ad alia vasa ruit, quæ nimirum distendendo, tandem aperit funestum fluxum producendo. Id quod singulari observatione WILLISIUS in opere posthumo Sect. I. cap. VII. confirmat, ubi totus lobus sinister a tumore scirrroso adeo obriquerat, ut penitus constrictus & quasi lapideus appareret: quare non mirum est, si cruor rapidissime per pulmones trajiciendus alicubi e vasis eruperit.

18. Qui palpitatione cordis detinentur, eos polypus cordis plerumque interficit; qua de re habemus egregium locum in BAGLIVI *prax. med. Lib. II. pag. 229.* ubi scribit: sectis cadaveribus plurimis, observavimus in cordis ventriculis polypos, aneurysmata, grumos sanguinis ingentes & consimilia, inter quæ, elapso quinquennio, notavimus in cadavere sexagenarii, palpitatione demortui, aneurysma ingentis magnitudinis in aorta adscendente, ubi proxime a corde exoritur, & in cavitate aneurysmatis polypum magnitudine ovi asserini. Jam facile patebit ratio, quare palpitatio sola corporis incurvatione vel capitis ad terram inclinatione, quoties redit, cohiberi possit. Quo spectat insignis observatio, quam CL. NABOTH, *medicus & professor Lipsiensis* nobiscum communicavit, ubi juvenis, quoties in lecto lateri dextro incumberebat, spirandi difficultate, cum suffocationis metu cordisque palpitatione laboravit, quæ protinus decubitu in latus sinistram cessabat; tandem, cum repertus mortuus dissecaretur, ingentis magnitudinis polypus auriculæ dextræ impactus inveniebatur. Ceterum in iis, qui palpitatione pereunt, ordinario ingens feri copia in pericardio observatur. Qua de re legi meretur PISO *de morbis a serosa colluvie oriundis pag. 107.* item OLAEUS BORRICHIIUS in *act. med. Hafn. pag. 173.* & TULPIUS *lib. IV. c. XX.* FERNELIUS *lib. V. patholog. cap. XI.* Neque



Neque alia hujus extravasati feri origo est, quam difficillimus sanguinis per cordis thalamos transitus: unde serum per meatus auriculæ dextræ nimium dilatatos expressum, intra pericardium descendit.

19. Accidit quoque interdum, ut quidam asthmate intereant, ubi pulmonum moles amplissima & ad sensum integra totam thoracis cavitatem replet: cujus mortis causa quærenda est in tunica illa glandulosa, quæ interius totum bronchiorum tractum investit, quæ tumida vel scirrhusa, impedit, quo minus aer intrare & exire possit, unde sanguinis quoque liber per vasa pulmonum cursus intercipitur. Ejusmodi observationem habuimus ante aliquot annos in Theologo primario Cizensi, qui multos per annos ex difficili respiratione laboravit, tandem hac decessit: aperto thorace pulmones totum ejus spatium occupabant, & nihil præternaturale ibi visebatur, præterquam quod multa scirrhusa tubercula & granula in ramis bronchialibus internis existerent. Huc quoque trahendam esse censeo *observ. XIX.* Cl. RUYSCHEII, qui nobis proponit casum, ubi virgo per multos menses orthopnoea suffocativa laboravit, in qua culter anatomicus, in parte pulmonis, magnum pellucidarum vesicularum acervum detexit, quæ ab aere expansæ & ita obstructæ erant, ut levi compressione ab aere evacuare vix potuerint, neque impulsus per asperam arteriam flatus ullum commercium cum hisce expansis vesiculis habebat. Similem quoque casum in sequentibus observationibus XX. & XXI. refert, ubi in viro disponoæa mortuo observavit, totum malum hæsisse in obstructa pulmonis parte, in qua omnes vesiculæ oppilatæ & expansæ apparebant. Idem in puero octo annorum observavi. Deinceps in demortuo principe stupendum in modum pulmo inflatus erat & universam thoracis cavitatem implebat: mortuus est orthopnoea & hæmoptysi; & arteria aspera sanguine grumoso & florido repleta erat; tota pulmonum superficies exterior innumeris ulcusculis oblecta. vid. VERZASCHA in *obs. pag. 307.*

20. Ex affectibus chronicis ipsa phthisi pectorali & consummata nullus facile majoris periculi est, dum hominem omnibus viribus lente depauperat, & inopinato suffocat. In defunctis culter anatomicus in sequentia detegit. Primo in omnium fere, qui phthisi decedunt, pulmonibus ingentes scirrhusitates vel dura tubercula, quæ partim pure scætent, partim instar steatomatum aliquid sebacei continent, reperiuntur. vid. M. N. C. D. III. A. III. *obs. 188.* PEZOLD. *obs. 64. 74. Act. Hafn. P. I. A. 1673. obs. 4.* HARDERUS *obs. 46.* Secundo in nonnullis pulmonum lobi, penitus abscessu & pure consumti; in quibusdam exsiccati, nullum amplius pusfundentes, videntur, & propagationes asperæ arteriæ, aliaque vasa sanguinea, albescent, ut, absque ulla dilaceratione, a pulmonum deperdita substantia solutæ cernantur. vid. PETR. PAW. *obs. 22. it. obs. 15.* & HARDERUS *obs. 51. it. BARTHOL. Cent. V. obs. 7.* Tertio in pericardio, in thorace, sæpe ingens feri impuri foetidi copia offenditur, qua de re consule HARDERI *Anat. pract. obs. 41. 45. it. 47. 51. & 52. M. N. C. D. I. A. I. obs. 15.* & BLANCARD. in *anat. pract. p. 189. M. C. D. II. A. III. obs. 199.* PEZOLD. *obs. 74. it. 92.* PLATERUM in *obs. Lib. III. pag. 689.* Quarto observamus in dissectionibus phthisicorum, quod pulmones ut plurimum, firmissime costis itemque diaphragmati adhæreant, quod passim fere in omnibus observationibus, quæ anatomen phthisicorum tradunt, legitur. Quinto polyposæ massæ, vel cruor coagulatus, sæpenumero in corde vel pulmonum vasis phthisico malo defunctorum subsistunt, de quo phænomeno consuli potest HARDERUS *Obs. 45. it. 49. & 52. BARTHOLIN. Hist. Cent. V. Obs. VII. it. M. N. C. D. II. A. V. obs. 65.* Sexto, concrementa calculosa tartarea interdum in exulceratis pulmonum sinuositatibus reperiuntur. vid. HAR. DERUM *Anatom. pract. obs. 34. & M. N. C. D. II. A. IV. obs. 35. & D. III. A. III. obs. 188.*

21. Hæc omnia & singula phænomena, in cadaveribus phthisi demortuorum



conspiciam, tum morbi genium & symptomatum rationem, tum interitus causam perspicue satis declarant. Siquidem prima phthiseos incunabula atque originem, qui ex obstructis minimis pulmonalibus vasculis tumefactis ac induratis deducunt, recte ii, mea quidem sententia, judicant. Hæc tubercula, quæ cum vesiculas pulmonales, tum bronchiales ramos occludunt, impediunt, quo minus aer pulmones satis distendere possit: unde libero sanguinis itinere intercepto, cum difficultate, angustia atque anxietate fit respiratio, eoque gravior, quo majorem scirrhostas pulmonalem substantiam occupat. Hæc quoque tubercula & mole sua, & acrimonia lymphæ vel purulentæ materiæ, quam fundunt, nervosas bronchiorum partes continuo irritando, continuæ, siccæ, & ferinæ tussis causam subministrant. A libero vero sanguinis transitu per pulmones præpedito, regurgitat ille in cor, quod nimium distendendo, maximas anxietates, quæ phthisicis sæpissime superveniunt, parit; ubi etiam, facta accumulatione, in polyposam massam successive coalescit; qua postea difficilior adhuc sanguinis per pulmones & cor circuitus fit, unde in universo venarum systemate circulatio fit tardissima. Hinc serum secedens, inque porosam partium substantiam influens, facit tumores pedum & abdominis, qui subinde phthisicis junguntur & feralem catastrophem indicant. Simili ratione serum, secessum faciens a sanguine, in cordis auricula, præsertim dextra, utpote tenuissimæ structuræ, hydropem pericardii facit, & tandem etiam ex ruptis vasis lymphaticis serum in thoracem exundat. Frequentior vero pulmonum ad pleuram adhæsiō sero, quod ex poris pulmonum, sub difficultate transitus, exprimitur, tribui debet. Hoc enim, exhalantibus partibus tenuioribus, tenax fit, quo partes conterminæ conglutinantur. Igitur quo gravior est læsio pulmonum, consumptio, scirrhostas, & obstructio, eo majus, ob difficiliorem sanguinis transitum, suffocationis periculum imminet,

qua, plures phthisicorum intèreunt. At phthisi perpetuo fere hecticus calor, cum ingenti virium defectu, jungitur, qui liquido nerveo a putredine inquinato jure est adscribendus. Quum vero continuo calore omnes succi & vires successive consumantur, lente sic cordis motus fatiscit & tandem extinguitur, atque mors, sine turbatione mentis, plerumque inexpectata & ex improvviso supervenit.

22. Ex chronicis malis vix ullum frequentius hydrope interimit, qui plerumque aliis gravibus affectionibus, ut asthmate, quartanæ, cachexiæ, scorbuto supervenit. Causam mortis si inquiremus, inspectione cadaverum diligentiori, immanem copiam feri patridi, tam in abdominis cavitate, quam sæpissime etiam in pectore & pericardio deprehendimus, quod interiora, præsertim omentum, (quod nunquam non consumtum & putridum visitur), aliæque viscera corrupta, & ipsa adeo intestina, livida ac sphacelosa reddit. vid. BARTHOL. Cent. III. Hist. 81. M. N. C. D. II. A. VII. obs. 187. it. obs. 188. D. III. A. III. obs. 161. D. I. A. IV. obs. 3. D. II. A. VI. obs. 31. D. I. A. VI. obs. 165. PEZOLD. obs. 77. 88. 65. HARDER. obs. 72. PETR. PAW. obs. 5. it. 28. Et ubi hæc feri extravasatio in hydrope decumbentibus non observatur; ibi etiam nondum omnis spes salutis evanuit. Quod vero ut plurimum paracentesi factam mors subsequatur, in causa est aer admissus, quo accedente feri putrefactio multum promovetur. Hæc ubi incipit, non modo omnis appetitus tollitur & virium reliquæ consumuntur; sed & calor præternaturalis, sine quo non facile hydropticus moritur, supervenit atque incenditur, qui penitus omnes vires & superstites vitales nervorum succos ita exhaurit, ut cordis musculus a motu suo vivifico in totum dejiciatur.

23. Fit quoque hic morbus sæpissime ex asthmate, asthma vero ex polypo cordis, in cavitate ejus dextra detento, aut saltem tumore nodoso majorum vasorum ostia coarctante: qualis etiam



etiam in hydropicis dissectionibus non raro adhuc visitur. *vid. cent. III. Misc. N. C. observ. 117. it. BEZOLD. obs. 77. M. N. C. D. III. A. III. obs. 161. it. obs. 65. & BONETUS in Sepulchreto. Neque rationem difficile est invenire, siquidem, retardato sanguinis per pulmones motu, is regurgitans ad venarum systema ibi tardius movetur atque subsistit; unde feri in partibus inferioribus, per quas semper adscensus sanguinis, quia perpendicularis, difficilis est, magna collectio fit. Ceterum difficilior illa naturalis sanguinis in hepate trajectio ex vase portæ venoso in venam cavam, præclare sentiente Cl. STAHL. in *diff. de vena portæ*, multarum chronicarum passionum, quam maxime hydropis, causa potentissima utique censetur. Nam sanguis ex hoc vase regurgitans in pancreas, lienem, mesenterium, intestina, hæc viscera multum infarcit, tumidaque reddit, & minimos glandularum ductus occludendo, hæc omnia scirrhusa, dura efficit, sicuti etiam hoc modo semper fere, facta inspectione, oculis sese ingerunt. *vid. M. N. C. D. 2. A. 8. obs. 100. it. D. 2. A. 6. obs. 73. D. 1. A. 6. obs. 68. it. obs. 165. & 221, HERDERUS obs. 71. & 72. PETR. PAW. obs. 5. & obs. 28. PEZOLD. obs. 88. M. N. C. D. 3. A. 3. obs. 161. D. 1. A. 4. obs. 3. BARTHOLIN. Cent. 3. bist. 81. D. 2. A. 7. obs. 187. & D. 2. A. 1. obs. 2. D. 2. A. 5. obs. 73. RIVERIUS cent. 2. obs. 53. RUYSCH. in obs. 45. & 46. Per indurata & obstructa vero viscera, libero sanguinis cursu præpedito, fit ejus stagnatio in vena portæ, & inde serum secedens ad vasa fertur lymphatica, quæ nimium distenta & a tono suo dejecta, vergunt in hydatides, (quarum ingens sæpe copia in dissectionibus visitur) quæ disruptæ illam exitialem feri extravasationem efficiunt.**

24. Est adhuc alia hydropis origo ex sanguinis circulo per uterum ob vasa, a materia polyposa vel cruore coagulato varicosa reddita, vel ob ejus scirrhuscentiam impeditiori facto; quo fit, ut serum secedens copia & impetu in vasa lymphatica feratur, quæ in hydati-

des abeuntia tandem rumpuntur. *conf. M. N. C. D. 2. A. 9. obs. 99. HARDE- RUS in apiario obs. 87. VESALIUS Lib. V. de cop. human. fabrica cap. IX. & MAURITIUS CORDÆUS comment. in Lib. I. HIPPOCRATIS de morb. mulier.*

25. Sæpissime quoque mors in cachecticis, tabidis & diuturna lenta cachectica febre detentis, ex ingenti abscessu interno rupto nascitur, ubi foetidissimus non modo viscus, cui insidet, penitus consumit; sed & vicinas partes, quas tangit, eadem corruptione inficit. Ejusmodi vero abscessus maxime mesenterium, hepar, uterum, renes occupant, & fiunt identidem a sanguinis libero circulo, propter magnas obstructions & compressiones vasorum atque scirrositates viscerum intercepto: unde stas in sanguis concipiens vasorum tunicas perripit, ac cavitates sibi formans tandem in pus foetidum convertitur. Abscessibus autem plerumque jungi tumores & scirrositates, fidem luculentam observationes anatomicæ faciunt. PARÆUS lib. 23. cap. 36. in femina mesenterium penitus scirrhosum observavit, quod libras decem cum dimidia pendebat, cui infiniti abscessus, sua quisque cystide, inclusi erant. Ita etiam HILDANUS cent. 1. obs. 7. meminit puellæ, cujus mesenterium tumoribus duris scirrhosis & steatomatibus refertum fuit, præcipue circa venas, quæ ad portam tendunt. Et GOLTTER in *obs. anat.* in hydropico tumorem & magnam colluviem puris foetidi, quod hepar putredine infecerat, animadvertit. Plura vide in WARTONI *tract. de glandulis pag. 50. it. RAYER. M. N. C. D. 3. ann. 3. obs. 131. D. 3. A. 3. obs. 73. Hepar quoque interdum occupant & renes, qua de re vid. M. N. C. D. 3. A. 3. obs. 73. it. D. 1. A. 4. obs. 114. & HILDANUM cent. 2. obs. 39. it. HARDE- RUS. obs. 76. Frequentius vero abscessus in musculis abdominis, præsertim a causa externa, residet, quo interius rupto mors ut plurimum subsequitur. *vid. HILDANUM cent. 2. obs. 37. it. RIVERIUM cent. 1. obs. 92. M. N. C. D. 2. A. 1. obs. 88. Ab apostemate vero mors fit, quia fe-*  
bre*



bre lenta, quæ pedissequa abscessuum est, omnes paulatim vires exhauriuntur, & tota humorum massa successively in excrementa resolvitur. Abscessu autem rupto prodiens pus non modo conterminas partes simili corruptione inquinat; sed & fœtore suo tenuissimum illud fluidum, quod fibris vim motricem confert, admixtione sua contaminat: unde recte HIPPOCRATES S. VII. a. 8. *Extuberculi intus rptione exolutio, vomitus, & animæ deliquium fit.*

6. Qui ex calculo renum & vesicæ moriuntur, hos quoque corruptio putredinosa, vitali moventi insensibilissima, interimit. Nam si quando calculus in vesica vel uretere hæret, efficit, ut per renes transcolatum falsum serum immane quantum & ureteres & renes distendat, qua vehementi distensione & compressione vasorum illi inflammantur atque in abscessum vel putrilaginem, qua penitus tandem consumuntur, degenerant vid. M. C. D. 2. A. 8. *observ. 153. it.* BARTHO-LIN *in cent. 3. bist. 35. it.* M. C. D. 1. A. 2. *observ. 81. it. 2. A. 2. obs. 13.* & PETR. PAW. *obs. 3. it. D. 1. A. 4. obs. 23. it.* VERZASCHA *cent. 1. obs. 2. it.* FERNELIUM *de partium morbis & symptomat. lib. 6. cap. 12. pag. 316.* RIOLANUM *lib. 2. cap. 29.* HIC. TULPIUM *lib. 3. obs. cap. 6.* PANAROLUM *Pentecost. quart. obs. 31.*

27. Præterea plus vice simplici in iis, qui ex calculi tormentis & ischuria diutius obierunt, ventriculi inflammacionem, ex suis signis dignoscendam, nec non epilepticas convulsiones supervenientes animadvertimus, procul omni dubio ob atrocissimos spasmos in ventriculum per consensum, vel etiam ipsum in caput derivatos. Quare nihil dubitamus, quin, si in dissectione cadaverum etiam has partes, maxime ventriculum & intestina, majori cura simul scrutemur; (id quod minus factum esse in iis, quas perlegi, observationibus vidi, dum dissectores, quando calculum invenerunt, veluti mortis causa deprehensa, aliarum partium inspectionem supervacaneam crediderunt) in inflammatione & sphacelatione, præ-

fertim in senibus & debilitatis, proximam mortis causam reperiamus.

28. Præsentior adhuc mortis causa inflammatione & sphacelatione ventriculi & intestinorum, quæ plerique, qui morbis acutis & malignis decedunt, item ex veneno vel validiori medicina, nec non peste, morbo Hungarico, dysenteria, colica vel iliaca passione, aut acuta vel omnino alia febre succumbunt, in dissectione reperitur. Siquidem in nonnullis corporis partibus spasmus, inflammatio vel sphacelatio periculosior est, quam in iis, quæ nervosæ ac membranosæ texturæ sunt, ac exquisitiore sensu ac motu gaudent, neque minus cum universo nervorum genere consensiones fovent. Huius vero generis esse ventriculum & totum intestinorum canalem, vix ullus ad dubitabit. Venena vim suam maxime exserere in ventriculum & vicina tenuia intestina sphacelo ea corripiendo, sectiones & observationes plures hinc inde prostantes declarant. Ex omnibus vero WEPFERUS *in tr. de cicuta aquatica*, qui plurima experimenta in animalibus instituta collegit, evolvendus est. Aquæ frigidae potum, corpori calefacto copiose immissum, vel brevi mortem, vel alias ad mortem tendentes afflictiones invenire, res certæ, quotidianæ & indubitatæ experientiae est. Neque alia tam subitæ & funestæ catastrophes suppetit ratio, quam quod frigidus potus celeriter ipsum sanguinem, in vasis ventriculi & intestinorum coagulet atque in motu sistat: unde, nisi mature discutiatur, necesse est, ut in sphacelum abeat. Tristissimum ejusmodi exemplum in *dissert. de benignorum remediorum abusu & noxa* fuse recensuimus. Huc quoque referendam esse subitam sæpius existimo mortem, qua senio confectos & viribus orbatos ex usu fructuum refrigerantium, v. g. melonum, malorum persicorum, interdum defungi historiarum monumentis legimus: siquidem notum est, quam pronus senum, quin etiam scorbuticorum & imbecillium sanguis in sphacelosa sit corruptionem, quæ in illis levissima sæpe ex causa quam facillime suscitatur.



fulcitatur. Quam graves etiam noxa, immo ipsa. mors haustum frigidum, post graviolem iracundiam assumtum, excipiant, notissimum est.

29. Qui pestilentia & febribus malignis tolluntur, ventriculū & intestina sphacelata nunquam non exhibent; quod etiam ferme de omnibus febribus acutis, ardentibus, cholericis, semitertianis, variolis, aliisque intelligendum est. Nos plena fide attestari possumus, quod omnes eos, quos ex febre quadam acuta mortuos scimus, ex inflammatione ventriculi, intestinorum vel meningum supervenienti decessisse deprehenderimus; quod non modo ex symptomatibus judicavimus, sed & ex dissectionibus, quas ipsi habuimus, & de quibus alii fidem certam nobis fecerunt, apparuit. Legi possunt ejusmodi historiae apud FORESTUM lib. 6. obs. 13. DIEMERBROECIUM p. 273. HELMONTIUM p. 887. BARTHOLINIUM cent. 3. historia 68. it. cent. 3. ep. 92. it. 29. M. N. C. dec. 3. anno 3. obs. 100. item PEZOLDUM observ. 87. BARTHOLINIUM hist. anat. cent. 5. observ. 4. M. N. C. dec. 1. an. 6. observ. 161. BLANCARDUM obs. 67. & in Dissertatione nostra de inflamm. ventriculi.

30. Neque alia morte diarrhoea vel dysenteria correpti, quam intestinorum sphacelatione, perimuntur; id quod non solum signa, sed & sectiones nobis manifestant. Laborant vero maxime hisce in morbis crassa intestina sphacelationibus & multis tuberculis. vide Misc. N. C. dec. 2. dec. 6. obs. 104. PLATER lib. 3. p. 821. Acta. Hafnens. p. 2. obs. 17. p. 40. & BARTHOLIN. cent. 6. hist. 2. BINNING. cent. 4. obs. 48. Neque aliter mors colica spasmodica vel iliaca passione correptis, quam intestinorum inflammatione & sphacelatione contingit. Vide M. N. C. decad. 2. ann. 3. obs. 193. item obs. 65. BLANCARD anat. pract. cent. 5. obs. 2. HILDANUM obs. 61. centur. 2. KERCKRINGIUM obs. 42. WILLIS. de medic. oper. p. 28. Qui ex vermibus infantes moriuntur, eos identidem intestinorum sphacelatio ad lethum dedu-

cit. Vide Acta Hafnensia tom. 2. p. 88. & LENTILII Miscellan. medica p. 365.

31. Illud ulterius notatu perquam dignum est, quod, qui colica spasmodica, vel veneno diutius morante, aut aliis atrocioribus tormentis moriuntur, plerumque intestina invicem connexa atque coalita habeant. Ejusmodi casus B. Dn. OCHLITZ Clausthalensium medicus, nec non Cl. NABOTH Lipsiensis retulit. Similes casus vide in 10. RHODII cent. 2. obs. 32. it. PETR PAW. obs. V. & BARTHOL. hist. anat. cent. 3. hist. 6. HOECHSTEDTERUM dec. 10. casu 6. M. N. C. decade 2. anni 7. obs. 15. Causa hujus peculiaris phaenomeni vix alia poterit reperiri, quam quod spastica vehementiori strictura serum ex intestinorum tunicis & vasculis minimis exprimitur, quod a volantibus partibus tenuioribus glutinosius redditur, coalescentiam efficit. Eadem ratio est, quare in pectoris affectibus, ubi difficillima est sanguinis per pulmones trajectio, pulmones tam facile pleurae & vicinis partibus adnascantur, de quo supra diximus.

32. Puerperas, quae ex febre inflammatoria intereunt, uteri sphacelo tolli & symptomata & sectiones nos docent. Evolve M. N. C. dec. 1. ann. 2. obs. 85. it. dec. 2. ann. 4. obs. 94. dec. 1. ann. 4. obs. 192. & dec. 3. ann. 3. obs. 123. ann. 1. obs. 22. Infantes pusillos & adhuc lucentes ex torminibus ventris, nec non epilepticis convulsionibus, ab acrimonia biliosa caustica mori, res vulgo notissima est; neque dubium, intestina, ex quibus non raro ad ultimum nigra secedunt, sphacelata in dissectionibus reperiri debere; modo frequentiores corporum & infantilium & omnis aetatis defunctorum, in foro medico fierent.

33. Ex hisce jam allatis historiis, & cadaverum variis morbis extinctorum dissectionibus, satis perspicue edocemur, quomodo mors, sive omnimoda machinae nostrae, quoad structuram & motum, destructio, ex morbo produci soleat. Et quamvis morborum causae multiplices sint; attamen eas, quae mortem proxime inferunt, quatuor potissimum generibus con-



contineri, attentiori observationum anatomicarum consideratione certiores reddimur. Quandoquidem vel in capite cruoris aut seri extravasatio & stasis, vel in pectore polypus aut tumor ostia viarum, per quas sanguis vel aer fertur, occludens subitæ mortis causa est. In reliquis morbis, iisque acutis ex stasi sanguinis suborta sphacelatio sive corruptio putredinosa, fœtida, subito vires prosteruens; in morbis autem chronicis, stagnatio humorum, lente viscera & partes exedens, corrumpens vel exulcerans, genuinæ mortis causæ censendæ sunt. Absoluta itaque mors, sicut plenariam corruptionem corporis nostri organici post se trahit; ita quoque ejus principium corruptio existit, eaque primum particularis est, quæ successive universalis evadit. Etenim nihil in universa rerum natura e diametro magis durationi corpori nostri contrarium est, quam putredo, quæ ex quiete & motu progressivo humorum extincto numquam non prognoscitur. Et ubi hæc incipiat in corpore animantium, non modo ejus partis, cui insidet, structura ac mixtio dissolvitur, sed, quod maximum, illud, quod motum ac robur cordi, arteriis, omnibusque fibris motricibus præstat, subito inficitur & illius admixtione corrumpitur. Quo magis vero putredo vires & incrementa sumit, & in nervosis, sensibilibus partibus residet, eo plus virium destructiva est. His vero destructis incipit sanguinis circulus per cor atque pulmones totumque corpus tardior fieri & tandem penitus extinguere. Et hæc est causa, quare respiratio cum stertore quodam intercepta, & membrorum convulsio mortem plerumque & proxime antecedere soleant, eo quod sanguis in capite, æque ac in pulmonibus, incipiat in confiniis mortis subsistere ac motu privari.

34. Diductis hac ratione causis mortis proximis, promptum jam ac facile esset alias veritates felicissime inde, non sine magno in medendi scientia usu, deducere: videlicet, quid faciendum sit medico, ut in morbis ferales has mortis

causas antevertat & depulset, item quomodo temeraria medicina quam facile causa mortis accersi & procurari possit.

35. Illud vero ultimo loco non transmittendum esse censeo, quod vulgariter causa morbi cum causa mortis admodum confundi soleat. Fit quam maxime id a medicis in morbo defunctorum dissectionibus, ubi, occurrente magna extravasatione vel corruptione, protinus lethalityatem morbi exinde dijudicant. Adeoque sic perperam a causa mortis ad causam morbi argumentantur, quæ, annon potuisset ullo remediorum genere tolli, & ne exinde mortis causa fieret, præcaveri, res sæpius adhuc in quæstione & indagatione versatur.

FREDERICI HOFFMANNI

MEDICUS POLITICUS.

PARS PRIMA.

De Prudentia circa personam ipsius Medici.

CAPUT PRIMUM

De religione & Studiis Medici.

REGULA I.

**M**edicus sit Christianus. Christianus est ille, qui non tantum intelligit historiam fidei Christianæ, circa credenda pariter & agenda; sed qui vita sua etiam ostendit, quid & quomodo credat, qui non solum ore profitetur Christum, sed etiam operibus suis illum imitatur. Si itaque Medicus bonus est Christianus, necessario exercebit misericordiam, imprimis erga pauperes, quibus nunquam gratuitum auxilium denegabit: quia benignissimus Deus gratam constituit Medicinam, eamque ex mera benignitate exerceri finit; nec deerit occasio, quotidiana enim hominum miseria eum admonebit, consilio cuivis indigenti succurrere. Porro Medicus non sit



fit avarus, neque superbus; sed humilis. Duplex est superbia: alia versatur in animo, quando levioris conditionis hominibus denegat colloquium, nec illos æstimat; alia versatur in gestibus, quando vestitu splendidissimo multisque famulis gaudet, quæ omnia nocentissima solent esse Medico. Itaque tanquam Christianus humanitatem exercebit, ad quam optimam occasionem exhibebit ipsa Medicina; quando consideramus, quid sit homo, quam caducus, quam fragilis, unde ortum habeat: nascitur enim inter sterces & urinam. Quid igitur vita hominis? nil nisi umbra.

## R E G U L A 2.

**M**edicus sit moderatus, nec multum de rebus religionem & fidem spectantibus disputet. Melius est ut demonstretur laudabili vita quid sit Christianismus verus, quam multum rationibus & controversiis id ipsum indicare;

## R E G U L A 3.

**M**edicus non sit Atheus. In conversatione hominum observamus, multos reperiri Atheos, licet non theoreticos, tamen practicos. Athei vero practici iterum sunt duplices: alii crassiores, qui nullum plane discrimen inter Deum & naturam credunt, sed mundum pro Deo agnoscunt; ad quem Atheismum Philosophia Stoica occasionem exhibet: alii sunt subtiliores, qui quidem credunt, esse etiam Deum, de cætero vero non sunt solliciti de vita juxta placitum Dei instituenda. Hic Atheismus maxima ex parte ortum habere poterit ex Philosophia Cartesiana; quando Cartesiani doctrinam de motu per genuina Cartesii principia non explicant, atque ita Divinam providentiam prorsus negant, seducti a similitudine, defuncta ab artifice horologii conficiente, qui post mortem horologii sui curam amplius non habet; horologium tamen ex eo in cursu suo non turbatur, sed potius continuo motu horam indi-

cabit; eodem modo Pseudo-Cartesiani statuunt, quod Deus creaverit mundum, ut Spinoza alique; quod tamen Cartesio nunquam in mentem venit. Statuendum est potius, omnia sub clementissima Dei directione & voluntate fieri; quorum etiam Cartesius inclinatur, dicens: *Deus est causa, per quam cuncta conservantur.* Hoc modo describitur & significatur Deus in natura; ideoque longe aliter Deus considerandus est in gratia, quando nos illuminat & ad fidem perducit.

## R E G U L A 4.

**M**edicus non sit superstitiosus. Hic iterum est distinctio inter superstitionem crassam & subtilem, Illa nil aliud est, quam Enthusiasmus, Fanaticismus & Quakerianismus, ortumque habet a Philosophia Platoniorum, qui communiter tres hominis partes essentielles statuunt; 1) corpus, 2) animam materiale, 3) ipsius Dei particulam, puto spiritum. Quoniam itaque Deus omnia revelans in ipsis habitat; in ea sunt opinione, quod etiam, ut ethnici, absque verbo extrinseco, ex revelatione miracula Dei possent pronunciare, si modo non resistant spiritui. Nostri autem Theologi distinguunt inter lumen naturæ & gratiæ, quod accendit reliquias imaginis Divinæ mediante verbo & sacramentis. Subtilioris superstitionis sunt v. g. Chiromantia, Alchimia, Astrologia, Physiognomia, Magia naturalis & Diabolica, herbarum collectio certo tempore & circumstantiis variis instituenda, rerum signaturæ, atque tandem curæ sympathicæ. Ex Astrologia nil plane possumus prædicere. Licet etiam Sol & Luna in terram influant; tamen cætera sidera nil plane ad plantarum generationem conferunt, ut taceam, ad generationem hominum. Conclusiones ex Physiognomia & Chiromantia deductæ sæpissime fallunt, præsertim cum educatio, consuetudo & vivendi ratio accedant; quæ omnia mirum in modum hominum indolem

alte-



alterare solent. Non quidem plane rei-  
iciuntur Physiognomia & Chiromantia  
in se considerata, sed quatenus respectus  
habetur ad astra, ad montem veneris,  
& sic porro. Vera Physiognomia non  
modo considerat faciem, sed etiam at-  
tendit ad totius corporis habitum, an  
carnosus, an cute mollior vel durior;  
considerat porro parentes, inclinationem,  
quæ potissimum ex temperamentis co-  
gnoskitur. Verbi gratia: sanguinolenti  
sunt jocosæ longeque celeriores in om-  
nibus actionibus, quam pituitosi & phleg-  
matici, qui cum melancholicis sunt &  
tardiores & hebetiores vultuque obtu-  
siores & toto cælo à sanguineis diffe-  
rentes, ob circulationem sanguinis spi-  
rituumque tardiores. Physiognomicum  
studium ex hoc fundamentum desumptum  
maximopere est commendandum. Chi-  
romantiam autem, quoniam nec præ-  
terita nec futura certo potest cognosce-  
re, incertam & fallacem judicamus. Al-  
chimia est ars vana & nimis quæstiosa.  
Contendunt quidem Alchimistæ, quod  
spiritu suo extractio mira præstare pos-  
sint, sed illorum spiritus quam maxi-  
me in dubium vocatur, neque hæc-  
tenus ullus fuit, qui minimum effectum  
demonstrare potuisset. Quæ vero ars in  
innumeris tantum speculationibus confi-  
sit, illa deficiente experientia nulla est.  
Circa herbarum collectionem plurimum  
quidem interest, ut certo colligantur  
tempore, quod vero ad astra respicien-  
dum sit, ad certum scilicet diem vel  
horam vel constellationem, hoc est, quod  
negamus & superstitiosum esse putamus.  
Signaturæ vero, ex qua ratione certis  
partibus medicamenta prodesse dicun-  
tur, verbi gratia: nucista capiti, nil  
nisi superstitionem pro fundamento ha-  
bent.

## REGULA 6.

**M**edicus sit Philosophus. Per Philo-  
sophiam acquirimus sapientiam.  
Medicus verò Philosophus Deo æqua-  
lis habetur juxta Hippocratem. Philo-  
sophi autem vel sunt morales, vel Physi-  
Opusc. Patb.

ci: utrumque in uno inveniatur Medi-  
co necesse est. Duplex vero iterum est  
Philosophia moralis, versatur vel in in-  
tellectu vel voluntate. Hæc inculcat actio-  
nes bonas mediaque ad tranquillitatem  
tam temporalem quam æternam perve-  
niendi; illa vero cognitionem juris na-  
turæ, & quod juxta illud Deo, proxi-  
mo, mihiq; debeo. Circa jus naturæ  
varia sunt Philosophiæ principia, sibi  
invicem contradicentia, optime tamen  
juxta nostram hypothesein illud explica-  
tur, si statuamus, principium primum  
atque ultimum esse felicitatem huma-  
nam, quæ tres sub se continet leges:  
I. Deus est colendus. Ex lumine natu-  
ræ cognoscimus fuisse creatorem, qui  
& rerum omnium conservator, cui de-  
bemus (α) Timorem, illi enim, qui fe-  
cit nos, non erit difficile creaturas suas  
iterum in nihilum redigere, (β) Hono-  
rem, quia fuit autor vitæ nostræ, &  
hujus universi, (γ) Amorem, quia quo-  
tidianis nos beat beneficiis. II. Societas  
est servanda. Infelicissimi essemus alio-  
rum consortio destituti, quapropter ser-  
vanda est societas, consistens in amore  
mutuo, à quo omnium gentium jura  
dependent, quæ jura nil aliud exigunt,  
quam ut omnia societatem destruentia  
vitentur, rupta enim societate concidit  
amor atque felicitas cujusvis. III. Or-  
do naturæ est servandus. Versatur hæc  
lex vel circa hominem ipsum, vel circa  
omnes res creatas. Juxta hanc regulam  
ipse homo temperanter vivit, non fa-  
cile turbatur motibus præternaturalibus,  
sed vitam longam metamque à Deo  
propositam acquirit. Ex neglectu vero  
hujus regulæ plurima fluunt peccata,  
verbi gratia: ira, odium, cædes, scor-  
ratio, concubitus cum brutis; ex ea-  
dem oriuntur cupiditates animi pravæ  
pro temperamento hominis. Quæ si in-  
telligit Medicus, non herbis solum sed  
etiam verbis atque consiliis compescet  
plurimorum affectuum ex ejusmodi cu-  
piditatibus pravis prodeuntium effrena  
mala. Dixi porro, hanc regulam sese ex-  
tendere ad omnes res creatas, quantum  
scilicet consideramus earum naturam,  
S verbi



verbi gratia: ignis temperiem, qualitates ciborum aliaque, ut hac ratione fugiamus nociva & appetamus naturæ nostræ convenientia. Hæc omnia Medicus Physica scientia instructus facile intelligit, juxta quam omnium rerum sui que ipsius naturam examinat. Concludo itaque, Medicum non modo Philosophum Moralem, sed & Physicum esse debere. Physicus est, qui effectuum & phænomenorum naturalium causas explicare potest. Itaque non sufficit Medico hominis cognitio, accedere debet machinarum omnium in mundo occurrentium, sive quod idem est, mechanismi universi. Si enim macrocosmum non intelligit, quomodo quæso potest cognoscere microcosmum. Ante omnia vero Physicus Philosophus sibi eligat principia vera & certa, quæ fluunt ex recta ratione conjuncta cum experientia; fugiat autem cane pejus & angue, quæ figmenta, superstitiones & imaginationes pro fundamento habent. Vera enim eruditio non est res imaginationis, sed potius intellectus. Distinguitur Philosophia Physica in historiam & scientiam. Historia Physica pertinet saltem ad bene esse. Quoniam vero hætenus à nemine ex professo tractata fuit, non immerito à medico excolitur. Absolvitur potissimum tribus capitibus:

1. Continet regnum animale, ubi de natura, essentia, speciebus animalium cognitionem sibi acquirit Medicus. Est autem hoc studium difficillimum, & totum hominem totamque ejus ætatem requirit, & licet aliquis totus in hoc studio fuerit occupatus, nunquam tamen completam impetrabit scientiam ne reptilium quidem, ut taceam volatili-um & natatili-um ob ingentem rerum multitudinem. Scripsere hac de re Jonstonus, Aldovrandus. Amatores hujus scientiæ ineant nonnunquam consuetudinem cum venatoribus, aucupibus, aliisque, quibus brutorum species præcæteris cognitæ sunt.

2. Continet regnum vegetabile sive historiam plantarum, quæ vero adeo difficilis & licet decem millia plantarum

numerantur, non tamen ad ingentem plantarum numerum accedunt. Præterea & methodus hodiernorum Botanicorum ita instituta est, ut, qui novit summa plantarum genera, quæ supra millenarium se non extendunt numerum, facili quoque negotio species a se invicem poterit distinguere. Excellunt hac in arte Morison, Rajus, Hermannus, Rudbeckius, & præ omnibus Celeber. Rivinus, a quo ars botanica in se spectata difficillima, faciliiori disci poterit methodo.

γ) Exhibet regnum minerale, ubi Physicus iterum calleat metalla eorumque generationem, item gemmas earumque probationem, nec imperitus sit in arte docimastica. Ad hanc cognitionem rursus totus requiritur homo, & erit tamen incompleta, quia generatio metallorum aciei mentis nostræ abscondita est. Desperandum tamen non est: possumus enim a notis ad ignota concludere, ulterius vero progredi non licet, sed admiranda potius omnipotentia Divina. Et sicuti ex artificioso horologio artificem cognoscimus arte sua perfectum ita ex innumeris potentissimi Dei opibus summam ejus scientiam perspicimus.

Progredimur nunc ad scientiam Physicam, quæ ante omnia requiritur a Medico, ut reddere possit causas omnium rerum naturalium. Hæc scientia maxime incompleta est, quia sensus nostri non sufficiunt ad cognoscendam intimiorem rerum essentiam & constitutionem; quæ vero scimus, ea plurimum ex effectibus saltem habemus beneficio Philosophiæ experimentalis. Atqui ex hujus ignorantia atque defectu omnes omnino errores & sectæ originem traxerunt, quæ exulta, peritura est omnis inter Philosophos discordia. Varia ad hanc scientiam requiruntur instrumenta; Telescopia, microscopia, vitra caustica &c. cum quibus varia experimenta instituimus, ex his rationes particulares desumimus, ex quibus denique universale probare contendimus. Si hoc obtinemus, certum axioma constituimus, juxta quas multas rerum demonstrationes exhibere possumus.



sumus. Verbi gratia: Amygdalæ in mortario cum aqua tufæ præbent lactis instar emulsionem. Si rationis beneficio inquiri in causas, apparet, oleofas amygdalarum particulas intime cum aqua mixtas talem præferre colorem; ad confirmandam hanc thesin aliud constituimus experimentum cum oleo cinnamomi vel anisi etiam, quod solutum & cum aqua mixtum, transit in lac. Ex hisce particularibus experimentis universaliter concludo; ubicunque oleum intime solvitur a particulis aqueis, ibi exsurgit color lacteus. Applicatio hæc fiat ad chylum nostrum qui nil aliud est, quam emulsio naturalis, quod ex præcedentibus concludo. Quivis Medicus & imprimis Physicus continuo in experimentis potissimum Chemicis sit occupatus. Rectissime enim Chemia a quibusdam vocatur Medicinæ anima, quando scilicet de experimentis sermo est; qui hanc non intelligit, totam fere Physicam ignorat. Duo itaque requiruntur ad Physicam experimentalem: 1) Chemia, cujus beneficio multæ inveniuntur veritates, quæque ad specialiora progrediendo ante omnia addiscenda est; 2) Ex Mechanicis summe necessariam habemus doctrinam de motu, ubi præ omnibus commendatur Leibnizius in Theodicea sua, item Wallisius, Borellus. Sinclarus de gravitate, Tigellius, Gassendus &c. Quod vero totam Philosophiam experimentalem attinet, nullus hætenus repertus fuit, qui veram Mechanicam Philosophiam in justum & accuratum ordinem atque formam rede gisset. In generalioribus quidem excellens fuit Cartesius, item du Hamel, le Grand, Rohaultius. In specialiori vero Physica nemo hætenus omnem absolvit numerum, possumus tamen ex clarissimis scriptoribus collectim sumtis egregiam haurire scientiam. Inter quos principem sibi vendicant locum Boyleus, deinde Sturmius, Acta Anglicana, Ephemerides, ex quibus omnia optima colligenda, erronea corrigenda sunt.

REGULA 6.

**M**edicus sit eruditus. Id est ab omni ruditate liber, hoc impetrat, si addiscit linguas, ex quibus Latina cardinalis dicitur. Scriptores Medici qui in hac Lingua excelluerunt ex veteribus sunt Celsus tanquam alter Cicero. In Physicis Jul. Cæf. Scaliger atque Plinius. Ex recentioribus Verulamius, ex recentissimis Pechlinus. Post hanc summe necessaria est Medico lingua Gallica, quæ his temporibus fere ubique viget. Deinde Anglica atque Italica, utpote in quibus multi libri eduntur eruditissimi. Intelligat ad minimum has linguas, si non loquatur Medicus. Tandem quoque Græcam eruditus calleat Medicus ad ornamentum. De cætero vero hac lingua carere possumus, quia scriptores Græci jam dudum latinitate donati sunt. In hætenus enarratis linguis nulla quidem consistit eruditio, si scilicet in se considerentur, constituunt tamen medium, ad aliorum eruditionem nos perducens. Non enim semper acquiescendum est in unius cujusdam auctoris scripto, sed varii sunt consulendi, quibus diligenter collatis, occasionem habebimus instituendi meditationes de rebus sensibus nostris quotidie non obviis, quæ his neglectis in intellectum non venissent. Porro ad veram eruditionem requiritur rectæ rationis usus, sive ars ratione recte utendi, quod habemus ex logica. Ut scilicet intelligamus omnia egregie proponere, accurate connectere, atque clarissime demonstrare. Qui hujus artis vim scire amat, non adeat Logicam vulgarem sed Mathesin, & in ea se exerceat, quæ etiam Logistica dicitur. Hanc non negligenter tractet, est enim Mathesis mater omnium scientiarum, qua neglecta omnis ad filiam denegatur aditus, estque princeps omnium disciplinarum. Qui itaque felicem sibi in his promittit progressum, is Arithmeticæ & Algebræ imprimis notitiam sibi acquirat, quo judiciosus redditur &



capax, verum a falso non difficulter discernendi. Qui paucis iis veris principis instructus est, non opus habet multorum Longicorum scriptis. Evolvat Cartesium, Malebranche, Clerici Logicam, Metaphysicam & Pneumaticam, in quibus omnia, quæ ad Logicam veram necessaria & Medico utilia, sufficienter inveniet. Egregium etiam adfert Medico augmentum & ornamentum, quando Politica instructus in consuetudine cum Politicis non plane rudis reperitur, quod in Parenthesi dictum volo. Porro Medicus sese exerceat in Geometria, Statica, Mechanica, Hydraulica & Optica, iisque utatur in rationibus Physicis recte explicandis, quibus maximum afferre solent lumen. Cavendum vero sedulo, ne in quibusdam minutiis scientiam nostram ostendamus, quod animum magis otiosum quam judiciosum indicat. Absoluta sic Physica generali, in specie ad corpus humanum tanquam subiectum Medicinæ se conferat Medicus, ubi Anatome primum sibi vindicat locum, quæ duplex est: hominum & brutorum. Hæc quidem proprie ad Physicam pertinet, in ea tamen non imperitus esse debet Medicus, quia non ultima laus est, si erudite de differentia, in quorundam animalium partibus nonnunquam occurrent, differere potest. Commendantur hac in parte Blasius, Acta Hassniensia, Acta Naturæ curiosorum. Imprimis vero Anatomia hominis a Medico requiritur. Optandum hic esset, ut diligentius studium hoc utilissimum in Academiis tractaretur, ut observavimus in Wilisio, Bartholino aliisque. In omni Anatomia tria observanda veniunt: 1) Structura vasorum & viscerum, 2) Osteologia, 3) Myologia, hæc duo posteriora ad Chirurgum ut plurimum referuntur, necesse tamen erit, ut Medicus exquisitam & ossium & Musculorum habeat cognitionem, imprimis in iudicio de vulnerum lethalitate ferendo, ubi multorum Medicorum fama atque fortuna

periclitatur, item in adstistendis operationibus Chirugicis, ubi si Medici atque Chirurgi inscitia pari passu ambulant, miserrime de ægri luditur corio. Si vero Chirurgus in scientia sua Anatomica Medicum superat, non immerito Medicus irridetur. Ad Myologiam addiscendam non incongruum est conservatio corporum per ballamationem, quia subiecta quotidie non occurrunt. Osteologia vero optime addiscitur ex veteribus, ubi præ omnibus commendatur Vesalius, ut & in Myologia, post hunc Riolanus, Veslingius aliique. Ex neotericis non inutile judicatur Blancardi Anatomia nova. Dionisius poterit inservire, quando discursus Anatomicus est instituendus. Lowerus Anatomiam suam applicavit ad Mechanicam, Dimerbroek pro & contra rationes adfert, & commendatur disputantibus. Bidloo quoad figuras judicatur optimus. Fundata sic Anatomia, in specie intelligat usum explicare partium, itaque addiscat Physiologiam. Multi quidem Anatomici Physiologiam simul exhibent, sed incompletam. Excellunt recentiores in observationibus & explicationibus, præ omnibus commendatur Bohnii Circulus Anatomicus, qui omnia fere Mechanice explicavit. His absolutis, calleat Medicus Materiam Medicam, ad praxin summe necessariam, ubi medicamentorum facultates imprimis Chemice explicandæ sunt. Ex libris eandem addiscere velle est difficillimum, quoniam nemo hactenus accuratissime omnia examinavit, quotque sunt auctores, tot etiam reperiuntur sententiæ. Prius itaque cum Physica Chemia addiscenda est, antequam perveniamus ad Pharmaceuticos. Jam ad praxin se applicaturus ante omnia instructus esse debet Semeiotica atque Pathologia, ex signis enim causas scrutari possumus, ex causis vero remedia. Primo itaque Pathologia generalis tractanda est. Optandum autem



antem foret, ut majorem diligentiam hac in re adhibuissent, qui ante nos vixerunt, atque ex fundamento eam tractassent. Si enim excipiamus Sennertum, & in prognosi Hippocratem, nemo sane reperitur, qui nostræ intentioni satisfacit. Post observatores ex antiquis evolvendi sunt neoterici; Sydenhamus, Sylvius, Ettmullerus; ex Chirurgicis, Hildanus. In horum auctorum perlectione non tam attendenda sunt eorum principia, quam cautelæ & observationes. Sic acquiritur Praxeos generalis scientia, quæ neminem reddit practicum, nisi porro adplicetur ad praxin clinicam.

REGULA 7.

**M**edicus discat praxin Clinicam & individualem. Observandus est morbus, ægrotus, attendenda sunt signa, in dies adnotandæ sunt variationes speciales. Ante omnia vero Medicus ad praxin se applicaturus noscat conditionem loci, victus rationem, naturamque aquarum & individuorum. Circa loci conditionem probe considerandus est situs, qualis sit climatis conditio, an aer temperatus, an frigidus, quæ anni tempora: ut plurimum enim morbi epidemici ab aeris conditione dependent, verbi gratia: si præcesserit æstas calidior, subsequente autumno dysenteriis laborant ægri. Circa locum etiam notentur morbi epidemici, e. g. Westphalia rarissime morbis acutis & febribus ardentibus infestatur; sæpius vero febribus quartanis, peripneumonia, pleuritide. In Hungaria atque Polonia istis morbis nihil solemnius est atque frequentius. Loca frigidioris climatis inclinant ad paralytin; quæ omnia in praxi probe attendenda sunt. Circa diætam sciendum, quod ubivis terrarum diversa sit victus ratio: alii enim adsueti sunt durioribus, alii mollioribus, pulmentis, lacticiiniis. Durior cibus præsupponit ventriculum robustum: requiritur itaque in ejusmodi subjectis dosis medicamentorum auctior, qui mollioribus adsueti ob de-

*Opusc. Patb.*

bilitatem ventriculi, majorem dosin jubent. Circa aquarum naturam notandum, an Salinæ magis, an Vitriolicæ, an abundant particulis terrestribus; an faciles sint ad coquendos cibos. Quæ omnia accuratissime adnotanda sunt & examinanda, quia multum ad sanguinis temperiem aquæ conditio conferre solet. Qui hæc omnia considerat, videbit, effatum Galeni verissimum manere: *multa esse in praxi, quæ nec dici nec scribi possunt*. Sciendum saltim, quod ab Hippocratis temporibus hocce studium de exploratione climatum penitus neglectum fuerit, cum tamen dimidia ferme praxis ab eo dependeat. Egregium de locis, aquis, & aere caput visitur in scriptis ejus, quod praxeos cultoribus indefessis summo studio commendando. Post Hippocratem in omnibus practicis scriptis nihil fere reperitur. Pono, ad praxin clinicam pertinet cognitio individuorum, ut scilicet exploremus, qualia medicamenta in hoc vel illo melius operentur, atque an alias hoc morbo, quo jam laborat, fuerit correptus & qua ratione invaserit, quaque iterum deseruerit ægrum; an venæsectioni fuerit adsuetus, ad sudorem proclivis; quo gaudeat temperamento: quæ omnia si non ab ægrotto, tamen a familiaribus ipsis facillime percipi possunt. Ad ejusmodi cognitionem acquirendam consuetudo cum Medico erudito maximum poterit adferre symbolum, vel si hoc non concessum sit, adeat collegia casualia non fictitiis casibus adornata, sed ex vera experientia desumpta. Porro sedulo legendæ sunt observationes veterum practicorum. Postea propriæ observationes præsertim circa praxeos initium conscribantur, ubi notanda est ægrotorum constitutio, morbus, medicamenta, eorum effectus. Sæpius præsertim ægrotus visitandus inter propinandum medicamentum, observandus pulsus præsertim in diebus criticis. Non inconsultum porro erit Medico, si circa primos praxeos annos ipse dispenset medicamenta, vel ad minimum probe calleat artem

phar-



pharmaceuticam, ubi non solum simplicia noscat, sed & illorum præparationes & compositiones, ne famam amittat apud Pharmacopœum, neque impingat in præscribendis formulis, si scilicet præscribat illa, quæ in composito adhibito jam extant. Sic quoque in visitandis Pharmacopoliis plurimum juvabit nosse simplicia & rerum compositiones; quod facile acquiritur, si hypocoustum conducat Medicinæ studiosus apud pharmacopolam celebrem, ubi præparationibus Pharmaceuticis quotidie interesse licebit. Deindevolvendi auctores qui Pharmacopœas scripsere, præsertim quæ non a Pharmacopœis, sed toto collegio Medico elaborata sunt. His peractis sæpe quoque evolvendus catalogus officinarum, seu taxa medicamentorum, & successive perlegendus, ut acquiramus pretii notitiam, sæpius enim ab ægrotis & imprimis pauperibus quæritur de pretio formularum, quem si determinare nequeat Medicus, non leve opprobrium ipsi judicatur. Nec prætereundi libri Chemici; commendamus itaque Ill. Boerhaave Chemiam, dein Lemmery cursum Chemicum, Glaferum, Schroederum, Pharmacopœam Augustanam. Ex veteribus Agricola commentarium in Poppium. Tandem circa medicamentorum dispensationem tenendum, quod propria remedia vix approbentur: vix enim medicamentorum pretium ab ægrotis accipimus, quin simul etiam auctoritatem amittamus. Accedit & hoc si ab improvviso moriantur, melius est, conscriptas & asservatas in Pharmacopoliis habere formulas, ut si forte nonnulli medicamentis præscriptis causam mortis adscribere velint; formulæ examinari queant, sicque Medicus absolvatur, & culpa potius redundet in Pharmacopœum. Non omnibus tamen medicamentis destitutus sit Medicus, ut pauperibus nempe inservire possit; & quando tali loco praxin exercet, ubi nullum pharmacopolium extat, tunc necessario propria medicamentorum dispensatio admittitur.

## REGULA 8.

**M**edicus nosse debet Chirurgiam. Sæpius interfit operationibus Chirurgicis easque probe observet, nec spernat Chirurgorum consuetudinem, imprimis peritorum, quæ maxime in peregrinationibus commendatur. Hollandia vero optimam occasionem exhibet hanc artem exactissime exercendi, reperiuntur enim ibi Chirurgi peritissimi, cum quibus conversare neminem pœnitebit. Ex auctoribus commendatur Hildanus, Viganus, Sculteti armamentarium. Ex recentioribus Barbette, Heisterus, Garregeot. Porro etiam sibi comparare debet instrumenta Chirurgicæ, si non omnia, tamen necessaria, v.g. Trepanum, ut in statu necessitatis Chirurgis adesse possit non solum consilio, sed & optatissimo auxilio. Hæc omnia, de quibus in præcedentibus egimus exactissime scire oportet Medicum: quare non immerito Medicina nostra omnium artium censetur difficillima. Hoc tamen non deterreat ejus amatores, habemus enim certa adminicula, quibus hoc studium jucundissimum reddere illudque facilitare possumus.

## CAPUT II.

*De Adminiculis in Studio Medico.*

## ADMINICULUM I.

**S**int libri selectiones, quos sibi comparare debet Medicus. Multis enim libris se obruere non est consultum; omnibus itaque veteribus, Hippocratem Celsum & Galenum excipiam, carere facile possumus. Ex recentioribus quoque pauci sufficiunt. Suadetur eum in finem consuetudinem inire cum bibliopolis, ut perlegendos nobis communicent libros recens editos, interdum enim pauca in iis reperiuntur utilia, quæ brevissimis possumus excerpere, si vero nonnulli deprehenduntur utiliores, illos nobis comparare par est.

AD.



ADMINICULUM 2.

**S**int diaria experimentalia, Chemica & practica. Diario experimentalis inferantur quæ observat, dum novas mixtiones tentat, quæ phænomena, quæ mutationes accidant. Præsertim circa aerem ejusque mutationes quotidie sit occupatus, indagando tempestatem cœlique temperiem, & consequentia ex ipsis considerando. Sic tandem expertus ratione prognoseos multa certo poterit adferere, quæ alii in dubio suspensa relinquunt. Inscribebat porro in suum diarium varia experimenta Chemica, observationesque circa processus rariores, nec tædeat carbonibus maculare manus, quia teneræ manus tenerum quoque indicant Chemicum, id est, Chemiæ parumper peritum. Diarium practicum habeat, observationes enim in hoc vel illo morbo quotidie adnotare non detrectet, præsertim in primis præceos annis; sic brevi tempore sibi comparabit egregium thesaurum, quem variis in casibus experientia, confusus poterit consulere.

ADMINICULUM 3.

**S**int loci communes, quos Verulamius magni commodi vocat, adjuvant enim memoriam aciemque judicii exercent. De his philiatè sit sollicitus, ex multis optima excerpatur, & locis communibus inferere potest quæ in opponendo & respondendo variisque occasionibus iterum adhiberi possunt.

ADMINICULUM 4.

**S**it liber peculiaris cui inscribat consilia Medica iudiciaque de vulnerum letalitate varia, quæ vel ipse tradidit, vel ab aliis accepit, quibus suo tempore commodissime rursus uti, solidamque eruditionem demonstrare poterit, quando similes occurrant casus, de quibus consilium vel iudicium ferendum sit.

ADMINICULUM 5.

**T**empori atque ordini studia sua accommodet Medicus. Multum refert, ut studia sua rite instituere beneque tractare sciat. Hic non solum respiciendum est ad anni tempora, verum etiam ad unumquemque diem: nam discat tempori cedere, cum aliud tempus meditationibus magis sit accommodatum, aliud ad memoratationibus. Vernal tempus ære temperato vegetabilibus æque ac animalibus & meditationibus vigentibus aptissimum. Si mediteris, mens sit tranquilla, copiaque spirituum non pauca: hinc optime facit, qui scriptis eruditionem suam demonstraturus hoc eligat tempus. Huic respondet aurora, corpora reficiens & alacriora reddens. Æstivum tempus aptissimum est ad exercendam rem botanicam, utpote floribus fertilissimum: dissipati enim tunc spiritus calore, meditationibus non sufficiunt. Porro hoc tempus ob dierum longitudinem ad peregrinationem, consuetudinem cum viris eruditis aptum est, item in praxi ad visendos ægros. Tempus autumnale impendatur studiorum repetitioni & ordinationi eorundem, quæ verno tempore, vel æstatis aurora meditata sunt. Vesperis evolvantur libri practici alique, & quidquid memoriæ demandandum est, illud fiat ante noctem, felicius enim tunc tenetur; id quoque hyeme observandum, quo res memoriæ tractentur & quotidie legantur. Ante omnia vero in hieme experimenta Chemica sunt instituenda, tunc æstum facilius tolerare possumus & hypocausta calida multis rebus inquirendis ansam præbent. Hoc quoque tempore Medicus medicamenta parare poterit, quæ proprie dispensabit. Tandem quoque exercitio anatomico, quantum fieri poterit, incumbendum; quod tamen autumnali commodius peragitur tempore. Sic erit omnium felicissimus, qui iusto ordine omnia adgreditur, & unius anni spatium plus perficiet, quam alii, qui neglecto or-



dine tribus vel quatuor annis talia vix efficiunt.

### CAPUT III.

*De virtutibus peculiaribus ad  
famam conservandam  
Summe necessariis.*

#### REGULA 1.

**M**edicus sit humilis non superbus, cum quibus instituit colloquium; decenter se insinuet in gratiam nobiliorum, æque ac ignobiliorum; neque in vestitu sit nimium luxuriosus.

#### REGULA 2.

**M**edicus sit taciturnus. Multis quandoque affligitur imbecillitatibus corpus humanum; hæmorrhoidibus, herniis, podagra, gonorrhœa, quæ omnia, uti etiam fonticulos, nemo patientum divulgari gaudet; memores imprimis verborum Verulamii: Homines aut delectare bono proprio, aut malo alieno.

#### REGULA 3.

**M**edicus non sit negligens sui officii sed diligens. Hæc præsertim observet, quando copia ægrorum auxilium suum postulant, nec ullum negligat, nec divitiis magis quam egenis succurrat. Si non omnibus adesse potest, præsertim in locis, ubi ingens hominum & consequenter ægrorum deprehenditur numerus; non promittat suum auxilium, & aperte dicat, se non posse omnibus prospicere, alium vero in tempore adeant eumque consulant, sic nullam conscientiae inuret maculam. Quando in morbis præsertim acutis æger sæpius visitandus, & medicamenta, victus & potus ratio ordinanda; providendum, ne nocte destituti sint medicamentis, multum enim in recta continuatione positum est. Caveat autem, ne superfluous sit in præscribendo. Itidem moneo, ut in visitando

sit moderatior, ne imprimat ægrotis visitandi consuetudinem, nisi necessitas urgeat. In morbis acutis ter, quater vel quinquies visendus est quovis die ægrotus, ejusque status cognoscendus, nec statim iterum recedendum, sed per horam & ultra commorandum est, ut eo melius mutationibus, quæ sæpe multiplices in hora occurrere solent, obvenire possit. In febribus intermittentibus sufficit unica de die visitatio, vel etiam alternis diebus; accedat verò præcipue circa horam paroxysmi, ut accurate cognoscat mutationes. In morbis chronicis duo vel ad summum tres per septimanam visitationes sufficiunt. Nunquam tamen præscribendo deficiat Medicus, licet interdum visitando tardus sit, nec omnibus ex nutu satisfacere possit. Nam Medici vita præsertim practica non immerito omnium miserissima dicitur: quoniam servus servorum est, & nunquam commoditati studere potest, sed omne fere tempus consumere debet inserviando aliis, se ipsum consumendo; inde senex Medicus rarissima avis in terra, & ut plurimum Medici morbis malignis a contagio contractis corripuntur: quare incidenter moneo, ne egrediatur jejunos ad ægros; sed adsumat prius jusculum vel saltem myrrham, aut corticem citri, aut radicem zedoariæ mastice; sic halitus ægrorum non adeo eum poterunt inficere. Qui considerat periculum, cui Medicus visitando ægros subjectus est, videbit, eum maximum esse generis humani beneficium, summeque gratissimum: propriam enim vitam non curat, sed studet conservare vitam alienam. Quibus vero periculis & difficultatibus quam plurimis quam stipatum sit studium nostrum; tamen non deterremur; sed ab altera parte magna Medici æstimatio multum incitamenti addit illud amplectentibus.

#### REGULA 4.

**M**edicus omnibus virtutibus ex Philosophia morali desumptis operam navare debet. Sit itaque misericors, modestus,



deſtus, humanus, fugiat ceu peſtem vitam diſſolutam, verba obſcœna, ebrietatem omnemque ludum illicitum, alias omnem ægrotorum amittit fiduciam. Si que medicamentum effectum non præſtat deſideratum, ſed mali pertinacia potius augetur; certo certius ejusmodi Medico error quidam adſcribitur, licet omnia ſecundum ſcientiam adornaverit. Porro non ſit jaçtator inanis, ut empiricorum more multa promittat & pauca efficiat. Non contemnet alios, neque medicamenta ſua ſpecifica extollat: quia juxta tritum illud proverbium propria laus ſordet, melius eſt, quando ab aliis laudes promeritas expectet. Hæc & multa alia diligentiffime obſervanda ſunt a Medico.

#### C A P U T IV.

##### *De Peregrinatione Medici.*

**S**Tudio Medico maximam partem abſoluto, neceſſe eſt, ut inſtituatur peregrinatio, priuſquam id faciat, adſumat gradum Doçtoris, gradualis aditus facilius apud omnes admittitur, quam ſtudioſorum. Deinde eruditorum gratiam ſibi conciliet Medicoſ. Dixi abſolutis ſtudiis Academicis peregrinationem eſſe inſtituendam, nec incongrue: tunc enim ſolidiore eruditione firmoque judicio pollet, adeo ut cum eruditis erudite diſſerere non erubeſcat, quod ſane in juventutis annis non ſperandum. Porro eruditorum imprimis Anglorum conſuetudo talis eſt, ut non facile arcana ſua communicent, niſi prius proceſſum curioſum, obſervationem rariorem, aut ſimilia a peregrinantibus acceperint, non immemores proverbii, quod manus manum lavare debeat. Qui vero ante maturitatis annos peregrinatur, ille fruſtra & tempus & ſumptus impendit: eruditi enim, quos adit, multis rebus ſunt occupati, ut non impendant tempus ſuccurrendi ipliſus ſtudiis; & ſi hoc non eſſet, notum eſt, quod ſtudioſus juvenis variis rebus inutilibus præſertim antea non viſis delectetur,

ita ut facili negotio animum diſtrahi patiatur aliis rebus, quibus majori diligentia incumbere debebat. Itaque ad firmandam ſaltem eruditionem, quam Philiaſter jam adeptus eſt, exoticas regiones luſtret, ubi ætas jam maturior, ratio vivendi magis ordinata, judicium firmum exiſtit. Peregrinas Academias ſalutaturus Medicoſ, ante omnia petat Hollandiam, primum propter perfectiſſimum Botanicæ exercitium, quale noſtris regionibus propter exoticorum defectum non conceſſum, deinde propter Chirurgiam & praxim firmius ſtabilendam. Italiam viſitet propter Botanicam & Chirurgiam. Galliam propter Chirurgiam & Philoſophiam. Angliam tam propter praxin, quam propter Mechanicum & Phyſicum ſtudium. Societas enim Regia alit ſemper viros præſantiſſimos. In Germania vero noſtra Chymia & Praxis non minus floret, quam in aliis terris. Hollandiam atque Angliam viſitet per vernum tempus uſque ad autumnum, Italiam per hyemem.

#### C A P U T V.

##### *De Promotione Medici.*

**C**irca promotionem ſuadeo, ut Medicuſ non adeo maturet, uti plerumque fieri ſolet, ſed tandiu vitam Academicam colat, quamdiu vires permittunt, & ſi fieri poteſt, ante annum ſextum Academiam non deſerat; expertuſ loquor. Quidquid ante promotionem diſcimus, hoc habemus, poſt illam pulcherrima quoque ingenia, accepto perfectionis teſtimonio, ut plurimum deſidiæ dedita ſunt, vel gulæ, vel ventri indulgent, impetrato minoris oppidi Phyſicatu praxin exercent, theoriam deſerunt, deſtituti imprimis fideliffimorum præceptorum manu ductione. Alia eſt ratio in illis, qui citius ſumptibus deſtituuntur, quam animuſ diſcendi cupidine; hiſ indulgendum eſt, quia non aliam emergendi viam proſpiciunt, conſulentes fortunæ ſuæ ditiore matrimonio. Hæc vero probe notet Practicuſ.



incipiens, ne statim post vitam Academicam sedem fixam capiat in civitate celebriori vel etiam in patria; exerceat potius per aliquot annos praxin suam in loco obscuriore; ea vero æstimatio, quam ab initio sibi acquirit, servanda; vel inserviat Practico erudito visitando ægros, sic medicamentorum applicationem accuratius poterit cognoscere, si-bique practicum thesaurum in alieno quasi fonte comparare, nec sine lucro, præsertim si humanitatem & modestiam suam ostendat. Tandem monere volui, post promotionem statim matrimonia-libus se ne implicet, nisi summa fortuna & alia emergendi occasio se offerat. Nam mulier & cum illa res domesticæ dimidium temporis studiis impendendi subripiunt. Hæc sunt, quæ circa Medici personam in prima parte monere volui. Felicissimus, ille, qui omnia observare poterit.

## PARS SECUNDA.

De Medici officio circa personas  
Externas.

### CAPUT I.

De Medici officio circa Pharmacopœum.

#### REGULA I.

**P**rescribat formulas eleganter Medicus, quod si nescit, obscurissimam servabit famam: Medicum enim ex præscripto æstimat Pharmacopœus. Propterea non impingendum contra genuinam formulas præscribendi methodum, nec præscribantur talia, quæ nulla mixture & agitatione combinari possint, ne medicamentum aliam acquirat faciem quam determinavit Medicus.

#### REGULA 2.

**Æ**stimatio Medici dependet a medicamentorum præparatione. Hæc regula præcipit, ut medicamenta quæ ipse

dispensat, rite & non sordide præparet, partim etiam Pharmacopœo postulanti elegantem communicet præscriptionem.

#### REGULA 3.

**M**edicus, non quod opus, sed quod necesse est, præscribat. Contra hanc regulam plurimi peccare solent Medici, gloriosam sibi promittentes ex formularum multitudine deprædicationem. Pharmacopœo talis quidem consuetudo non ingrata est; indicat tamen, quod Medici scientia non adeo sit firma. Contra vero laudem sibi conciliat apud omnes; si paucis medicamentis morbi atrocitatem tollat, atque in hoc eruditionis suæ perfectionem ostendat. Verum quidem est, quod multa interdum utilia esse possint, & forsan casu; sed non sunt necessaria, ideoque potius omituntur; nam medicamentorum multitudine obruitur & confunditur natura, ut non agat, quod debebat; cum tamen naturæ maxima pars convalescentiæ adscribenda sit.

#### REGULA 4.

**Q**uæ in Pharmacopoliis prostant noscat Medicus, sive sint simplicia sive composita & medicamentorum taxam. Ante omnia inquirat in medicamentorum præparationem, an spiritus abundant phlegmate an minus, an sint recentiora olea, an rancorem contraxerint, an aquæ destillatæ aciescentiam acquisiverint. Hæc & alia bene noscat ut de bonitate remediorum, quæ præscripturus est, certus sit. Medicamentorum dosis non potest esse semper eadem; sic compositionis & præparationis magna est diversitas; interdum aliquot guttulæ unius medicamenti plus habent efficaciam, quam alius. Hoc si non observet Medicus, magnos errores potest committere, præsertim in emeticis & opiatibus, cum quibus cautissime mercari debet; semper examinet ejusmodi medicamenta & eorum compositionem.



positiones exploret, antequam præscribat. Quot enim Pharmacopœi, tot fere variationes opiatorum, verbi gratia Mindæ laudanum opiatum vocatur Essentia anodyna: Medicus cui hoc ignotum est præscribit Essentiam anodynam ad guttas decem, laudanum vero opiatum ad grana tria. Valde igitur impingere poterit in hujus præscriptione.

REGULA 5.

**M** Agis Medicus debet scribere quam dicere. Hæc regula in ordinandis Medicamentis observanda est, ne committatur error, neque Pharmacopœus cum Medico simul incurrat periculum. Hic Halæ accidit quondam tristis casus, dum virgo quædam Pastoris M. Merckii febre maligna petechiali laboraret. Medicus tum temporis Physicus ordinarius ad mitigandum æstum propinavit Nitrum Antimoniatum optimo cum successu, ita ut non dubitaretur de ejus convalescentia; altero die accedens Medicus invenit ægram bene constitutam & non nisi de æstu querelas ferentem, discedens petit Pharmacopolium, jubetque famulum Nitri Antimoniatum semidragmam ægrotanti virgini transmittere. Absente Medico, famulus Pharmacopoli transmittit vitrum Antimonii, virgo absorto hoc medicamento, dixit: nunc mihi propinavistis mortem, statim enim atrocissima supervenire symptomata, vomitus enormis & dolores intolerabiles, & obiit post horam sextam. Hæc & similia ex Medici negligentia fieri solent quotidies; caveat igitur, ne verbis tantum modo exprimat, sed semper præscribat, quæ ordinare velit.

REGULA 6.

**R** Eformatio Pharmacopœorum, & moderatio taxæ summe necessaria est. Tanta est in officinis medicamentorum copia, ut dimidio eorum citra damnum carere possemus, præsertim si inspiciamus congesta a summa veterum ignorantia; quippe hæsitantes circa simpli-

cium effectum, combinarunt cuncta obvia interdum ineptissima. Exemplo sit compositio Theriacæ, quæ componitur ex quinquaginta ingredientibus; cum tamen viginti, cæteris omnibus superfluis, sufficerent. Sed tamen si consideremus effectum, nemo negabit, simplex quoddam oleum vel lac majore virtute alexipharmaca gaudere, quam ipsam Theriacam, quæ nil aliud est, quam opium correctum, quod omnem vim alexipharmacam amisit, destructum ex compositione simplicium; neque doloribus sedandis sudorique excitando satisfaceret, nisi mitigaretur acido quodam vehiculo, quoniam per se sumptum, nimis foret calidum. Porro ex massis pillularum non parva ineptiarum copia sese offert. Optandum autem erat, ut ejusmodi medicamenta simul ex officinis ejicerentur, sic in taxa quoque quædam moderatio foret speranda. Incomparabile sane lucrum quærunt Pharmacopœi, ita ut quædam medicamenta pro uno thalero parabilia pro tringinta, quadraginta & ultra vendant; verbi gratia: Simplicia, quæ in vulgus extant, non magni veneunt, quæ vero soli habent, sextuplo magis constare debent quod; adhuc concedendum esset, si modo in Chemicis immodicum quæstum non quærerent. Dicunt quidem, se maximis impensis opus habere quovis anno in comparandis medicamentis, quæ per decennium a nemine expetuntur. Sed respondemus, absque damno ejici posse cum veterum ineptiis, quæcunque in biennio non præscribuntur. Deinde non credendum est, quod quovis anno compositiones aliquot conficiant, sed maxima pars a proavis hæreditate tradita est. Refugiunt porro, quando de moderatione sermo est, ad taxas a magistratu approbatas; sed sciant, quod veteribus Chemia valde incognita fuerit, qui pro arcanis multa venditata magnis sumptibus propinarunt. Jam vero, Chemia magis exculta, compendioso & parvo pretio ejusmodi arcana omnia præparare scimus. Sed nihilefficit Medicus cum ipso Pharmacopola, nisi magistra-



stratus vel Princeps succurrat; quod tamen non sperandum; dona enim cæcos reddunt sapientes, causamque justam invertunt. De cætero legi meretur Ludovici integer libellus de moderatione taxæ, quem conscriptum Pharmacopœo suo adnectit.

#### REGULA 7.

**E**X præscriptis sibi solum ex Pharmacopœa quarere odiosum & damnosum est. Multi Medici in hoc peccant, quod pactum cum Pharmacopœo ineant, & promittant se omnes formulas pro duobus grossis in Pharmacopolium semper præscripturos, eventum tamen minus felici. Primo enim libertatem suam pro pecunia vendit talis Medicus, fitque Pharmacopœi quasi servus: unde ab eo Medicus parvi æstimatur, putat enim Medicum sua gratia destitutum non posse subsistere; deinde levissima de causa offenditur Pharmacopœus, nec veretur postea hoc pactum in Medici culpam divulgare ejusque avaritiam ægrotis patefacere. Quare consultum duco, abhorre a tali consuetudine.

#### REGULA 8.

**N**imia familiaritas parit contemptum. Quare opprobrio est Medico, si cum Pharmacopœo fraternitatem contrahat, vel ludere cum ipso non detrectet: sic enim fastus istorum augetur, quoniam superiorem sibi similem reddere; sique divitiis abundant, Medicum pauperiorem non solum flocci pendere sed etiam penitus suppressere student.

#### REGULA 9.

**P**armacopolii pyxides sapius perlustranda sunt, sæpe tituli varia remedia habent, pyxides venena. Sæpe videmus in visitationibus pharmacopoliorum præsertim inopinatis, quod in pyxide inaurata & specioso titulo adornata nil nisi tela araneorum similiaque magis nociva quam utilia reperiantur. Ipsorum

superbia cum avaritia conjuncta excogitavit talia stratagemata, quibus imperitioribus persuadent, quantos adhibeant sumtus in componenda præstantissimorum remediorum multitudine; cum tamen pixides, præsertim in loco elevatiori repositæ, ut plurimum inanes sint, si sedulo inspiciantur.

#### REGULA 10.

**V**isitatio medicamentorum curiosa fiat, imprimis Chemicorum & simplicium. Summe necessarium hoc est; nonnullis in urbibus quidem annue suscipitur, in plerisque vero plerumque intermittitur; ubi vero ex consuetudine peragitur, munere visitatores adstrictos reddunt Pharmacopœi, ut nihil laudabile efficiatur. Inspicienda imprimis simplicia sunt, an bona nec ne; tum in Chemicorum præparationem inquiratur, & ratione totius processus examinetur. Composita denique respiciantur, an recentiora sint, nec ne. Reliqua composita imprimis veterum, quæ non æque adhibentur, inspectione non indigent. In genere vero circa visitationem teneatur, quod & simplicium & compositorum maxima pars sit supervacanea. Sic Eleosaccharorum prorumptuaria nullius fere sunt utilitatis, possunt enim ex tempore parari. Balsama plurima exulent, extracta omnia exceptis iis, quæ gaudent sale fixo, resinoso vel amaritudine aliqua aut adstringente virtute. Multis syrupis carere possumus. Spiritus ex floribus virtutem anodynâ habentes inutiles sunt. Quæ sale volatili gaudent, pulverisata servare, prorsus est inutile; exemplo sit Rhabarbarum, quod si aeri liberiori integrum exponatur, superficies post paucos dies redditur inutilis, adeo ut color rubicundus abeat in flavum, saporque pereat. Si hoc in integra radice acidit, quid fiet in pulveribus, ubi virtus in tot particulas divisa corruptioni resistere nequit? Acida non nisi pauca aservanda sunt, conservæ plurimæ, exceptis florum anthos, cochleariæ, rosarum rubrarum, tussilaginis, violarum, citri



citri cum paucis aliis rejiciendæ sunt; ut & compositiones pilularum trochiscatarum. Essentiæ paucissimæ asservandæ, magisteria fere omnia, fæculæ, unguenta plurima, inutilia, frivola, non in parva quantitate occurrentia, rejicienda. Hac ratione instituta visitatio docebit, Pharmacopœos innumeris superfedere posse sumptibus, ad quos provocare solent, quando de taxæ moderatione sermo est.

REGULA II.

**M**edicus sit peritus taxæ, præsertim ejus loci, ubi degit. Necessario requiritur hæc notitia, primo ad expiscandam Pharmacopœorum avaritiam, qui neglecto etiam juramento, ultra præscriptam taxam urgent medicamentorum pretium: secundo respectu ægrorum, ut pauperibus non præscribat cariora, divitibusque viliora: tandem ut determinare possit, quod circiter pro formula præscribenda sit solvendum, quando fortassis ab ægrotis quæritur.

REGULA 12.

**S**uccedanea absque Medici consensu non sunt subjicienda a Pharmacopœo. Hoc plerumque fieri solet, ut Pharmacopœi & ipsorum famuli substituant multa, quæ eadem virtute prædita esse credunt, præsertim si ex præscriptis una vel altera species deficiat. Itaque omnino ministri jurejurando obstringi debebant, quia Pharmacopœus non nisi paucissima medicamenta sua manu præparat atque distribuit.

REGULA 13.

**C**onfectionibus officinalibus ipse interfit Medicus, & probe examinet ingredientia & eorum mixturam. Hanc regulam observet, quando medicamentum aliquod præparatur frequentius & prolixius præscribi solitum, ut inter conficiendam theriacam. Hic opus est, ut semper interfit Medicus, curamque ge-

rat, ut omnia ingredientia in schedis notata ordine assumantur. Sæpius quidem omnia ostenduntur: absente vero Medico pretiosa auferunt, quod scelus quidem omnes non committunt, sed tantummodo avari, qui nullum scelus pro peccato habent.

REGULA 14.

**P**harmacopœo non est concedenda praxis, quia non intelligit, quod pertinet ad genus prædicum. Non enim sufficit formularum ad hunc vel illum morbum copia, sed accedere debet judicium prædicum, quo explorandæ sunt morborum causæ & differentiæ, ægrorum natura & similia, sine quibus rationalis practicus nemo esse potest. Plebeji quidem in ea sunt opinione, quod Pharmacopœus circa plantarum species quotidie occupatus illarum efficaciam, consequenter artis Medicæ non sit ignarus, sed maxime decipiuntur, quidquid enim præstant, præstant ut empirici, nemo autem sartori imperito exhibebit vestimenta nova corrumpenda, ut taceam, corpus. Si vero quidam Pharmacopœorum in arte Medica præsertim praxi sufficienter est instructus, illamque exercendi cupidus, more consueto coram facultate Medica specimen eruditionis suæ exhibeat tentamine aliquo, petatque testimonium, tum demum conceditur.

REGULA 15.

**I**nterrogare Pharmacopœum ratione morbi & præscribendorum, turpe est. Videtur enim speciem quandam ignorantie præ se ferre; ratione mixturæ convenit quidem, melius tamen est, si hoc quoque calleat Medicus.

REGULA 16.

**P**harmacopœus a Medico ordinario examinandus prius est, & ejus ministri. Qui Pharmacopœi munus de novo aggre-



modum instituat: 1) Ratione venenorum, quærendum, quid sit venenum, & quæ possideant venenatam qualitatem, qualia sint purgantia fortiora, vomitoria, abortum causantia tam regno minerali quam vegetabili desumpta; neque ignarus sit dolcos eorum. 2) Ratione præparationis compositionis & mixturæ quæritur, quomodo instituendæ? quæ ingredientia prius sumenda? quomodo miscenda e. g. theriaca, emplastrum. Intelligat porro conficere emulsionem, si modo certa quantitas ipsi porrigatur, item morsulas, electuaria, syrupos. Hic peractis multa ingredientia præscribo, ipsumque interrogo, qualis color, & quænam consistentia proveniat ex hac mixtione, intelligat acidum cum alcali ebullire, sufficit si modo effectum sciat, etiam si rationem reddere non possit. 3) Terminos technicos quoque sciat, quid sit bolus, quid lintus, quid apozema? 4) Ratione botanices explorandus; an noscat simplicia? 5) Ratione Chemiæ quoque examinandus erit. 6) Ratione medicamentorum in genere sciat determinare dosin licet non exactissimam, ut ad minimum absente vel deficiente Medico formulam conficere calleat, verbi gratia: sudoriferum vel purgans. Si nesciat, communicandæ ipsi sunt nonnullæ generaliores formulæ. Denique ne texæ limites transeat Pharmacopœus, jurejurando obstringatur Formularum examen eodem modo posset institui, & laudandi essent, si omnibus possent satisfacere: ut plurimum tamen acquiescere Medicum oportet, si modo quoad materiam Medicam accuratam exhibeat scientiam, ipsis enim tantum præparandæ committuntur formulæ. Quod si vero casu pyxides permutentur, ita ut Mercurius præcipitatus ruber reperiatur, ubi cinabaris Antimonii inesse signatura ostendit, tunc ignorantia eorum ingentis periculi causa esse potest. Ex ea ratione non permittenda pueris medicamentorum præparatio, experimur tamen famulos eadem sæpe pollere ignorantia, qua pueri, quod sane dolendum, si non mutando est.

## CAPUT II.

*De officio Medici circa Chirurgum ejusque operationes.*

## REGULA I.

**O**perationes ordinarias & vulgares relinquat Chirurgis. Non secare, nec urere, nec emplastra applicare debet, quia infra dignitatem est rationalis Medici, suscipere talia, tonsores enim, balneatores & lithotomi ubique fere haberi possunt. Hic autem non suadeo, ne discatur Chirurgiæ studium nobilissimum, sed summe necessarium esse affirmo. Sæpius enim interesse debet Medicus operationibus, præsertim periculosis, verbi gratia, trepanationibus, paracenthesi. In priori casu prospiciat, ne trepanatio attingat suturam, item ut administretur tali in loco sanguis commodius emanare potest, eum ut locum accurate determinet, succurratque ægrotanti decumbenti analeptici, si opus est, internis. In paracenthesi, quam nunquam, ut solus suscipiat Chirurgus, curet Medicus, ne temerarius simul ac semel vitam cum aqua detrahat, quale exemplum exhibuit hic Halæ Chirurgus quidam in Advocato quodam hydropico, qui tres fere amphoras prima vice detrahens causam mortis post decimum diem subsequutum acceleravit. Porro adsistat Medicus amputationi membrorum, ubi metuendæ hæmorrhagiæ, ibi succurrat consilio auxilioque.

## REGULA 2.

**M**edicus non increpet Chirurgum ipsum, sed modeste moneat coram ægrotante. Junioribus data hæc lex est, quia hac ratione gloriam sibi conciliare existimant, quando Chirurgi imperitiam propalant; cum tamen nihil aliud efficiunt, quam ut Chirurgus fama sua destitutus occasionem ulciscendi quærat, ipsumque Medicum multis calumniis afficiat.

RE.



REGULA 3.

**M**edicus nimiam familiaritatem cum Chirurgo non ineat, easdem operationes, quas circa Pharmacopœos traditas repetere nolo: illud saltem addo, ut caveat disputationes de hac vel illa re, præsertim si sentiat semet inferiorem in tali materia Chirurgica.

REGULA 4.

**N**on patiatur Medicus, ut Chirurgus remedia interna ægrotis offerat. In defectu tamen Medici & in casu necessitatis Chirurgus calleat ea, quæ spectant ad artem Chirurgicam, uti sunt decocta vel infusa ex herbis vulneratis, decoctis lignorum: pulveres vulnerarii & lapides cancerorum, quæ domestica tali in casu præbere queat; item purgans aliquod lenius ex passulis, foliis sennæ atque rhabbaro. His si plane destitutus, vel saltem vetustissimis præscriptionibus instructus sit, quæ plerumque nullius momenti, Medicus ipsi generaliores quasdam præscribere debet formulas, quibus tempore necessitatis uti possit, quando pauperioribus succurrendum sit. Præsentem vero Medico, nunquam adhibere audeat interna, penitusque ipsi interdicta sint medicamenta heroica, ut opiata, purgantia drastica, emetica, quæ instar gladii vagina orbi in manu imperiti sunt. Hoc proprio exemplo testatus hic Chirurgus est, propinans sibi grana quindecim gummi guttæ, quo facto plusquam triginta vicibus alvum deponere coactus est; evacuatis sic primis viis, recepit se in cellam, hausta que frigida aqua & comesto raphano correptus est convulsionibus, cum horrendis ventris torminibus, cum quibus vitam exspiravit non sine suspitione veneni a familiari Chirurgo accepti, nisi constitisset de purgante vehementiori adsumto.

REGULA 5.

**S**emper optimo Chirurgo utatur in civitate Medicus. Medicus in civitate Physicatum accepturus statim eligere Chirurgum necesse habet, qui non solum quoad famam integram omnibus est notus vel in discursibus aut operationibus eruditionem suam comprobavit: soli enim famæ confidere non est consultum, quia optima interdum fama minime respondet eruditioni.

REGULA 6.

**M**edicus non concedat Chirurgo sectionem cadaverum & inspectionem vulnerum, sed ipse sectionem instituat & dirigat. Pessima est consuetudo, quam nonnulli prætorum fovent, quando scilicet agyrtis & tonsoribus inspectionem vulnerum committunt; agitur enim de vita hominis lædentis, totumque inquisitionis fundamentum in vulneris inspectione positum est. Itaque non sufficit, ut advocetur Chirurgus præsertim imperitus, qui non est capax judicandi de vulneribus, nisi accedat Medicus, qui etiam ex viscerum læsorum examine de lethalitate longe accuratius iudicium ferre potest. Probe vero distinguenda vulnera, an lethalia per se, an per accidens. Accidit interdum, quod vulnus ratione læsionis minus lethale sit, sed ratione impeditæ curationis referri mereatur ad vulnera per se lethalia. Vulnera ex accidente lethalia sunt multiplicia vel ratione ægroti; si verbi gratia scorbuticum subjectum levi pulmonum vulnere infligitur, quod per se non adeo lethale fuisset, nisi dyscrasia sanguinis accessisset; si diætam præscriptam negligit gravissimosque errores committit: vel ratione Chirurgi vulnus per accidens lethale fit, quando non avertit symptomata, hæmorrhagiam enormem & similia. Circa debilitatem naturæ oritur controversia, an vulnera debilioribus inflicta, licet per se non sint lethalia tamen respectu debilioris naturæ



naturæ talia fiant & mortem delinquenti adferant? Academia nostra Halensis cum Erfurtenſi affirmavit, quia vulnus inſiſtum mortem accelerat, ſublata enim cauſa effectus non eſſet ſubſequutus. Cæteræ vero Academiæ mitiores ſunt. Sæpius accidit, quod Medicus in inſpectiones vulnerum dubius hæreat, an per ſe lethalia, an minus, v. g. contuſione capitis moritur æger, nullo præſente Chirurgo, qui forte trepanatione auxilium ferre potuiſſet, vel quando trepanum juſto loco non applicatum. In ejuſmodi caſibus optimum eſt ſi nil decernat circa lethalitatem, ſed vulneris conditionem enumeret, cauſasque ſecundas adducat, cum morti factus ſit obnoxius æger, ſic conſcientiam illæſam ſervat, mediaque ſemper tutiſſima progreditur via. Circa ſectionem cadaveris in genere notandum eſt, quod Chirurgo quidem apertio concedi poſſit, vulnus vero ipſum accuratius perſpiciat Medicus, nec acquieſcat in exploratione partis vulneratæ, ſed totum corpus inſpiciat, ut cognoscatur omnium viſcerum thoracis & abdominis conſtitutio, caput vero non attingitur, niſi fuerit læſum. Hoc pacto Medicus conſcribit caſum, illumque Chirurgo ad confirmationem ſubſcribendam exhibet.

#### REGULA 7.

**C**hirurgus debet examinari à Medicis & Chirurgis, præſertim novitiis. Hic coram collegio Chirurgico a Medico ſequentem in modum inquiratur & examinetur: 1) In Anatomicis, ut ſciat nomina præcipuorum muſculorum, illorum ſitum, tendinumque cohærentiam, ubi nervi tranſeunt, nec in vena ſecanda nervum vel etiam tendinem vel arteriam attingat; intelligat ſitum & nexum partium & articulationes, ut ad judicanda luxationes curamque legitime inſtituendam aptus ſit. 2) Circa lethalitatem vulnerum examinandus, an vulnera ſpinæ dorſi, cordis, contuſio colli & ſimilia lethalia ſint? Cordis vulnera non ſemper lethalia eſſe probant

cicatrices, quæ sæpe reperiuntur circa cor in ſectione cadaverum. Conf. Albini Diſſertatio de læſione cordis habitæ Francofurti ad Oderam. Vulnera ſpinæ dorſi in ſuperiori parte ſemper periculo majori ſunt expoſita quam in inferiore, quod non adeo lethale eſt. Contuſio colli in junioribus magis lethalis eſt quam in ſenioribus. Hepatis vulnera non ſemper lethalia ſunt, niſi læſio enormis adſit. Ventriculi vulnera in ſuperiore parte non eſſe lethalia teſtatur experientia, ubi hic Halæ culter deglutitus anno 1693. abdomine aperto iterum per ſtomachum extractus fuit abſque lethaliſſitate. Ex his concludo, vulnera ut plurimum lethalia eſſe propter extravasationem ſanguinis vel humorum vel ciborum putreſcentium, nervorumque læſionem. Hac ratione venarum aut arteriarum diſſectio in vulnerato femore lethalis eſt 3) Quærendus eſt, quomodo inflammatio vulneris cognoscenda, quomodo cura inſtituenda, Medicus proponet ipſis caſus, quos reſolvere curamque demonſtrare debet, ut de fiſtulis curandis, quomodo callus removendus, quomodo vulnera partium tendinoſarum nervoſarum & capitis tractanda, ubi omnia pinguia exulari debent & adhiberi potius nervina, quid ſuccus cepearum in vulnere efficiat? cur brachium ligetur in venæ ſectione? 4) Denique emplaſtra conficere intelligat, ne iſta ſemper ex Pharmacopoliis emere cogatur. Multum vero in eo ſitum eſt, ut ſolvere ſciat reſinoſa aceto ſeu vino generoſo, ut exprimat ſoluta per lintheamina, ut igne leniſſime coquat, inſpiſſet, quo lenius enim coquuntur emplaſtra, eo melius conficiuntur, vid. Zwelfferi animadverſiones circa præparanda emplaſtra. Circa potiones vulnerarias quærendum, quales convenient herbæ; circa diætam vulneratorum, quales cibi vitandi. Hac ratione Medicus experitur Chirurgorum profeſtus, qui interdum ſatis ſunt leves. Quare optandum eſſet, ut diſcentes frequentius Bataviam, Galliam atque Italiam, ob Chirurgiam florentiſſimas, viſitarent, aut ſequantur caſtra,



castra, aut visitent urbes montanas, aurifodinas celebriores, ubi casus periculosiores non raro occurrunt, ex quibus solidissimam artis suæ perfectionem sibi comparare possunt.

REGULA 8.

**M**edici est, iudicare de agri conditione, an opus sit, an vires agri ferre possint operationes Chirurgicas. Præcipue Chirurgorum operationes sunt venæ sectiones, lithotomiæ, amputatio membrorum sphacelatorum, in quibus omnibus semper virium ratio est habenda, & quidem circa venæsectionem in virium debilitate & præcipue in morbis malignis, ne in mortis periculum præcipitetur æger. Circa lithotomiam & herniotomiam caveatur, ne administretur, quando dolor summus adest, debilisque ægrotus existit, præsertim in subjectis cacochymicis, uti ejusmodi operationes nunquam periculo vacant, licet in sanguineis aliisque felicius administretur. In specie circa lithotomiam observandum, an calculus in vesica hæreat grandior, sæpe enim ulcus vel ardor in meatu urinario, item stranguria vel gonorrhœa eisdem dolores excitare possunt, exploratio vero quæ stylo instituitur, majores quam lithotomia dolores excitat, quod omnes ægri confirmant; itaque cautius est procedendum & digito immisso explorandum, sic, stante ægro, protinus sentimus calculum; ex ægro quoque id ipsum experiri possumus, decumbens enim nullos fere dolores sentit, ambulans vero corpore erecto dolores augentur, quia calculus hoc modo statim ad orificium vesicæ procedit. Circa sphacelum probe notandum est, an a causa intrinseca oriatur, an ab extrinseca: ille nunquam amputatione removeri potest, sed semper ulterius serpit, quia a malignitate & corruptione sanguinis oritur; si vero a causa externa, prospiciendum erit, an perfecte adsit sphacelus, an vero gangræna immineat, quæ saltem absque amputatione quoque sedari potest. Quamdiu vero signa amputandi membri

*Opusc. Patb.*

non luculentissime observantur, continuandum est cum medicamentis alterantibus internis & balsamicis antisepticis, quibus sæpe imminenti sphacelo resistitur.

REGULA 9.

**T**emporis ratio habenda est in operationibus, atque videndum an opportune omnia fiant: nec nimis temporis parcendo cunctandum, nec nimis festinandum. In lithotomia hæc observatio non negligenda; ægrotus enim diu decumbens, doloribus plurimis exhaustus, sectionem non facile admittit, quia vires huic ferendæ longe impares sunt. Ante omnia vero hæc regula observanda est in cataracta, ne prius deponatur quam ad maturitatem pervenerit; sic quoque abscessus ante maturitatem non sunt aperiendi, quia excitari potest inflammatio degenerans in gangrænâ vel sphacelum; si differatur ultra modum operatio, facile degenerare potest in fistulam cariemque ossium. Signa verò genuina aperiendi abscessus sunt: pustula albicans dolorque remittens. Instituaturs itaque operatio in loco commodo, ne sic quoque generetur fistula inferius scilicet, si fieri potest, ut materia purulenta paulatim effluere queat.

REGULA 10.

**S**ollicitus sit Medicus de loco eligendo in operationibus Chirurgicis. Venæsectio in brachio medianæ est tutissima. In operationibus gravioribus locus designetur a Medico facto puncto cum penicillo colore tincto, sive trepanatio fiat, sive membri amputatio. Dein monendum, ne in articulo abscindatur membrum sed trium vel quatuor digitorum distantia a læsione. Digitum in articulatione amputare licet.

REGULA 11.

**O**bservet modum Medicus, quo utitur Chirurgus inter deligandum. v. g. in deli-



deligandis fracturis, ne nimis stricta facta excitetur gangræna. Necessario quidem firma requiritur ligatura, non autem excessiva, sed modus observandus, ne nimia compressione impediatur sanguinis circulus, sicque inflammationi ansa præbeatur. Si ægrotus queritur post ligaturam de atrocissimis doloribus, videndum, an strictior sit ligatura? quæ si reperiatur, aperienda & relaxanda est.

#### REGULA 12.

**I**N repositione luxatorum membrorum *avertat Medicus, ne dolores absque necessitate excitet Chirurgus.* Verum quidem est, quod absque extensione membrum luxatum reponi non possit, modus tamen & hic observandus, ne excitentur gravissima symptomata.

#### REGULA 13.


**I**N cura berniarum, *ne castrentur viri, impediatur Medicus.* Plerumque peritonæi processus excinditur cum testiculo, sed pessimo successu; reddunt enim homines impotentes, quod neminem & omnium minime conjuges exhilarat.

#### REGULA 14.

**M**edicus examinet instrumenta Chirurgica, *visitet emplastra, unguenta.* Quotidie fieri solet, quod instrumenta Chirurgorum absque discrimine adhibeantur in infectis & non infectis; hinc pura applicentur & sordibus accurate abstergis, pristino nitori reddantur. Si varia instrumenta in operatione quadam applicanda, ante operationem, ut cito absolvatur, ne circumquaque conquærenda sint instrumenta, alterum juxta alterum ordine, quo applicari debent, reponendum, ita tamen, ut conspectum ægrotantis fugiant, nec terrorem majorem eidem incutiant. Quod emplastra aut unguenta concernit, absque necessitate illorum præparationem vel compositionem nunquam exploret Medicus, ne

Chirurgus causam superbiendi præbeat; aut tempore necessitatis circa ægrotantes obstrictus est Chirurgus, ut declaret eorum compositionem, si ea exhibuerit.

#### REGULA 15.

**C**hirurgus an sit habilis ad tales operationes & probe expertus, videat Medicus; sæpe enim ignorans & magis audacia, quam ratione ductus instituit periculosissimas operationes nulla cautione adhibita, summoque cum ægrotantis periculo. Quare admodum necessaria hæc regula est, an verbi gratia senio, vel morbo confectus; adeoque ad luxationem reponendam ineptus ob virium defectum, an manus tremore laborent in Venæsectione, cataracta deponenda & similibus; an sit ebrius, adeoque magis temerarius quam prudens; & in genere, an antea ejusmodi operationibus interfuerit vel etiam eas exercuerit? 

#### CAPUT III.

*De officio Medici circa obstetrices & earum munus.*

**D**olenda sane est obstetricum præsertim nostratum ignorantia, qua multæ trucidantur puerperæ, quia rarissime optatum ferre didicere auxilium.

#### REGULA 1.

**O**bstetrix ante omnia sit pia, casta, sobria, non temeraria, taciturna, honesta, perita. Pia sit imprimis, ne impune tractare puerperas vereatur, benedictio enim Divina impiæ menti non largitur. Perita sit in arte sua, quare consultum erit, haud qualicumque mulierculæ obstetricis munus tradere, nisi examine quædam experientiæ & scientiæ sufficientis specimina adeat.

#### REGULA 2.

**I**N Anatomicis examinanda est obstetrix. Ad minimum cadaveris foemineæ sectionem adspexisse convenit, ut sciat situm, stru-



struturam uteri & vaginæ extra graviditatis tempus; deinde, quod præstat, si cadaveris fœminei gravidæ accesserit inspectio, eo magis perfectam habebit harum partium ideam.

### REGULA 3.

**I**n Physiologicis examinanda. Juxta hanc regulam intelligat necesse est, quamdiu gravida gerat in utero, item quando primus embryonis motus percipiatur, situm embryonis naturalem, quo modo quoque tempore ad egressum se accomodat. Ante omnia nosse debet signa graviditatis, ut virginem a meretrice dignoscere queat, præsertim infanticii signa adsint. Est certe non exigui momenti, distinguere mensium suppressionem a graviditate & graviditatem ab hydrope ascite, quid quod? Medici sæpe graviditatem pro hydrope tamdiu curarunt, donec partus in lucem prodit. Maxima vero difficultas in istis reperitur fœminis, quæ prima vice utero gerentes ignaræ sunt omnium symptomatum circa gravidas evenientium; unde Medicum sæpissime falsa relatione decipiunt, spasmos iliacos aut alios leniores motus pro embryonis motu habentes. Ex his apparet, quod non statim ab uno alterove signo graviditatem judicare possimus, sed omnia combinanda, ex quibus tandem collective sumptis veritatem eruere possimus. Præcipua vero graviditatis signa ex aliis sunt sequentia: 1) Genæ gravidarum plerumque rubescunt licet non semper; contra suppressione mensium laborantes pallida incedunt facie. 2) Tumor in suppressione mensium magis reperitur circa inguina atque uteri egressum; in gravidis vero magis circa umbilicum animadvertitur & ascendit. 3) Gravidæ ut plurimum nullum virium defectum sentiunt, nec appetitus earum adeo prostratus est, prout fieri solet in mensium suppressione laborantibus, tamen pro signo infallibili non est habendum, quia gravidæ nonnullæ aliis infirmiores esse solent. 4) Venæ turgescere incipiunt

in gravidis crassioresque conspiciuntur circa femur, quod alius contingere non solet. 5) Mammæ intumescunt, quod tamen in multis non accidit, licet inveniantur gravidæ. 6) Urina quidem crassa apparenteque nebula dicitur, sed fallax imo fallacissimum signum est, quia in multis morbis eadem apparent. 7) Femur in nonnullis magis dilatatur, sed non in omnibus, aliæ circa anteriora magis, aliæ circa posteriora magis fœtum gerunt. 8) Restat ultimum & infallibile signum, motus scilicet infantis, qui plerumque circa septimanam vigesimam contingere solet. Hæc si intelliguntur, cæteraque omnia enarrata respondent, nullum de graviditate amplius superest dubium. Interdum vero accidit, quod motus non rite percipiatur etiam ad septimum mensem, præsertim si embryo debilior fuerit, tum usus externus spiritus cujusdam vel balsami embryonis, vel oleum macis & nucis expressum linimenti aut emplastri instar applicatum abdomini, embryonem roborando facit, ut motus fortior sentiat, quod ab alio tumore aut flatibus non accidit. Sed non sufficit, obstetricem peritam esse signorum graviditatis prægressæ, sæpius enim accidit, ut coram magistratu judicium ferendum sit de meretricula, an fuerit gravida, & juxta obstetricis effatum inquisitio instituatur. Quo in casu observanda sunt sequentia: 1) Post partum abdomen relinquitur rugosum, quod non tam cito in pristinum statum reducitur 2) Si partus non ita pridem contigerit, fluxus sanguineus deprehenditur post sex vel octo septimanas, licet sæpius exiguus, exhibet tamen signum certissimum.

### REGULA 4.

**I**nterroganda est obstetrix, quomodo succurrere velit puerperis partu tam faciliore, quam difficiliore laborantibus. Sit itaque circa partum omnium peritissima, ut sciat distinguere conatus parturiendi legitimos a falsis. Multum hac in re momenti positum est, imperit enim



enim obstetrix sæpius puerperam ante legitimum parturiendi tempus falsis instantibus conatibus fatigat illamque ad promovendos conatus cogit, ita, ut tandem deficiat in ipso parturiendi actu, dilapidatis antea viribus. Sunt autem veri conatus spasmici seu contractiones uteri in dorso incipientes, & à superioribus versus inferiora vergentes; falsi contra conatus in dorso quum incipiunt, ab inferioribus partibus versus superiora tendunt & penes umbilicum terminantur. In his falsis conatibus non cogantur mulieres, sed expectandum est tempus legitimum, ubi etiam levissima abdominis compressio infantem excludit. Natura enim est firmior in excludendo fœtu quam ipsa puerpera. Qui itaque naturæ leges non observat, nunquam certe excludere valebit infantem, etiam si cuncta adminicula encheiresesque adhibeat. Similis est partus alvi excretionibus, quæ natura non succurrente excernere velle impossibile erit. Quando vero natura ad ejiciendum parata, verique percipiuntur dolores, obstetrici convenit, ut videat, an infans ad egressum rite sit dispositus, an orificium uteri internum hiscat? quod duobus digitis oleo inunctis explorandum. Quo observato animus puerperæ erigendus ipsaque admonenda, ne subito expiret, atque hac ratione parturiendi negotium irritum reddat. De cætero manus puerperarum abdomini imponi potest, ut hac quoque ratione partus quodammodo promoveatur. Excluso fœtu curet obstetrix, ut ligetur funiculus umbilicalis filo duplicato cera imbuto, puto ea in regione, ubi egreditur ex abdomine, postea vero abscindatur funiculus quatuor transversos digitos supra ligaturam. Obstetrix digitis apprehendit funiculum umbilicalem à placenta dependentem, & infantem recens natum committit adstantibus ad lavandum, ipsa vero occupata est circa extrahendas secundinas quarum extremitates cum funiculo blande apprehendit altera manu, altera vero separationem, si opus, paulatim promover.

Extractas secundinas explicat obstetrix, ut omnes videant nihil remansisse; pessimum enim est, si tota secundina cum substantia vel etiam portio quædam remaneat, quod observavimus in Westphalia in pago quodam, ubi fœmina secundinis per quatuor septimanas retentis, sævissimis cruciata fuit symptomatibus, æstu scilicet & convulsionibus; adhibito vero spiritu cornu cervi ingens sudoris profluvium excitatum fuit, sicque secundinæ putrefactæ prodierunt cum fœtore; ut plurimum vero puerperæ intereunt, si secundinæ retineantur. Partu absoluto abdomen puerperæ ligandum, ipsa vera secundinis extractis in lectum rite præparatum ad lochia excipienda deferatur. Interim infans à viscosis sordibus sit purgatus in lavacro, cui infusus spiritus lavendulæ vel etiam vinum, præsertim si debilitas in fœtu observetur. Semper afferat obstetrix secum pro embryone confortando analeptica, ut: aquam antepilepticam, balsamum embryonis, aquam cinnamomi, quibus tempora naresque inungantur & inspiretur halitus ex fragrantibus ex cinnamomo vel cariophyllis. Pro ipsa vero puerpera paratum sit castoreum, quo tempore necessitatis uti queat. Hæc de faciliori partu. Quod difficiliorem partum attinet, sciendum est, quod duplici ratione accidat, vel matris vel fœtus causa. In matre parturiente notatur plerumque spirituum defectus, qui restaurandus est analeptics conjunctis simul antispasmodicis in parte difficili summe necessariis. Respetu fœtus partus difficilis redditur, ob perversum situm, qui fieri solet à motu nimio circa parturiendi tempus, quando ex impatientia modo huc modo illuc sese movet puerpera, item si legitimo tempore nondum instante cogatur ad conatus promovendos, porro si membrum aliud, verbi gratia, brachium vel pes justo citius egreditur, quod si non statim regreditur, emoritur, cultroque resecandum, si nempe revera mortuum deprehendatur. Ut plurimum vero in partu difficili infans moritur. Probe itaque calleant obstet-



obstetrices an foetus re vera sit mortuus, nec ne, ne languide spirante occidant, vel mortuo jam nimium parcant cum non exiguo matris detrimento. Sæpius foetus in utero dissecandus sicque frustulatim extrahendus est, quæ operatio magnam crudelitatem requirit. Cognoscitur vero foetus obitus, si mater corripitur horrore febrili animique deliquis, si facies cum labiis palleat, sudores frigidi sint, partes extremæ lividæ, si nullus in utero sentiatur motus, vel si de latere in latus sentiatur quid instar lapidis, item si sanies foetida ex utero emanet. Tandem nosse debet obstetrix an gemelli adsint, facile enim fieri potest, ut cum uterque egressum urgeat, illa unum tantummodo adesse credens, utriusque pedes apprehendat, aut alio modo errorem committat. Licet vero ex indubitatis signis vix cognoscantur, suspicari tamen gemelli possunt, si ventris ambitus non fuerit æqualis, sed certis eminentiis quasi divisus, si majus sentiatur pondus & inæquale, quando nempe alter altero vegetior, sicque in diversis locis diversi sentiantur motus, & quidem tactu vel a matre vel ab aliis.

REGULA 5.

**O**bstetrix intelligat quid uterus sit, quid procidentia vagina & quid consilii. Medicus non admittitur, ut ipse de hoc affectu judicium ferre queat, an uterus an vagina saltim prodeat, & magna de hac re orta est controversia, inter Beckium & Cramerum, hic uterum ipsum, ille vero vaginam tantummodo procidere posse statuit. Sciendum itaque est, Beckii sententiam in illo casu, circa quem controversia orta fuit, veram fuisse, deinde non concludendum universaliter, ac si procidentia uteri sit impossibilis; nemo tamen sibi persuadeat totalem uteri eversionem instar mitræ inversæ fieri, quod plane absurdum foret. In procidentia uteri adhibenda sunt usu interno confortantia propter laxitatem

*Opusc. Path.*

ligamentorum. De cætero obstetrix caleat quoque, quomodo puerperæ tractandæ, quod tamen magis ad forum Medicum pertinet.

REGULA 6.

**M**edicus non concedat, ut adhibeantur superstitiosa circa puerperas. Multifaria anicularum est superstitio, ut omnia hic explicare supervacaneum existimem. Aliæ enim in partu difficili tibialia viri, aliæ indusium viri sordidum induunt puerperæ, aliæ urinam viri propinant, quasi vero maritus omnis hujus mali causa sit. Alii adhibent cingulum ex corio humano, ac si singulares vires in eo laterent. Hæc & similia Medicus adhiberi non permittat.

CAPUT IV.

*De officio Medici in exhibendis testimoniis.*

**N**on solum circa lethalitatem vulnerum testimonia a Medico requiruntur sed etiam circa contagium, luem Veneream, an scilicet veneno interemptus sit. Legi merentur Zachiæ quæstiones Medico Legales cum commentatione Frankii, item Ammanni Medicina critica, ejusdem Praxis Medica de vulnere lethalitate, ut & Bohnius de renunciatione vulnere.

REGULA 1.

**I**n porrigendis testimoniis, ut ex certis indubitatis & sufficientibus signis claram demonstrationem exhibeat, sedulo allaboret Medicus.

REGULA 2.

**I**n testimoniis ferendis ante omnia observandum, ne Medicus judicium suum extra limites extendat, sed rationem decidendi relinquat Jureconsultis. Hæ duæ regulæ erunt probe observandæ, quas porro applicabimus ad singulares casus.



*Testimonium de mania.*

Quæritur, an quis mania laboret? probe itaque observandum est, an simulata sit mania, an vera, an duret per tempus, an saltem ex morbo oriatur? omnia facile cognoscuntur ex signis sequentibus: 1. In mania vera vel melancholica nullus vel parvus adest somnus, adeo ut totam fere noctem vix horam dormiendo transigant; in simulata vero mania somno indulgent consueto imo diuturniori. 2. Ex colloquio vera melancholia cognoscenda, omnia enim miscent, ad quæstiones propositas interdum non respondent, saltem ab una re ad alteram perveniunt, licet non semper absurda loquantur. 3. Pulsus est vehementior; exagitationes externæ non negligendæ. 4. Etiam ex oculis maniam judicare possumus, sunt enim mentis speculum, quando itaque fulgidi & fugitivi apparent, indicant maniam, quando vero fixi quasi torpidique deprehenduntur, tunc potius melancholiam designant. 5. Ex modo vivendi; morosi sunt, nunquam circa unam rem versantur, sed modo hoc, modo illud incipiunt. 6. Plerumque alvo sunt adstricta, interdum quoque circa certam aliquam rem delirio saltem corripiuntur, de cætero vero in aliis suis rebus satis sapiunt. 7. Tandem a melancholia mania differt in hoc, quod in mania furor sit perpetuus sine manifesta causa, oculi ignei, somnus fere nullus; Melancholia vero sese exferit perpetuo horrore, tristitia atque timore; facile tamen mania, si curatur, transit in melancholiam & viceversa.

*Testimonium circa contagium.*

Hic sane cautius mercandum est, quia non hominis unius, sed totius sæpe rei publicæ salus judicanti Medico relinquitur. Cavendum vero est, ne ex quovis morbo maligno pestem concludamus, sed inquiremus in causas, signa, qualitatem morbi; & si demum suspicio pestis adsit, non statim propalanda est in

vulgus, quia multi a solo terrore & timore peste corripiuntur. Deinde quoque periculum incurrit Medicus, (quod Halberstradii factum, ubi domum Medici, suspicionem pestis non divulgantis, aggressus est vulgus) si contagium plane non annunciet, ne ulterius repat. Optimum itaque consilium, erit, magistratui indicare periculum suspectæ domus, ut claudatur, vel ad minimum aliis visitatio ægrorum interdicatur. Cognoscitur omnis pestis ex carbunculis & bubonibus frequentius occurrentibus, accedente ardore summo in maniam non levem sed brevem sæpius transeunte, sed tamen hæc non sufficiunt; nisi alia in urbe vel pago, modo si perviginti milliaria Germanica non distet, idem ille morbus scilicet pestis homines corripiat.

*Testimonium circa affectum leprosum.*

Rarissime quidem hic morbus occurrit, præsertim hic nostris in terris, & licet nonnunquam inveniatur, non tamen adeo malignus est, ut homines interficiat, prout olim factum. Sed tamen melius est, ut ejusmodi ægotantes ab aliis separentur. Cognoscitur lepra ex eschara totam corporis cutem investiente, eamque in superficie albedine tingente. Hæc eschara nec pus nec sanguinem effundit, sed semper est squammosa ac interdum acerrimam humiditatem exhibet.

*Testimonium circa luem Veneream.*

Probe observanda in hoc signo sunt omnia signa essentialia, ne gonorrhœam virulentam pro lue venerea habentes injuriis afficiamus ægros. Inquirendus itaque status genitalium, an putredo ibi deprehendatur? quæ melioris confirmationis causa. Chirurgus simul inspicere jubeatur. Porro quærat, an ulcera vel pustulæ circa penem vel in scroto? an glandulæ inguinales intumescant? Extra genitalia hæc lues sese manifestat pustulis majoribus in facie, dorso ac pectore. Porro percipiuntur intolerabiles dolores



res circa ossa, præsertim tempore nocturno. Observavimus aliquando totum cranium carie corruptum & cum dura matre perforatum in milite, qui lue venerea demum extinctus est. Interdum quoque tubercula hinc inde apparent, ulcerosam materiam præbentia, tandem raucedo atque exulceratio faucium; quæ omnia hanc luem sufficienter demonstrant.

*Testimonium de obsessis & fascino.*

7 Circa obsessionem vel fascinum iterum cavendum, ne statim tale quid pronunciemus ex convulsionibus spasmodicis vehementissimis; licet enim non manifestam habeamus earum causam, observationes tamen testantur, a vermibus sæpe ejusmodi convulsionem fuisse ortas. Obsessionis suspicio est, quando persona affecta post invocationem Divini numinis convulsionibus torqueatur, quibus intermissa invocatione non torqueatur, item quando multas loquitur linguas, quandoque futura præfagit, vel præterita manifestat, quæ alias occulta sunt. Tale exemplum sese obtulit circa fontes soterios Hornhusianos, ubi homo sequioris sexus natione Berolinensis in conspectum venit, quæ post invocationem, vel saltem nominationem Jesu Christi in terram collapsa, murmura, strepitus & mores inconsuetos exhibuit. Dixit aliquando diebus binis elapsis veniet Landgravius Hassiæ; quod ita evenit: item pastori peccata juventutis accurate objecit.

*Testimonium circa exhibitum venenum.*

Signa suspicionis sunt, quando post tale assumptum virulentum medicamentum gravissima symptomata, vomitus vel propensio ad vomitum, respirandi difficultas, calor interne, externe vero frigus, tormina ventris intolerabilia, tumor abdominis, tandemque convulsionem lethales se exserunt. Hæc signa ingentes assumpti veneni præsumptiones præbent. Ne vero Medicos illis decipiatur, sectio

instituenda est, in qua si ventriculus deprehendatur erofus, vel maculis nigris aut rubris adpersus, seu invehiatur aliquid materiæ propinatæ, tunc certacertius suspicionem confirmare poterit. Si tunc repertum illud in ventriculo examinetur, inveniri poterit ex quo genere desumptum fuerit venenum. Si antimoniale, reduci potest in antimonium, vel regulum, vel sapore cognoscitur. Arsenicum carbonibus inspersum cognoscitur ex odore alliaceo fumoque albicante. Mercurius sublimatus semper existit corrosivus auri que flavedinem colore albo tingit. Opiatum cognoscitur ex odore & sapore. Si spirituosum fuerit adsumptum, nihil certi affirmari poterit. Optimum itaque erit pronunciare summam suspicionem a veneno, de quo suspectus juramento sese purgare necesse habebit. Huc quoque referendus est pulvis Monkii, qui non immerito nominatur diabolicus ob tristissimos effectus, quos nobis observare licuit Halberstadii in viro celeberrimo & nuperrime hic Halæ in scemina quadam nobili; dicitur hic pulvis nil aliud esse quam Mercurius vitæ.

*Testimonium de Surditate.*

Sæpe a nobilibus desideratur judicium de surditate a Medico, nam lege peculiari surdis munera interdiciuntur, quod debito officio fungi non possunt. Sed notandum est, quod multi inveniuntur surdi, multique, quibus magnum ingenii acumen summaque prudentia, quod tamen merito Jurisconsultis relinquendum, an surdi sint capaces nec ne? Itaque Medico saltem incumbit describere factum prout inventum, de cætero circa jura parum sit sollicitus.

*Testimonium circa vulnere lethali*

Circa hæc testimonia legi merentur supra nominati autores. Zachias, Ammannus, Bolinius. Ipse vero Medicus conscribat quotidie casus occurrentes evolvatque acta criminalia, ubi



semper iudicium Medicum annexum. Sic egregiam sibi comparabit notitiam circa vulnerum lethalityatem, & magna ipsius laus est, si ex certis & indubitatis signis iudicium suum deducere, atque cum ratione proponere potest. Incerta si occurrant, incertis quoque verbis designanda sunt; *videtur, potest esse.*

*Testimonium circa philtrea.*

Circa philtrea quoque nonnunquam iudicium Medicum desideratur, ubi non ita pridem celeberrimus D. Franke maxime impegit, quæsitus an Princeps Martisburgensis quodam infectus sit philtro, affirmativam assumpsit; examinatis vero omnibus circumstantiis à Facultate Halensi refutatus fuit.

*Testimonium circa impotentiam & sterilitatem.*

Impotentiam de viris, sterilitas de foeminis dicitur. Impotentiam est vel absoluta, vel restricta. Absolute incapax dicitur, qui vitiatis genitalibus laborat; ita ut à multis causis deduci queat, ut: si testiculi deficient; si penis nimis parvus aut brevis, ut ingredi non possit: si hernia major adsit: si membrum penitus corruptum, exesum vel plane descissum, quod sæpius accidit in lue venerea ut dimidia pars rescindatur stricta impotentia dicitur, quando vel fascinium vel debilitas & laxitas vesicularum seminalium introducta, erigitur quidem penis, sed semen citius effluit, quam par est, ut adeo nunquam foecundus sperandus sit congressus. Symptomatica est e.g. ut plurimum in morbis acutis ob defectum virium nulla est erectio, sed laxitas penis, donec morbo rursus fugato, vires restituantur, talis impotentia notatur in phthisi, hydrope, hectica: porro gonorrhœa ad tempus impotentiam facit, si penis cum dolore erigatur, vel si absque erectione semen semper effluat. Cavendum est in testimoniis ferendis, ne ex brevitate penis statim concludamus ad impotentiam, li-

cet enim sæpius non sufficit in muliere crassa, sufficit tamen in muliere macilentia. Major difficultas occurrit in cognoscenda sterilitate; hæc enim pauca & sæpe nulla manifesta in oculos incurrentia signa ostendit. Sterilitas etiam in absolutam & restrictam dividi potest. Absoluta dicitur, quando mala conformatio in partibus externis, vel in utero deprehenditur, ut; quando clausura est uteri, vel vagina nimis angusta, vel in utero scirrhus, vel fungosa quædam caro ex ipso utero dependet, ubi nullus coitus foecundus sperari potest, quamdiu hæc impedimenta obtinent, videatur Hildanus. Quæritur porro, an fluor albus reddat steriles? Respondetur; experientia docet, hoc non esse constans, dantur enim plurima exempla contrarium affirmantia. Quoad intrinsecas sterilitatis causas apodictice aliquid determinari nequit. Nimia quidem pinguedo ovarium & tubam Fallopiam occupans inertiores reddit foeminas, non tamen steriles, dantur enim exempla in contrarium. Hoc vero manifestum est, quod sicciores citius concipiant quam pinguiore.

PARS TERTIA.

De Prudentia Medici circa Ægros.

C A P U T I.

*De officio Medici circa visitationem agrorum.*

R E G U L A I.

**N**E nimium sit parcus Medicus in visitandis agris, cum tamen dimidium curæ in frequenti visitatione consistat; præsentia enim Medici reddit ægrum confidentem, atque quæ ab eo excitatur convalescentiæ spes animum confirmat ægroti. Hoc quoque affectu alacriores reddunt & excitantur spiritus animales ad debellandum hostem. Contra vero multi intereunt præ mortis timore, qui convalescerent, si talis affectus illis eximeretur.



REGULA 2.

**C**ertior morbi & symptomatum cognitio ex visitatione agri emergit. Ex relatione nunquam accuratam morbi ægrique constitutionem percipere possumus, præsertim si persona ægri non fuerit cognita. In relatione ea interdum, quæ summe necessaria sunt, omittuntur, ideoque ægrotum ipsum visitare Medico convenit, nam unica visitatio mille literis est præstantior & utilior.

REGULA 3.

**I**ncrementum & decrementum ex iterata visitatione patet, præcipue in morbis acutis, ubi mutationes variæ ambiguae morbi predicunt eventum. Eiusmodi mutationes ex oculis statim cognoscuntur, quare jam suo tempore Hippocrates inspectionem oculorum tanto perere commendavit. Ex pulsu quoque plurimum habemus, qui nunc intermittens nunc caprizans, quod pessimum signum. Si cum pulsu concurrat sudor lenis & frigidus, signum indubitatum appropinquantis mortis exhibet. In malignis materiæ cognitio quærenda erit ex quiete, item ex viribus. Si tres priores dies vires ægroti consumunt, & septimo vel octavo die delirans videaturque robustus, Medicus falli poterit, si bonum eventum ex eo promittat, falsum enim est, quod robur accedat, quando delirium accedit. Sed pessimum signum. Maximum certe Medici artificium prudentiam animi ingentem ostendens in eo consistit, ut de malignis morbis certum ferre possit iudicium, & qualis sit futurus eventus, agitur enim hic de vita hominis & morte, utrumque nuncium si modo certum, licet nonnunquam ingratum, Divinum præfagientis ostendit animum.

REGULA 4.

**U**tendi modus & assumendi facilitas à directione Medici & presentia ejus

dependet. Haud raro de vehiculo medicamenti adstantes minus sunt solliciti & in defectu peccant in propinando liquido, quod tamen ad ingratum saporem corrigendum plurimum conferre solet, præsertim in acidis acrioribus. Præsens ergo Medicus omnia juxta arbitrium suum disponit, suæque auctoritate ægrotos ad assumenda medicamenta excitat præsertim apud infantes vel senio confectos, quorum impatientiam reprehendit, si morem gerere detrectent. Qui vero à natura à medicamentis pharmaceuticis abhorrent, his juxta morem hodiernum decoctum vel infusum parari poterit instar Thee, quod ipsi parere queunt ex convenientibus herbis. Multi enim præconcepta opinione abhorrent à medicamentis pulcherrimis in officinis paratis, ea vero quæ ab ipsis conficiuntur, licet longe inferiora sint quoad gratiam saporis, majore appetitu tamen assumunt.

REGULA 5.

**O**blatio officii Medico parit contemptum. Neque per alios hoc fiat, neque propria commendatione. Multi quidem sunt, quorum cura omnis in eo consistit, ut pateat ægrotis inserviendi cupiditas, inde aniculas quasdam mercede conducunt, qui dominum Doctorem data occasione de meliori commendant, quo vero successu id fiat, experientia docet; plerumque enim auctoritas & fama non diu durant, præsertim si pactum innotescat & eruditio promissis anicularum non respondeat. Eruditio semet commendat, quod tamen non interdicitur est Medico; verum officia sua offerre & alterum coram ægrotis obtristare turpe est, etiamsi maxime incongrua deprehendatur, quod quidem alteri demonstrandum est, sed tempore convenienti non circa decumbentis lectum, qua difficillime ægrotus sibi persuadebit hanc monitionem suæ salutis causa fieri, potius inducitur credere, quod propriæ utilitatis ergo hoc faciat; quo non solum famam, sed & amicitiam ægroti atque Medici amittit.

RE.



## REGULA 6.

**M**edicus est omnium horarum homo omnibusque invigilare debet. Non imitetur segniores aniculas, sed ipse sit alacris, præsertim nocturno tempore, & si quis accessum postulat non retardet, potest enim urgens symptoma adesse, quod non speraverat: itaque accedere festinet, sciatque turpe esse, Medicum ex sexcentis scriniis vestimentorum ornamenta conquirere priusquam ægrum adeat, vel commoditatis gratia pulsantibus fores relinquere clausas.

## REGULA 7.

**I**n tempore venire omnium rerum est primum. Hoc præstare debet partim præsentia sua, partim per medicamenta, præsertim quando in malignis febribus periculum imminere intelligit, quo removendo non cunctetur. Optandum quoque erat, ut ægroti hanc regulam melius observarent Medicique auxilium implorandum haud diutius differrent, sed properarent, sæpissime enim culpa tritioris effectus non Medico sed ipsi cunctanti ægroti & adstantibus tardis debetur. At

*Principiis obsta, sero Medicina paratur.*

## REGULA 8.

**T**urpe est Medicum esse ebrium. Famam qui quærit ebrietatem fugiat, sana ratio ebrietate perit, ineptumque illum reddit ad præstandum debitum officium, præsertim si tempore noctis necessitas consilium urgeat, quo ebrius summo obrutus non potest excitari sique tandem evigilet temulentus est, nec scit, quid dicat, aut scribat, quare ceu pestem fugiat ebrietatem ejusque amatores.

## REGULA 9.

**G**ravitatem temperet humanitate, deponatque omnem severitatem. Hoc

ipso non omnis interdicitur gravitas, sed excessiva, quæ nomine morositatis insigniri meretur.

## REGULA 10.

**N**on accedat saltem ut videatur, sed etiam ut loquatur. Medici multi ea gaudent consuetudine, ut lecto assidentes nil, nisi interrogati loquantur, quod maxime reprehendendum; eum enim in finem postulatur, ut examinet ægrotum, morbi naturam exploret & scrutetur causas conveniente medicamento tollendas. Plurimi vero peccant in excessu contra hanc regulam, qui garrulitate magnam ægrotis interdum contrahunt molestiam, dum novellas referunt, cœlique tempestates examinant, aut ægrotorum seriem eorumque constitutionem tempus fallendi gratia recensent, quo ipso tamen omnem fiduciam amittunt. Sic enim egroti garrulum perspecti existimant, quod præsens de aliis, hoc etiam post discessum de ipsis loquatur.

## REGULA 11.

**N**ec jactantia nec pollicitationibus occupetur. Plurimis modis contra hanc regulam peccant nonnulli, quando vel ratione medicamentorum vel ratione eventus morborum plura promittunt, quam præstare valent, aut medicamenta & eruditionem suam in cœlum usque extollunt. Principio quidem ejusmodi jactatores magnam sibi conciliant famam, sed non diu durantem, uti videmus in empiricis, quorum jactantia mox patescit.

## REGULA 12.

**I**n acutis morbis sapius, in chronicis vero rarius ægrotum visitet Medicus. Sæpius in acutis punctum temporis neglectum mortis periculum afferre solet, præsertim circa dies criticos scilicet quartum, septimum, nonum, undecimum, decimum quartum & vigesimum primum.



num, qui probe observandi, & in quibus ægrotus frequentissime visitandus, quo mutationibus sæpius in hora multoties variantibus occurrere queat. Nec opiata nec evacuantia circa hos diēs exhibeat, sed solam naturam operari sinat, quod veteres jam optime cognoverunt, quando dixerunt. *In diebus criticis nihil movendum est.* Cæteroquin regulæ quoque diætæ probe observandæ atque aeris conditio, quoniam minimus auræ frigidæ adspiratus mortem nonnunquam conciliare solet.

REGULA 13.

**M**edicus sit alacris in ipsis morbis. Alacritas maxime requiritur, quando aliquem invadit apoplexia, catarrhus suffocativus aut similis morbus repentinus; quando persona illustris ægrotat.

REGULA 14.

**N**on temere accedat ad maniacos, vel amantes furentes aut contagioso morbo laborantes. Periculo enim non vacant. Si contagio infecti visitandi, Medicus abstineat apud illos salivam deglutere vel lecto affixus halitum ægroti altius inspirare. Quoniam vero contagii effluvia plerumque per salivam communicantur, præstat contagiosum illud statim corrigere masticando myrrham vel citrum in visitatione ægrotorum.

REGULA 15.

**N**on ambratus nec moscatus facile incedat Medicus, ut taceam quod sit effœminati hominis, saltem hoc urgeo, quod scœminæ à suaveolentia abhorrentes facillime in passionem hystericam incidunt.

REGULA 16.

**N**on festinet aditum nimis quam par est. Quando nullum periculum in mora esse cognovit, non adeo festinet, ne avaritiæ signum præbeat.

REGULA 17.

**D**ato sostro non statim remaneat Medicus. Avarorum ægrotorum certe indoles est, qui statim quadantenus à morbo liberati Medico sostrium mittunt, ne crebriore visitatione id quoque crescat. Hinc una alteraque vice visitandi adhuc sunt, ne sibi persuadeant, solummodo pecuniæ causa Medicum accessisse, Observet tamen Medicus modum, ne videatur sostri causa visitationes crebro repetere, propterea quoque sub ingressu veniam accessus precari potest.

CAPUT II.

*De eo quod Medico observandum est in ægro sub morbi statu per varia examina.*

**E**xaminanda sunt præcipue sequentia: Urina, excrementa, alvi, pulsus, oculi, saliva, temperamentum, vitus ratio, consuetudo.

*Judicium ex inspectione Urina.*

REGULA 1.

**E**rrant, qui urinæ inspectionem negligunt vel dedecori esse judicant ipsi Medici. Ex urina statum sanguinis atque feri probe cognoscere possumus; itaque non negligenda inspectio ejus, sed summe necessaria apud ægrotorum lectum, licet ea, quæ domi peragitur, non approbanda sit.

REGULA 2.

**N**on soli urinæ fidendum est, sed semper per alia signa conjungenda sunt. Ex urina quidem præcipua habemus signa, sed non sufficiunt, nisi alia conjungantur. Omnia autem externe calia sunt, ex quibus judicare licet statum sanguinis & viscerum. Ex quiete sensuum & recto eorum usu, mente tranquilla cognoscimus statum cerebri, nervorum & spirituum animalium actionem. Vitales vero



vero motus perspicimus ex pulsu, qualis verbi gratia sit transpiratio. Actiones denique naturales judicamus ex egestis, urina scilicet, alvi excrementis & saliva. Præcipue autem indicat urina digestionem ventriculi serique statum ejus abundantiam aut defectum, item an tenue sit, an crassum. Urina cum pure permixta indicare potest renum corruptionem; urina rubra inflammationem viscerum; in hæctica, phthisi atque hydrope urina ut plurimum est eadem, quare ad alia signa simul attendendum est.

### REGULA 3.

**N**on iudicium ferre Medicus debet ex urina sola transmissa. Multi urinam adportantes adeo obstinati sunt, ut plane non respondeant rogati de ægroti statu. Interdum etiam ex locis peregrinis diffitis urina transmittitur & desideratur iudicium; sed nisi simul describatur ætas, sexus, & an ægrotus lecto detineatur, tunc non accipienda urina, sed absque omni iudicio remittenda.

### REGULA 4.

**Q**uamvis fieri potest id agant Medici, ut tollant urinae inspectionem indomito sua: Allaborandum Medico est, ut dissuadeat hominibus ex urina magiam, ut ita dicam, expetere.

### REGULA 5.

**N**on certum potest ferri iudicium, nisi notæ adhuc sint aliæ circumstantiæ. Ideoque præmittere debet Medicus quosdam generales circa morbi statum quæstiones. Primo ratione durationis morbi quæritur, an persona illa jam diu decubuerit? tunc statim responsione produnt sexum dicuntque: ille vel illa diu quidem male se habuit, sed nondum in lecto detenta fuit; & sic non opus est, ut ratione sexus aliam proponam quæstionem. Quia hæc urina pauca, quæro an omnis urina una vice excussa allata sit? Si affirmatur possum dicere:

perfecto puer est. Quære itaque ratione ætatis, tunc ejusdem determinatam ætatem sponte indicant. Quando ad primam quæstionem respondent, per 4. vel 5. dies continuas semper decubuit, cognosco morbum acutum; si itaque urina rubicunda absque præcipitatione, quæritur an tussis simul adsit? si affirmatur, est pleuritis vel peripneumonia. Symptomata recenseo: parum dormit, est semper inquietus, dolor pectoris intolerabilis in latere sub costis, in latere illud se reponere nequit, difficulter respirat, valde sitit, calet; quod ipsis summam admirationem parit. Si vero tussis non conjuncta est, indicat febrem ardentem acutam, & tunc dico: caret appetitu, non dormit, calet, sitit, pulsus celer. Si variolæ grassantur, & dolor in dorso sentitur, quod ipsi sæpius dicunt, dolores in dorso sentiunt, sed tamen non decubuit, tunc dico: Fortasse variolæ in herba latent. Si vero tempus eruptionis præterlapsum est, & sentitur dolor in dorso, & quasi scindens in renibus indicatur renum inflammatio, si non semper lecto detinetur æger, concludo febrem, si diutius quærelis morbum protulerit & decumbit, appropinquat hæctica, præsertim si urina rubicunda, quæro itaque an tussis sicca laboret? ex affirmatione respondeo: per noctem semper sudat æger, sique urina præcipitatur, parum concurrit tumoris; si vero tussis adest, quæro, an tumore laboret? tunc refero symptomata, si affirmetur. Si urina crassa & bruna, indicat icterum. Si æger non decumbit; urina existente candida, dico: ventriculus est depravatus; si anicula, tunc illa inclinat ad cachexiam scorbuticam, cujus symptomata explico. Si urina rubicunda absque sedimento in decumbente muliere, quæro: an frequenter illo morbo affligetur? tunc inclinat ad passionem hysterica, cujus symptomata enarro, imprimis si dolor simul circa præcordia observetur. Si urina rubra pellucida in masculo, quæritur; an dolores in artubus sentiat, quod indicat arthritidem.



REGULA 6.

**I**N morbis acutissimis *urina inspectio summe necessaria est*. In peripneumonia, febribus acutis & omnibus inflammationibus, ut & in febribus intermittentibus summe necessaria est *urinae inspectio*. Si autem in febribus acutis non mutetur *urina*, sed in eodem semper permaneat statu, pessimum signum: si vero mutetur, speranda convalescentia est, imprimis si pellucida præcipitetur; si ab initio semper observatur crassa & permanet in eodem statu, pessimum est.

REGULA 7.

**U***Rina non post cibum aut potum emissâ, sed post coctionem absolutam inspicienda est*. Quærendum itaque, an iusto tempore *urina* asservata fuerit? quæ vesperi hora quinta vel sexta ante coenam vel mane circa horam sextam, quando assurgere solemus mittitur, optima est.

REGULA 8.

**U***Rina crassa in infantibus voracibus & senibus nil denotat mali*, modo ventriculo succurratur abstergentibus leniterque purgantibus; in senibus indicat concoctionem pravam. Sed tamen bene distinguenda est *urina* humana ab *urina* jumentorum. Horum *urinam* cognoscimus ex odore, item ex colore, quoniam turbida est, non clara nec pellucida, sed lutea quodammodo vel viridis vel viridescens. *Urina* instar lixivii scorbutum indicat.

REGULA 9.

**U***Rina existente crassa, cæteris paribus purgatio ut plurimum indicatur*. Adhibito uno purgante vel vomitorio, *urina* redditur genuina.

REGULA 10.

**U***Rina quæ antea fuit clara, & deinde turbida crassa fit, vel etiam vice*

*versa, indicat calculum*. Si scilicet absque medicamentis prius adsumtis talis appareat, tunc conveniunt leniora diuretica, præsertim si *urina* clara ex alba fit crassa, atque indicat resolutionem materiæ. Si igitur crassa, succurrendum solventibus.

REGULA 11.

**C***Rassa simul & flava urina & brunæ coloris linteamina tingens icterum indicat, & quo magis atro colore apparet, icterum nigrum*. Hæc signa sunt infallibilia; dicimus itaque: fæces albas deponit per alvum, appetitus est prostratus, sitit, calet, oculi flavent.

REGULA 12.

**U***Rina aquosa minus colorata nisi à nimio potu, ut plurimum indicat sanguinis vitium consistere in principio sulphureo minus subtilisato*. Hæc phlegmaticis & senibus propria est, accidit post usum lactis in hypochondriacis; in calculosis, propter constrictionem tubulorum renalium. Si *urina* talis copiosius mingitur, plus quam liquidum assumptum fuerit, denotat diabete. Talis *urina* absque tinctura emissâ in febribus malignis, notat tristissimum eventum; indicat enim turbatam penitus destructamque massæ sanguineæ unionem atque partium ferosarum secessionem, quando nempe accidit ex motu circulationis sanguinis deficiente.

REGULA 13.

**O***Mnis tenuis & aquosa urina in febribus dicitur cruda*. Talis *urina* indicat recidivam vel morbi contumaciam. Notandum vero est, *urinam* tempore paroxysmi secretam raro obtinere sedimentum, sed tempore intermissionis.

REGULA 14.

**I**N virginibus tenuis aquosa *urina* chlorosin significat. Chlorosis nil aliud est, quam



quam cachexia cum febre lenta vel amatoria conjuncta orta ut plurimum ex mensium suppressione, ex hac vero motus sanguinis fit lentior & transpiratio impeditior, unde collectio copiosioris feri per urinam secedentis. In viris notat cachexiam seu hydropem, si vero non diu durat talis urina notat aepsiam atque bilis defectum, & tunc conveniunt balsamica atque amara, elixiria, extracta amara, item tinctura antimonii, salia volatilia oleosa concoctionem promoventia.

## REGULA 15.

**U**rina oleosa in macilentis notat bectiam. Duplex est talis urina vel oleosa, vel oleaginosa quoad totam substantiam. Quando mixta in matulam sine ullo sibilo ac strepitu miscetur, tunc oleosa dicitur, & pingue supernatat. Oleaginosa vero parietibus urinalis adhæret, & vitrum reddit opacum. Prior notatur in hypochondriacis hecticis, altera etiam in sanis observatur, scilicet in voracibus; talis quoque in omnibus febribus ardentibus.

## REGULA 16.

**S**i copiosa excernitur urina in cachexia & hydropse, bonum est signum, notat enim feri stagnantis secessionem.

## REGULA 17.

**U**rina copiosa à diureticis assumtis nihil mali portendit sed potius bonum est signum. Diuretica virtutem habent colliquandi serum, simul etiam laxant constrictos poros renales, quare omnia salia acida sunt diuretica. Post diureticum datum tota urinæ quantitas ostendi debet Medico.

## REGULA 18.

**S**i sudor & aliæ egestionem cessant, tunc copiosius mingitur. Bene Sanctorius: Quando copiosior assumtis urina mingitur,

transpirationem cessare. Et hoc videmus tempore brumali.

## REGULA 19.

**M**ulieres plus mingunt, quam viri quia sunt terosiores, humidiores & frigidiores.

## REGULA 20.

**C**lara in infantibus sæpe mingitur urina, quod ob defectum bilis accidit.

## REGULA 21.

**P**ueri quoque copiosius mingunt quam adulti. Non solum copiosius mingunt, sed etiam sæpius, propter temperamentum humidum, & nisi mingant, pessimum signum est; si infantes sæpius reperiantur in lintheamentis humidis, bonum est; Sin minus, vel ægrotant, vel nutrices lacte destituuntur, quod propter remotionis metum sæpissime celant.

## REGULA 22.

**M**ala est alba & clara urina in ictero, minatur ut plurimum hydropem. Indicium est, bilem esse inertem, crassam, humores crassos, ad tincturam inertes.

## REGULA 23.

**S**perma in urina supernatans notat pollutiones nocturnas vel etiam gonorrhœam. Distingui potest sperma à pituita, quæ constanter fundum petit, licet agitetur: a pure quod etiam fundum petit, quod mediæ quasi est naturæ & citius resolvitur quam pituita.

## REGULA 24.

**U**rina sanguinea notat miculum cruentum & lationem renum, ut plurimum nephritidem. Fit nephritis in foeminis a mensium, in viris ab hæmorrhoidum suppressione. Urina sanguinea distinguitur à rubicunda saturata, quod in



in hac grumi farinacei instar antimonii fundum petant, & quamvis tunc mixtura fiat clarior, tamen obscure cruenta manet; hæc indicat calculum.

REGULA 25.

**U**rina alba instar feri lactis, quæ sedimentum ponit album, in infantibus ut plurimum denotat vermes. Vel si pauca guttatim & cum dolore excernitur in adultis calculum vesicæ. In infantibus vermibus laborantibus notatur defectus bilis, parum comedunt, nunc rubent, nunc pallent, pruritus narium sentiunt, abdomen nonnunquam intumescit; conveniunt amara, martialia. In adultis talis urina solemni ter notat appetitus prostrationem læsamque digestionem, item bilis defectum; & tunc adhibeantur volatilia amara v. g. centaurium minus & bilem restituentia.

REGULA 26.

**Q**uo magis color urinae à naturali flavo recedit, eo peior est. Naturalis urinae color est flavus aurei coloris; quo magis itaque excedit, eo auctorem indicat calorem præternaturalem, quo magis vero decedit, eo magis defectum partium sulphurearum motum, attritumque minorem declarat.

REGULA 27.

**U**rina excessive flava fit etiam à medicamentis assumptis, ut, a rhabarbaro, croco in quantitate assumpto, maxime in substantia. A curcuma perfecte redditur flava; adhibetur hæc radix in obstructionibus hepatis & bile deficiente, in ictero; Indos hanc radicem, pro præstantissimo aromate habere ferunt.

REGULA 28.

**F**lammea urina per modum spiritus natri in destillatione transeuntis, significat ut plurimum febrem tertianam non notam, sed exquisitè veram.

REGULA 29.

**U**rina ruffa calorem præternaturalem notat, & quo major est rubedo, eo major extrinsecus calor. Augmentum & decrementum caloris interni cognoscitur optime, si recipiatur unica uncia urinæ, & affundatur aquæ simplicis quantum sufficit ad naturalem colorem, & apparebit urinæ ejusmodi unciam unam interdum recipere aquæ simplicis uncias duas. Hoc ipso experimento brevi compendio quotidie caloris decrementum explorari poterit. Eiusmodi vero urina indicat feri defectum, sulphuris vero excessum, & observatur ut plurimum in omnibus inflammationibus.

REGULA 30.

**Q**uando urina rubicunda absque calore, notat scorbutum, quo magis exaltatus color deprehenditur, eo pejus est malum, & notat abundantiam salium excrementitiorum.

REGULA 31.

**A** nimio motu corporis & animi, à defectu humiditatis, ut & ab ira nonnunquam, urina talis rubicunda secedere solet. Nihil mali hoc portendit; possumus enim mox succurrere diluentibus infuso herbe thee. Similis urina cum sedimento observetur etiam post diuturnas vigilias.

REGULA 32.

**U**rina naturalis similis etiam est in multis morbis & maxime in febribus malignis, petechialibus, pleuritide maligna uno verbo in omnibus inflammationibus malignis.

REGULA 33.

**U**rina saturate rubicunda vel etiam sanguinea in variolis & morbillis magnum portendit periculum. Plerumque inflammationem internam occurrentem indicat, præsertim cum post diem quintum vel sextum accidat.

RE-



## REGULA 34.

**U**rina rubicunda citra sedimentum, quodammodo turbida cum bullis significat ut plurimum morbos pectoris, asthma, catarrhum suffocativum, summam respirandi difficultatem, palpitationem cordis.

## REGULA 35.

**Q**uando urina observatur nigra, à plurimis pro signo letali habetur; sed falsum hoc est: talis enim sæpius observata fuit in melancholicis & post martialium usum, ubi utique non adeo bonum est.

## REGULA 36.

**U**rina livida convulsivos motus indicat, item urina rubicunda absque sedimento.

## REGULA 37.

*Pus in urina notat abscessum.*

## REGULA 38.

*Imprægnatio ex urina non potest cognosci.*

## REGULA 39.

**F**urfures farinacei excoriationem vesicæ indicant.

## REGULA 40.

**I**n mensium suppressionem urina est turbida, qualis etiam in gravidis accidit.

## REGULA 41.

**I**ndicatio particularis ex urina temeraria est. Non possumus determinare, in qua parte malum hæreat, quia urina non communicat cum causis externis, sed totum fundamentum in eo consistit, ut dignoscamus statum sanguinis. Non autem sufficit sola urinæ inspectio, sed ulterius examinanda est, quomodo per ostionem atque evaporationem, ut co-

gnoscamus, quantum salis, aquosi & sulphuris in ea contineatur. Vini & cerevisiæ crassioris potatores excernunt urinam copioso sale volatili prægnantem; item juvenes præ senibus, id quod per destillationem intelligitur. Denique non de nihilo est illud examen, quod Hippocrates suo jam tempore instituit, quando ponderavit urinam, vel per se, vel cum instrumentis staticis.

*Judicium circa alvi excrementa & quæ per superiora excernuntur.*

Hæc imprimis in personis superioris conditionis & dignitatis inspicere non detrectet Medicus. Natura enim præside nihil turpe. Egregia cognitio exinde habetur in diarrhœa, dysenteria, ubi videndum an excrementa pure vel sanguine sint mixta, an ipsa substantia intestinorum membranacea jam sit erosa, vel saltem pura lymphæ excernatur? Deinde quoque inter deponendam alvum inspicienda sunt excrementa, semper enim in dysenteria cum dolore excernuntur. Porro ex inspectione excrementorum innotescit status digestionis & conditio bilis, cujus quantitatem testantur ipsa excrementa. Si fæces deprehenduntur albæ, indicatur bilem non effundi in duodenum propter ductus cholidochi obstructionem, sed transire ad massam sanguinis & creare icterum. Si vero absque icteri suspitione apparent excrementa albæ, notat bilem non satis esse sulphuream. Viridia excrementa in infantibus nonnunquam sunt prodromus epilepsiæ infantum vel colicæ spasmodicæ, & indicant, magnam aciditatem adeste cum bile. Quando enim ejusmodi excrementis viridibus instillatur oleum tartari per deliquium, convertitur viriditas in flavedinem, quod etiam contingit, si per vomitum viridissima excernantur, acidum enim absorbetur ab alcalibus. Necesse quoque est, ut perspiciat Medicus, an fæces sint nigræ, quod accidit post martialia assumpta post limaturam martis & tincturam ejus, item post acidulorum usum. Sic quoque ex-



tempore fæcibus nigredo conciliari potest, si adjicitur vitriolum. Sed tamen non vacat periculo color nigricans excrementorum, si absque martialibus assumptis accidat: observantur talia in vitio lienis, & quod pessimum est, in intestinis corruptis; quod in Westphalia notavimus in mercatore quodam, ubi ante decimum quartum diem obitus nigerrima excrementa prodire; secto vero cadavere, intestina plane erosa inveniebantur. Nonnumquam etiam ipsi Medici hoc stratagemate utuntur in morbis malignis, præsertim si periculum immineat: martialia adhibent culpam à se declinantes, si non ex voto observetur eventus. Porro attendatur, an cibi sedant integri, an semi-digesti: hoc in fluxu cœliaco, illud vero in lienteria observatur. Tandem si multæ exeant bullulæ, indicatur flatulentia. Quando maximus adest foetor, indicatur inflammatio.

Apud plebejos vero sufficit relationem de fæcibus ab aliis audire. Per superiora ejiciuntur vel pituitosa vel biliosa quorum inspectionem primarum viarum statum patefacientem, utcunque admittere licet.

*Judicium circa pulsum.*

Ante omnia Medicus pulsum tangat, & ex ipso judicium formet. De pulsum differentia videri potest Sylvius. Motus cordis oritur à motu sanguinis & spirituum animalium. Magnus itaque pulsus indicat motum sanguinis fortissimum. Debilis atque frequens indicat motum sanguinis intestinum vitiosum cum spirituum defectu. Omnis debilis pulsus ante paroxysmum fit debiliior, interdum plane intermittens. Inæqualis pulsus indicat sanguinis motionem inæqualem; intermittens notat destructionem massæ sanguinæ, spasmus cordis, catarrhum suffocativum, asthma, & vitiosam sanguinis circulationem in pulmonibus. Plane intermittens indicat syncopen, vel mortem. Magnus & æqualis indicat copiam spirituum & sanguinis motum intestinum legitimum; celer & inæqualis,

*Opusc. Patb.*

si concurrat sudor, cum defectu spirituum, luctuosum eventum. Medicus pulsum observaturus, semper attendat ad sequentes regulas:

REGULA 1.

**N**on statim in accessu præsertim tempore bibernali tangendus est pulsus. Sæpius terrore percutiuntur ægri à manu frigida: itaque expectandum, donec manus Medici incalescat in hypocausto.

REGULA 2.

**N**on solum ex pulsu judicandum, sed ex aliis simul collective sumtis circumstantiis. Interdum enim pulsus est bonus, urina bona; & tamen æger moritur. Hoc accidit in senibus, & personis sanguinis visciditate laborantibus, si in his concurrat calor internus, evadit naturali & sanorum pulsui simillimus, in se nimirum spectatus; & tamen existit vitiosus & præternaturalis ratione subjecti ægrotantis. Itaque accedat ætatum & temperamentorum contemplatio, cholericis enim in febribus semper celeriori gaudent pulsu, item infantes.

*Judicium ex oculis.*

Ex oculis judicare possumus statum morbi ejusque vehementiam, ut & spirituum animalium conditionem. Si clari & fugitivi apparent, somno præsertim deficiente certissime imminet delirium. Commendavit itaque Hippocrates inspectionem oculorum, idque non sine ratione.

*Judicium ex saliva & lympba.*

Inspectio salivæ summe est necessaria, est enim menstruum ventriculi saliva, & indicat vitium stomachi & digestionis depravationem, si eadem male constituta est. Acrimonia salivæ venerem vel ferrum arrodens indicat aciditatem: spumosa & pauca saliva indicat influxum spirituum copiosorum; aquosa defectum spirituum. In summa, qualis saliva, talis digestio.

V

Ju.



*Judicium ex temperamentis.*

**A**Nte omnia Medicus accedens ad ægrotum inquirat in ejus temperamentum vel partium solidarum. Horum temperies dicitur habitus corporis, quo multa concludere licet. Circa fluidarum temperiem attendatur, qualis humorum sit proportio, an sit in æquilibrio, an prædominetur sulphur, an acidum. Qualis enim sanguis, talis color corporis. Pituitorum color albus est; sanguineorum ex rubro pallidus, melancholicorum lividus; cholerorum ruber igneus. Ex oculis quoque cognoscitur temperamentum: cholerorum oculi sunt ignei, summe mobiles, nigri: pituitosorum oculi sunt majores, non adeo mobiles: melancholicorum oculi semper in terram sunt fixi. Per excretionem quoque cognoscitur temperamentum; sanguinei majorem habent transpirationem, multum sudoris profundunt: in choleris contrarium observatur: phlegmatici abundant visciditate sudantque. In actionibus, sanguinei sunt hilares, inconstantes, quidquid in mentem venit, lingua profert: cholericis sunt superbi, non diu deliberant, quid agendum. Notabile est, quod Galenus dixit: *Mores animi sequi temperamentum corporis*, quod præsertim apparet in statu morbofo, quoniam arctissimum inter animam & corpus datur vinculum: sic in melancholicis actiones respondent temperiei corporis, somnolenti sunt, in omnibus actionibus impedimenta inveniunt, & cogitationes fixas habent propter tardiores sanguinis motum: in choleris, cum sanguis in illis celerius moveatur, necesse est, ut animo commoveantur magis: sanguinei propter fluidiorem sanguinis motum, celeriores habent inclinationes, nihil plane curant, sunt hilares, ad Venerem proclives, & in genere ab omnibus istis rebus afficiuntur, quæ ad voluptatem pertinent. Ex ingenio quoque ægrotum temperamentum apparet: cholericis sunt impatientes, irascuntur facile, ad delirium inclinant, loquuntur impetuose, non

diu in lectu detineri possunt, sed statim curari cupiunt: pituitosi nimis sunt patientes, & parum loquuntur: melancholici non facile fidunt Medico, omnia observant dicta, & facile desperant: sanguinei sunt inconstantes, facile mutant Medicum, & medicamenta omnia adsumunt. Judæi fere omnes sunt melancholici, non omnia adsumunt, quæ Medicus præbet. Temperamentum, quod cadit in partes solidas est duplex: alterum laxius, mollius & spongiosius; alterum strictius & arctius. In priori venæ sunt minores, in posteriori vero majores sanguineturgidæ, quoniam parva sanguinis quantitas reperitur in vasis arctioribus. Sanguinei dicuntur, qui non solum multum sanguinem; verum etiam copiosum in carne, paucasque venas habent; his si accedant humores pituitosi, dicuntur phlegmaticis. Inde facile apparet, quod unum temperamentum transmutari queat in alterum per victum & medicamenta, sic si phlegmatici utuntur spirituosius & motu corporis, fieri possunt sanguinei, item ex choleris melancholici & contra. Hæc omnia bene cognoscenda, si accuratius in causas statumque morbi inquirere velimus.

*Judicium ex victus ratione.*

Medicus apud ægrotum potissimum etiam indagare debet victus rationem, an crasso, an tenui vel medio utatur victu; an multa comedat, an acidis utatur, leguminosis, viscidis. Etenim ex ratione vivendi & victu dependet temperamentum & constitutio sanguinis, ita ut qui crassum cibum amant, crasso quoque gaudeant sanguine, & hac de causa etiam diutius ægrotent, corripiantur morbis chronicis; ubi vero sanguis mobilior, ibi facilius evanescit morbus. Deinde etiam quærendum, quali liquido usus fuerit antea ægrotus, an tenui cerevisia, vel lupulata, an vino vel aqua, & qualis fuerit: qualis enim aqua, tales ut plurimum solent esse humores sanguinisque temperies. Si salis aquæ, plerumque scorbutus familiaris ægrotis.

Judi-



*Judicium ex consuetudine agrorum.*

Explore Medicus, an æger assuetus fuerit longiori somno, venæ sectioni, purgationi, sudori, vomitui. Fœminæ in specie de mensium consuetudine quærendæ. Circa morborum consuetudinem quærat, an olim hoc morbo correptus fuerit ægrotus, quale initium & qualem finem habuerit, quibus remediis assuetus. Si itaque statum sanguinis præsentem conferat cum præteritis, concludere poterit ex eo sanguinis temperiem, morbi statum & medicamenti inventionem.

C A P U T III.

*De Medici prudentia respectu sui erga agros.*

R E G U L A I.

**Q**ui Medici curæ demandati sunt fideliter tractentur. Fidelitas duplici modo consideranda est: 1 ] diligenter visitandus est ægrotus: 2 ] medicamenta necessaria præscribenda, addito semper legitimo utendi modo, & semper præscriptorum effectus sedulo est examinandus. Perversus sane, & plane improbandus est mos quorundam agrorum, qui binos semper adhibent Medicos, periculum exinde sapius sibi contrahentes. Neuter enim in opere diligens; quodque uni faciendum erat, id alterum jam fecisse vel facturum esse credit; sic æger negligitur seroque pristinam recuperat sanitatem.

R E G U L A 2.

**D**octi sunt docte tractandi. Accidit interdum, quod docti ægrotantes physicam callentes evolvant libros aliquos Medicorum curiosos, præsertim circa affectum illum, quo corripiuntur. Hi successu temporis vel ex diuturna consuetudine intercedente cum Medico, vel etiam ex autorum diligenti lectione non levem acquisivere scientiam, didi-

cerunt linguam Medicam, licet non absque sumptibus. Sæpius enim Medico eruditissimas proponunt quæstiones, ad quas respondere res non levioris est negotii. Moneo autem, ut tum respondeatur cum judicio & ratione de præsentis affectu ejusque causa magis speciatim indicetur, docta partim addita ratione, quare hoc vel illud medicamentum in præsentis affectu eligendum. Indoctis & ignaris sufficit generalis affectus explicatio, exempli gratia: ventriculus est depravatus, hepar est obstructum, lien intumefactus, sanguis est corruptus. Semidoctis etiam explicet morborum quæstiones, licet non omnia intelligant, ne hoc neglecto, æger Medici scientiam leviorẽ judicet.

R E G U L A 3.

**Q**ui morem non gerunt, eos mature deserat Medicus, ne postmodum infelici subsequente effectus culpa ab imperitiori vulgo Medico ipsi tribuatur.

R E G U L A 4.

**A** pud contumaces opus est parrhesia interdum & fallacia. Serium se præbeat Medicus contra ejusmodi ægrotos: multi enim timentes auctoritatem Medici citius obsequium præstant, & lubentissime adsumunt, quod Medico absente detrectant. Inter plebejos etiam non vereatur objurgationibus uti, præsertim si nulla inter ipsos & medicamenta sit antipathia. Fallacia interdum requiritur, quando ægroti præ timore assumere recusant vomitoria, purgantia, mercurialia, sub specie aliorum medicamentorum propinari possunt, sique voce supplicis à Medico contendunt, ne talia præscribat, respondendum est quandoque: absit, talia non exhibeo, minime propinabitur tale; sed tamen spero, quod analepticum seu confortans aliquod remedium non detrectabis. Sic assumere solent ea, quæ citra rationem abhorrent, sub specie analepticorum, quæ alias præ timore præpostero vel imperitia



peritia respuerent. Quandoque vero abhorrent medicamenta in officinis parata, existimantes omnia ex pharmacopolio allata ingrata esse, his domestica præscribenda simpliciaque, vel herbæ quædam loco Thee, quas ipsi miscere & præparare possunt. Hæc optima sæpe est methodus, quia sub specie domesticorum ægroti ipsi pulcherrima interdum sic miscent medicamenta, quasi ex officinis allata essent, tanquam nauseosa rejicerentur.

#### REGULA 5.

**Æ** Ger non facile est deferendus. Sine ratione agunt qui ægrotis nullum auxilium superesse plane pronunciant, multo minus, qui eos deferunt: interdum enim ex tali immatura prognosi Medicus non leves maculas famæ suæ inurit. Hinc alterum, forsan empiricum consulunt, qui licet morbus valde sit malignus; pro more tamen enumerat, quod jam profligaverit plures tales morbos, quo fit, ut confirmato ægrotantis animo, natura omnes profligando eo morbo colligat vires & adhibeat; accidit & hoc, quod postea talis agyrta mirum in modum commendetur, & licet maximos in praxi sua committat errores, unicus tamen morbus ab aliis lethalis pronunciatus, & ab ipso casu & feliciter, sed beneficio naturæ curatus, omnes tegit errores nec adhibetur fides, si rationalis Medicus demonstret illos, & quantum noceant ejusmodi jactatores, quia ex invidia tale judicium natum esse creditur. Itaque omnibus modis abstinendum est ab ejusmodi loquendi formulis: amplius succurrere nescio; quibus remediis si parum proficitur, nescio quid supersit: tunc enim statim alium in auxilium vocant.

#### REGULA 6.

**M** Utatio vaga agrotorum contemnenda est à Medico. Inveniuntur multi chronicis laborantes morbis v. g. malo hypochondriaco, phthisi, podagra, qui

statim ad alium confugiunt Medicum; si auxilium promissum paulo diutius distrahatur. Sed pessima hæc consuetudo non est approbanda, nec ægris ipsis conducit, quando ipsum cui natura illorum est cognita, deferere satagunt.

#### REGULA 7.

**I** Tse Medicus, quando ægrotat, alios quoque tempore necessitatis consulat. Hoc nemo vitio vertat Medico, imprimis acuto si laboret morbo. Multi enim ægrotantes Medici admoniti a proverbio: Medice cura te ipsum, viribus suis plus confidentes tunc temporis nimia, quam par est, adhibita medicamento- rum farragine, in alium cum impetu destrudere conantur, nec circumstantias adeo in se pensitant omnes quam in aliis, quod sæpius cum damno experiuntur proprio. Porro non negligat alienam implorare opem, quando scemina vel liberi ipsius morbo periculoso corripuntur quoniam ipse præ dolore & tristitia omnia pensare nequit.

#### REGULA 8.

**P** Eregrini, & extra urbem degentes à Medico nunquam longius detinendi sed citius expediendi sunt. Interdum enim periculum in mora est, locique distantia subitanæ requirit responsionem. Hi itaque, qui in civitate degunt, tali in casu melius expectare possunt, quam extranei. Hoc quoque observetur, quod semper chartæ demandari debeat peregrinorum ægrotantium morbus cum medicamentis exhibitis. Sæpius enim intra quatuordecim dies redeunt, sique remedium optatum attigerit finem, denuo ejus transmissionem desiderant, quo intervallo & status ægri, & medicamenta exhibita oblivioni tradita sunt. Satiùs itaque erit omnia literis demandare.

#### REGULA 9.

**I** N captiosis questionibus & subdolis stratis gematibus omnia investiganda & cautius pensi-



*penstanda*. Maxima in urina committitur fraudulentia, nam sæpius ægroti Medicorum scientiam explorare cupiunt hoc stratagemate: mittunt Medico per ignoti cuiusdam ægroti urinam, finguntque ex diffitis apportari locis, quando itaque iudicium ex urina non respondet cum illo, quod circa lectum contingit, omnem simul amittit æstimationem. Cavendum itaque, ne specialiora ex urina prælagiantur; item ne unquam per literas urinæ iudicium patefaciamus, quia sæpissime ægrotantes circa unius Medici iudicium non acquiescunt, sed & alterius explorant, quando vero consilia invicem collata non respondent, utriusque fama periclitatur, quia ægrotantes incerti sunt, cui habenda sit fides. Sæpius accedunt mulierculæ extra thorum legitimam imprægnatæ, simulantes suppressionem mensium, vel alium quemcunque morbum, quibus non statim fidendum est, sed accuratius examinandæ sunt, ut patefiat illarum constitutio, an naturalis sit, an vero morbosa, & sic cognoscet Medicus facillime quid adhibendum, & quidem in mensium suppressione martialia, tanquam leniora pellentia & aperientia commendantur, quibus non facile abortus causatur. In genere quoque circa urinæ inspectionem considerandum, quos & quales in civitate reperiantur morbo chronico laborantes sic enim inopinata interdum prognosis Medico conciliavit famam.

REGULA 10.

**M**edicus si non lectum adire potest, tamen per literas consilio inserviat. Etsi primus censeatur ultimus modus, cum ex adspectu circa lectum facillime cognoscatur ægrotorum status; miserrima tamen res est, quando Medicus ab ortu solis usque ad occasum per plateas divagari cogatur. Laboret itaque eam potius introducere consuetudinem, ut post unam alteramve visitationem nuncium transmittant ad Medicum, referantque ægrotorum conditionem; sic multis simul inservire

*Opusc. Patb.*

potest Medicus absque incommodo. Dolendum tamen est, quod, si per literas consulatur Medicus, sæpius ea, quæ summe necessaria sunt ad morbi causam cognoscendam non referantur, hinc appropriata remedia præscribi non possint. Quo in casu optimum erit, præscribere leniora diaphoretica, & in responso adnectere quæstiones de omnibus circumstantiis, prout ad lectum fieri solet, & sic demum patefiat Medico ægrotorum constitutio.

REGULA 11.

**M**iserrima res est Medici, cui semper bene est, quando aliis male. Per iocum quandoque dici solet, Medicos quotidie Deum implorare, ut morbis afficiat mortales, quando in oratione dominica dicunt: Panem nostrum quotidianum da nobis hodie: quoties enim hæc verba pronunciant, toties ægrotos desiderant. Sed miserrima sane res est, si Medicus ex ægrotantibus victum & amicum quærit. Et licet decumbentes occurrant, multum tamen exinde felicitatis sibi promittere non poterit: totus enim se tradit ægrotis, totus morbus in Medicum quasi conjicitur, & aliis inserviando sanitati & vitæ commoditati multum detrahit. Sed tamen convenit Medico maiorem ægri gerere curam, quam ipsemet æger sui.

CAPUT IV.

*De officio Medici circa specialiora objecta,*

*Specialissime circa principes & Magnates ægrotantes.*

REGULA 1.

**C**ordatus sit Medicus non timidus. Imperator enim corporis audit, talem quoque se magnatibus exhibeat; cum prudentia tamen præsertim circa adhibenda remedia.



## REGULA 2.

**C**orporis omne malum tanto conspectius in se, quanto major est ille, qui agrotat. Imprimis apud magnates adhibenda est cautio; quo majores enim illi, eo majorem quoque famam conciliat Medico præstitum auxilium.

## REGULA 3.

**M**edicus nihil promittat temere. Hoc præsertim observandum apud principes & magnates, ut nihil promittamus, nisi quod consistat in nostra potestate; licet enim felicissimus aliquando sequatur effectus, spem tamen sæpe fallere potest. Circa opiata tamen nonnumquam, in sedandis sistendisque doloribus exoptata prognosis locum habere potest; & tali in casu Medicus Medico conciliat famam: ægrotantes enim putant, quo major dolor, eo propinquior mors; qui tamen facillime sedari potest opiatis & anodynis.

## REGULA 4.

**N**on temere contradicat principi patienti, vel aliis Medicis, nisi periculum urgeat. Contradictiones ferre non possunt Princeps, itaque audiendæ sunt eorum rationes: qui enim simulare nescit, nescit curare. Nec perstringendi sunt alii Medici apud Principes, ne alteri foveam paraturus ipse incidat, præsertim si intervallo temporis adversarius ex singulari Principis gratia extollatur.

## REGULA 5.

**S**ola pretiosa, sive rævera talia, sive venditata, sola non sunt propinanda. Vilissimis rebus majores vires indidit Divinum numem, quam pretiosis, ne pauperes laborantes destituantur auxilio, quare viliora si absolute requiruntur, non spernenda sunt; quamquam cariora propter præjudicium majoris efficacitæ etiam addi possint.

## REGULA 6.

**I**n heroicis medicamentis adhibendis apud principes & cordatus, & cautus sit. Venæsectionem, vomitoria, purgantia &c. non facile adhibeat solus, nisi cum aliis necessitatem illorum perpenderit. e.g. in febribus lentis emetica interdum summe sunt necessaria, quibus intermissis, febris lenta successu temporis mutatur in hecticam. Vid. Ettmullerum in praxi sua de vomitoriis. Interdum quoque venæsectio rite administrata gravissimum in momento tollit morbum, quæ vero neglecta omne sæpe auxilium redditur frustraneum.

## REGULA 7.

**I**ncurabiles morbos præstat non attingere. Hæc regula apud Magnates ante omnia tenenda. Præstat quoque inferioris conditionis homines incurabili morbo laborantes ordinario committere Medico; si vero omnibus modis desideratur auxilium, adhibenda saltem sunt analeptica, emulsionem similiaque, quæ ab istis ægrotantibus pro analepticis habentur.

## REGULA 8.

**Q**ui nescit simulare nescit etiam curare. Non omnia spernere Medicus nec contramandare debet quæ ab aliis adhibentur. Mulierculæ sæpius in consiliis ferendis sunt liberaliores; quæ, modo manifestum non inferant damnum, permittenda sunt, præsertim si externe quid applicandum; ea tamen lege, ut hæc vel illa species addi debeat. Interdum quoque sciolus quidam Chirurgus apud Magnates symbolum in morbo confert, quod non plane reprobandum est.

## REGULA 9.

**N**on temere symptomata quæ secundum naturam sunt, à fascino vel veneno orta esse pronunciet. Licet interdum præsumptio adsumti veneni adsit, ta-



tamen non statim divulganda est, nisi sit certissima, & si quid subest veri, à Medico facile sæpius succurri potest, cum ut plurimum illi robore spirituum & sanguine puro & temperato polleant, nec facile corripiantur à veneno & contagio. Post infelicem curam Medici, sectione instituta, venenum fuisse exhibitum interdum pronunciant, quod contigit in sectione Ludovici Principis Brandenburgici.

REGULA 10.

**O**Mnes curare non est in Medico, omniaque ad votum succedere, plane non est sperandum. Quid est frequentius, quam quod ægroti secundum Medici præscriptum exacte vivere negligant? Quid mirum igitur, si spem illius, cui vitæ & sanitatis non est absoluta potestas, eludat denegatum ægrotantis obsequium.

REGULA 11.

**I**N gravioribus morbis non statim desperet Medicus, nec desistat à cura; caute tamen semper communicato cum aliis consilio adgrediatur graves morbos.

CAPUT V.

*De prudentia Medici circa fœminas ægrotantes.*

REGULA 1.

**M**edicus debet esse castus. Castus sit in verbis & factis, quando ægrotantes visitare debet fœminas: non enim deest Medico libidinem exercendi occasio, præsertim apud incastas fœminas, si conscientia leges violare cupit.

REGULA 2.

**M**ulier omnem morbum bis patitur. Antiqua est sententia eaque verissima. 1) Fœmina omnem morbum patitur, quatenus est homo: 2) Patitur in specie morbos, qui non cadunt in virum, quando igitur viri semel ægrotant, fœ-

mina certe bis ægrotat; Medico quidem decuplo plus negotii facessit & animo & corpore imbecillis hic fexus.

REGULA 3.

**L**apis lydius sanitatis fœminarum sunt menses. Generale est axioma; quales menses in fœmina sunt, talis sanitas. Quando itaque regulares sunt & ordinati, nec in quantitate, nec qualitate peccant, indicant sanitatem; quando vero subsistunt, vel parum fluunt, indicant morbos vel conjunctos ipsis mensibus, vel statim subsequuturos. Plerumque si ægrotant fœminæ, vitium est circa menses, præsertim in morbis chronicis. Ante omnia itaque quærendum de statu mensium, & qualis excretus fuerit sanguis, an crassus vel niger, & sic porro.

REGULA 4.

**M**ulieres plurimæ in nostro climate sunt hystericae; quoniam generis nervosi debilitatem sibi contraxerunt à victu crassiore, abstinencia à potu, aere crasso, abusu acidorum & à reliquorum rerum non naturalium errore. Semper in ægrotante fœmina habeatur respectus ad affectus spasmodicos seu passionem hystericam, & inquiretur in conditionem mensium; item an antea ejusmodi convulsionibus adsueta fuerit, quod multum periculi involvit, si affirmatur; si vero negatur, minus difficulter sanantur.

REGULA 5.

**I**N mensibus movendis cautus esse debet Medicus. Non statim adhibeantur medicamenta fortiora, menses pellentia. Supprimuntur interdum menses ex sanguinis abundantia quia sanguis legitime moveri non potest: itaque tunc magis conveniunt venæsectiones. Sistuntur quoque menses per aliquot menses post morbum graviolem, in tali casu convenit sanguinem potius generare, quam detrachere. Cholericis fœminis & ubi sanguis abundat suppressis menstruis ex refrigerio, sanguis non provocandus est calidioribus, ne malignis morbis ansa præbeatur; sed potius venæsectio instituen-



tuenda. Contra pituitosis non conveniunt venæsectiones, sed martialia & pellentia leniora. Nunquam menses pellantur, nisi ventriculus fuerit correctus.

#### REGULA 6.

**A** Bortum procurare, quando consulto id fiat, scelus; si inconsiderato, dedecus. Non decet Medicum abortum consulto procurare, nec facile accidit talis casus, nisi ipsius Medici lascivi culpa gravida facta fuerit foemina. Inconsiderato tamen sæpius fieri solet, si non rite distinguitur suppressio mensium ab imprægnatione. Cautissime itaque agat Medicus, nec statim fortiora adhibeat pellentia non vomitoria vel purgantia vel calida oleosa destilata præsertim in maritatis, licet ipsæ se gravidas esse negent. Nunquam vero turpius fallitur Medicus, quam ab ipsis meretricibus: caveat itaque semper, ne menses provocet, sed saltem exhibeat humores pravorum corrigentia, balsamica, extracta amara, absinthium, scordium, melissam cum croco & martialibus, & ultro prodibunt menses.

#### REGULA 7.

**G** Ravidam esse foeminam temere asserere vel etiam negare periculosum est. In hoc casu probe discernenda sunt signa graviditatis & mensium suppressionis, quippe quæ maxime interdum conveniunt.

#### REGULA 8.

**E** ffutire secreta sibi concredita uti omnino alias, sic maxime apud foeminas seu earum secretas affectiones, turpe est.

#### REGULA 9.

**P**urgantia, venæsectio, calida fortiora cautissime sunt danda ipsis gravidis vel plane non. Gravidæ lenissime sunt tractandæ: venæsectio nonnunquam nocet, nonnunquam abortum provocat, &

nonnunquam ab abortu præservat. Si plethoricæ sunt foeminæ intermissa venæsectione abortus facile causatur. Instituenta est circa mensem quartum vel quintum, in nonnullis etiam circa tertium: nonnunquam secunda vel tertia vice; cavendum tamen, ne nimia quantitas subtrahatur: præstat ergo repetere venæsectionem, & parum emittere una vice ad uncias 4. vel ad summum quinque. Quæ abortui consuetæ circa tertium mensem venam secari curent & dein alterno statim mense. In non plethoricis venæsectio abortum procurare potest, item si circa tempus partus instituat, ubi alimentum majori quantitate requiritur. Quoad purgantia omnia fortiora vitanda sunt, quoniam operantur spasmo, qui uterum facile afficere potest propter consensum viciniamque loci. Nonnullarum tamen natura atque nervi ita sunt comparati, ut nunquam fere afficiantur spasmo; quod sæpius in meretricibus videmus, quæ etiam post fortissima purgantia adsumpta interdum non abortiunt. Itaque nullum datur medicamentum, quod absolute & necessario abortum promoveat, sed respective saltem individui. In nonnullis etiam mitiora symptomata abortum producant, ut in cholericis, sanguineis, ubi quoque animi affectus levissimus item clysteres damnum inferunt, quia spiritus facillime moventur. Vomitoria fortiora magis, quam ipsa purgantia abortum movent. Sæpius vero opus est vomitu, qui facillime procurari potest, præsertim jam præsentente nausea atque propensione ad vomitum, si aqua debita hauriatur in copia, & vel dimidia vel quarta pars grani tartari emetici adjiciatur. Convenit quoque gravidis, alvum habere liberam, quod fieri potest lenissimis absterisivis: verbi gratia rhabarbaro, vel passulis, vel manna, cremore tartari, terra foliata tartari cum foliis senæ, quæ citra ulla tormina & citra noxam alvum movent, gravidisque interdum maxime proficua sunt, & ab abortu præservant, nimiam humiditatem absorbendo.



REGULA 10.

**A**cida, opiata, frigida, ipsumque frigus forte ac rigidum venena sunt ipsis gravidis. Gravidæ tractandæ sunt, ut plethoricæ & simul cacochymicæ. Uti enim in cacochymia frigus & acida nocent, sic quoque in gravidis coagulum inducunt sanguini, circulationem ejus reddunt impeditiorem, majorque fit accumulatio humorum & sordium serosorum, quod etiam à frigore accidit: itaque gravidæ hoc modo tractatæ, gravissimos incurrunt morbos. Opiata sunt vitanda, quia sistunt spirituum motum, & per consequens etiam sanguinis circulum, ita ut sanguis stagnans obstructions efficiat, vasa nimium distendat, atque ob ruptionem abortum creet, læpius quoque inflammationem uteri, aut hæmorrhagias enormes cieat.

REGULA 11.

**G**ravida etiam abstineant ab omnibus perturbationibus mentis & animi pathematibus. Mentis tranquillitas multum contribuit ad prolongandam vitam, sanumque reddit corpus, multo magis in gravidis eò spectandum est, quæ & suæ & embryonis sanitati simul confulere debent. Etsi vero fœminæ ab animi affectibus facile plerumque labripiantur; tamen adhuc magis in graviditatis statu sunt irritabiles. Ex eo vero in tristissima mala incidere possunt, cum præsertim in cacochymicis illis nihil magis noceat quam animi commotio, ex qua spasmi & abortus nullo negotio excitantur.

REGULA 12.

**P**otus calidi non promiscue & copia suadendi sunt ipsis gravidis. Intelligitur hic potissimum potus thee & coffee. Observatum enim est, in cacochymicis potum thee per vias urinarias non statim transivisse, cum tubuli renales obstructi sint, ubi tanquam noxius erat interdicens; si vero transeat, mode-

ratus semper admitti debet eorum usus.

REGULA 13.

**G**ravida abstineant ab omnibus dulcibus: quoniam dulcia abundant visciditate, lentore quodam. Homines qui motui non sunt adsueta, post dulcium usum in gravissima mala incurrunt. Fœminis infantibus, & quæ vitam amant sedentariam, nihil magis est noxium, quam dulcia: reddunt enim sanguinem crassum.

REGULA 14.

**B**alnea multis gravidis in usu sunt, maxime mense ultimo & circa partus tempus. Nonnullæ etiam utuntur aliis mensibus, sed perperam: catarrhis enim sic facillime occasio præbetur, ultimis vero diebus tertio vel quarto antepartum balnea saltem tepida maxime proficua sunt, quia emolliunt & relaxant vias. Sic infessus quoque optime conveniunt gravidis eodem scopo.

REGULA 15.

**S**i gravida est debilis, etiam embryo notabili laborat debilitate. Quando verbi gratia nullus sentitur motus, tum Medicus semper caveat ab omnibus calidioribus item à durioribus crassiores partes in se continentibus; sed cibi facilioris digestionis cum vino paucio juncti in usum vocandi. Item balsamus embryonum externe applicari potest cum pane tosto. Abdomen levare potest cum aqua Reginæ Hungariæ, sicque interdum excitatur & conservatur fœtus.

CAPUT VI.

De prudentia Medici circa puerperas.

REGULA 1.

**P**uerperæ non copiosis, nec fortioribus medicamentis tractandæ sunt; sed convenientibus.

RE-



## REGULA 2.

**T** *Ractanda sunt puerpera, ut graviter vulnerata*: nam propter egressum foetus fauciatus est uterus, sanguis stagnans resolvendus est, ne inflammationes excitet.

## REGULA 3.

**T** *Ractanda sunt puerpera, ut summe debiles* nam tempore gestationis multas amittunt vires, in cachecticum quasi statum præcipitantur, porro etiam in ipso partu mirum in modum debilitantur. Sic quoque debilitati puerperarum nocent animi affectus, quoniam cras in sanguinis destruunt & spiritus magis dissipant. Nocent porro omnia medicamenta fortiora & commoventia, scilicet purgantia. Nocent denique cibi copiosi & crassiores ex quibus cruditates maxime generantur. Adhibeantur potius cibi euchymi, carnes juniores, potus tenuis, calida juscula, & abstinence a vino & cibis induratis salitis.

## REGULA 4.

**L** *Ydus lapis valetudinis puerperarum sunt lochia*. Lochia male fluentia inflammationes & alia mala indicant. Continetur quoque fluxus lochialis a metu & terrore: ob stricturam enim stagnat, inflammat, & putrescit in utero. Acida quoque supprimunt lochia, quoniam coagulant sanguinem. Symptomata quæ comitantur talem fluxum suppressum, solent esse graviora: plerumque excitatur febris inflammatoria, & nisi succurramus cautissime, gravissimum imminet periculum, nonnunquam mors.

## REGULA 5.

**A** *Nimio lochiorum fluxu maxime debilitantur puerpera*: tunc igitur abstinendum est à cibis copiosioribus dyspeptis, ab animi pathematibus, medicamentis fortioribus & adhibendi cibi paucissimi temperati, ac leniora medicamenta.

## REGULA 6.

**R** *Egimen aeris sit temperatum, uti omnibus agris, sic quoque puerperis*. Non convenit aer nimis calidus, nec nimis frigidus, nec nimis humidus. Experientia testatur, plures puerperas interire ex errore vel Medicorum, quando adhibent fortiora atque calida tanquam pessima; cum tamen juscula nimis substantifica cum lapidibus concorum & analeptica paucissima sufficerent; vel ex errore adstantium, quando deferuntur in lectum frigidum, humidum, recens stratum quo transpiratio impeditur.

## REGULA 7.

**M** *Edicus apud puerperas inquirat potissimum in transpirationem & respirationem*. Si cessat transpiratio & nulum plane sudorem habent, pessimum est signum: incurrunt ut plurimum in diarrhoeam, quæ vires penitus absorbit. Si respiratio atque pulsus inordinatus, febris lenta imminet.

## CAPUT VII.

*De prudentia Medici circa infantes eorumque morbos.*

**D** *Uo sunt ardua in Medicina, medici scilicet infantibus & gravidis*: his facile abortum causare possumus; in illis vero, quia non facile adsumunt medicamenta, nec loqui nec conqueri possunt de affectu, ex conjectura curationem petere debemus. Ob teneritatem infantibus non sunt deneganda medicamenta, sed adhibenda cum prudentia & cautissime. Nonnunquam opus est venæsectione in infantibus plethoricis, quando variolis corripiuntur. Cum tamen plerumque pituitosi deprehendantur, melius est expurgare vitiosam qualitatem ex primis viis, quam sanguinem detrahare. Vomitoria etiam pulsilli, & qui adhuc lactent ferre possunt optime; sufficit autem pars quarta vel quinta unius grani tartari emetici, quæ præfer-



servare possunt ab asthma, catarrho suffocativo; adhibeantur autem in forma liquida. Sæpius ad vomitum ipsi proni sunt infantes, & ventriculus sponte sua se exonerat copia lactis adsumti, quod bonum est signum. Etiam purgantia ferre possunt, quæ commodissime sub forma syrupi exhibentur: delectantur enim dulcibus, nec facile recusant absumere syrupum cichorei cum rhabarbaro. Opiata etiam adhibenda conceduntur, minima tamen dosi: sufficit decima vel duodecima pars unius grani & adhuc minor dosi cum matre perlarum in dentitione difficili, ubi imminet epilepsia.

REGULA 1.

**I**n infantum temperamentum non est destruendum nimis calidis. Multi Medici peccant in hoc gravissime, quando infantibus exhibent salia volatilia oleosa destillata similiaque. Sanguini hoc modo vis infertur ejusque crasis destruitur ab ebullitione excitata, nec vinum concedatur, quoniam infantes teneriores reddunt, ejusque usu abbreviatur vita, redduntur imbecilles motum sanguinis nimium concitando. Disponunt quoque ejusmodi calida ad epilepsiam, præsertim ubi ebullitio sanguinis jam adest, & prostant exempla eorum qui mortem subierunt post usum spiritus cornu cervi in variolis. Observamus enim, quod ab usu vini ejusmodi tenellorum spiritus excitati ad varios quidem jocos, instar morionum aptinati sint, sed ut plurimum incrementi cum imbecillitate corporis judicii quoque imbecillitatem ostendunt. Infantes, qui cerevisia crassiore lupulata atque spirituosâ utuntur, ut plurimum stipidi & ad studia tractanda inepti deprehenduntur.

REGULA 2.

**P**urgare convenit infantes. Fieri hoc poterit vel internis educantibus salburram ex primis viis, vel etiam clysteribus quam commodissime: quoniam di-

luunt salia corrosiva, quæ maxima copia generantur in ventriculo infantum. Cognoscitur autem maxime corrosivitas in viriditate & crassitie fæcum, ex corrosione lintheaminum, quod sæpius accidit, item quando excoriatio accidit ex urinæ acrimonia.

REGULA 3.

**A**d sudorem nunquam sunt cogendi: Quoniam ad sudorem expellendum necessario requiruntur calida, quæ destruant crasin & texturam sanguinis.

REGULA 4.

**I**n variolis omnia calida, item regimen calidum vitandum. Laudandus recentiorum mos præ detestando veterum, quod abstineant ob omnibus calidis & saltem temperata medicamenta abhibeant, edocti melius ex veterum errore & damno, qui virulentiam quondam vi expellendam peccare statuentes in variolis adhibere calidissima. At summum in usum vocanda sunt mixtura simplex, diascordium Fracastorei, salsa, item spiritus nitri. Interdum sola conducunt acidula remedia, neglectis omnibus temperatis non minus quam calidis, præsertim in sanguineis ubi nimia ebullitio. Calida nunquam esse proficua videmus in scabie, si enim calidissimis materiam peccantem expellere, & ægrotantes in maxime calefactis hypocautis tenere velimus, certe maximum excitamus, pruritum, & salium acrimoniam exaltamus, quod etiam valet in morbillis.

REGULA 5.

**I**n infantibus attendendi sunt clamores. Plerumque torminibus affliguntur quando clamant, sique concurrat simul inflatio abdominis, certi sumus de torminibus, quæ proveniunt ex vitio lactis, quando primis viis insunt. Maxime vero hoc in casu lac peccat crassitie, quippe qua aptum est obstruere vasa lactea. Pessima est nutricum consuetudo con-



continuò ostendere clauitantes mammas lacte turgidas: nullum enim exinde sentiunt levamen, sed malum augeatur, quod Hippocrates cognovit, quando dixit: maciant, dum lactant infantes. Nobiliores scemina minus aptae sunt ad lactandum, quam rusticae: quoniam illae ex victu laudabili generant sanguinem copiosum crassum, lac quoque crassum infantibus nocivum deponentem; haec vero, quoniam victu utuntur tenui, bibunt aquam, & vescuntur brassica, optimum lac generant sanissimosque nutriunt infantes. In torminibus infantibus injiciantur clysteres, praebatur rhabarbarum & oleum amygdalarum dulcium. Ex foecibus viridibus si cognoscitur acidum, juvant alcalina terrea, mater perlarum, lapides cancerum. Si lac crassius in causa sit, detrahatur nutrici alimentum, & exhibeatur potus tenuis.

## R E G U L A 6.

**A**t tendendum quoque est, an alvus respondeat. Infans ad minimum ter vel quater intra viginti quatuor horas alvum deponat, si unica saltem vice id fiat, indicat inclinationem ad morbum. Itaque praeservationis gratia adhibeantur lubricantia, pulvis infantum, radix ireos Florentinae, rhabarbarum vel etiam clysteres.

## R E G U L A 7.

**V**ideatur an faeces sint virides, vel coagulatae, sunt ut plurimum prodromus morbi, itaque probe observetur acidum & viscidum; visciditas autem ortum trahit ex inopia diluentis liquoris & nimio acido, quod corrigendum est.

## R E G U L A 8.

**D**ulcia omnibus fere infantibus grata, insalubria sunt saepissime. Juxta diversitatem temperamentorum homines diversa appetunt alimenta, dulce est temperamentum infantum, itaque dulcia

appetunt; cum tamen saepe instar veneni noceant, quoniam facile acescunt, visciditatem gignunt, tormina ac vermes procreant, unde ab iis abstinendum. Si vero medicamenta adsumere detrectent infantes, admiscenda quidem sunt dulcia, sed absque hac conditione nequaquam sunt concedenda.

## R E G U L A 9.

**D**ulcia, acida, spirituosae & nimium frigus infantibus venena sunt. Dulcia excitant tormina, flatum, obstructions; item acida, quae praeterea coagulant lac & ipsorum humores, praesertim si sunt acida mineralia. Spirituosae vero destruunt massam sanguinis & disponunt ad motus spasticos & epilepsiam. Infantes quando bene bibunt, bene dormiunt, ac simul in somno granulatim sudorem profundunt, optimum est signum. Cavendum itaque est, ne frigus corpus illorum attingat nudum. Non penitus ipsi interdicitur usus aeris liberioris, si modo corpusculum & caput defendatur à frigore.

## R E G U L A 10.

**F**ascinia non statim attribuantur morbis infantum. Quando infantes non statim pinguescunt, dicitur saepissime quod sit ex fascinio, & adhibeantur gelatinosa & lac tanquam bene nutrientia; cum tamen balnea, frictions & resolventia medicamenta propter obstructionem pororum cutis adhiberi deberent. Plerumque vero accidit à vermicibus, ut non solum contabescant, verum etiam motus convulsivi oriantur.

## R E G U L A 11.

**O**piata facillime operantur apud infantes, quia sunt serosiores, ideoque parcius sunt adhibenda. Horum usus frequentior stupida reddit ingenia memoriamque obtusam. Haec adhibenda non sunt, quando alvus est adstricta: quoniam augeatur causa morbi, & corpus repletur copiosioribus fordibus. In doloribus den-



dentium opiata sæpissime non sunt spernenda; si vero dolores oriantur ex vitio primarum viarum, sedantur quidem opiatis, sed, gravius nascitur malum.

REGULA 12.

**E**X suctione, somno & ordinata alvo maxime sanitas infantum noscitur. Verissima est regula, qui bene ingerit & bene digerit, bene egerit & sanus est. Digestionem vero & nutritionem promovet somnus.

REGULA 13.

**P**robe observandum, quomodo alias se gesserit infans, nonnulli ad clamores a natura adsueti sunt, alii parum dormiunt, alii sæpe sine nocumento vomunt, si consuetudo transcenditur, malum indicat.

REGULA 14.

**R**ecens natis non statim præbeantur mamma, ad minimum duodecim vel viginti quatuor horæ præterlabantur, nam multa digerenda adhuc infanti restant ex utero allata. Adhibeatur itaque saltem oleum amygdalarum dulcium, item syrupus de cichorio cum rhabarbaro, cibentur interea juscule avenaceo infantes.

CAPUT VIII.

*De prudentia Medici circa varia ætatis homines.*

1) Circa infantes.

**I**nfantēs gaudent temperamento calido humido, multum comedunt, & quando cibum detraxeris, simul somnum detraxeris. Videndum tamen, ne unica vice major adhibeatur copia, paucus somnus, sed & successive & sæpius. Motus ipsis concedendus est, sed non fortior, qui sanitatem firmat. Tandem abstineant ab omnibus excessivis acidis,

salinis, destillatis spirituosiss, dulcibus, viscidis, frigidis, purgantibus drasticeis. Cibis vescantur facilioris digestionis, bibant cerevisiam tenuem secundariam.

2) Circa juvenes.

Juvenēs & adolescentes melius ferre possunt cibos duriores, quia illorum sanguis magis vergit in calorem. Abstineant autem maximopere a vino atque spirituosiss, etiam a purgantibus fortioribus, si in statu sano conservandi. Motus corporis proportionatus ratione ingestorum, & animi recreationes illis non interdicanur.

3) Circa adolescentes.

Hi abstineant maxime a Venere, quoniam liquor seminalis ad incrementum partium multum facit. Qui in adolescentia Venerem & Bacchum exercent, debilitant nimis vires, & effectum corpus tradunt senectuti; qui vero circa trigimum annum harum rerum initium faciunt, illi diutius integri constabunt.

4) Circa viros.

Hi saltem temperatis utantur.

5) Circa senes.

Senes adhibeant leniora spirituosissima & tractandi sunt placide, ut pueri. Caldiora quidem si simul sunt humectantia perferre possunt; quæ vero vires abluunt, qualia sunt purgantia & quæ sanguinem desiccant, senili corpori maxime sunt inimica.

CAPUT IX.

*De prudentia Medici in morbis acutis & chronicis.*

REGULA I.

**A**nte omnia Medicus se defendere debet a contagio morborum malignorum. Optime



Optime se defendere potest tam à peste, quam aliis morbis, si vitam servet sobriam, & liberet se à vitiosis humoribus, maxime scorbuticis & pituitosis, qui maxime dispositi sunt ad contrahendam malignitatem, quod non æque accidit in cholericis & melancholicis humoribus. Deinde acidula minus fortiora acida ut succus citri, acetum non nocent, præsertim si temperamenti pituitosi sit Medicus. Porro somnum habeat decentem ut recreentur vires & spiritus. Deinde utatur potu vini modico, quoniam porcutis excretoriipatuli servandi, ut verbo dicam: sit sanus. Denique in ore teneat, quæ volatilizant pituitam, liquant salivam, & corrigunt miasmata hausta, quale remedium est myrrha, quæ virtute sua balsamica præservat à putredine, & miasmatis resistit, idem facit Zedoaria, radix contrajervæ petasitidis, angelicæ, quæ celebratissima sunt tanquam phlegmatizantia. Postremo ejiciat sputum continuo in loco infecto, nec deglutiat: illud miasma enim non facile per pulmones, sed cum saliva in ventriculum & plerumque primas vias prius depluit, deinde ingreditur sanguinem, id quod sputo rejecto avertitur. Promovet vero sputi ejectionem fumus tabaci, cujus usus maxime commendatur, quoniam sale suo oleoso venenatam materiam destruere potest.

#### REGULA 2.

**N**on facile diu moretur Medicus, vel assistat ipsis ægris, quando mortis sunt proximi: tunc temporis enim massa sanguinis penitus est destructa quoad elementa, majoraque exhalant effluvia ob summam putredinem. Tempore vero convalescentiæ non adeo facile inficiuntur adstantes, nisi maxime sint prædispositi; omnium vero maxime si moriantur ægri: abstineat ergo Medicus circa tempus mortis à visitatione.

#### REGULA 3.

**C**onsilave humidum ac parvum non perspirabile Medicus vitare debet.

Ipsa loca ubi degunt ægrotantes, multum faciunt ad infectionem, præsertim si hypocauftum sit parvum, humidum, angustum, ibi enim concentrantur miasmata & putrescunt, denegato aeris accessu, hinc non frequentet Medicus ejusmodi loca. Adstantibus quoque ipsis magis conducit, si fruantur hypocaufto perspirabili, & ob eandem rationem tempore hiberno magis inficiunt miasmata maligna, quoniam non possunt aperiri fenestræ, ad aeris liberioris transgressum: quo liberior enim locus & quo magis perspirabilis, eo melior quoque judicatur.

#### REGULA 4.

**M**edicus semper cautissime agat in morbis malignis quoad medicamenta heroica. 1) Circa venæsectionem sit cautissimus, præsertim si jam malignitate infecti sint ægri, tunc enim plane non concedatur, quoniam detracto sanguine magis adhuc dejiciuntur vires; nec opus est, nisi in subjectis plethoricis. Ubi vero nulla adest malignitas, tunc venæsectio plethoricos præservare potest à malignitate ne inficiantur. 2) Exulent omnia purgantia fortiora in malignis, quoniam projiciunt vires, quæ magnam affinitatem habent cum miasmatis malignis. Alvus tamen commendatur aperta, fluida, & mollis: hunc in finem clysmata, si opus est, non negligenda sunt, vel saltem usu interno salia commendanda sunt, v. g. nitrum depuratum, statim post conceptum contagium; commendantur tamen leniora cum alexipharmacis mixta sumta etiam in ipsa peste, & adhiberi possunt sine præservativo; quando vero ulterius serpsit malignitas, ita, ut humores jam invaserit, tunc adhibenda amplius non sunt. 3) Idem valet circa usum valentissimorum sudoriferorum vel alexipharmacorum, & maxime errat, in eo vulgus, adhibens calidissima, v. g. spiritum cornu cervi, elixir sudoriferum, persuasus, hoc modo una statim vice miasmata expelli posse. Commendantissima potius sunt leniora diaphore-



phoretica sanguinis dissolutionem impediunt, absorbentia, terrea, confortantia, antimonium diaphoreticum, cerussa antimonii, lapides cancrorum, corallia, mandibula lucii piscis cum nitrosis; deinde etiam humectantia dicta, decoctum scorzonerae, decoctum cornu cervi; item analeptica v. g. tinctura rosarum, aqua florum scordii, ut conserventur vires, in hoc casu summe necessariae, reliqua omnia committantur naturae. 4) Ante omnia cavendum, ne opiata adhibeantur, sunt enim opiata ante dies criticos semper nocentissima; si vero status aegri postulat anodyna, sufficiunt papaveracea & semina quatuor frigida majora. Etiam in dysenteria maligna abstinendum est ab opiatis & fortioribus adstringentibus, sed lenioribus absorbentibus succurrendum est aegrotis.

REGULA 5.

**M**edicus prognosin cautam debet formare in morbis malignis & acutis. Optime dixit Hippocrates. Incertae sunt omnes praedictiones circa spem salutis in morbis acutis. Circumspecte itaque loqui debet Medicus, ne se prostituat, nec statim absolute decernat, quod necesse sit mori, quod non evasurus sit; sed semper restrictive & cum conditione, licet periculum adsit dicat, & quidem adstantibus seu sanguine conjunctis magis quam aegro; adesse periculum, multosque hujus constitutionis obvisse, optimum tamen esse sperandum; sed tamen mortis meditationem non esse negligendam, siquidem ab omni christiano optime quamvis sano requiritur ut quavis hora ad moriendum paratus sit. Ante omnia vero requiritur cautio in principio, semper enim dies critici sunt expectandi septimus & nonus, ante quos nunquam certa exhibenda est prognosis.

REGULA 6.

**N**e nimis tutos nimiumque timidos aegrotos reddat Medicus. Semper in ma-

lignis, ubi vires deficiunt, cautus sit Medicus in praedictione, ratione salutis & mortis, dubiumque quaesitis ferat judicium, ita ut nesciant quaerentes quid debeant concludere ex verbis Medici.

REGULA 7.

**S**i personae sunt digniores, solus curam in malignis morbis nunquam suscipiat, etiamsi ipse sit peritissimus; praestat tamen alterum quoque Medicum etiamsi quoad eruditionem inferiorem sibi adjungere: sic enim dividitur Medici fama, relictisque id manet solatii, Medicos omnia praestanda praestitisse. Haec de morbis malignis in genere; sequitur nunc in species de variolis & morbillis.

REGULA 8.

**M**edicus bene cognoscat tempora ipsarum variolarum. Quatuor sunt variolarum tempora: ebullitionis, eruptionis, suppurationis, exsiccationis. 1) Tempore ebullitionis circumspecte & caute sunt adhibenda: calida, & quando maxima est ebullitio, tunc plane non sunt adhibenda, quoniam expellunt quidem, mox vero retrahunt. Conducunt potius temperantia, terrea & leniter laxantia, eamque ob causam diarrhoea critica ante quartum diem non est sistenda. 2) Tempore eruptionis abstinendum est ab omnibus revocantibus, clysteribus constringentibus, acidis, terreis, opiatis, nimioque calore: natura enim requirit ad agendum temperiem, sponteque expellit variolas, itaque circa diem criticum quarto vel quinto die prognosin ita instituat: se scilicet velle hoc vel illo medicamento eruptionem promoveri, & certissime promittere poterit eruptionem. Quoniam vero natura ipsa etiam absque medicamentis eo tempore expellit quod inimicum est; tamen adhibere potest medicamentum nitrosum, item lapides cancrorum, diascordium Fracastorii, antimonium diaphoreticum, myrrham &c. ut ipsi adscribatur.



batur, quod à natura peractum est. Idem iudicium esto de morbillis. 3) Tempore suppurationis rursus abstinendum est à calidis, nihil magis enim obest tum temporis quam myrrha vel in substantia vel, quod pejus est, in essentia adhibita, quoniam fere semper propter exulcerationem atque calorem febris inflammatoria imminet; adhibeantur potius nitrosa, absorbentia, temperantia. Notetur porro, quod circa suppurationem non propinanda sint sicca, v.g. pulveres, propter deglutitionem impeditam, ex œsophagi tumore; sed potius liquida, emulsiones, quo vehiculo lapides cancrorum subtilissime pulverizati exhiberi possunt; temperantia vero semper sunt optima, nec nocent tunc clysteres. 4) Tempore exsiccationis adhibeantur balsamica, myrrha, crocus, item elixir balsamicum ex nucifera, item terrea absorbentia desiccantia. Circa variolas porro observandum est, quod Medicus pro lubitu possit proliferare variolas quot & ubi velit. Primum scilicet quot velit fit ordinario, si tempore supurationis demum adhibeat calida: calida enim ab initio adhibita non solum multas expellunt variolas, sed & profundiores relinquunt cicatrices, quod bene notandum; posterius scilicet, quod possit proferre variolas ubicunque velit, hoc modo fit: quando pars corporis, quam variolis obsitam esse nolumus sub stragulis minus fovetur. Propterea si facies semper sub lecto detinetur, item quando adsueta sunt ægri certo semper incumbere lateri, tunc ordinario in eo latere & in facie plures prodituræ sunt variolæ. Cavendum itaque ne ejusmodi methodum tædiosam ægrotantibus adgrediamur, nec unquam faciem obtegamus, sed saltem corpus. Si vero ex errore factum jam sit, ne majores adhuc fiant, post maturationem statim aperiendæ sunt pustulæ, & inungendæ oleo amygdalarum dulcium, vel quod melius balsamo sulphuris ex oleo amygdalarum parato, adjecta pauca camphora. Non tota autem facies inungenda, sed tantum pustulæ acu aperiendæ. Post exsiccationem abluatur facies

cum aqua florum fabarum cum camphoræ & saccharo candido. Idem observandum circa morbillos, nisi quod in his non metuendæ sint cicatrices. Tandem in genere moneo, ne tempore eruptionis adhibeantur medicamenta naturæ motum à centro ad peripheriam revocantia ad interiora, ut sunt purgantia atque clysteres. Post eruptionem vero si alvus adstricta reperiatur, aperiatur per clysmata leniora. Sic ab initio statim tempore ebullitionis adhiberi possunt laxantia leniora acrimoniam diluentia ut imminuatur variolarum copia.

### R E G U L A 9.

**M**edicus variolas, morbillos, morsus pulicum & maculas scorbuticas non pro petechiis habeat & contra. Distinguenda sunt hoc modo: 1) Circa tertium vel quartum febris diem insurgunt maculæ, & faciei tumescencia notatur in variolis faciem occupantibus, quod non videmus in petechiis faciem intactam relinquentibus: 2) morsus pulicum majores sunt ipsis petechiis, compressique pollice relinquunt punctum in centro: 3) maculæ scorbuticæ præsertim malignæ sunt petechiarum species; paulo tamen tutiores frequentioresque ipsis petechiis; 4) variolæ à morbillis non æque distinguuntur ab initio; notandum tamen, quod non facile eodem tempore & loco grassentur, denique quod rarissime altera vice corripiantur variolis.

### R E G U L A 10.

**C**irca dysenteriam malignam Medicus cautus sit ante omnia etiam accedendo dysentericos. Gravissimus fœtor circa dysentericos nonnunquam observatur, itaque Medicus non negligat masticare supra laudata remedia. Deinde curet, ut detracto cervicali, excrementa transire queant in vas suppositum, ne conspurcetur lectus, pessimusque excitetur fœtor, adstantibus non minus, quam ipsi sanitatis præfidi summe noxio. Circa prognosin hujus morbi sit cautissimus, ne



ne promittat convalescentiam neque in principio, neque in declinatione: interdum enim uno statim momento symptomata remittunt, & tamen maximum imminet periculum, ubi nimirum subsequuto sphacelo viribusque prostratis mors in propinquo est.

REGULA II.

**S**corbutus & malum hypochondriacum sunt matres omnium morborum chronicorum. Hi morbi nil aliud sunt, quam depravata sanguinis & lymphæ temperies, unde dolores spasmodici, digestio turbata, similiaque symptomata. Porro ex hisce malis facilis sequitur arthritis, podagra, calculus. Causa mali hypochondriaci est obstructio nata ex acido & viscido, itaque talia venena sunt hypochondriacis.

REGULA 12.

**C**ura chronicorum maxime instituenda est tempore vernali & hiemali. Tempore verno omnia sunt temperata, tota natura viget, aer est temperatus, subtilis, talemque reddit sanguinem, & inde longe felicius operantur medicamenta; hiemali vero tempore natura est debilis, humores cum aere densati, pori obstructi.

REGULA 13.

**Q**uanto nimis radicatum est & consummatum malum, caveat Medicus fortiora adhibere, sed lenissime tractet agrum. Fortioribus natura non confortatur, sed penitus destruitur: absint itaque purgantia similiaque; semper tamen alvus aperta est servanda, temperata adhibenda, lapides cancerorum, nitrum depuratum, conchæ præparatæ, item salia circa prandium. Porro non inutilis potus theæ & caffèæ, item evacuantia lenissima, qualia sunt pilule hypochondriacæ martiales ex aloe, absinthio &c. Tandem diæta exactissima, motus corporis vel equitando vel alio modo.

Opusc. Patb.

REGULA 14.

**N**on facile promittere debet Medicus reconvalescentiam in morbis chronicis: Potissimum vero observet tempus, ubi natura interdum plus operatur, quàm omnia medicamenta, si modopaululum ipsi succurratur.

REGULA 15.

**P**rudenter se gerat Medicus in adbibendis medicamentis heroicis, si obtinere velit finem sibi propositum. 1) Circa purgantia probe distinguat individua, probe cognoscat eorum efficaciam, ut possit exinde judicare effectum. In melancholicis & hypochondriacis etiam fortissima melanagoga nihil efficiunt; feliciorem contra præstant effectum laxantia, & ex his manna, folia sennæ, rhabarbarum. Nunquam igitur determinet, quot sedes à purgante supervenerint, interdum plane non operantur, & indicant humores magis corrigendos esse quam evacuandos. Porro circa purgantia fortiora monendum, ne unquam propinanda sint Medico absente: quoniam sæpiissime excitare solent symptomata sævissima, quibus persentitis Medicus accersitur & consulitur. Circa vomitoria quoque sit cautissimus, beneque rursus distinguat subjecta an sint debiliora, an robustiora, in debilibus granum unum tartari emetici satis magna copia ejicit materiam peccantem: si itaque supra modum operantur medicamenta emetica, eorum vis infringenda est anodynis & alcalinis. Porro notandum, quod visitatio non instituenda sit circa ipsum operationis actum: nulli enim tam patientes sunt, quin operationem aliquantum culpent, præsertim si anxietates præcordiorum quædam concurrant. Illos itaque peracta demum emeticorum operatione visitet, tuncque majorem gratiam habebit. 3) Circa venæsectionem media via incedendum, pauca interdum emissa sanguinis quantitas optimum ægroto exhibet



bet successum; si vero modus transcendatur, facillime ad morbos chronicos panditur via, præsertim in frigidioribus subjectis. Optime autem instituitur venæsectio, tempore vernali, aere calidiore, sanguine spirituosiore, quam hyeme, ubi abstinendum à venæsectionis negotio. In subjectis plethoricis non raro reiterari potest venæsectio, ne una statim vice nimia detrahatur quantitas. Prima itaque venæsectio mense martio instituatur, altera maio, quando rosæ proferunt flores. Melancholici quoque venæsectionem admittunt in autumno, quoniam illorum sanguis crassior, quam phlegmaticorum. 4) Circa opiata observetur tempus nocturnum, quo meliorem exhibent fructum.

#### REGULA 16.

**I**N omnium medicamentorum adhibitione bene observanda sunt tempora, verbi gratia: quando movendi sunt menses, observandum semper est naturæ tempus consuetum, & tres vel quatuor dies ante illud tempus exhibenda sunt medicamenta convenientia, quo natura ipsa ad evacuationem inclinans cooperatur.

#### REGULA 17.

**M**edicus ad ægrotum vocatus altero jam præsentem Medico hæc tria observet. 1) Priori relinquat formularum præscriptionem, nisi specialissime ab ipso desideretur. 2) Nihil præscribat absque alterius consensu. 3) Circa prognosin prius alterius iudicium privatim percipiat, ut convenient, nec sibi invicem contradicant.

### CAPUT X.

*De prudentia Medici circa Sostium.*

#### REGULA 1.

**A**Ccipe, dum dolet, post morbum Medicus olet. Est regula generalis,

quæ probe observanda, sciat uti dolore, & tunc non recuset oblatam accipere pecuniam, quia talis solvendi promptitudo non semper occurrit, sed ut plurimum cum dolore evanescit. Levissima interdum anxietas Medico prudenti plurimum affert lucri. Ægrotantes enim doloribus correpti atrocioribus egregia offerunt premia, persuasi, dolores majores esse prodromos mortis; sedato vero dolore metus mortis dissipatur, & premia quoque minora expectabit Medicus, præsertim à Judæis, qui optimum sæpe in civitate seligunt Medicum, postea sæpius obliviscuntur. His atque omnibus ingratis detegitur error, si advocata quoque alia vice Medicus cunctetur quodammodo, ac si aliis distrahatur negotiis, præsertim quando periculum non est in mora. Quid sit? obliti nostri recordantur, accedunt, solvunt, omniaque juxta Medici arbitrium gerunt atque perficiunt.

#### REGULA 2.

**P**acisci de mercede rationalem non decet Medicum. Empirici ut & Chirurghi hoc laborant vitio, sed Medico non convenit, & maxime suspectum est, si prænumeratam accipiat pecuniam, majorque tandem evadit ignominia, si effectus promissis non respondeat. Primaria itaque Medici intentio sit salus, non pecunia proximi.

#### REGULA 3.

**S**ostium sive muneris sive debiti nomine offeratur, promte Medicus accipiat, nec cum pudore, nec cum tristitia.

#### REGULA 4.

**P**ecuniam in loco negligere, maximum interdum est lucrum. Famulos ægrotantes, vel eos, quibus quotidianus conceditur aditus, curamus gratis, præsertim si magnatum, vel etiam in urbe nobiliorum gratia fruuntur. Medicamenta dispensamus absque determinato pretio,



pretio, sicque ut plurimum duplum accipimus, & ultra: ægroti enim nunquam gratis exposcere solent auxilium, sed gratuiti sunt plus solvendo, quam opus fuisset.

REGULA 5.

**I** mportune sostrum quarere, parit contemptum. Ægrotantes admonere debiti, turpe est, & conciliat Medicis illorum odium, ita ut alteri sese imposteorum committant; si vero importuni sunt seu ingrati, tunc per tertium aliquem urgere illos possumus; ita tamen, ne subolfaciant, à Medico institutam esse admonitionem.

REGULA 6.

**N** on servile sit sostrum, sed bonorarium. Hæc regula magis ab ægrotantibus observanda est, quam à Medico; poterit tamen etiam à Medico attendi, ne postulet pro una visitatione duos vel quatuor grossos, atque hoc

pacto rerum suarum non minus, quam artis salutaris auctor sit. Præstat autem laboris præmium ægrotis donare, quam illud ipsum postulare vel adsumere.

REGULA 7.

**N** Ec præmia pauperum sunt spernenda, quamvis eos sapius gratis curemus. Si accipere recusamus quæcunque etiam offerantur à pauperibus, tunc putant, Medici auxilium implorare ipsi non amplius esse concessum.

REGULA 8.

**P** rolongare curationem lucri majoris causa, infame est. Interdum unicum emeticum vel sal digestivum ab initio adhibitum tollere febrim, item purgans, vel elixir proprietatis sine acido paratum menses suppressas provocare potest, quibus neglectis ad curationem multum requiritur temporis; quod sane injustum, Medico vero ingenuo indignum esse censetur.

FINIS.



# I N D E X

## RERUM PRÆCIPUARUM.

### A

- A** Bortiva pharmaca absolute talia non sunt 174. 203. quæ pro iis habentur 203. seq.
- Abortus** non sine convulsione & hæmorrhagia fit uteri atoniæ debetur 175. requirit dispositionem 174. venæsectione præcavetur 175. semel eum passæ curiterum facile incident. ibid.
- Absorbentia** in malo hypochondriaco acidum non obtundunt 21. evacuantia iis subjungenda ibid.
- Acidulæ** quomodo agant 94
- Acidum** in statu secundum & præter naturam extra ventriculum non est 15. 19. promover digestionem 20. in copia ingestum abit in sal neutrum 20. morborum causa proxima & immediata non est ib. suppressionis mensium sæpe causa 22. peccat plerumque in hypochondriacis & hysteriis 21. in infantibus & pueris facile generatur 20
- Acida** infensa sunt humorum progressui 21
- Acidi salis** in aere generatio 14. natura & indoles 19
- Acuti morbi** qui 125. eorum natura symptomata & causæ ibid. symptomatum explicatio 129. sq. multi debentur inflammationi 151. solutio quando, ejusque signa 131. in spongiosis & phlegmaticis signa funesta. 152
- Adolescentiæ** periodus ejusque morbi 6
- Aer fluidum** est subtilissimum 207. sal acidæ naturæ in se continet 14. ejus vis in corpus 208. non immediate cum sanguine miscetur 208. impurus varia inducit mala 210. marinus salus est 208. puteis & fossis mineralibus a pulvere pyrii condensati noxa 212
- Ætas** temperamenta mutat 4. ejus mutatio morborum causa 5. sæpe morbis medetur. 9
- Ætatum morbi** a capite incipiunt cur 5. differunt pro climatum diversitate 7
- Alcali purum** in animantibus non est 19. fixum unde 91. artis effectus est 19. ex quibus vegetabilibus eliciatur ib. volatile sola putredine & combustionem efficitur. ibid.
- Alcalinorum** in morbis utilitas & noxa 20. seq.
- Alvus adstricta** in febribus noxia 102. paræthemata inde ibid.
- Amara** in medicina sunt præstantissima cur 97
- Amarities** unde 99
- Anatomia** firmum est medicinæ fundamentum 39. ad mortis & Morborum causas detegendas est necessaria ibid. accuratum facit medicum 42. ejus contemptio unde 39
- Anima** non est causa motuum in corpore 63. 139. perperam dicitur natura 142. non est medicinæ principium 40. ejus facultates quando primum sese exerunt 242. sed Helmontius in ventriculo posuit 221
- Aneurismata** in hepate unde 242
- Animi pathemata** gravidis nocent & quæ 61
- Antimonium crudum** non est venenum 205. ejus substantia 216. in passionibus rheumaticis spectatæ virtutis est ibid. igne tractatum venenum evadit ib. hausti ipsius fumus morbosus effectus 215. funestum a floribus ejus adsumptis exemplum 16
- Apoplexia** infantes non invadit 7. mortis ejus subitæ causa sedes sæpe est in primis viis 166. in Hispania frequens 186.
- Arabum curatio** 186
- Aqua** est menstruum universale 28
- Aquarum examinatio** medico est necessaria in fodinis, 54. metallifossoribus nocent 219
- Ardentium febrium** signa solutionis 135
- Argenti portio** sub fusionem avolat. 208
- Arsenicum** ubi inveniatur 214. ad veneficia præcipue usurpatur cur 230. affectus inde lethales 214. antidotum sunt oleosa cum lacticiniis 206. eo extincto, rum



rum anatome 230. illud tractantes quibus morbis pateant 214. a fumo infectorum curatio 219

Arteriæ duplici motu gaudent 298

Arthritis quæ invadat 168. vere & autumno maxime frequens ibid. 103. causæ & symptomata ibid. leniori sæpe emetico curatur 168

- - - vaga unde sæpe 21

Ascarides hypochondriacos sæpe vexant 19

Atheromata in hepate unde 241

Auripigmentum quando venenum 26

Aurum intime solvi non potest 27. ejus artificiosa exhalatio 208

## B

**B** Arba quando compareat 5

Berberi morbus in India 1912 ejus causæ ibid.

Bilis quid 92. generatio ipsius & elaboratio ibid. materia in sanguine solum est 92. est valde penetrans 91. recondit sal amarum 90. seq. a Sylvio pure alcalina habetur 158. cujus naturæ tamen non est 92. vesicæ & hepaticæ differentia 89. in vesica est amaricantior ibid. experimenta cum ipsa instituta 91. convenit maxime cum centauryo minori ib. amaritiam suam in intestinis deponit 96. est necessaria & utilis in corpore 94. humana a bovina differt 92. post iram venenum 102. abundantia unde 94. ad quos morbos disponat 98. defectus unde ibid. 98. ejus restitutio 53. ex mora in duodeno corruptæ noxa 97. ex admixtione corruptæ noxa 164. iners ad stagnationem confert 162. præcordiorum anxietates inducit 163. alvi adstrictionem ibid. flatus ibid.

- - - æruginosa & viridis unde 164

- - - bovinæ usus mechanicus & medicus 92

Biliarii ductus obstructi unde 99. parthemata inde ibid.

Butyrum insulsum umbilico infantis inditum alvum movet cur 157

## C

**C** Achexiæ signa funesta 157. ea defunctorum anatome 268

Calculus in Persia rarus cur 193. ejus symptomata 55. signa funesta 154. vesicæ sæpe in utero foetum adficiit 60. causa & modus propagationis 66

Calor in corpore unde 109. moderatus necessarius 116. est instrumentum putredinis seq. nimius in febribus intermittentibus unde 109

Cacochymia quid 16. causa ibid. qui ipsi sunt obnoxii 17

Camphora quid 37. ejus operatio in corpus ibid. usus in febribus ibid. abortum non inducit 204

Canceri exulcerati signa funesta 155

Carbunculi in peste retrocedentes necant 115. signa horum funesta ibid.

Cardialgia quos invadat 48. sedes ibid. hepatis obstructioni sæpe jungitur ibid.

Caries dentium unde 80. curatio ibid. optime fit per cauterium actuale 81. aut extractionem dentis ejusque cautelæ ibid. præservatio 85

Carnes animantium annosiorum longa coctione indigent 3

Catarrhales defluxiones post febres unde 19

Catarrho suffocatorum anatome 263

Cephalica cur cerebro amica 103

China chinæ in febribus prodest cur ibid.

Cholerae signa funesta 194

Chronicorum morborum sedes 94. signa feralia 156. methodus medendi generalis 169. quæ in his causa mortis 44

Circulus sanguinis & humorum unde 147. ejus ignorati noxa 42. inventi usus ibid. continuus ac æquabilis arcet putredinem 51. ad vitam est necessarius 162. est quasi animæ cum corpore vinculum ibid. ab anno LVI. LXIII. fit lentior 7. morbi inde ibid. vehemens nocet 32

Cœcitas in Tartaris a partu per aliquot dies unde 193

Coitus sæpe in virginibus rebelles morbos tollit 11

Coli texturæ sinuosa & situs in praxi cognitu necessarius 48. tumores ibi falso

X 3 lieni



- lienī adscribuntur 48. in eo adfecto  
quæ profint ibid.
- Colica** spasmodica defunctorum sectio ana-  
tomica 170. ejus per topica mitigatio  
27. dolores post febres unde 19
- Colli** tumor strumofus quibus Europæ po-  
pulis endemius 283. causæ ibid. feminæ  
ipsis magis obnoxia ibid.
- Comedones** in Misnia in infantibus fre-  
quentes 190. tabem inducunt ibid. mel-  
le & balneo calido e cute provocan-  
tur ibid.
- Consensus** partium unde 55. matrum cum  
foetu in utero 61
- Continuæ** febres Galliaë populis frequen-  
tes cur 184
- Convulsiones** in inflammatione ventriculi  
unde 227. a vermibus 56
- Corpora** exsiccata putredini non sunt ob-  
noxia 29
- Corpus** humanum est machina artificiosis-  
sima 140
- Corruptio** homini infensa est 149
- Cremer** in Hungaria quinam morbus 189
- Crisis** a veteribus jam notata 130. quid  
ipsis sit ibid. natura ejusque rationalis  
explicatio 139. causæ efficiens ibid.  
non est anima sed mechanismum 141.  
salutaris signa 142. cum evacuatione &  
remissione symptomatum sit ibid. non  
omnis remissio & evacuatio est crisis  
143. excretionum causæ ibid. non sunt  
solutionis causæ, sed causæ morbificæ  
victæ ibid. quibus diebus solemnis 130.  
an statim dentur ibid. sit exacerbatio sæ-  
pæ in his 137. a quo tempore compu-  
tandi ibid. de quibus morbis dicatur  
130. usus in praxi 143. perfectæ magis  
in calidioribus regionibus sunt 137. im-  
perfecta quæ 132. sit per abscessus ibid.  
non est turbanda 117. turbatur sæpe per  
imprudentem medicationem 113. per an-  
ni tempus & intemperiem aeris. 137
- Cutis** structura practico scitu necessaria  
46. ejus officium 44. poris obstructis  
quid faciendum ibid.
- Cynanche** ejus signa funesta 152. suffoca-  
tione perimit. ibid.

## D

- D**emonstratio in medicina ex quibus  
principiis desumi debeat 27
- Dentes** quid 70. eorum substantia genera-  
tio & nutritio 222. numerus 74. figu-  
ra indeque eorum orta divisio 75. sensa-  
tio unde 73. instituta cum ipsis experi-  
menta 70. incisorum proruptio quando  
71. caninorum & molarium 74. in pue-  
ris facile possunt eximi cur 75. canino-  
rum dolor in pueris unde 79. ejus sym-  
ptomata ibid. candor quando pereat 75.  
stupor dentium quid & unde 80. mu-  
tilatio quid 76. defectus restitutio 86.  
extractio quomodo instituenda & cau-  
telæ 81. quando necessaria 82. cillatio  
unde & cura 85. tartarus unde 77. quæ ipsis  
sunt insensa recensentur 86
- Dentitionis** difficilis causæ 29. cura 85
- Dentificii** pulveres circa hos cautelæ 87
- Diarrhœa** sal acre in ea peccat 23. mor-  
tui anatome 270. methodus medendi ge-  
neralis 23
- Dolor**, ejus in spina dorsi causæ 49. dex-  
tri lateris circa ilei costam unde & ubi  
sit 48. ejus medela generalis ibid.
- Dracunculi** unde 193
- Duodenum** ventriculus succenturiatus 159.  
ejus initium & terminus ibid. structura  
53. distinctum præ reliquis intestinis  
habet officium ibid. caret viis lacteis 161  
intimior in ipso sit ciborum solutio &  
elaboratio ibid. multorum morborum  
causæ est & quorum 53. inflammatio in  
causæ & febre ardente unde 99
- Dysenteria** exstinctorum anatome 265. fu-  
nesta ejus signa 154. Londini frequens  
est 184
- Dyspnœa** mortui anatome 265

## E

- E**ffluvia ex aere attracta corpus varie  
alterant 209. sulphureorum metallico-  
rum causæ 212. effectus 208
- Elephantiasis** in Ægypto unde 193
- Emetica** in morbis ex prima regione sunt  
optima 169. quando usurpanda ibid. in  
forma



forma liquida melius propinantur 169.  
 post iram valde noxia sunt 228  
 Endemii morbi quibus causis debentur 183  
 Ephemeræ febris solutio quando 135  
 Epidemii morbi communi aeris vitio debentur 183  
 Epilepsia spasmō duræ matris debetur 225.  
 generationis causæ 9. ætate sæpe curatur & quando 4. chronicam nonnunquam quartana solvit 118. ad foetum non raro in utero propagatur 60. modus propagandi 66. infantilis causæ 51. curatio 12. variolarum vigori superveniens lethalis 136. signa in infantibus funesta 156. ea peremptorum anatome 257  
 Erosiones in gonorrhœa & lue venerea unde 24  
 Erysipelas quando invadit & remittit 135. ventriculi indicatur febre leipiria ibid. solutionis signa ibid.  
 Exanthemata repellentibus non sunt tractanda 46  
 Excretiones suppressæ sæpe sunt causæ morborum 41. ingestis debent esse proportionatæ 261  
 Excrementa hominum salibus sunt imprægnata & quibus 15  
 Exessio dentium unde 76. curatio optime per cauterium æquale fit 81. aut extractionem dentis 85. cautelæ circa hanc & præservatio ibid.

## F

**F**æces infantum viridissimo colore sæpe tinctæ sunt 10. acres in hectica unde

Febris definitio 106. ortus & causæ ib. formalis spasmō debetur 107. symptomatum & imprimis horroris explicatio rationalis 108. caloris 109. materia in spiritus nervorum & membranarum agit 106. solutionis signa 136. salutaris sæpe a veteribus & recensioribus habetur. 105. in se non est salutaris 118. quo sensu habenda ibid. 119. quæ salutares sunt 118. quandoque eam accendere juvat 121. evacuationes legitimo tempore in ea succedentes morbos solvit 117. viscerum obstructions sæpe refert 119. apoplexiam

quandoque discutit ibid. scabiem nonnunquam aufert 118. epilepsiam chronicam interdum tollit ibid. hinc in initio non est reprimenda 120. in ipso die accessus remedia sunt propinanda & quæ ibid.

.. Hungariæ ortus symptomata & causæ 189

Femellæ nondum menstruatae gravibus obnoxia sunt passionibus cur 12

Fermentationis & putrefactionis differentia 28

Ferri & cupri exhalationes noxiae 218

Flammulae sulphureæ de nocte salientes unde 211

Fluor albus, ejus causæ 192. sedes 178. methodus medendi 169. Londini est morbus endemius 184

Fœtor dentium unde 82

Fontium foteriorum in hepatis adfectibus usus 245. virtus eorum in quo consistat ibid.

Fœtus in utero nutritio non est immediate a sanguine 64. per os nutritio adhuc dubia est 63. imbecillis signa 69. morborum causæ sæpe sunt aer præsertim hiemalis 68. ciborum defectus ibid. acidorum abusus ibid. animi pathemata ibid.

Frigus arcet putredinem 29. in febribus unde 107

Fulguris & fulminum in aere productio 14. materia sulphuri minerali similis est ibid.

Fuligo sal vere urinosum volatile per destillationem fundit 15

## G

**G**enarum fistula unde 77. cura & cautelæ circa hanc 82

Gibbositatis & luxationis in pueritia facilis proventus unde 6

Gingivarum officium 74. consumtarum causæ & cura 85. hæmorrhagiæ quomodo sistendæ 86

Glandularum duodeni textura & officium 160.

Gravidæ sæpe hydrope laborant 177. exempla & cura 178. cautelæ practicæ circa gravidas & puerperas 159



## H

**H**æmoptysis unde 265. non facile necat 264. defuncti anatome ibid.  
 Hæmorrhagia spontanea in se non est salutaria 115. nimia magnorum morborum causa est 33. sedes & principium sæpe in primis viis est 52. signa funesta 156  
 Hæmorrhoides qua ætate incipiunt 7. qua subsistant ibid. iis adfecti acida fugere debent 22. foeminae etiam iis vexantur 181. Venetiis sunt endemiæ 155  
 Hæreditarii morbi causam habent in solidis probatur 4  
 Hectica febris consistit in lentius procedente putrefactione 36. difficilis sanationis est ibid.  
 Hemiplexia quibus morbis se adsociet 262. infantes non invadit 7. ea mortuorum anatome 262  
 Hepar quid 238. ejus situs ibid. figura ibid. structura ibid. vasa 239. diaphragmati annexum 51. vasa ibid. lymphaticis quoque gaudet 240. nervi sensu exquisito caret 242. omnibus animalibus est 95. tardissimus in eo sanguinis circulus 94. bilem secernere primum officium est 31. 50. secundarium ventriculum calore fovere 241. quibus morbis pateat 50. 243. rara ejus est inflammatio 243. signa lethalis corruptionis 156. cura & præcautio 50  
 Hernia umbilicalis in foetu unde 64  
 Holsari non longævi cur 189. febribus malignis & petechialibus maxime obnoxii 190  
 Horror in febribus spasmo debetur 107  
 Humida stagnantia facilem putredinem subeunt cur 30. quomodo possint servari ibid.  
 Humores quatuor veterum in corpore qui 45  
 Hydatides in hepate unde 244. in utero ibid.  
 Hydragyrum est venenum 214. vapor maxime aurifabros afficit ibid.  
 Hydrocele Narbonensibus familiaris cur 184.  
 Hydrops ex utero sæpe oritur 267. ex

asthmate diuturno & palpitatione cordis 156. post paracenthesin sæpe lethalis 266. ejus funesta signa ibid. pericardii unde 66. in utero foetum sæpe affligit ibid.

Hypocondriaci mali symptomata unde 55.

Hysterica passio uteri potissimum vitio debetur 299. acidi abusus sæpe remota causa est 22. humi prostratio in ea unde 56. curatur sæpe per concubitum 11.

## I

**I**cterus, ejus generatio causæ & symptomata 99. in hystericis & hypocondriacis unde 16. venenis adsumtis sæpe se adsociat 200. præcedit nonnunquam inflammationem ventriculi 233. foetum non raro in utero afficit 58. propagationis ejus modus 66

Iliacæ passionis sedes 48. causa 225. frequens est in Græcia 49

Impotentiam & sterilitatem inducentia auferuntur 204. quæ proliis habentur ibid.

Infantes quando loqui & incedere incipiunt 4. quam maxime capite patiuntur 5. morbi illorum qui ibid. causæ 12.

Inflammatio quid 221. in partibus membranaceis periculosior reliquis, 220. in sphacelum transitus signa 152

Inflammatoriæ febris signa salutaria solutionis 85. frequens est Apuliæ incolis 186.

Intermittentium febrium sedes in duodeno 164. paroxysmi in illis unde 101. causæ 167. generalis medendi methodus ibid. sæpe a matre ad foetum deducuntur 59. signa & causæ 65. Galliæ populis endemiæ 184. vid. febris.  
 Intestinum rectum ex anatomia cognitum est necessarium 49. connexio cum vesica ibid.

Ira varia inducit mala 169. dolorem in scrobiculo cordis 48. icterum 228. gravissimas sæpe etiam tollit passiones ibid. remedia 169

Juventutis periodus 6. ad morbos peccatoris proclivis ibid.

Lac



## L

- L** Ac præcipua morborum infantum  
caussa 20
- Lætio absolute lethalis quæ 197. non ex  
tempore, quod supervivit vulneratus,  
judicanda 201. propter accessum dene-  
gatum quandoque absolute lethalis 199.  
per accidens lethalis quæ 198. ab igno-  
rantia aut defectu chirurgi sæpe fit 200.  
pericranti quando lethalis 198
- Lethargus quibus morbis se adsociet 262.  
eo adfecti serosa extravasatione in cere-  
bro moriuntur ibid.
- Lentorum februm ex intermittentibus or-  
tarum sedes 166. signa & cura ibid.  
mortuorum anatome 169. Gallia genti  
endemiæ 184
- Lienis structura 51. officium ibid. obstru-  
ctionis noxa ibid. dolorum in eo situs  
48. gravativi & fixi cur ibid. reme-  
dia 52
- Ligna in vase clauso cremata acidum stag-  
ma & oleum fundunt 20
- Lithargyri virulencia unde 215. spiritu  
metallico gaudet ibid. pathemata inde  
ibid. a fumo ejus incommoda 219. cu-  
ratio 220
- Lochia suppressa eorum causæ externæ  
179. a spasms nimis sæpe oriuntur  
ibid. signa funesta 153
- nimium fluentia, signa funesta 155  
male venæsectione in manu & adstrin-  
gentibus sistuntur 175
- Longavitas hominum ante diluvium un-  
de 3. quibus præsidis acquiratur 43
- Lues venerea in utero sæpe ad foetum tran-  
sit 65. Constantinopoli exulat 191
- Lumbrici in pueritia unde 6. Gallia gen-  
ti familiaris 184
- Lympha ab arteriis separatur 54. ejus of-  
ficium ibid. gastricæ & intestinalis usus  
15. ex anatomia cognitu est necessaria  
54. progressus ejus quomodo facilita-  
tur ibid. morbi ex vitio & retarda-  
to cursu qui ibid. cur curatu difficiles  
ibid.

## M

- M** Alignæ febris in phlegmaticis &  
cachecticis unde 119. Gallia popu-  
lis endemiæ 184. exstinctorum anatome.  
269
- Mechanismus quid 2
- Medicinæ necessitas 41. rationalis requisi-  
ta ibid. scopus 259
- Medicus longam vitam præstare debet &  
quomodo 31. ejus requisita 239. circa  
criminalia officium 195. testimonium  
de vulnerato mortuo a se curato nihil  
valet 202
- Melancholia hypochondriaca Hispanis fa-  
miliaris 186
- Melicerides unde 244
- Membranaceæ corporis partes quæ 52.  
structura ibid. ad spasmos & inflamma-  
tiones proclives ibid.
- Menses quando primum erumpunt 5. caus-  
sæ 6. qua ætate cessant 5. sæpe morbos  
solvunt 10
- suppressi circa eos ad quod respicien-  
dum 173. ob prægressos morbos sæpe  
retinentur 172. fotibus & balneis salu-  
tariter revocantur 173. interna quæ  
profunt ibid. pellentia sæpe nocent &  
quando ibid. fontes foterii in his sa-  
lutares & qui 175
- nimium fluentes unde 173. feminæ  
præ virginibus iis obnoxia 174. fon-  
tibus foteriis ii sæpe in ordinem re-  
diguntur 175. male venæsectione in  
manu & adstrigentibus sistuntur ibid.
- Mercurialia scorbuticis infensa cur 23
- Mercurius gravitate pollet 215. fessoribus  
est infensus 214. noxii inde effectus  
215. dentium firmitati nocet 80
- Metalla omnia sulphur recondunt 211.  
eorum natura ibid. quæ prima materia  
ibid. in aqua crescentia præstant terre-  
nis ibid. menstruum universale est æthe-  
reum ibid.
- Metalli fessorum morbi 210. præservatio  
& cura 219. cur suffocatione pereant  
212. coeruleus color in antris suffoca-  
torum unde ibid.
- Metastasis morborum acutis, familiaris 136.  
lethalis sæpe ibid.
- Mo.



**Molæ** unde 176. sunt vel nutritionis vel generationis ibid. explicatio ibid. an in virginibus inveniuntur ibid.  
**Montium** incolarum longævitæ unde 3  
**Morbus** niger Hippocratis quid 34. quomodo mortem inferat ibid.  
**Morbi** a Galeno a fluidis derivantur 2. sed falso 4. sæpe a defectu sanguinis veniunt 33. it. ab abundantia ibid. ipsi & morborum effectus distinguendi 114  
 - - - **Ægyptiis** frequentes qui 193  
 - - - **castrenses** unde 33  
 - - - **contagiosi** unde 102  
 - - - **maligni** qui 35. causæ 24. alios inficiunt ibid. præservatio 35  
 - - - **metallici** in pulmonibus habent initia. 210  
**Mordechi** Indis frequens morbus 191. causæ ibid.  
**Mordexyn** morbus Goæ incolis peculiaris 192  
**Mors** quid 44. est necessaria 3. causæ præcipue sunt quatuor & quæ 44. ex anatomia variis morbis extinctorum desumi debent 148. quomodo præscindendæ 149. in acutis quæ 44. in senibus ab abusu fructuum horæorum 269. ab emeticis & purgantibus sæpe accersitur 154  
**Motus** quid 40. in corpore animanti unde 106. species quot 252. arteriarum est continuus 249. sanguinis duplex 116. utque ad febrium salutarem solutionem requiritur ibid. vehemens, quando dicatur 252. localis veterum requisita 248  
**Mucus** salædinis manifestæ expers est 14

## N

**N**atura veteribus quid 114. morborum est medicatrix 101. mechanica necessitate agit 115. qualem ordinem servet 114. non sufficit ad morbos curandos 41. intensiori motu morbos sanat 115  
**Nervorum** consensus cognitu est necessarius 55  
**Nitri** generatio 13

## O

**O**culorum vitia in Armenia frequentia 192. Japponensibus communissima ibid.  
**Obesi** præ gracilioribus morbis patent 255.  
**Odontalgia** nonnunquam a decubitu feri acris venit 78. aut sæpe a dente carioso 81.  
**Ovulum** foemini omnia linimenta hominis continet 62

## P

**P**alpitationis cordis sæpe polypo debetur 265. sub incurvatione corporis sæpe cohibetur ib. defunctorum anatome ib.  
**Pancreaticus** succus a Sylvio acidus habetur 158  
**Paralysis** infantes non invadit 8. quibus morbis se adlociet 262. ea extinctorum anatome ibid.  
**Partus** a nimia strictura uteri difficilis quibus remediis facilitandus 179. sæpe post mortem matris fit 155. funesta gravioris signa ibid. facilis est in Æthiopia 198.  
 - - - **vitalis** qui 204  
**Pediculorum** copia in Hungaria unde 189  
**Peripneumonia** mortuorum anatome 264. in Westphalia frequens 189. causæ ibid.  
**Pestis** quid 187. essentia consistit in putrefactione 35. quomodo hominem jugulet ibid. defunctorum anatome 269. incalidissimis regionibus frequens 187. Constantinopoli endemia 190. quo anni tempore ibi invadat & causæ 191. in insula Formosa periculosissima 192  
**Petecharum** essentia consistit in putrefactione 35. curatio generalis 56. signa solutionis 135  
**Phantasia** ac imaginatio unde 189  
**Philtrea** pharmaca non dantur 207. quænam pro iis venditantur ib. vera quæ ib.  
**Phrenitis** quando in variolis funesta 146. signa funesta 151  
**Phthisis** unde 266. signa funesta 154. mors in



in hac facilis 267. defunctorum: anatome 296. Londini frequens est 185  
 Pilorum in pube proventus quando 5  
 Placentæ uterinæ structura 64. vicem gerit pulmonum ibid.  
 Plethora est causa obstructionum 17. imminutio sæpe a natura fit. 32. circuli sanguinis tardioris est ibid. sæpe causa mortis & pinguedinis ib.  
 Plica Polonica quid 189. causa 190  
 Pleuritidis signa solutionis 137  
 Plumbi mechanica textura 217. promte in auras avolat 216. adsumti noxa ib. fumus quid ib. deglutiti incommoda 217.  
 Podagra in Persia rara 194. in Armenia frequens 193  
 Podagræ doloribus ventriculi & anxietatibus vexantur 103. mitigatio quomodo fieri debeat ib.  
 Polypus quid 263. in juvenili & virili ætate frequens 6. signa ib. plerumque in dextro ventriculo invenitur 153. sæpe causa mortis evadit 32  
 Potus frigidus in calefactum corpus ingessus venenum 34. infusus calidis ex herbis antispasmodicis curatur 35  
 Præcordiorum anxietates in ventriculi inflammatione 226. tumor ibi 227  
 Prognosis famam medico conciliat 144. ad artis finem proprie non spectat ibid. est ex difficillimis ib. causa est observationum defectus ibid. seq. veterum est empirica 145. distinguenda pathemata, corpora & tempora 145. quæ in acutis ferenda 151. pulsus in his tangendus ib. in morbis pectoris quæ 153 cautelæ generales circa eam 157  
 Pubertatis periodus 6. morbi ib.  
 Pueri & infantes præ juvenibus morbis obnoxii 255  
 Pulmonum structura 50. in praxie usus ibid. subsidentes in aqua infanticidii sunt signum insufficiens 203. vulnera lethalia quæ ibid.  
 Pulsus quid 248. ad motum localem a veteribus refertur ib. mechanice explicatur ib. variat pro subjectorum varietate 154. item anni temporum 255. it. pro tempore febris 253. quando ille tangendus 255. in utroque carpo quandoque scrutandus ib. facit ad diagnosin

& prognosin 253 per experientiam addiscendus ibid. Galenus nimis multas finxit species 251. Sylvius ad tres tantum reduxit 252. revera tamen quatuor sunt & quæ ib. quænam possint invicem conjungi 253. in capitis interiori parte in continuis & malignis febribus delirium prænunciat 257. in hypochondriacis in hypochondrio sinistro unde ib. in partibus incongruis denotat inflammationem aut suppurationem ib. plane cessans cum sudore frigido mortem prænunciat ib. usus circa medicamentorum exhibitionem 258  
 Pulsus æqualis qui 270. sanitatem indicat. 253  
 . . . caprizans inæqualis species. 154  
 . . . in acutis periculosus ibid.  
 . . . celer Sennerto quid 235. qui dicatur 252 ex frequentia judicandus 113. copiam virium an indicet ib. separatim percipi nequit 250. est in cholericeis ac cholerico sanguineis 254. post purgantia vehementiora idem tangitur. 258  
 . . . & frequens cum caloris augmento febrem indicat 250. sine errore unus pro altero ponitur. ib.  
 . . . creber ac mollis in infantili ac puerili ætate est. 255  
 . . . debilis quid. 251  
 . . . dicrotus inæqualis species 254. pessimum corporis statum indicat ibid.  
 . . . durus quid 253. inflammationem in membranaceis partibus indicat 257. aut dolores, spasmos & convulsiones 254. in senibus est unde. 255  
 . . . frequens Sennerto aliisque quid. 249 non est de essentia pulsuum ibid. causa & rationalis explicatio 256. ex numero & tempore determinato dijudicandus 252. febrium signum pathognomonicum 255. seq. non sine celeritate est. 250  
 . . . debilis & parvus languidum circulum sanguinis indicat. 256  
 . . . parvus & inæqualis terrore adfectuum est. 255  
 . . . inæqualis & languidus in pectoris adfectibus & palpitatione cordis est. 257  
 . . . formicans inæqualis species 253. in acutis periculosus ibid.  
 . . . inæqualis quid 252. non boni ominis 253. &



- ... & debilis in crasturbatum sanguinem & inordinatum spirituum influxum denotat ib. præfagit ibid.
- intermittens infausti præfagii est. 254 sine exitio quandoque observatur ibid.
- debilis & celer junctus plerumque mortem prænunciat. ib.
- irregularis pessimam corporis conditionem indicat. ib.
- magnus Sylvio quid 252. qui recte dicatur ib.
- moderatus sanitatem indicat 252.
- mollis quid & unde ib. in infantibus deprehenditur. 254
- parvus Sylvio quid 252. qui dicatur ib. progressum sanguinis languidum & virium debilitatem indicat. 253
- debilis & frequens virium languoris & diu persistens malignitatis index est ib.
- languidus & tardus tristitiam est. 255
- rarus Sylvio quid 252. tarditatis signum. ib.
- ferratus inæqualis species 253. in acutis periculosus ibid.
- tardus qui 251. sanguinis visciditatem indicat. 254
- & magnus virium roboris & visciditatis sanguinis signum est 254. in senibus plethoricis & melancholicis est. 253
- parvus ac languidus dormientium est. 255
- tremulus inæqualis species 253. in acutis periculosus. ibid.
- vehemens quid. 251
- & celer febriculofam intemperiem indicat. 254. cholericis & cholerico sanguineis familiaris. ib.
- magnus intensiorem sanguinis æstum significat. ib.
- undosus inæqualis species 253. in acutis periculosus ibid. vermicularis idem ac undosus. ibid.
- Purgantia validiora nocent & quæ 45 inflammationem ventriculi sæpe concitant 230. veteres cur in propinandis peccaverint 45
- Purpura in Misnia frequens morbus 190 quale sal in eo peccet 25. signa & causæ 190. præter alios puerperas maxime invadit ibid. facile aliis jungitur morbis inclinatis 168. methodus medendi. ibid.

- alba acutis superveniens lethalis 154 signa ibid.
- Putredo quid 23. semper comitem habet foetorem ib. causæ sæpe sunt venena 34. sanguinis boni copia 33. defectus ib. a corpore quomodo arcenda 29. sequi differta fermentatione 27

## Q

- Quartana febris æstate facite curatur 161. foetum in utero sæpe adficit 60 emetico in initio curatur 167. diuturna huic non cedens quid faciendum ibid. epilepsiam sæpe tollit 169
- Quies quid 49

## R

- Rachitis in Anglia morbus inquilinus 185
- Remedia diætetica chymicis in morbis rebellibus sunt anteferenda 1
- Renum officium 52. qualia salia secernant 16. motus est ibid. celerrimus 52. morbi ex iis ibid.
- Rheumatismi a sale acri oriuntur experimento probatur 22
- Rigor febrilis spasmō debetur 209
- Roseolæ in Italia frequentes 185

## S

- Sal, primogenium est acidum in aere 13. est necessarium ad vitam 15. generatur per motum 13. causticum unde 24. indoles vis & effectus in corpore ibid. est in venenis ibid. generatur sæpe in corpore ex sordibus ibid.
- Salis salis in corpore generatio 21. ad quos morbos disponat ibid.
- volatilis in animantibus generatio 14 productio ex iis 29
- Salia quæ in corpore sano sunt 19. non omnium morborum sunt causæ 25. probatur rationibus ib. causæ & morbosa diversa in corpore unde ib. generantur ab humorum copia ib. defectus 17. febribus ardentibus 16. tertianis continuis ib. ab



ab æstu intenso intestino 17. a spiri-  
tuosis 36. ab alimentis nimium sali-  
tis *ibid.*  
Saliva aerem in se continet 210. usus 15  
Salivantia in lue venerea ubi applican-  
da 42  
Sanguis crassus ad hepar fertur 240. in  
eo facile stagnat 242. tardus progres-  
sus unde 241. color coccineus unde 209.  
calor 110. præternaturalis non testis de  
circulo citato *ib.* copia quæ producat  
mala 17. itidem defectus ejus restitutio  
34  
Sanitatis fundamentum in quo confi-  
stat 33  
Sarcocèle Narbonensibus familiaris 184  
Scabies humida adolescentibus familia-  
ris 22. sicca phlegmaticis *ibid.* metho-  
dus medendi generalis *ibid.* nimium sa-  
lina remedia nocent 2. in VVestphalia  
frequens 189. rara in Hispania 186  
Schiptio morbus in insula Formosa qui  
192  
Scorbutus quid 37. salia in eo peccant  
24. adfecti in sphacelum sunt proclives  
37. mercurialibus non est tractandus  
25. rarus est in Hispania 186. maris  
Baltici accolis frequens 187. signa  
*ibid.*  
Semen quando secerni incipiat 6  
Semiteriana febris Romanis frequens  
185. quos ibi invadat *ibid.*  
Sensuum instrumenta sunt partes mem-  
branaceæ 221  
Senectutis periodus 7. causæ & morbi *ib.*  
Senes a vermibus sunt immunes 8. a peste  
*ibid.* ad sphacelum proclives 37  
Singultus ventriculi inflammationi super-  
veniens lethalis 227  
Situs erectus noxius a veteribus jam co-  
gnitus 122. in acutis 123. causæ  
125. observationes & exempla 124. quæ  
phenomena sequantur 128. quæ pro-  
sint 129  
Simultæ confectio 214. eam tractantium  
morbi. *ibid.*  
Solidorum structura diversa est causa di-  
versitatis operationum in corpore 4  
Spasmus quid 106. indoles 227. omnium  
morborum fundamentum 107. homini  
insensus est 150. nimii ante & in partu  
quomodo compescendi 180

Sphacelus in hepate unde 243  
Spinæ dolores unde 49  
Spirandi difficultas unde 48 ab inflatione  
ventriculi sæpe fit *ibid.*  
Spiritus fumans ex quibus conficiendus  
19. experimenta curiosa 208  
Sputum falsum in hæctica unde 18  
Stamni exhalationes noxiæ 218  
Steatomata in hepate unde 244  
Strint in Hungaria quinam morbus 189  
Sudoriferorum noxa post excandescenciam  
46  
Sulphur in fulgure & fulmine unde 14  
inflammabilis ex resinis productio 22  
præparatio ex minera prope Goslarium  
213. noxa in corpore *ibid.* odor. in ca-  
pitis dolore ex ebrietate aut levi ob-  
structione prodest *ibid.*  
Syncope unde 261. lethalis causa 263

## T

T Abaci fumus an prosit in odontal-  
gia 87  
Tarantulæ morsus Apuliæ genti endemius  
186. symptomata *ibid.*  
Transpiratio ad vitam & sanitatem est  
necessaria 166. suppressa concitat ma-  
la 17  
Temperamentorum mutationis ratio-  
lis explicatio 4  
Terror gravidis noxius 61  
Topica ubi applicanda 47. in febrium  
spasmodis *ibid.* in debilitate nervorum  
*ibid.* in morbis capitis 55  
Tussis Londini familiaris 184

## V

U Lcera cæcæthica senes sæpe inva-  
dunt 8  
Ureterum situs 49. structura *ibid.* calculus  
sæpe ipsis insidet *ibid.*  
Urina in scorbuto quæ 23. rubicunda in  
hæctica unde 19. mictio cur potum ca-  
lidum brevi sequatur 52. suppressa per  
topica provocatur 47. mingendi difficul-  
tas cum tenesmo juncta 49  
Uterus vi elastica gaudet 170. substantia  
est fungosa 171. magnitudo extra gra-  
vidi.



- viditatem 178. innumera habet vasa 171. quæ per anastomasin connectuntur 168. in gravidis distenduntur 171. venæ hypogastricæ ibi latiores sunt, quam arteriæ hypogastricæ 171. alit consensum cum intestino recto 181. multorum morborum matrix est 51. nimia strictura facit artum difficilem 179. vaginæ prolapsus in tenesmo unde 181. hæmorrhagia post & ante partum aut abortum est periculosa 171. flatus in eo quid indicent 180. hydatidum & hydropis causa & exempla 181
- Vapores in metalli fodinis varia produ-  
cunt mala 218
- Vaporosa cerebro non conveniunt 55
- Variolæ quando invadant & remittant 137. materia est sal tenue causticum & acre 65. signa funesta 153. in utero sæpe ad foetum propagantur 58. quomodo & unde 65. Londini familiares sunt 193. itidem in insula Formosa 192 & in Malabarâ 191
- Vegetabilia coacervata facile putrescunt 30. causa coloris ac virtutis unde 13
- Venæ cavæ officium & cursus 239
- Venæ portæ structura & officium ibid.
- Venæsectio longævitatatis est remedium 43 in pulmonum morbis prodest, 50. usus duplex est 45
- Venena vera quæ 205. actio in corpus ibid. necatorum anatome ibid.
- Venti boreales quomodo ad morbos faci-  
ant 22. quale sal secum vehant 13
- Ventriculus ejus structura 221. substantia ib. situs 48. officium 223. consensu & ex-  
quisito sensu gaudet 222. orificium  
dextrum & sinistrum maxime sensibile  
cur 53. in praxi cognitu est necessari-  
us 47. exulcerati signa funesta 157.  
vulnera absolute lethalia sunt. 225
- Ventriculi inflammatio raro apud au-  
ctores allegatur 224. frequens tamen  
in praxi observatur 221. signa patho-  
gnomonica 224. subjecta 234. sympto-  
mata 56. 227. signa funesta 182. differ-
- ta cardialgia 225. præ reliquis inflam-  
mationibus periculosa ibid. in se spe-  
ctata non est causa mortis ib. defun-  
ctorum anatome 234. hanc sæpe pro-  
ducunt animi pathemata 228. vomito-  
ria præsertim post iram ib. purgantia  
fortiora 229. venena caustica 236. pestis  
230. febres petechiales retrocedentes ibid.  
podagra retropulsa ibid. variolæ &  
morbilli retrogressi 231. bilis 232. fri-  
gidus potus post calefactum corpus 232.  
vermes ib. præcavetur. venæsectione  
235. purgantia minus conveniunt ib.  
anodyna ac opiata sunt periculosa ib.  
optime infusis calidis ex antispasmodi-  
cis & demulcentibus curatur 236
- Ventris torminibus defunctorum anatome 270
- Vermes generantur ab acido 20. senes non  
vexant 8. dantur quoque in dentibus  
77. per totum corpus in Guinea fre-  
quentes 193. signa & symptomata 194
- Vertigo sedem sæpe habet in duodeno  
165.
- Vesicæ situs 49. textura ibid. felleæ situs  
86. structura ibid. valvula in cervice  
caret ibid. officium ib.
- Virilis ætatis periodus 6. morbi ibid.
- Vita quid 43. non in conservatione mix-  
ti a putredine consistit 260. nec in ex-  
cretionibus 44. nec integritate structuræ  
142. sed circulo sanguinis jugi ac æ-  
quabili 30. requisita 95. veterum de ea  
obscuræ sunt notiones 42
- Vitriolum quid 213. sulphuræ indolis est  
ibid. abunde in monte Rammelio pro-  
venit ibid. fossiles nudi colligunt ibid.  
quibus morbis pateant. ibid.
- Vomendi conatus post iram perperam pro  
naturæ motu salutari habetur 229. opti-  
me antispasmodicis curatur ibid. in in-  
flammatione ventriculi unde 227
- Vomitibus cruentis in malo hypochondria-  
co & lienis obstructione unde 53
- Voracium dispositio ad morbos 33











To/



